



**NGERANG *Mera el*  
LOLISECHAKL  
A BIBLIA?**

# NGERANG *Mera el* LOLISECHAKL A BIBLIA?

TIA EL BABIER A KLOKLEL A

---

Omesodel a Siasing: ■ 7 el llel: Siasing er a American Bible Society ■ 21 el llel:  
Beluulechad: Siasing er a NASA ■ 26-7 el llel: Siasing er a WHO el lengiluu a Edouard Boubat  
■ 100-1 el llel: Dub el mla obuu: Oltirakl er a siasing er a USAF; ngalek:  
Oltirakl er a siasing er a WHO el lengiluu a W. Cutting

© 2010

Watch Tower Bible and Tract Society of Pennsylvania

A REMELUCHES

Watchtower Bible and Tract Society of New York, Inc.  
Brooklyn, New York, U.S.A.

Mirruul er a September 2013

Tia el babier a diak locheraol. Ngmileketmokl el kirel a ureor er a osisecheklel  
a Biblia el meliuekl er a beluulechad el rokir el okiu a tengetengir a rechad.

A oidel a Biblia el lousbech er ngii a *Chedaol Biblia* me sel *Beches el Testament*,  
engdi a lsekum e ngngodech e ngmocholt. A tekoi el NW el llechukl er a uriul er a bades a  
mengai er a *New World Translation of the Holy Scriptures—With References*.

*What Does the Bible Really Teach?*

Palauan (*bh*-PU)

Made in Japan  
Mirruul er a Siabal

# BELDEKLEL

---

## BLIONGEL

## LLEL

Ngntiaikid a Mle Telbilel a Dios? . . . . .	3
1. Ngera Klemerang el kirel a Dios? . . . . .	8
2. A Biblia a Babier el Mla er a Dios . . . . .	20
3. Ngera Telbilel a Dios el kirel a Beluulechad? . . . . .	30
4. Ngtecha Jesus Kristus? . . . . .	41
5. A Olubet a Kot el Ngarbab el Sengker er a Dios . . . . .	52
6. Te Ngar er Ker a Rulekoad? . . . . .	63
7. A Mera el Omelatk el kirir a Remla Mad el Betik er a Rengum . . .	74
8. Ngerang a Rengedel a Dios? . . . . .	86
9. Kede Kiei er a “Uriul Sils”? . . . . .	98
10. A Rechanghel—Ngera Te Meruul el Mei er Kid? . . . . .	110
11. Ngera me a Dios a Omechei a Ringel Me Ngngar er Ngii? . . . .	122
12. Kede Kiei el Oldeu er a Rengul a Dios . . . . .	133
13. A Osengel a Dios el kirel a Klengar . . . . .	144
14. A Rolel e a Telungalek er Kau a Mo er Ngii a Deurreng er Ngii .	154
15. Omengull el Kengei er Ngii a Dios . . . . .	166
16. Bo Mdechor el kirel a Mera el Omengull . . . . .	178
17. Mokedau er a Dios el Ngar er a Nglunguuch . . . . .	189
18. Techolb me a Deleuill er Kau me a Dios . . . . .	200
19. Molemolem el Ngar er a Bltikerreng er a Dios . . . . .	212
Bebil er a Omesodel . . . . .	224

## Ngntiaikid a Mle Telbilel a Dios?

MONGUIU a ngii di el simbung. Momes a TV, me a lechub e morrenge a razio. Ngkmal betok a chisel a delengerenger, me a mekemad, me a kdekudel el tekoi el duubech el oeak a reterrorist. Ka kuk bo molebedebek a di mondai er kau. A secherel me a lechub a kodellel a betik er a rengum a locha uchul a klou el ringelex a uldesuem. Ke locha mo melechesuar el kmo ke ua ngike el ungil el chad el Job er a lolekoel el kmo a chelebulel a “kuk obraod er a chelechol er a rriil.”—Job 6:2, 3.

Di el kau el oker er kau el kmo:

- Tiaikid ngmle telbilel a Dios el kirek me a klechad el rokir?
- Ak metik a ngeso er ker el kirel aike el chetituokel er a klengar er ngak?
- Ngngar er ngii a omelatx el kirel a taem el mo sebeded el mesa budech er a beluulechad?

A Biblia a meskid a kmal el ungil el nger er aika el ker.




**A BIBLIA A OLISECHAKL EL KMO A  
DIOS A MO REMUUL A CHOUAIKA EL  
OMELODECH ER TIA EL CHUTEM.**

*"E mo mesuld a bek el iuosech ra  
mederir, e mo diak a kodall, ma  
klengiterreng ma langel ma ringel  
me ngmo diak."—Chocholt 21:4*

*"A re chitechut a mo  
melechেসokl e meloik."  
—Isaia 35:6*

*"A re meiko a mo  
sebechir el omes."  
—Isaia 35:5*



*"Tirikel rokui el ngara  
debull, me te tuobed."  
—Johanes 5:28, 29*


*"Ng mo diak a  
tal chad el kiei er  
a beluad el lmuut el  
mo mengeremrum el  
kmo ng smecher."  
—Isaia 33:24*

*"Bo le betok a  
redechel a wheat er a beluu."  
—Psalm 72:16*

## MNGA KLUNGIOLEM ER AIKE EL LOLISECHAKL A BIBLIA

Lako mereched el mo omdasu el kmo a tekoi el mlocholt er aike el uleak uchei el llel tia el babier a kora di urungulir a rechad e merekong. A Dios a tilbir el mo kutmokl a chouaisei el blekeradel, e a Biblia a smodii el kmo ngmekera bo el loruu el uaisei.

Engdi a Biblia a remuul a lmuut el betok el tekoi. Ngmeskau a kiis el mo er a klengar el ngar er ngii a mera el deurreng er ngii er a chelechang. Ka bo mtelkib el melebedebek aike el ngar er ngii el sebekreng me a mondai er a klengar er kau. Ngsebechel el mo uldimukl er ngii a tekoi er a udoud, mondai er a telungalek, secherel a bedenged, me a lechub a kodellel a betik er a rengud. A Biblia a sebechel el ngosukau el mo outekangel me a lechub e ke mesmechokl a mondai er kau er a chelecha el taem, e sebechel el chemolodii a rengum sel longer a ker el ua aika el kmo:




- *Ngera uchul me kede mo chuarm?*
- *Kede mekera e mo outekangel me a lechub e kede mesmechokl aike el sebekreng er a klengar er kid?*
- *Ngmekera e sebeched el lmuut el kilungii a deurreng er a chelsel a klengar er a telungalek er kid?*
- *Ngera duubech el mei er kid sel demad?*
- *Ngsebeched el lmuut el mo meseterir a rulekoad el betik er a rengud?*
- *Kede mekerang e mo ulterekokl a rengud el kmo a Dios a mo oltaut a telbilel el kirel a ngar er a medad el klebesei?*

Tia el kau a menguiu er tia el babier er a chelechang a olecholt el kmo ngsoam el mo medengei a lolisechakl a Biblia. E tia el babier a sebechel el ngosukau. Mutebengii el kmo a ker el kirel a bek el parakurab a llechukl er iou er a bek el llel tia el babier. A rebetok el miliol el chad a dmeu a rengrir el ousbech a ker me a nger el teletelel a omesuub a losaod er a Biblia el obengterir a Resioning er a Jehovah. Me aki oureng el kmo kau me ke dirrek el mo uaisei. Bo el sebechel a Dios el mekungeltengat er kau sel moldeu er a rengum er a ungil el omesubem er aike el tekoi el *mera el lolisechakl a Biblia!*

## BO MODENGELII A BIBLIA ER KAU

NGNGAR er ngii a 66 el hong me a babier el dmak e rullii a uldekial a Biblia el rokir. A derta me a derta er aikang a blii el mo meklou el bliongel me a mekekerei el bades el kirel me lebeot a dosiik a tekoi er a chelsel. Me tia el babier sel loluches a bades, e sel kot el ochur el llechukl er a bita er a ngklel a hong er a Biblia a melutk er a klou el bliongel er a chelsel ngii el hong me a lechub e ngbabier, e sel ongingil el ochur a melutk er a kekerei el bades er a chelsel sel bliongel. El di ua tiang, a lsekum e ngellechukl a "2 Timoteus 3:16," e ngbelkul a kmo ongeru el babier el mo er a Timoteus, 3 el klou el bliongel, 16 el kekerei el bades.

Ngsebechem el mereched el mo smau er a usbechel a Biblia el oak sel momes a derta me a derta el bades el ousbech tia el babier. Ngera me ngdiak dilerrek el mrelii a temem el mo sebechem el menguiu er a Biblia er a bek el sils? A omonguiu a bekord edei el mo er a eim el bliongel er a ta el sils, e ngsebechem el chiuii a Biblia el rokir er a chelsel a ta el rak.





## Ngera Klemerang el kirel a Dios?

A Dios ngmera el omekerreu aike el duubech  
el eko er kau?

Ngua ngerang a blekerdelel a Dios? Nngnar  
er ngii a ngklel?

Ngsebeched el olekeed er kid er ngii?

NGMLA ta el momtab er a rengalek sel loker a ker? Te betok a omuchel el lokerker sel kot el mo mengedecheduch. Te ngellomel er kau e oker el kmo: Ngera me a btuch a omsisebusech? Ngera me a eabed a merael? Ngtecha ullisechakl a charm el suebek el mo mengitakl? Alta e ke melasem el onger, engdi ngdiak el blechoel el beot el moruul el uaisei. E le ungil el nger er kau a dirrek el olechau er a lmuut el ta er a ker el kmo: E ngerang?

<sup>2</sup> Ngdiak el di el ngalek a oker. E le dorael el mo meklou el chad e kede mele-molem el oker a tekoi. Kede oker me bo el sebeched el metik

---

1, 2. Ngera uchul me ngungil a deblechoel el okerker?



a roled, e mo medengei a kengaol el tekoi me doibngid er ngii, me a lechub e debetik a nger er aike el tekoi el soad el mo medengei. Engdi te betok el chad a mla mo diak el okerker, el ileakl aike el meklou a ultutelel el ker. A lekesengil, e ngdikea el osiik a nger er a tekoi.

<sup>3</sup> Ka molatk aike el ker el ngar er a ikrel tia el babil er me lmuut er a uchelel tia el bliongel. Aikang a bebil er aike el meklou a ultutelel el ker el sebechem el oker, engdi te betok el chad a mla mo diak el osiik a nger er ngii. E ngerang? Ngngar er ngii a nger er ngii er a Biblia? A rebebil a melatk el kmo ngmeringel a bo dodingei a nger er ngii. Me a rekuk bebil a bekikl el oker e le ngchetirir el mo merur. Me a rebebil a melatk el kmo a chouaika el ker a ungil el di mengeteklel a klechelid me a resensei a oker. E kau a ua ngera uldesuem?

<sup>4</sup> Ke locha semeriar el mo medengei a nger er aike el meklou a ultutelel el ker el kirel a klengar. Ke ultrerekokl el locha melatk a lebebil er a taem el kmo: 'Ngngera moktek er a klengar? Ngdi tiaikid a klengar e merekong? A Dios ngmera el ua ngerang?' Ngungil a lak meterob el dimerekmo obetik a ultrerekokl el nger. A Jesus Kristus a dilu el kmo molemolem el olengit, me le beskemiu; e molemolem el osiik mo betik; e molemolem el melngod er a chesimer, me lobkais el kiriu. —Matteus 7:7.

<sup>5</sup> A lsekum ke melelem el osiik a nger er aika el ker, e ngsebechem el metik el kmo ngklou a omeksaul el bo mnguu. (Osisechakl 2:1-5) E le *ngngar er ngii* a

3. Ngera uchul me a rebetok el chad a dikea el lolasem el osiik a nger er aike el meklou a ultutelel el ker?

4, 5. Ngera bebil er a meklou a ultutelel el ker er a klengar el sebeched el oker, e ngera uchul me ngkired el osiik a nger er ngii?

nger er ngii, e *sebechem* el metik er a chelsel a Biblia e kmal beot el bo dodengei. E a ngarbab er ngii, ngsebechel el mo uchul a omelatk me a deurreng el kirem. Ngsebechel el ngosukau el mo er ngii a deurreng er a klengar er kau er a chelechang. Me ka me dolebedebek er a ta el ker el omekerrau a rengrir a rebetok el chad.

### A DIOS NGDIAK EL OMEKERREU?

<sup>6</sup> Te betok a omdasu el kmo nguaisei. E le te kmo, 'A lsekum a Dios a omekerreu, e tia el beluulechad ngdiak el bai el ngodech el beluu er a chelechang?' E le sel domes el meliuekl er kid e kede di mesa beluulechad el mui er a mekemad, klauketui, me a chelebuul. Me kid a mo smecher, e mo chuarm, me a rebetik er a rengud a mad. Me seikid e te melekoi el kmo, 'A lsekum a Dios a mera el omekerreu er kid, e ngera me ngdiak el terob ngii el tekoi me lak el duubech?'

<sup>7</sup> E a mekngit er ngii, a rullisechakl a tekoi er a klechelid a lebebil e te rulleterir a rechad el mo omdasu el kmo a Dios a diak el mekngit a rengul er kid. El mekera loruul el uaisei? Sel duubech a chelebuul, e te blechoel el melekoi el kmo ngkuk mlo kirel er a Dios. Chouaisei el osisechakl a ua loltelechakl er a Dios el kirel aike el mekngit el tekoi el duubech. A Dios ngmera el uaisei? Ngngerang mera el lolisechakl a Biblia? A Klengiterreng 3:33 a melekoi el kirel a Dios el kmo: "Ng diak ledeu a rengul el omekringel e omekcharm er

---

6. Ngera uchul me a rebetok a omdasu el kmo a Dios a diak el omekerreu a ringel el lecharm a rechad?

7. (a) Te mekerang a remengeteklel a klechelid a loruul er a rechad el mo omdasu el kmo a Dios a diak el mekngit a rengul er kid?  
 (b) Ngerang mera el lolisechakl a Biblia el kirel aike el ringel el bo decharm?

kid." Me a Dios a diak el luchul aika el mekngit el blekeradel er a beluulechad. (Job 34:10-12) Me nguaisei engdi ngdirk omechei aika el mekngit el blekeradel. Engdi ngngar er ngii a klou el klekakerous er a *omechei* a tekoi me ngngar er ngii me a *meruul* er ngii el tekoi.

<sup>8</sup> El di ua tiang, ka molebedebek er a mellomes a rengul e betik a rengul el chedam el ngar er ngii a ngelekel el mla mo klou el chad e dirk obengterir. Ngii el ngalek sel bo el mekngit a omerellel e bo lomtok er tir e ltobed el mo osiik a ngodech el delengchokl, e a demal a diak lorrob er ngii. Engdi a bo el mekngit a klengar er ngii, e ngdemal a mle uchul? Ngdiak. (Lukas 15:11-13) Me ngngar er a osisiu el blekeradel, e a Dios a dimlak lorrob er a rechad er a lengiltii el mo oltirakl er a mekngit el roel a klengar, engdi ngdimlak el ngii a ulemekdubech aike el mondai el mlo er ngii el omerellir a uchul. Me ngkmal cheleuid el tekoi a doltelechakl er a Dios el kirel a rokui el mondai el ngar er ngii er a klechad.

<sup>9</sup> Ngngar er ngii a ungil el uchul me a Dios a omechei er a rechad me te melemolem el ngar er a mekngit el roel a klengar. Ngii a mellomes a rengul e mesisiich el Ulemeob, me ngdiak a ultutelel el losaod er ngii er kid. Engdi ngbltikerreng er ngii a uchul e nguaisei. Ke lmuut el mo mesuub a betok el ngar er a 11 el Bliongel. Me di bo lulterekokl a rengum el kmo a Dios a diak el

---

8, 9. (a) Ngmekera omomekesiu er a klekakerous er a chad el omechei a chelebirukel me ngmelemolem el ngar er ngii me ngike el uchul a chelebirukel? (b) Ngera me ngdiak el melemalt a dosiik a telemellel a Dios e le ngii el milechititerir a rechad me te merael el ngar er a chelebirukel?

ngii a uchul a mondai el dechelebangel. Ngbai meskid a omelatk el kirel a semecheklel a mondai er kid.—Isaia 33:2.

<sup>10</sup> A lmuut el tang, a Dios a chedaol. (Isaia 6:3) Tiang a belkul a kmo ngbliochel e klikiid el diak a chesechesechel a klengit er ngii. Me ngkmal sebeched el otuil a klaumerang er kid er Ngii. Tiang a lmuut el cheroid er aike el sebeched el melekoi el kirir a rechad el bebil e te kmal chebirukel a omerellir. Ngmo lmuut er ngi-ke el kot el melemalt el merreder me ngdiak a klisichel el sumechokl a bebil er a tellemall el lukdubech a remekngit el chad. Engdi a Dios a olab a bek el klisiich. Ngsebechel, e ulterekokl el mo choroid aike el bek el telemellel a chelebirukel el ngar tia el klechad.—Psalm 37:9-11.

### **NGUA NGERA OSENGEL A DIOS EL KIREL A CHELEBIRUKL EL DECHELEBANGEL?**

<sup>11</sup> Ngua ngera osengel a Dios el kirel aike el tekoi el ngar er ngii er a beluulechad me a dirrek el klengar er kau? A Biblia a olisechakl el kmo a Dios a ‘betik a rengul er a llemalt.’ (Psalm 37:28) Me ngkmal omekerreu el kmo ngerang a melemalt e ouketui a rokui el bedengul a chelebirukel. A Biblia a melekoi el kmo a Dios a “kmal uluuchel er a rengul” er a lomes a chelebirukel el mekekii a beluulechad. (Genesis 6:5, 6) A Dios a dirkak el mengodech. (Malakai 3:6) Ngdirk chetil el omes a ringel me a chelebuul el oberkang er a beluu-

10. Ngera uchul me ngsebeched el oumerang el kmo a Dios a mo choroid aike el bek el telemellel a chelebirukel me a mekngit el omeruul?

11. (a) Ngera osengel a Dios el kirel a chelebirukel? (b) Ngua ngera osengel a Dios el kirel aike el tekoi el omcharm?

lechad. Ngdirrek el diak el soal el omes er a rechad el chuarm. A Biblia a kmo: 'Ngomekerreu er kau.'—1 Petrus 5:7.

<sup>12</sup> Kede mekerang e medengei el kmo a Dios a mera el ouketui a ringel me a chelebuul? Aikakid a lmuut el bebil er a olechotel. A Biblia a olisechakl el kmo a chad a ulebeob el okesiul a Dios. (Genesis 1:26) Me kede olab a ungil el blekeradel e le Dios el olab ngii el ungil el blekeradel. El di ua tiang, ngkora meringel er kau el meseterir a rediak a telemellir el chad el chuarm? A lsekum ngmeringel er kau el omes a chouaisei el chelebirukel, e bo el ulterekokl a rengum el kmo a Dios a lmuut el kmal meringel er ngii.

<sup>13</sup> A ta er a kot el ngarbab el klungioled a rechad a sel duch er kid el olecholt a bltikerreng. Tiang a dirrek el olecholt er a blekerdelel a Dios. A Biblia a olisechakl el kmo a "Dios a bltikerreng." (1 Johanes 4:8) Kede oubtikerreng e le Dios el oubtikerreng. A bltikerreng, ngsebechel el odbechau el mo torob aika el ringel me a chelebirukel el momes er a beluulechad? A lengar er ngii a klisichem, e ke mo rullii? Ke ulterekokl el mo rullii. Me bo el ulterekokl a rengum el kmo a Dios a mo torob a ringel me a chelebirukel. Aike el telbiil el mil dung er a uchelel tia el babier a diak di el ua leberrous el tekoi. A telbilel a Dios a ulterekokl el mo motaut. Engdi uchei er a omotuul a klaumerang er kau er ngii el ome latk, e ngkirem el mo medengei a lmuut el betok el kirel a Dios el mirruul ngii el telbiil.

---

12, 13. (a) Ngera uchul me ngngar er ngii a ungil el blekerdeled el ua bltikerreng, e mekerang a bltikerreng e ngar er ngii a lerellii er a osenged er a beluulechad? (b) Ngera uchul me ngsebechel el mo ulterekokl el rengum el kmo a Dios a ngar er ngii a bo el rellii el kirel aika el mondai er a beluulechad?

## A DIOS A SOAL A OBO MODENGELII

<sup>14</sup> A lsekum ngsoam a chad a bo lodengelkau, e ke mekerang? Ngdiak bai mochtotii a ngklem er ngii? A Dios ngngar er ngii a ngklel? Ngbetok el klechelid a onger el kmo ng “DIOS” me a lechub e ng “RUBAK,” engdi aikang a dui, el di ua “king” me a “president” el di dui. A Biblia a olisechakl el kmo a “Dios” me a “Rubak” a bebil er aike el betok el dial engdi ngngar er ngii a mera el ngklel, el Jehovah. A Psalm 83:18 a kmo: “Ng

*A Isoam a chad  
a bo lodengelkau,  
e ngdiak mochtotii  
a ngklem er ngii?  
A Dios a olecholt  
er a ngklel er kid el  
okiu a Biblia*


di kau el tang a RUBAK, ke ngarbab el merreder er a beluulchad el rokir.” A lsekum e tia el ngakl a diak er a Biblia el mousbech er ngii, e nglocha soam el mo omes er a Bebil er a Omesodel el ngar er a 225-7 el llel tia el babier el kmo ngngera uchul. A klemerang a kmo tia el ngklel a Dios a debetik er ngii el betok el telael el taem er a chelsel aike el mechuodel el llechukl el babier er a Biblia. Me a Jehovah a soal a bo doudengeli a ngklel e dousbech er ngii. Me ngousbech er a Biblia el olecholt er a ngklel er kau.

<sup>15</sup> A Dios a ngiluu a ngakl el kmal klou a belkul. Tia el ngakl el Jehovah a belkul a kmo ngii el Dios a sebechel el mo oltaut a ngii di el tel-

14. Ngtecha ngklel a Dios, e ngera uchul me ngkired el ousbech er ngii?

15. Ngngera belkul tia el ngakl el Jehovah?





*A Biblia a olisechakl el kmo a Jehovah a  
betik a rengul el Ulemeob a rokui el tekoï er  
a uldekial a eanged me a chutem*

bilel e kutmokl a ngii di el moktek el lolatk.\* Tia el ngklel a Dios a kmal ileakl el diak a ngodech el uai ngii e di ngii el tang a oungakl er ngii. Me ngoeak a betok el roel e a Jehovah a kmal ileakl. El ua ngerang?

<sup>16</sup> Kede milsa Psalm 83:18 er a lolekoi el kirel a

---

\* Ngar er ngii a lmuut el betok el omesodel a belkul me a omengi- uel a ngklel a Dios el ngar er a Bebil er a Omesodel er a 225-7 el llel tia el babier.

---

16, 17. Ngera sebeched el suubii el kirel a Jehovah sel domtab aika el dial el: (a) "Rubak el Dios, el Cherrengelel a klisiich"? (b) "King ra ikel bek el taem, el ngikel diak le ngemed"? (c) Ulemeob?



Jehovah el kmo: “Ng di kau el tang a RUBAK, ke ngarbab el merreder er a beluulechad el rokir.” E di ta el Jehovah a mokedong el kmo: “Rubak el Dios, el Cherrengelel a klisiich.” A Chocholt 15:3 a kmo: “Ngklou e mengasireng chomerellem! Kau el King ra rokuil renged, ngmelemalt e klemerang a rolem!” Tia el dui el “Rubak el Dios, el Cherrengelel a klisiich” a olisechakl er kid el kmo a Jehovah ingii a kot el mesisiich el di ngar el diak lemokesiu a klisichel e kot el ngarbab. Ngar er a 1 Timoteus 1:17, e a Jehovah a okedongall el “King ra ikel bek el taem, el ngikel diak le ngemed.” Tia mekltkid el kmo a Jehovah a dirrek el ileakl el ngar er a kuk ta er a ro-lel. Ngdi ngii el tang a di mla ngar er ngii er a irechar el mei. A Psalm 90:2 a kmo: “E kau a diak a ulebengelem el Dios, el diak a uchelem el diak a ulebengelem.” Tia el

*Sel bltikerreng el  
lolechesuar er ngii  
a ungil el chedam  
el mo er a rengelekel  
a mekltkid er a klou el  
bltikerreng el oba  
Demad el ngar er a  
eanged el mei er kid*



mengasireng el uldasu ngdiak el sal ochau a omengull er kid?

<sup>17</sup> A Jehovah a dirrek el kmal ileakl e le ngdi ngii el tang a Ulemeob. A Chocholt 4:11 a kmo: “Rubak e Dios er kemam, ikau a redemelel a ngu u a klebkall, ma chomengull, ma klisiich, ele kau a mileob a rokuil te koi, ma rokuil te koi a ngarngii luleltirakl a uldesuel a rengum e ulebeob.” Aike el rokui el sebechem el do be debek, el ngar er a eanged el mei er a chutem el mo lmuut er a chesel a daob me a omoachel, ngii el rokui el ngar er ngii e le Jehovah el Ulemeob.

### **NGSEBECHEM EL MO KMEED ER A JEHOVAH?**

<sup>18</sup> A rebebil a kora mo bekikl sel longuiu el kirel aika el betok el mengasireng el blekerdelel a Jehovah. Tomdasu el kmo a Dios a kmal ngarbab me ngdiak el sebechir el mo kmeed er ngii me a diak a ultutelir er ngii. Engdi a chouaisei el uldasu, ngmelemalt? Ngdiak, e le Biblia a melekoi el kirel a Jehovah el kmo: “E me rang, ngii a diak le cheroid ra di derta er kid.” (Rellir 17: 27) Ngdirrek el melisiich er kid el kmo: “Bo mkeed ra Dios me bo le keed er kemiu.”—Jakobus 4:8.

<sup>19</sup> Ke mekerang e sebechem el mo kmeed er a Dios? A kot, e ke melemolem er tia el moruul er ngii er a chelechang el mesuub el kirel a Dios. A Jesus a dilu el kmo: “A diak a ullebengelel klengar tiakid el bo lodengelkau el dital meral Dios, ma Jesus Kristus el ngikel mulderchii.” (Johanes 17:3) Me a dosuub el kirel a Jehovah me

---

18. Ngera uchul me a rebebil a omdasu el kmo ngkmal diak el sebechir el mo kmeed er a Dios, engdi ngera ngolisechakl a Biblia?

19. (a) Kede mekerang e omuchel el olekeed er kid er a Dios? E ngera el klungiaol a mo er ngii? (b) Ngera el blekerdelel a Dios a kmal soam?

a Jesus e ngsebechel el mo uchul a “diak a ullebengelel klengar” el kired. “A Dios a bltikerreng.” (1 Johanes 4:16) Ngdirrek el ngar er ngii a lmuut el bebil er a klebokelel el blekerdelel. A Biblia a melekoel el kmo a Jehovah a ‘mui er a blekokuii ma klechubechub, el diak le merched el ngmasech a rengul, e olecholt er a blechoel bltikerreng.’ (Exodus 34:6) Ngdirrek el “ungil, e ousubes a tellemall.” (Psalm 86:5) Ngklou a rengul. (2 Petrus 3:9) E oba blakerreng. (Psalm 18:25) A omolemolem el menguiu er a Biblia, e ke mesang el kmo ngmekerang a Jehovah a lolecholt aikaikid me a lmuut el betok el ungil el blekerdelel.

<sup>20</sup> Ngklemerang, ngdiak el sebechem el mesa Dios e le ngdiak a bedengel el rruul er a tech me a rasech. (Johanes 1:18; 4:24; 1 Timoteus 1:17) Engdi sel mosuub el kirel el oeak a Biblia, e ngdi ua lullekoi a ta er a milluches er a psalm el kmo ke mo ‘mechas a rengum er a klungiolel.’ (Psalm 27:4; Rom 1:20) Me a lolengeriakl a omesubem el kirel a Jehovah, e ngmengal mo ua mera el chad er a rengum me ngmeleketek a bltkil a rengum el mo er ngii e mo soam el olekeed er kau er ngii.

<sup>21</sup> Ngsebechem el mo medengeliu a uchul me a Biblia a olisechakl er kid el mo omdasu er a Jehovah el ua el Demad. (Matteus 6:9) Nguchul a klengar er kid e soal a kot el ungil el klengar el kired, el di ua betik a rengul el chedam el soal a ungil el klengar el kirir a rengelekel. (Psalm 36:9) A Biblia a dirrek el olisechakl el kmo ngsebeched el mo sechelil a Jehovah. (Jakobus 2:23) Ka molebedebek er kau el sebechem el mo sechelil Ngike el Ulemeob!

---

20-22. (a) A lak el sebeched el omes er a Dios e tia el tekoi ngmerob er kid me ngdiak bo dekeed er ngii? Mosaod. (b) Te mo melasem el mekerang a rebebil er a rechad el melatk a ungil el kirem? Engdi ke mo mekerang?

<sup>22</sup> Sel molemolem er a omesubem, e a rebebil a mo melasem el merrob er kau. Engdi lak becherei a ngii di el chad me leterebengau, me bo lak momak er a kot el ungil el klausechelei el sebechem el mo obang.

<sup>23</sup> Ngulterekokl el mo er ngii a diak el sal bleketakl er a rengum er a uchelel, engdi kele becherei a rur me leterebengau el loker. A Jesus a dilu el kmo ngungil a le-ngariou a rengud, el ua remekerelei el ngalek. (Matteus 18:2-4) E kid a medengelterir a rengalek el di oker a ker. A Dios a soal a lemonger a kerim. A Biblia a chemat er a rebebil el mle kerekikl el merriter a bades el omes el kmo a tekoi el lulsuub ngmera el mle klemerang me a lechub e ngdimlak.—Rellir 17:11.

<sup>24</sup> A kot el ungil el roel e kede mesuub el kirel a Jehovah a sel bo dorritter er a Biblia. Engdi ngoeak a ngera el roel e ngngodech er a bek el babier? A ongingil el bliongel a mo mesaod er tia el tekoi.

23, 24. (a) Ngera me ngkirem el melelem el oker a ker el kirel a tekoi el mosuub? (b) Ngera kede mo mesuub er a ongingil el bliongel?

#### AIKE EL LOLISECHAKL A BIBLIA

- A Dios a omekerreu aike el duubech el eko er kau.—1 Petrus 5:7.
- A ngklel a Dios a Jehovah.—Psalm 83:18. Momes er a *footnote* el ngar er a 3 el llel sel cherrungel el oidel a Chedaol Biblia.
- A Jehovah a mengemedaol er kau el mo kmeed er ngii.—Jakobus 4:8.
- A Jehovah a betik a rengul, e bekokuui, e chubechub.—Exodus 34:6; 1 Johanes 4:8, 16.

## **A Biblia a Babier el Mla er a Dios**

**Ngoeak a ngera el roel e a Biblia a ngodech  
er a bebil er a babier?**

**Ngmekera Biblia a lengesukid el mo outekangel  
a mondai er kid?**

**Ngera me ngsebechem el otilii a klaumerang er  
kau er aike el ulaoch el ngar er a Biblia?**

NGSEBECHEM el lotkii a taem el mngiluu a kmal ungil el sengk el mla er a betik er a rengum el sechelim? Ngulterekokl el kmal mlo ungil a rengum. E le sengk el dengai a blechoel el ouchais el kmo ngomes er a klausechelei er kid el kmal mekreos. Me ke ulterekokl el kmal mlo oureng a sulel.

<sup>2</sup> A Biblia a sengk el mla er a Dios me kede kmal oba omereng el saul el kirel. Ngolecholt er kid a tekoi el diak el sebeched el metik er a ngii di el ker. El ua tiang, ngouchais er kid er a omebelel a eanged me a chutem, me a rekot el chad. Ngngar er ngii a ulterekokl el omellach el sebechel el ngosukid el mo outekangel a mondai me a sebekreng er kid. Ngsmodii el kmo ngmekera Dios a bo el loltaut er a telbilel e lerellii a blekeradel er a klengar el mo ungil. Ngmera el ungil el sengk a Biblia!

<sup>3</sup> A Biblia a dirrek el odeu a rengud, e le ngocholt er kid a

---

1, 2. Ngoeak a ngera el roel e a Biblia a kmal ungil el sengk el mla er a Dios el mei?

3. Ngera uchul me a Jehovah a milskid a Biblia, e tia el tekoi ngera uchul me ngoldeu a rengud?



*A "New World Translation of the Holy Scriptures" a uleiuid  
el ngar er a betok el bedengel a omeleko*

tekoi el kirel ngike el milskid, el Jehovah el Dios. Ngulemeskid e le ngmle soal a bo dungil el medengeli. E mera el tekoi, a Biblia a sebechel el ngosukid el mo kmeed er a Jehovah.

<sup>4</sup> A lsekum ngngar er ngii a Biblia er kau, e ngdiak di el kau el tang. A Biblia a lecherrungel a oidel me a lak, me ngii a mla meluches e merous el ngar er a betok er a 2,400 el kakerous el omeleko me ngbekord el 95 el basent er a klechad a menguiu er ngii. Ngbetok er a ta el miliol el Biblia a merous er a bek el sandei me a betok el biliol el utsusi er ngii a mla meruul. Ngbleketakl el diak a ngii di el babier el ua Biblia.

<sup>5</sup> A Biblia a milluches el loeak a ngelsuil a Dios. (2 Timoteus 3:16) El oeak a ngera el roel? A Biblia a meketeklii el kmo a rechad a milluches el okiu a ulekrael er a oureor el

4. Ngera sel chosir a rengum el kirel a omerellel me a omerusel a Biblia?

5. Ngoeak a ngera el roel e a Biblia a milluches el loeak a ngelsuil a Dios?

klisichel a Dios. (2 Petrus 1:21) El ua tiang: A merreder er a siobai a oderchii a melechesel me ngmeluches er a babier el ouchais a uldesuel me a omesodel. Me ngbabier er ngii, el diak el babilengel a melechesel. Ngngar er a osisiu el ro-  
 lel, e a tekoi el ngar er a Biblia a klemechel a Dios, el diak el klemechir a remilluches. Me a Biblia el rokir a mera el “tiki-  
 ngel a Dios.”—1 Thesalonika 2:13.

### NGMELEKOI ER A DI TA EL TEKOI E MELEMALT

<sup>6</sup> A Biblia a milluches er a chesel a kuk betok er a 1,600 el rak. A remilluches er ngii a kiliei er a kakerous el taem er a reksi el mle kerous a bedengel a klengar er tir. A rebebil a mle chad er a sers me a rechad er a omenged me a rekleke-  
 rengel a charm me a reprofet me a rekuk bebil. A Lukas el ta er a milluches a Evangkelio a mle toktang. Me nguaisei el mle bek el bedengel a klengar er a remelluches, engdi a Biblia a oba ta el uldasu er a uchelel el mo er a ulebenge-  
 lel.\*

<sup>7</sup> A kot el babier er a Biblia a ouchais er kid el kmo ngmi-  
 lekera e omuchel a monдай er a klechad. E a ulebongel el babier a ochotii el kmo tia el chutem el rokir a mo paradis. A rokui el tedebechel a Biblia a smaod a betok el telael el rak er a reksi el omeketakl er a moktek er a Dios. Me ngmechas a rengud er a kltang el meues er a omelechesel a Biblia, eng-  
 di ngkirel el uaisei e le ngii el mla er a Dios el mei.

---

\* Alta e a rebebil a melekoi el kmo a bebil er a tedebechel a Biblia a ketouch, engdi a chouaisei el omelekoi a diak debetik a uchetemel er a ngii di el ker. Ka momes er a 7 el bliongel er a babier el *The Bible—God’s Word or Man’s?* el mlotobed er a Resioning er a Jehovah me a lechub e ngsel babier el *A Uchul Me Ngsebechem el Oumerang er a Biblia*.

---

6, 7. Ngera uchul me sel kltang el mocholt er a Biblia a kmal ileakl el kirel el utebengall?

<sup>8</sup> A Biblia a melemalt a lolekoi. Ngmelekoi a dirkak el lebo er ngii a klemedengei er a klechad el kirel el tekoi, er sel taem er a lemeluches. El ua tiang, ngar er a Levitikus e ngngar er ngii a llach el kirir a rechad er a Israel er a irechar el kirel a tekoi er a omengikiid me a ulekerreuil a bekoieuiuul el rakt er a taem el beluulechad a dirkak bo lodengei a chouaika el tekoi. Ngdirrek el dirk mle klou a cheleuid el uldasu el kirel a beluulechad, e a Biblia a melekoi el kmo a Dios a 'lilia beluulchad er a bechachau el melidiul.' (Job 26:7) Engdi a Biblia a diak el ua babier er a skuul el kirel a omesubel a beluulechad. Engdi sel losaod el kirel e ngkmal melemalt a tekoi el lolekoi. Ngdiak el ti aikid sel dolatk er ngii el kirel a babier el mla er a Dios el mei?

<sup>9</sup> A Biblia a dirrek el meskid a ulterekokl el tekoi el dilubech er a reksi e mesaod a tekoi el mo komakai.\* Ngomasech a ngklir a rechad me a uldidellel a rsechir a rebebil. Ngdirrek a domekesiu er a redi chad er a reksi el blechoel el diak loluches el kirel aike el chelitechetul a rengedir, e a remelluches er a Biblia a kmal mle beches, e le ngmo lmuut er a telemellir me a chelitechetul a rengedir me te uluuchais. El ua tiang, ngar er a babier er a Ulecherangel, e a Moses a milluches el kirel a telemellel el lemluklemalt el kirel. (Ulecherangel 20:2-12) Chouaisei el teletael er a omeluches a meringel el debetik er a babier er a reksi, engdi kede metik er ngii er a Biblia e le ngii el babier el mla er a Dios el mei.

---

\* El di ua sel komakai el omesodel a uldidellel a rasech er a Jesus el ngar er a Lukas 3:23-38.

- 
8. Ka mocholt a bebil er a roel e a Biblia a melemalt a lolekoi.  
9. (a) Ngmekera Biblia e melemalt a lolekoi el oltirakl er a reksi me ngsebeched el ultuil er ngii? (b) A bleketakl el teletelel a omeluches ngngera ngochotii er kau el kirel a Biblia?



*A ta er a remilluches  
er a Biblia el Isaia  
a uluuchais el  
kirel a rebetel  
a Babilon*



## **NGBABIER ER A NGAR ER NGII A BELKUL EL LLOMESERRENG**

<sup>10</sup> A Biblia a milluches el loeak a ngelsuil a Dios a uchul me “ngngarngii a blkul er chosisechakl, ma chomellach, ma chomekmelemalt, ma chomekrael el mora llemalt.”

10. Ngera uchul me ngdiak el mechas a rengud el kmo a teкои el loleкои a Biblia a sebeched el ousbech er a klengar er kid er a bek el sils?

(2 Timoteus 3:16) Me a Biblia a mera el ngar er ngii a usbechel er a klengar. Ngmeskid a klemedengei el kirel a blekerdelel a chad. E diak el mechas a rengud er ngii el te-koi, e le Jehovah a Ulemeob. Ngungil medengei a uldesued me a omelebedebeked, el kuk medengei er kid. E dirrek a Jehovah a kmal medengei el kmo ngera kede ousbech el mo dmeu a rengud e ngera el tekoi a kired el olechib er kid er ngii.

<sup>11</sup> Ka molebedebek er a cheldechedechal a Jesus el ngar er a Matteus er a 5 el mo er a 7 el bliongel el lomekedong er ngii el kmo Cheldecheduch el ngar er a Rois. Ngar er tia el merael a chisel el osisechakl, e a Jesus a millekoi a tekoi, el uldimukl er ngii a roel e kede metik er a mera el deur-reng, e mekera dosmechokl a klautok, e doluluuch, e mo sebechel el melemalt a osenged el kirel a kerruul. Aika el te-kingel a Jesus a dirk ngar er ngii a klisichel e dirk oureor er a chelecha el sils el di ua sera lekot el medung.

<sup>12</sup> A bebil er a omellach el ngar er a Biblia a kirel a klengar er a telungalek, blekerdelel a chad a loureor, me a deleuill er ngii me a rebebil. Aika el omellach el ngar er a Biblia a motaut el mo er a rokui el chad, me a llach el ngar er ngii a meklou a ultutelel. A tekingel a Dios el oeak a Isaia a mele-koi el kmo: “Ngak a RUBAK el Dios el olsisechakl er kemiu el mo ungilbesmiu.”—Isaia 48:17.

### NGBABIER ER A ULAOCH

<sup>13</sup> Ngngar er ngii a kmal betok el ulaoch er a Biblia, el oumesingd er ngii a mla mecherrungel. Ka molebede-bek er tiang. Ngoeak a profet el Isaia, el kiliei er a chelsel a

---

11, 12. (a) Ngera el suobel a lulsaad a Jesus el ngar sel Cheldeche-dechal el ngar er a Rois? (b) Ngera bebil er a omesodel a tekoi el ngar er a Biblia el sebeched el ousbech er a klengar? E ngera uchul me a omellach el ngar er a chelsel a diak a telkelel a usbechel?

13. A Jehovah ngulemekrael er a profet el Isaia el mo meluches a ngera el komakai el tekoi el kirel a Babilon?

ongelai el dart el rak er a uchei er a taem er kid, e a Jehovah a uluuchais el kirel a telemellel a mats er a Babilon. (Isaia 13:19; 14:22, 23) A komakai el omesaod a lebilsang el olecholt el kmo ngmekerang e mo mechitechut tia el mats. A urrurt er a recherraro a mo ngimetii a omoachel er a Babilon el mo meched e mo soiseb er a mats el ka loumekemad. Ngdimlak di el ikang e lemerekong. A ulochel a Isaia a dirrek el ochotii el kmo a ngklel ngike el king el mo mesisiich er a Babilon a Sairus.—Isaia 44:27–45:2.

<sup>14</sup> Ngbekord el 200 el rak er a uriul, el ngar er sel ke-sus er a 5 el kebesengil a Ongeteruich el Buil er a rak er a 539 er a uchei er a taem er kid, e a urrurt er a resoldau a mlo er a bita er a Babilon. Ngtecha mle mengeteklel ngii el urrurt? Ngchad er a Persia el ngklel a Sairus. Ngmla meketmokl a rokui el tekoi el kirel a otutel a mengasireng el ulaoch. Engdi tirka el soldau er a Sairus, te mera el di diak el loumekemad e nguu a Babilon el ua mildung er a ulaoch?

<sup>15</sup> A rechad er a Babilon a merruul er a klou el mur er isei

---

14, 15. Ngmleker a tilaut a bebil er a komakai el ulochel a Isaia el kirel a Babilon?



el kesus e milechesuar el selebechakl er a belurir el klou e mesisiich a cheotelel. Ngar er tiaikid el taem, e a Sairus a uleba llomeserreng e ultucheklii a ralm er a omoachel me ngmlo diak bo el siseb er a mats. Me ngdi mle telkib e ngmlo meched el mocha sebechir a rechedal el chemaot er ngii el mo kmeed er a cheotelel a mats. Engdi te mekera resoldau er a Sairus a bo el iuul er tia el klou el cheotelel a Babilon? Ngdiak dodengeliu a uchul, engdi sel kesus e a chesmerel a siseball el mo er a mats a dimlak el chelseches.

<sup>16</sup> Ngmildung er a ulaoch el kirel a Babilon el kmo: “Ng dikea lmuut el mo kiei er ngii. Ng diak a re merael el Arab el mo ultab er ngii, ma diak a re mengkar a charm el me omekedurs a chermir er ngii.” (Isaia 13:20) Tia el ulaoch a diak di el louchais el kirel a rebetel a Babilon e lemerekong e ngdirrek el olecholt el kmo ngdi mereko el cheloit el beluu. Ngsebechem el mes a olechotel a otutel aika el tekoi. A

16. (a) A Isaia ngera ngulemlaoch el kirel a mo ulebengelel a Babilon? (b) Ngmleker a ulochel a Isaia el kirel a telemellel a Babilon e tilaut?

### ***A miltemall el beluu er a Babilon***



cheloit el mle basio er a Babilon er a irechar, el bekord el 50 el mael er a dimes er a Bagdad, Iraq a meketeklii el kmo a te-koi el dilung a Jehovah el okiu a Isaia a tilaut el kmo: “Ak mo riekii a Babilon el oba oriik el sel di remiik a rokui el te-koi.”—Isaia 14:22, 23.

<sup>17</sup> Me a omesaod el kmo a Biblia a babier el kirel a ultere-kokl el ulaoch a kmal sebechel el melisiich a klaumerang er kid, adang diak? Me a lsekum a Jehovah a mla otaut a telbillel er a irechar, e nngngar er ngii a ungil el uchul e ngmo klou a rengud e oumerang el kmo ngdirrek el mo oltaut a telbillel el kirel a paradis el chutem. (Ulecherangel 23:19) Nguaisei, nngngar er ngii a omeltked e le “a Dios el diak lomulak a tilib a ikang ra rechuodel el kirel chomelatk ra diak a ullebengelel klengar.”—Titus 1:2.\*

### “TIKINGEL A DIOS A DINGAR”

<sup>18</sup> Ngoeak aike el dulsaod, e ngbleketakl el kmo a Biblia a mera el ileakl el babier. Me nguaisei, engdi a kerresel a kuk klou el engelakl er a di kltang er a tekoi el losaod el ngar er a chelsel, me a melemalt el omesodel a beluulechad me a tekoi er a reksi, me a llomeserreng el mocholt er ngii el sebeched el ousbech er a klengar er kid er a chelecha el taem, me a ulaoch el ngar er a chelsel el sebeched el otuil a ome-

---

\* A telemellel a Babilon a di ta er a okesiul aike el ulaoch er a Biblia el mlo tmaut. A lmuut el bebil er a okesiu a uldimukl er ngii a telemellel a Tyre me a Nineveh. (Esekiel 26:1-5; Sefania 2:13-15) Ngdirrek, a ulochel a Daniel a ullecholt a blechebechel aike el renged el mo olab a dereder er a beluulechad er a uriul er a Babilon, el uldimukl er ngii a Medo-Persia me a Gris. (Daniel 8:5-7, 20-22) Momes er a Bebil er a Omesodel, er a 230-1 el llel, el kirel a omesodel a betok el ulaoch el kirel a Messias el ngii a tilaut er a Jesus Kristus.

---

17. Ngmekera e a otutel a ulaoch er a Biblia e melisiich a klaumerang er kid?

18. Ngera el mesisiich el tekoi a ledillii a apostol el Paulus el kirel a “tikingel a Dios”?

Itked er ngii. A apostol el Paulus a milluches el kmo: “Ele ti-kingel a Dios a dingar e ngarngii a klisichel, e kuk kedorm ra ikel rokuil erebita medal saider.”—Hebru 4:12.

<sup>19</sup> A donguiiu a tekingel a Dios el ngar er a Biblia, e ngsebechel el ngmodech a klengar er kid. Ngngosukid el kmal mo kerekikl el merriter er kid. Ngsebeched el melekoi el kmo ngbetik a rengud er a Dios, engdi sel osenged el kirel a tekoi el lolekoi a Biblia, sei a mo ocholt aike el mera el ngar er a uldesued me a rengud.

<sup>20</sup> A Biblia a mera el babier el mla er a Dios el mei. Ngbabier el kired el menguiiu er ngii, e mesuub er ngii, e mo betik a rengud er ngii. Mochotii a omereng el saul el kirel tia el sengk el mla er a Dios el mei el loeak sel molemolem el merriter el mo medengei a ngar er a chesel. E a omoruul el uaisei, e ngmedechel a omereng el saul er kau el kirel a moktek er a Dios el kirel a klechad. Ngar er a ongingil el bliongel, e kede mo mesaod el kmo ngera tia el moktek e mekera e mo meketmocl.

19, 20. (a) Ngmekera Biblia e ngosukau el di kau el merriter er kau? (b) Ke mekera e ochotii a omereng el saul er kau el mo er a Dios el kirel tia el Biblia el ngii a kmal ileakl el sengk?

#### AIKE EL LOLISECHAKL A BIBLIA

- A Biblia a milluches el loeak a ngelsuil a Dios me ngmelemalt a tekoi er a chesel e sebeched el otuil a rengud er ngii.—2 Timoteus 3:16.
- A omesodel a tekoi el debetik er a chesel a Tekingel a Dios a sebeched el ousbech er a klengar er kid er a bek el sils.—Isaia 48:17.
- A telbilel a Dios el debetik er a Biblia a ulterekocl el mo motaut.—Ulecherangel 23:19.

## **Ngera Telbiblel a Dios el kirel a Beluulechad?**

**Ngera telbiblel a Dios el kirir a rechad?**

**Ngmilekerang e mleasem a Dios?**

**Ngmo ua ngerang a klengar er a chutem er a  
ngar er a medad el klebesei?**

A TELBILEL a Jehovah el kirel tia el chutem a kmal menga-sireng. Ngsoal a bo el mui er a rechad el dmeu a rengrir e mesisiich a bedengir. A Biblia a melekoi el kmo a “Dios a dilemii a sers er a Eden” e “ulemekeroul a bek el bedengel a kerrekar er ngii el mle klebokel e ourodech a ungil rodech.” Uriul er a lebebii a Adam me a Eba el mo kiei er ngii el klebokel el delengchokl, e ngdilu er tir el kmo: “Bo le betok a re ngelekiu, ma ruldidellel a rsechiu bo le kiei er ker me ker er a beluulchad e bo lorreder er ngii.” (Genesis 1:28; 2:8, 9, 15) Me ngmle telbiblel a Dios el mle soal a rechad a bo el loungalek, e bo longlou er isei el paradis e bo el lomekerreu a charm.

<sup>2</sup> Omomdasu e a telbiblel a Dios el soal a rechad a bo el kiei el ngar er a paradis, ngsebechel el mo tmaut? A Dios a melekoi el kmo: “A ika tekingek, me ng mo tmaut.” (Isaia 46:9-11; 55:11) Me ngulterekokl el mo otaut a telbiblel. E le ngkmo: “Ng dimlak le rellii el di bechachau el beluu, ng bai

1. Ngera telbiblel a Dios el kirel tia el chutem?
2. (a) Kede mekera e medengei el kmo a telbiblel a Dios el kirel tia el chutem a mo tmaut? (b) Ngera ngmelekoi a Biblia el kirir a rechad el kiei el mo cherechar?

basio el kirir a re chad el kiei er ngii.” (Isaia 45:18) Te ua ngera el chad a mle sorir a Dios a bo el kiei er tia el chutem? E kiei el ua klteketel a ngerang? A Biblia a onger el kmo: “A *re melemalt* a mo ungilbesrir el *kiei er a chelsel* a beluu e mo oubeluu er ngii el *di blechoel*.”—Psalm 37:29; Chocholt 21: 3, 4.

<sup>3</sup> Ngbleketakl tia el tekoi el dirkak el bo er ngii. A re-chad a dirk mo smecher e mad, te dirrek el kaumekemad e omekoad er a rebebil. Ngulterekokl a Dios el dimlak el tibir el kmo a beluulechad a mo ua itia el domes er ngii er a chelecha el sils. Me ngngera dilubech? Ngera uchul me a moktek er a Dios a dirkak el bo el taut? Ngdiak a babier er a reksi el sebechel el louchais er kid, e le mondai a mle-uuchel er a eanged.

### A UCHELEL A CHERRARO

<sup>4</sup> A kot el babier er a Biblia a ouchais el kirel ngike el ulemtok el dilum er a sers er a Eden. Ngmesaod er ngii el kmo ng “bersoech,” engdi ngdimlak el charm. Ngar er a ulebongel el babier er a Biblia e ngkmo ng “okedongall el Diabelong malechub e ngSatan, el mengeuid ra belulechad el rokir,” e dirrek el “*chuodel* bersoech.” (Genesis 3:1; Chocholt 12:9) Ngika el mesisiich el anghel a uluusbech er a bersoech el mo mengedecheduch er a Eba, el di ua blekerdelel a meduch el chad el sebechel el rullii a oto er a ngerel me ngmorenges el rengud ngmla er a oninio el ngar er a bita er ngii. Ngulterekokl el mla er sei er sera longetmokl er a chutem a Dios el kirir a rechad.—Job 38:4, 7.

<sup>5</sup> A Isekum a rokui el blebelel a Jehovah a mle

---

3. Ngera el meknngit a rengud er ngii el blekeradel a ngar er ngii er tia el beluulechad, me tia ngmekdubech a ngera el ker?

4, 5. (a) Ngtecha ngike el mera el milengedecheduch er a Eba el ousbech er a bersoech? (b) Ngmekerang e a mle ungil e melemalt el chad a mo merechorech?



mecherrungel, e ngtecha rirellii a “Diabelong,” e “Satan”? A beot el omesodel a kmo *a ta er tirke el mesisiich el ngelekel a Dios a di mle ngii el meltii el mo Diabelong*. Ngmlekerang e mo uaisei? Chelecha el sils e ngsebechel a ungil e melemalt el chad el mo merechorech a lebechei a mekngit el ngibes me ldubech er a chelsel a rengul. E a *lolemolem el melebedebek er ngii* e ngmo mesisiich, me a lebo er ngii a techellel, e ngmo rullii ngii el tekoi.—Jakobus 1:13-15.

<sup>6</sup> Tiang a dilubech el mo er a Satan el Diabelong. Nglocha rirengesii a Dios er a lolekoi er a Adam me a Eba me bo el loungelek el mekekii tia el beluulechad. (Genesis 1:27, 28) Me nglocha mlo melebedebek el kmo ‘Tirka el chad a bai kmal sebechir el mo mengull er ngak e diak longull er a Dios.’ Seikid e a mekngit el ngibes a ulemuchel er a chelsel a rengul. Me ngmocha melekoi er a Eba a blulak el kirel a Dios. (Genesis 3:1-5) Me ngmlo okedongall el “Diabelong” el belkul a kmo, “Ngike el Oltuub.” E “Satan” el belkul a kmo “Ngike el Omtok.”

<sup>7</sup> Me a Satan el Diabelong a uluusbech a blulak el rullii a Adam me a Eba el mo diak el lolengesenges er a Dios. (Genesis 2:17; 3:6) Me a uriul e te mlad el ua ledilu Dios el kmo ngmo duubech a bo lak el lolengesenges. (Genesis 3:17-19) A Adam a mlo diak el cherrungel er a lebo er a klengit, me a rokui el ngelekel a mludiukes er a klengit el mla er ngii. (Rom 5:12) Tia el tekoi a sebeched el omekesiu er ngii er a kata el doba el melul a blauang. A lsekum sel kata a mle blet e a bek el blauang el tuobed er ngii a ulduum. Me ngdi osisiu, a rederta el chad a uldiukes er a diak el cherrungel el ua “ulduum” el blekeradel el mla er

6. Ngmlekerang e ngike el mesisiich el ngelekel a Dios e mlo Satan el Diabelong?

7. (a) Ngera uchul me a Adam me a Eba a mlad? (b) Ngera uchul me a rokui el ngelekel a Adam a mo mechuodel e mad?

a Adam a uchul me kede rokui el mo mechuodel e mad.  
—Rom 3:23.

<sup>8</sup> A Satan er a lecheteklii a Adam me a Eba el mo er a klengit el omtok er a Dios, e ngulemuchel a ultok. Ngulemtok er a rolet a omengederederel a Jehovah. E le Satan a ua el dilu el kmo: 'A Dios a kmal meknig it mengedereder. Ngomulak e orreked a ungil el tekoi er a rechederedellel. Me a rechad a diak el lousbech er a Dios el mengedereder er tir. E le ngsebechir el di tir el melib a ungil me a meknig it kirir. E bai mo ungil a klechad er tir a bo el chederedall er ngak.' Ngmekerang a Dios a bo el longner er tia el ultok? A rebibil a omdasu el kmo ngbai mle kirel a Dios el di mekodeterir. Engdi a lurruul el uaisei, e ngulenger er a ultekengel a Satan? Ngmlo sebechel el meketeklii el kmo a omengederederel a Dios a melemalt?

<sup>9</sup> A cherrungel el llemeltel a Jehovah a dimlak el beche-rei me lemereched el mekodeterir. Ngmilsa el kmo a taem a mle usbechall el mo onger er a ultekengel a Satan e mo meketeklii el kmo ngii el Diabelong a bulak. Me seikid e a Dios a milechititerir a rechad me ngdi mlo tir el mengedereder er tir el telkib el taem el ngar er a cheungel a ulekrael er a Satan. Sel uchul me a Jehovah a mirruul er tia el tekoi me a uchul e ngulemechei er a kmal kenganget el taem el bo el losmechokl aikang, a mo soadel er a 11 el Bliongel er tia el babier. Engdi chelechang e ngkmal ungil el bo dolebedebek er tia el kmo: A Adam me a Eba ngmle melemalt el loumerang er a Satan, el ngii a dirkak a ta el ngera el ungil el rruul el kirir? Ngmle melemalt el bo el loumerang el kmo a Jehovah el ngii a milsterir aike el rokui el mla er ngii er tir, a mle cheblad? Omko ngmle kau e ke milekerang?


---

8, 9. (a) Ngera el ultok a lerirellii a Satan? (b) Ngera uchul me a Dios a dimlak el mereched el lokngemedeterir tirka el mlo omtok er ngii?

<sup>10</sup> Ngkmal ungil el dolebedebek aika el ker e le kid me kede chelebangel ngii el tekoi er a chelecha el sils. Ngngar er ngii a techellem el mo olengeseu er a Jehovah el longer er sel omelsemai er a Satan. Ngsebechem el kongei er a Jehovah el

10. Ke mekerang e olengeseu er a Jehovah el longer er sel omelsemai er a Satan?

*Ngmlekerang e sebecel a Satan e omsa  
Jesus a rokui el renged er a beluulechad a  
lsekum ngii el renged a dimlak el kloklel?*



mo Merredelem e olengeseu el lolecholt el kmo a Satan a bulak. (Psalm 73:28; Osisechakl 27:11) Ngklou el klengite-rreng e le te di mekesai er a chelsir tirka el betok el biliol el chad el ngar er a beluulechad er a chelechang a melilt er tia el tekoi. Me tiang a mekdebechii a klou a ultutelel el ker el kmo, A Biblia ngmera el lolisechakl el kmo a Satan a mendededer er tia el beluulechad?

### NGTECHA MENGEDEREDER ER TIA EL BELUULECHAD?

<sup>11</sup> A Jesus a dimlak el loumededenger el kmo a Satan a merreder er a beluulechad. Nguleak a ongasireng, e a Satan a mle ta el lolecholt er a Jesus a “rokuil renged ma klebkellel ngiil renged er tial belulechad.” Uriul e ngdilu er a Jesus el kmo: “A lsekum ke mo terrob el mengull el meluluuch er ngak, e ak meskau a ikal rokui.” (Matteus 4: 8, 9; Lukas 4:5, 6) Molatk er tiang. Omomdasu e tia el tekoi ngmle sebechel el uchul a *omengarm* el mo er a Jesus a lsekum a Satan a dimlak el mera el merreder aika el renged? A Jesus a dimlak el loumededenger me a ka lulemtok el kmo aika el kabelment er a beluulechad a mle kloklel a Satan.

<sup>12</sup> Tia ulterekokl el tekoi el kmo a Jehovah a kot el ngarbab el Dios, el Ngike el Ulemeob er tia el mengasireng el melidiul. (Chocholt 4:11) Engdi a Jesus a mle bleketakl el melekoi el kirel a Satan el kmo ng “merreder er tial belulechad.” (Johanes 12:31; 14:30; 16:11) A Biblia a dirrek el melutk er a Satan el Diabelong el kmo ng “chelid er tial belulechad.” (2 Korinth 4:3, 4) A Johanes a dirrek el milluches el kirel ngika el lomtok el Satan el kmo: “A belulechad el rokir a chederdall er ngikel mekngit.”—1 Johanes 5:19.

---

11, 12. (a) Ngmekerang e a ongarm el mlo er a Jesus a olecholt el kmo a Satan a merreder er tia el beluulechad? (b) Ngera dirrek el meketeklii el kmo a Satan a mera el merreder er tia el beluulechad?

## NGMEKERANG E MO METEMALL A BELUULECHAD ER A SATAN

<sup>13</sup> Bek el rak e a beluulechad a merael el mengal mo ke-ngaol. Ngmui er a ruumekemad el soldau, remechebirukel el chad er a balatiks, recheblad el mengeteklel a klechelid, me a redengerenger. Ngmeringel el lemesmechokl a beluulechad el rokir, engdi a Biblia a olecholt el kmo ngdi kmedung e a Dios a mo okngemedii tia el mekngit el beluulechad el oba mekemedil er a Armageddon, e mo mtechir er a melemalt el beches el beluulechad.—Chocholt 16:14-16.

<sup>14</sup> A Jehovah el Dios a ngileltii a Jesus Kristus el mo Mengedereder er a Rengedel el ngar er a eanged. A irechar e a Biblia a millekoi el kmo: “A ta el ngalek a mechell el kired! A ngalek el sechal a lebeskid! E ngii a mo merredeled. Ngmo okedongall el kmo . . . ‘King el ngalek er a Budech.’ A klisichel el king a di mo merael el mo klou; me a kabelment er ngii a di mo blechoel el ngar er a budech.” (Isaia 9:6, 7, *King James Version*) A Jesus a ullisechakl er a rulebengkel el meluluuch el kirel tia el kabelment el kmo: “A rengedem le mei, ma uldesuel a rengum le meruul ra belulechad el ua chomerellel ra eanged.” (Matteus 6:10) Me ngdi ua bo domes er a uriul el ngar er tia el babier, a Rengedel a Dios a di kmedung e ngmo tomall aika el rokui el kabelment er tia el beluulechad, e ngii a mo mengedereder el omtechei. (Daniel 2:44) E seikid e a Rengedel a Dios a mo kutmeklii tia el chutem el mo paradis.

### A BECHES EL BELUULECHAD A DI KMEDANG

<sup>15</sup> A Biblia a smisiich a rengud el kmo: “Ngdi kid a mengiil er sel ngara telbilel a Dios el beches el eanged ma beches el

---

13. Ngera uchul me kede ousbech er a beches el beluulechad?

14. Ngtecha bla el ngiltii a Dios el mo Mengedereder er a Rengedel, e milekerang a ulaoch a lolekoi el kirel tiang?

15. Ngera “beches el chutem”?

chutem el bo le kiei er ngii a llemalt.” (2 Petrus 3:13; Isaia 65:17) A lebebil er a taem e a Biblia sel ledu “chutem” e ngmelutk el kirir a rechad el kiei er tia el chutem. Me sel mememalt el “beches el chutem” a melutk el kirel a klechad el oba kengei er a Dios.

<sup>16</sup> A Jesus a tilbir el kmo ngar er sel mei el beches el beluulechad, e tirke el kengei er tir a Dios a mo ngmai a sengk er a “diak a ullebengelel klengar.” (Markus 10:30) Ka moutekangel el misii a Biblia er kau el mo er a Johanes 3:16 me a 17:3, e mesa lullekoi er ngii a Jesus el kmo ngngera kired el meruul er ngii me bo el sebeched el mo nguu a diak a ulebengelel el klengar. Momes el okiu a Biblia aike el klongeltengat el sebechir el mo oldeu a rengrir er ngii tirke el chad el mo rredemelel a nguu tia el mengasireng el sengk el mla er a Dios er a chelsel a Paradis el chutem.

<sup>17</sup> *A chelebirukel, mekemad, delengerenger, me a uldikel a mo diak.* “Ngdi telkib kung, e a re dengerenger a mo dibus; . . . ngdi tirkel medemedemek a mo ungilbesrir el kiei el ngar a beluu.” (Psalm 37:10, 11) Ngmo er ngii a budech e le “[a Dios a mo] merrob a mekemad er a beluulchad el rokir.” (Psalm 46:9; Isaia 2:4) E seikid e “a llemalt bo loleketek er a klemengetel a klengar er [a chad], ma klteketel a le diich a buil e di le medechel a klungiaol” el belkul a kmo ngmo diak a ulebengelel!—Psalm 72:7.

<sup>18</sup> *A remengull er a Jehovah a mo kiei el ngar er a ulekerreu.* A rengalek er a Israel er a taem er a omelecheselel a Biblia a kiliei el ngar er a ulekerreu sel lolemolem el olengesenges er a Dios. (Levitikus 25:18, 19) Kede ulterekokl el mo oldeu a rengud er a osisiu el ulekerreu er a chelsel a Paradis!—Isaia 32:18; Mika 4:4.

---

16. Ngera sel mekreos el sengk el mla er a Dios el mo er tirke el le- kengei er tir, e ngera kired el meruul me bo el sebeched el mo nguu? 17, 18. Kede mekera e mo ulterekokl a rengud el kmo ngmo er ngii a budech me a ulekerreu er a beluulechad el rokir?

<sup>19</sup> *Ngmo diak a ngelsengesel a kall.* A milluches er a psalm a milengitakl el kmo: “Bo le betok a redechel a *wheat* er a beluu; ma ikel bukl di bo le medekedek er a dellomel el kall.” (Psalm 72:16) A Jehovah el Dios a mo omekngeltengat er a remelemalt el chedal, me a ‘chutem a mo oltobed a sme-nge.’—Psalm 67:6.

<sup>20</sup> *A beluulechad el rokir a mo paradis.* A klebokel el beches el blai me a sers a oberk er aike el chutem el tillemall a rengar er a klengit el chad. (Isaia 65:21-24; Chocholt 11:18) Sel lo-rael a taem el mong, e aike el basio er a beluulechad el mla meketmokl a omerk el mo lmuut er sel taem el beluulechad el rokir a mla mo klebokel e bekerredechel el ua sers er a Eden. E a Dios a ulterekokl el diak el okor el mo ‘omok a chimal e omotech a rengrir a rokui el dingar.’—Psalm 145:16, *New World Translation.*

<sup>21</sup> *Ngmo er ngii a budech er a delongelir a rechad me a charm.* A tebelik me a turturk el charm a mo dmak el mengang. E a kekerei el ngalek me ngdiak bo el medakt aike el charm el chelecha el taem e ngkdekudel.—Isaia 11:6-9; 65:25.

<sup>22</sup> *A secher a mo diak.* Me a Jesus el ngii a Merreder er a Rengedel a Dios el ngar er a eanged, a mo omekungil er a rechad el ngar er a lmuut el kmal klou el rokel er aike el lurrul er a lengar er tia el chutem. (Matteus 9:35; Markus 1:40-42; Johanes 5:5-9) E seikid e ngmo “diak a tal chad el kiei er a beluad el lmuut el mo mengeremrum el kmo ng smecher.”—Isaia 33:24; 35:5, 6.

---

19. Ngera uchul me kede medengei el kmo ngmo obdois a kall er a chelsel a beches el blekeradel er a Dios?

20. Ngera uchul me ngngulterekokl a rengud el kmo a beluulechad el rokir a mo paradis?

21. Ngera ochotii el kmo ngmo er ngii a budech er a delongelir a rechad me a charm?

22. Ngera mo duubech el mo er a secher?





<sup>23</sup> *A rulekoad a lmuut el mo mekiis e mo er ngii a techel-lir el diak el luut el mo mad.* Tirke el rokui el mechiuaiu el ngar er a kodall el ngar er a omelebedebekel a Dios a rokui el mo moluut a klengar er tir. E le ngmo er ngii a “chokiis rar melemalt mar diak le melemalt.”—Rellir 24:15; Johannes 5:28, 29.

<sup>24</sup> Ngmera el mengasireng a klengar er a ngar er a medad el mengiil er a rechad el tir a melilt el mo mesuub el kirel ngike el Ngarbab el Ulemeob, el Jehovah el Dios, e mo mesiou er ngii! Tiaikid sel merael el mei el Paradis el ngar er tia el chutem el lullekoi er ngii a Jesus er sera el tibir el mo er ngike el chad el mle kltekotel er a kerrekar er a bita er ngii el kmo: “Ke mo obengkek el ngara Baradis.” (Lukas 23:43) Ngkmal klou a ultutelel el dosuub a betok el kirel a Jesus Kristus, el oeak ngii e aika el rokui el klengel-tengat a mo meketmokl.

23. Ngera uchul me a okiis a mo uchul a deureng er kid?

24. Ngera uldesuem el kirel a klengar el ngar er a chesl el Paradis el chutem?

#### AIKE EL LOLISECHAKL A BIBLIA

- A telbilel a Dios el mo meruul er a beluulechad el mo paradis a mo motaut.—Isaia 45:18; 55:11.
- A Satan a mengedereder er tia el beluulechad er a chelechang.—Johanes 12:31; 1 Johanes 5:19.
- Ngar er sel merael el mei el beches el chutem, e a Dios a mo oleitel a betok el klengel-tengat er bebrir a rechad.—Psalm 37:10, 11, 29.

## Ngtecha Jesus Kristus?

**Ngera el ileakl el deruchall a lobang?**

**Ngmla er ker el mei?**

**Ngmle ua ngera el chad a Jesus?**

TE NGAR er ngii a rekmal betok el merael a chisir el chad el ngar er tia el beluulechad. A rebebil a merael a chisir er a basio el kiei er ngii me a rebebil a merael a chisir er a beluulechad el rokir. Engdi a di dodengeli a ngklel a chad el merael a chisel a diak el belkul a kmo kede mera el medengeli ngii el chad. E le ngdiak dodengei a ome-sodel a cherellel me a okurulel me a diak dodengeli el kmo ngua ngera el chad.

<sup>2</sup> A Jesus Kristus a kiliei er tia el chutem er a be-kord el 2,000 el rak er a mla me mong, engdi te betok el chad el meliuekl er a beluulechad a mla remenges a kmung ngerang el chisel. Me nguaisei, engdi te betok a rrau a rengrir el kmo a Jesus ngmera el mle techang. A rebebil a melekoi el kmo ngkuk di mle ta er a ungil el chad, me a rekmo ngdi mle ta er a profet. Me a ngar er ngii a kuk oumerang el kmo a Jesus a Dios me ngkired el mengull el meluluuch el mo er ngii. Engdi ngmera el uaisei?

<sup>3</sup> Ngkmal klou a ultutelel el bo modengeli a

---

1, 2. (a) Ngera me a dodengeli a ngklel a merael a chisel el chad e ngdiak el belkul a kmo kede mera el medengeli? (b) Ngera el rraureng a ngar er ngii el kirel a Jesus?


3. Ngera uchul me ngklou a ultutelel el bo modengeli a klemere-rang el kirel a Jesus?



*Ngerang Mera el Lolisechakl a Biblia?*

klemerang el kirel a Jesus. E le Biblia a melekoi el kmo: “A diak a ullebengelel klengar tiakid el bo lodengelkau el dital meral Dios, *ma Jesus Kristus el ngikel mulderchii.*” (Johanes 17:3) Me a dodengeli a klemerang el kirel a Jehovah el Dios me a Jesus Kristus e ngmekrolid el mo er a diak a ulebengelel el klengar el ngar er a paradis el chutem. (Johanes 14:6) A Jesus a meskid a kot el ungil el kerebai el kirel a blekerdelel a klengar er kid me a omerelled el mo er a rebebil er a rechad. (Johanes 13: 34, 35) Ngar er a kot el bliongel, e kede milsaod er a klemerang el kirel a Dios. Chelechang, e me bo domes el kmo ngerang mera el lolisechakl a Biblia el kirel a Jesus Kristus.

*Sera lemetecholb, e a Jesus a mlo  
Messias me a lechub e ng Kristus*



## A MESSIAS ER A TELBIIL

<sup>4</sup> Betok el rak er a uchei er a lemechell a Jesus, e a Biblia a ulemlaoch el kirel a chad el bo lodureklii a Dios el me mechell el mo Messias me a lechub e ng Kristus. Tia el dui el “Messias” (el mlengai er a tekoi er a Hebru) me a “Kristus” (el mlengai er a tekoi er a Grik) a di dul belkul a kmo “Ngike el Mlucheluch.” Ngar er a taem er a omelechesele a Biblia, e a chad a metutk el mo er a ileakl el deruchall el oak sel lemoitel a cheluch er a bebul a bdelul. Me ngikaikid el ngalek er a telbiil a mo mucheluch, el belkul a kmo ngmetutk er a Dios el mo er a ileakl el deruchall. Ngar er a ulebengelel tia el babier, e kede mo mesuub a lmuut el betok el kirel a klou a ultutelel el ngerachel el loba Messias er a cheslel a otutel me a cherrengel el telbilel a Dios me aike el betok el klengeltengat el sebedhed el melelem el melai el me lmuut er a chelechang el okiu a Jesus. Engdi, uchei er a be lemechell a Jesus e te betok a locha millebedebek el kmo, ‘Ngtecha ngike el ngii a mo obeketakl el kmo ng Messias?’

<sup>5</sup> A redisaiplo er a kot el dart el rak a mle ulterekokl a rengrir el kmo a Jesus a ngike el mildung er a ulaoch el Messias. (Johanes 1:41) A disaiplo el Simon Petrus a dilu er a Jesus el kmo: “Ikau a Kristus.” (Matteus 16:16) Engdi te mlekerang tirke el disaiplo me kid e mo ulterekokl el medengei el kmo a Jesus a mera el ngike el mla er a telbiil el Messias?

<sup>6</sup> A reprofet er a Dios el kiliei er a uchei er a taem er a Jesus a uluuchais a betok el tekoi el kirel a Messias. A tekoi el luluuchais a sebedhel el ngosuterir a rechad el

---

4. Ngera belkul a dui el “Messias” me a lechub e ng “Kristus”?

5. A redisaiplo er a Jesus ngerang mle ulterekokl a rengrir er ngii el kirel a Jesus?

6. Ka msodii el kmo ngmilekerang a Jehovah er a lengesuterir a reblak a rengrir el chad el mo sebedchir el dongchii a Messias.

dongchii a Messias, el di ua tiang: Omko ke mlodurech el mo er a kmal meseked el bdelulachang el mo oltak er a chad el diak modengeli, e ngdiak el bai el lungil a lsekum te milskau a bebil er a komakai el omesodel ngii el chad? Me ngdi osisiu, ngoeak a reprofet, e a Jehovah a milskid a komakai el omesodel a tekoi el bo el loruu a Messias me a bo el charm er a klengar er ngii, el ngosuterir a reblak a rengrir el chad el mo sebechir el dongchii.

<sup>7</sup> Ka molatk a teblo el okesiul tiang. A kot, e ngbekord el 700 el rak er a uchei e a profet el Mika a ulemlaoch el kirel a ngalek er a telbiil el mo mechell er a Bethlehem. (Mika 5:2) A Jesus ngmlehell er ker? Ngmlehell er isei el mats. (Matteus 2:1, 3-9) Ongerung, e ngbetok er a 500 el rak er a uchei, e a ulaoch el ngar er a Daniel 9:25 a mil-lutk el mo er a rak el be el duum a Messias el ngii a mle rak er a 29.\* Me a otutel aikang me a lmuut el bebil er a ulaoch a meketeklii el kmo a Jesus a mera el ngike el mla er a telbiil el Messias.

<sup>8</sup> A lmuut el bebil er a olechotel a kmo a Jesus a mera el mle Messias a mlo bleketakl er a ulebengelel a rak er a 29. Tiaikid sel rak el Jesus a mlo er a Johanes el Techolb el mo metecholb. A Jehovah a tilbir el mo er a Johanes el kmo ngmo msa olengchelel a Messias. A Johanes a milsa ngii el olangch er sera lemetecholb a Jesus. A Biblia a ouchais el kmo: "Ma Jesus er a le metechelbang, e ngdimlemereched el tokerekl ra ralm, e mesang, ngulebkais a eanged e ngmesa [oureor el klisichel a] Dios el ua belochel el me

---

\* A omesodel a ulochel a Daniel el mlecherrungel er a Jesus, a domes er a Bebil er a Omesodel el ngar er a 228-9 el llel.

7. Ngerang a teblo er aike el ulaoch el mlecherrungel er a Jesus?  
8, 9. Ngera el olechotel a kmo a Jesus a Messias, a mlo bleketakl er a taem er a lemetecholb?

metengel er a bebul; e mlarngii a ngor ra eanged el kmo, ‘Ngikang a betik ra renguk el Ngelekek, el odeuir a renguk.’” (Matteus 3:16, 17) A uriul er a leues el renges a tekoi el dilubech, e a Johanes a mlo ulterekokl a rengul el kmo a Jesus a mlodurokl er a Dios. (Johanes 1:32-34) Seikid er a lemetengel a oureor el klisichel a Dios er a bebul a Jesus e ngmlo Messias el milengilt er a Dios el mo Mengedereder el King.—Isaia 55:4.

<sup>9</sup> A otutel a ulaoch me a tekoi el lullekoi a Jehovah el Dios a bleketakl el ulechotii el kmo a Jesus a ngike el mla er a telbiil el Messias. Engdi a Biblia a onger a lmuut el teblo er a meklou a ultutelel el ker el kirel a Jesus Kristus el kmo: Ngmla er ker el mei, e mle ua ngera el chad?

### A JESUS NGMLA ER KER EL MEI?

<sup>10</sup> A Biblia a olisechakl el kmo a Jesus a kiliei er a eanged er a uchei er a lemei er a chutem. A Mika a ulemlaoch el kmo a Messias a mo mechell er a Bethlehem me a uchelel a mla er a “kmal irechar” el mei. (Mika 5:2) Ngbetok el taem, e a Jesus a millekoi el kirel el kmo ngkiliei er a eanged. (Johanes 3:13; 6:38, 62; 17:4, 5) Me a lengar er a eanged, e ngmla er ngii a ileakl el deleuill er ngii me a Jehovah.

<sup>11</sup> A Jesus a kmal mle betik er a rengul a Dios el Ngelekel. Ngokedongall el ‘uleak uchei ra rokuil bleob,’ e le ngii el ble lekot el mepii a Dios.\* (Kolose 1:15) Ngii

---

\* A Jehovah a okedongall el Chedam e le ngii el Ulemeob. (Isaia 64:8) Me a Jesus a ulebeob er a Dios me ngokedongall el Ngelekel a Dios. Ngdi osisiu, a rechangel me a chad el Adam a dirrek el sebechir el okedongall el ngelekel a Dios.

---

10. Ngera ngolisechakl a Biblia el kirel a Jesus er a uchei er a lemei er a chutem?

11. Ngmekerang a Biblia a lochotii el kmo a Jesus a mle kot el betik er a rengul a Jehovah el Ngelekel?

a “dital Ngelekel” a Dios. (Johanes 3:16) Tiang a belkul a kmo a Jesus a di mle ngii el tang a mera el ulebeob er a Dios, e dirrek el di mle ngii el tang a luluusbech er ngii a Dios er a lomeob a rokui el tekoi. (Kolose 1:16) Ngdirrek el okedongall el “Tekoi.” (Johanes 1:14) Tiang a ouchais el kmo ngii a mle mekingel a Dios, el ullab a klumech me a ulekrael el mo er tirke el bebil er a rengelekel a Dios, el rechangel me a rechad.

<sup>12</sup> Ngika el kot el mlechell el Ngalek ngosisiu ngii me a Dios? Ngdi ua aike el dulsad er a uchei, a Biblia a olisechakl el kmo a Ngalek a ulebeob. Me ngmla er ngii a uchelel, engdi Jehovah el Dios a diak a uchelel el diak a ulebengelel. (Psalm 90:2) E a Biblia a bleketakl el olisechakl el kmo a Chedam a kuk ngarbab er a Ngalek. (Johanes 14:28; 1 Korinth 11:3) E di ta el Jehovah a “Dios el Olab a Bek el Klisiich.” (Genesis 17:1) Me ngdiak a ngii di el techang el mekesiur.\*

<sup>13</sup> A Jehovah me a Ngelekel a mle kaubltikerreng e uleldeu a rengrir er a kmes el deleuill er tir el betok el biliol el rak. (Johanes 3:35; 14:31) Ngika el Ngalek a kmal di mle ua Demal, a uchul me a Biblia a melekoi el kirel el kmo ng “chokesiul a diak le meues el Dios.” (Kolose 1:15) Me ngdi ua ngalek el sechal el sebechel el ua demal er a betok el rolel, me ngika el Ngalek el ngar er a eanged a dirrek el kmal mle ungil el okesiul a blekerdelel a Demal.

---

\* A lmuut el bebil er a olechotel a kmo a kot el mlechell el Ngalek a dimlak el osisiu ngii me a Dios, a omomes er a Bebil er a Omesodel el ngar er a 232-4 el llel.

---

12. Kede mekerang e medengei el kmo ngike el kot el mlechell el Ngalek a diak el osisiu a deruchellel ngii me a Dios?

13. Ngera belkul sel loleko a Biblia el kirel a Ngalek el kmo ng “chokesiul a diak le meues el Dios”?

<sup>14</sup> Ngika el di ta el ngelekel a Jehovah a di mle ngii el kongei el me metengel er a chutem el ua rechad. Engdi ke locha mo melebedebek el kmo, ‘Ngmlekerang e sebechel a Jesus el ngii a kiliei er a eanged el me mechell el ua rechad?’ A Jehovah a rirellii a ongasireng er a loiuelii a klengar er ngika el kot el Ngalek el Sechal er a eanged el mo er a omecherellel a klikiid el ekebil er a Judah el ngklel a Maria. Ngdimlak el usbechall a chad el chedam el mo omekdubech er a klengar er ngii. A Maria a milechell er a cherrungel el ngalek el sechal e milengeklii el Jesus.—Lukas 1:30-35.

### NGMLE UA NGERA EL CHAD A JESUS?

<sup>15</sup> Aike el lullekoi me a lurruul a Jesus er sera lengar er a beluulechad a ngosukid el mo medengeli, e a ngar er a uchei er ngii e kede mo ungil el medengeli a Jehovah. E ngera uchul? Molatk el kmo a Ngalek a mle cherrungel el okesiul a Demal, a uchul me ngdilu er a ta er a redisaiplo er ngii el kmo: “Ngikel mla mesekak a mla mesa Chedam.” (Johanes 14:9) Aike el eua el Evangkelio, el Matteus, Markus, Lukas, me a Johanes a ouchais er kid a betok el kirel a klengar me a tekoi el lurruul, me a dirrek el blekerdelel a Jesus Kristus.

<sup>16</sup> A Jesus a mle merael a chisel el “Sensei.” (Johanes 1:38; 13:13) Ngera ngullisechakl? A kot, e a klemechel a mle “evangkelio” er a renged, tiang a Rengedel a Dios, el sel kabelment el ngar er a eanged el ngii a mo menge-dereder er a beluulechad el rokir e mo uchul a diak a


---

14. Ngmilekerang a di ta el Ngelekel a Jehovah e mle mechell er tia el chutem?

15. Ngera uchul me kede melekoi el kmo ngoeak a Jesus e kede mo ungil el medengeli a Jehovah?

16. Ngera sel mle kot el klemechel a Jesus, e mla er ker el mei a osisecheklel?





*A Jesus a ulemerk er a klumech er aike el  
bek el basio el mla er ngii a rechad*

ulebengelel el klengeltengat el kirir a rebekongesenges el chad. (Matteus 4:23) A Jesus a di mle ngii el melekoi el kmo: “Chosisecheklek a diak le mlar ngak, ele ng mlar ngikel ulderchak,” el ngii a Jehovah. (Johanes 7:16) A Jesus a mle medengei el kmo a Demal a soal a rechad a lrengesii tia el ungil el chais el kirel a Renged. Me nngngar er a 8 el Bliongel, e kede mo mesuub a betok el kirel a Rengedel a Dios me aike el bo loruul.

<sup>17</sup> A Jesus a ullisechakl er aike el bek el lemla er ngii a rechad, me ngmla er a ikrel a beluu me a mats me a chesel a beluu me a blil a makit me a rekeblirir a rechad. Ngdimlak el longiil er a rechad el mei er ngii. (Markus 6:56; Lukas 19:5, 6) Ngera uchul me a Jesus a milengoit er a klou el temel el olisechakl er a rechad? E le tiang a mle soal a Dios. (Johanes 8:28, 29) Engdi ngdirrek el mle

17. A Jesus ngullisechakl er ker, e ngera uchul me ngkmal mle blak a rengul el olisechakl er a rebebil?



mekngit a rengul er aike el seked er a rechad el mlo omes er ngii. (Matteus 9:35, 36) A remengeteklel a klechelid a ullechib a osengir er tir. Engdi a Jesus a mle medengei el kmo ngmle klou a ultutelel el kirir a rechad el rongesii a klemechel a renged.

<sup>18</sup> A Jesus a kmal mle betik a rengul e chubteterir a rechad. Ngbekokuii e beot el bo longedecheduch er ngii, me ngmo lmuut er a rengalek me ngdimlak el medakt el mo kmeed er ngii. (Markus 10:13-16) A Jesus a dimlak longetukel er a rechad e uluuketui a chelebirukel. (Matteus 21:12, 13) Ngkiliei er a taem el dimlak a kmal techall me a omengull el mo er a redil, engdi Jesus a ullecholt el kmo te mle meklou a ultutelir. (Johanes 4:9, 27) A Jesus a mera el mle ngariou a rengul, me ngmle ta el lorisio a ocherir a rechapostol er ngii, el ngii a urerir tirke el kot el ngariou el mesiou.

18. Ngera el blekerdelel a Jesus a kmal soam?

<sup>19</sup> A Jesus a mle kerekikl a lousbech a rechad. Tiang a mle bleketakl er a lousbech er a oureor el klisichel a Dios el meruul a betok el ongasireng el omekungil a rakt. (Matteus 14:14) El ua tiang, ngmla er ngii a chad el mle kemkom el mlei er a Jesus e dilu el kmo: “A lungilbesul ra rengum, e ngebechem el kikidak.” A Jesus a mlo meknngit a rengul e le ngmillechesuar er a rengelel ngii el chad. Me nguldersii a chimal el rutechii e dilu el kmo: “Ngsoak; me bo mkliiid.” Me ngii el smecher el chad a mlo ungil er a rektel! (Markus 1:40-42) Ka motatk el kmo ngkol mlo ua ngerang a deuil a rengul ngii el chad.

### **BLAK A RENGUL EL MO ER A ULEBONGEL**

<sup>20</sup> A Jesus a ulehotii a kot el ungil el kerebai er a blekongesenges el mo er a Dios. Ngmillemolem el blak a rengul e uluutekangel a bek el bedengel a ultok me a ringel. Ngmle ulterekokl a uldesuel e mesisiich el ulemtok a omengarm el mla er a Satan. (Matteus 4:1-11) Ngmla er ngii a taem, el rechedal a dimlak el loumerang er ngii, e melekoi er ngii el kmo “ngmla moeau a rengul.” (Markus 3:21) Engdi a Jesus a dimlak el bechititerir me lengedechii a uldesuel e bai uluutekangel a otuub me a ringel, e di millemolem el ulserechakl.—1 Petrus 2: 21-23.

<sup>21</sup> A Jesus a millemolem el blak a rengul el mo lmuut er a kodall er a chimorir a recherrouel. (Filipi 2:8) Ka motatk aike el tekoi el chilarm er a ulebongel er a klengar er ngii el ua chad. Ngulebdechem el ua kelebus, e mlo-telechakl er a reklsuul el ocholt, e mloterekokl el kmo

---

19. Ngera olecholt el kmo a Jesus a mle kerekikl aike el lousbech a rebebil?

20, 21. Ngmilekerang a Jesus e kutmeklii a ungil el kerebai er a blekongesenges el mo er a Dios?

ngmekngit el oeak a remechebirukel el chad er a kerreke-riil, e meldenguul er a seked, e mlukcharm er a resoldau. Me a ledeleel er a kerrekar, e longoit a telil, e ngnguleldiu el kmo: “Ngmla mecherrungel!” (Johanes 19:30; Rellir 5:30) A ongedei el klebesei er a uriul er a kodellel a Jesus, e a Demal a ulekisii. (1 Petrus 3:18) A sesei el sandei er a uriul, e ngliluut el mo er a eanged. Ngar er isei, e ngmlo “dengchokl ra kidekmel a Dios” e mlengiil er a taem el blochu el nguu a klisichel a kleking.—Hebru 10: 12, 13.

<sup>22</sup> Me a Jesus ngngera nggirellii er a lolemolem el blak a rengul el mo lmuut er a kodall? A kodellel a Jesus a mekengii a techall el kired el mo kiei el diak a ulebengelel el ngar er a paradis el chutem, el oltirakl er sel mle moktek er a Jehovah er a kot el uchul. Ngar er a ongingil el bliongel e kede mo mesaod el kmo ngmekerang e a kodellel a Jesus a rullii tia el tekoi.

22. Ngera nggirellii a Jesus er a lolemolem el blak a rengul el mo lmuut er a kodall?

#### AIKE EL LOLISECHAKL A BIBLIA

- A mla mecherrungel el ulaoch me a dirrek el tekingel a Dios el mlounges a meketeklii el kmo a Jesus a Messias, me a lechub e ng Kristus.—Matteus 16:16.
- A Jesus a kiliei er a eanged el ua anghel er a uchei er a lemei er a beluulechad.—Johanes 3:13.
- A Jesus a mle sensei, e mle chubteterir a rechad, e mle kerebai er a cherrungel el blekongesenges el mo er a Dios.—Matteus 9: 35, 36.

## **A Olubet a Kot el Ngarbab el Sengk er a Dios**

**Ngerang a olubet?**

**Ngmilekerang er a longetmokl er ngii?**

**Ngerang a mo belkul el kirem?**

**Ke mekerang e ochotii el kmo ke oba  
omereng el saul el kirel?**

NGERA sel kot el mekreos el sengk el bla mnguu? A sengk a diak el belkul a kmo ngdi sel lemeringel a cheral e ngii a klou a ultutelel. E le kede medengei el kmo a mera el kerresel a sengk a diak el medebodeb el oeak a udoud. Ngbai, sel sekum a sengk el omngiluu a mlo uchul a deureng er kau me a lechub e ngmilchir a techerelbesum, e ke ulterekokl el omes er ngii el kmal mekreos er a rengum.

<sup>2</sup> Uldimukl er a sengk el molatk el sebechem el mo ngmai er a chesel a klengar er kau, e nnggar er ngii a tang el kmal ileakl er ngii el rokui. Tiang a sengk er a Dios el mei er a rechad. A Jehovah a mla meskid a betok el tekoi, engdi sel kot el mekreos el sengk er ngii el mei er kid, a sel tenget el olubet er a Ngelekel el Jesus Kristus. (Matteus 20:28) Me kede mo omes er ngii er tia el bliongel el kmo a olubet a kot el mekreos el sengk el sebechem el nguu, e le ngsebechel el mo uchul a diak el lobasech el deuil a rengum, e meskau aike el kmal meklou a ultutelel el tekoi el mousbech er a

---

1, 2. (a) Ngoingerang e a sengk el eko er kau a omomes el ua el sal mekreos? (b) Ngera uchul me kede kmo a olubet a kot el mekreos el sengk el sebechem el nguu?

klengar. Me a olubet a kot el ngarbab el ochotel a bltkil a rengul a Jehovah el eko er kau.

### **NGERANG A OLUBET?**

<sup>3</sup> A beot el omesodel a kmo, tia sel rolet e a Jehovah a mo olsobel er a rechad er a klengit me a kodall. (Efesus 1:7) A bo el ungil el bleketakl er a rengud tia el osisechakl er a Biblia, e ngkmal kired el mo melatk er a tekoi el dilubech er a uchei, er a chelsel a sers er a Eden. E le ngdi sel bo el ungil el bleketakl er a rengud a tekoi el lurriid a Adam er a lebo er a klengit, e seikid e ngmochu sebeched el mo medengei el kmo ngera uchul me a olubet a kmal mekreos el sengk el mlei er kid.

<sup>4</sup> Sera lebeii a Adam, e a Jehovah a milsa cherrungel el klengar el kmal mle mekreos. Ngbelkul a kmo a Adam a ulebeob el cherrungel a bedengel me a uldesuel, me ngdiak el bo el secher me a ka bo el chuodel me a lechub el mad. Ngmle cherrungel el chad, e mla er ngii a ileakl el deleuill er ngii me a Jehovah. A Biblia a melekoi el kmo a Adam a mla er a Dios el mei me ngngelekel a Dios. (Lukas 3:38) Me a Adam a uleldeu er a rengul er a kmes el deleuill el obengkel a Dios, el di ua deleuill er a ngalek me a betik a rengul el chedam. A Jehovah a milengedecheduch er ngika el ngelekel, e milsa a ureor el mlo uchul a deuil a rengul e silbedii el kmo ngera mle soal a bo loruul.—Genesis 1:28-30; 2:16, 17.

<sup>5</sup> A Adam a ulebeob el “okesiul a Dios.” (Genesis 1:27) Tiang a dimlak el belkul a kmo a Adam a mle ua teletelel a Dios a domes er ngii. E le ngdi ua aike el desiluub er a 1 el Bliongel, a Jehovah a diak el meues me ngdiak a bedengel

---

3. Ngerang a olubet, e ngera kirel el mo bleketakl a rengud er ngii e ngmochu sebeched el mera el mo oba omereng el saul el kirel tia el mekreos el sengk?

4. Ngerang a mle belkul a cherrungel el klengar el kirel a Adam?

5. Ngerang a belkul a ledu Biblia el kmo a Adam a ulebeob el “okesiul a Dios”?

el rruul er a tech me a rasech. (Johanes 4:24) Me ngmle belkul a kmo a Adam a ulebeob el ua blekerdelel a Dios, me ngulebang a bltikerreng me a llomeserreng me a lle-malt me a klisiich. A Adam a mle ua Demal er a lmuut el ta er a kmal klou a ultutelel el rolel el mle mimokl el melilt a tekoi. Me ngdimlak lekora mesil el di sebechel meruul a ulterekokl el tekoi el ulebeob el kirel. Ngbai mle sebechel el di ngii el melilt a ungil me a mekngit. Me a lengileltii el mo olengesenges er a Dios, e ngmle sebechel el kiei el diak a ulebengelel er a paradis el chutem.

<sup>6</sup> Me a Adam er a bo lak el olengesenges er a Dios me lemedebeakl el kirel a kodall, e ngkmal ngarbab el char a lulengkad er ngii. A kngtil a uchul e ngurridii a cherrungel el klengar er ngii me a rokui el klengeltengat el obengkel. (Genesis 3:17-19) Ngklengitterreng, e le Adam a dimlak di el loridii tia el mekreos el klengar el di kirel el merekong, e ngdirrek el kirel a klengelakel er ngii er a uriul. A Teki-ngel a Dios a kmo: “Le tal chad a uchul ma klengit a siliseb ra belulechad ma rokuil chad a mlora klengit, me ngsiliseb ra rokuil chad a kodall, el ua kodall luleak a klengit el me soiseb.” (Rom 5:12) Chochoi, kid el rokui a mludiukes er a klengit el mla er a Adam a uchul me a Biblia a melekoel el kmo a Adam a ‘ulterur’ ngii me a klengelakel er ngii el mo sibil a klengit me a kodall. (Rom 7:14) Ngmlo diak a ome-latk el kirel a Adam me a Eba e le ngmle durengrir el mo diak el lolengesenges er a Dios. Engdi kid a rengelekir a mekerang?

<sup>7</sup> A Jehovah a mlo mesebechakl er a klechad el oak a olubet. Ngerang a olubet? A olubet a blechoel el uldimukl er ngii a teblo el tekoi. A kot, e a olubet a sel char el dongkad er ngii me bo el sebechel el mo er ngii a ilmokl me a lechub e

---

6. A Adam er a bo lak el lolengesenges er a Dios, e ngera ngurridii? Tia el tekoi ngera ngtilemellii er a klengelakel er ngii?

7, 8. A olubet nguldimukl er ngii a ngera el teblo el tekoi?

kede omechar el olluut er a kmung ngerang. Tia sebeched el omekesiu er ngii er a char el mekekad el mo uchul a ngbetir a reblebaol er a mekemad. Ongerung, e a olubet a char el mlo melekedek, me a lechub e ngmengkad er a cheral a kmung ngerang. Me ngosisiu ngii me a char el dongkad er ngii el kirel a tellemall el dilubech. El ua tiang, a lsekum a chad a mle uchul a tellemall, e ngmo kirel el mengkad me a lechub e ngmtechir a meltemall el oba osisiu a kerresel el klalo.

<sup>8</sup> Ngmekerang e mo sebechel meketmokl a dekedekel tia el kmal klou el tekoi el lurriddi a Adam, me bo el sebeched el mo mimokl er a klsibai er a cheungel a klengit me a kodall? Ka me bo domes er a olubet el lekiltmeklii a Jehovah me a belkul el kired.

### **NGMILEKERANG A JEHOVAH ER A LONGETMOKL ER A OLUBET**

<sup>9</sup> Ngcherrungel el klengar a ririid a uchul, me ngdiak el sebechel a diak el cherrungel el klengar er a chad el mecherar el luttii. (Psalm 49:7, 8) Me ngmle usbechall a olubet el ngii a mle osisiu a kerresel ngii me sel ririid el klengar. Tiang a oltirakl er a omellach el kirel a cherrungel el llemalt el debetik er a Tekingel a Dios el kmo: “Klengar el kirel a klengar.” (Duteronomi 19:21) Me ngngera mo sebechel el dokedekii a kerresel a cherrungel el klengar er a chad el lurriddi a Adam? Ngusbechall a ta er a cherrungel el klengar el mo ‘olubet’ el osisiu a kerresel ngii me sel ririid.—1Timoteus 2:6.

<sup>10</sup> Ngmilekerang a Jehovah er a longetmokl er a olubet? Nguldureklii a ta er tirke el cherrungel el ngelekel el mla er a eanged el mei er tia el beluulechad. Engdi Jehovah a dimlak el loldurokl er a ngii di el ta er tir. Ngbai uldureklii ngike el kot el mekreos er a rengul, el di ta el Ngelekel.

---

9. Ngua ngera el olubet a mle usbechall?

10. Ngmilekerang a Jehovah er a longetmokl er a mo olubet?



(1 Johanes 4:9, 10) E ngii el ngalek a kmal kilengei el choitii a delengcheklel er a eanged. (Filipi 2:7) Me ngdi ua dulsuub er a uchei el bliongel, a Jehovah a mirruul er a ongasireng er a loiuelii a klengar er ngii el ngalek el mo er a omecherellel a Maria. Me ngoeak a oureor el klisichel a Dios, e a Jesus a milechell el ua cherrungel el chad me ngdimlak el ngar er a cheungel a delbeklel a klengit.—Lukas 1:35.

<sup>11</sup> Ngmekerang e sebechel a ta el chad el mo olubet el kirir a rebetok el chad? A kot e te milekerang a rekmal betok el chad e mlo er a klengit? Molatk er tia el kmo sera lebo er a klengit, e a Adam a urridii a cherrungel el klengar er ngii, me ngdi mlo sebechel el meliukes er a klengit me a kodall el mo er a rengelekel. A Jesus, el Biblia a omekedong er ngii el kmo “uriul el Adam” a mle cherrungel a klengar er ngii, e dimlak el ta el lebo er a klengit. (1 Korinth 15:45) Me a Jesus a ua leblo er a deruchellel a Adam me blo el luchul el blo el sebechel el losebelid. Me a letengetengii a cherrungel el klengar er ngii el oba cherrungel el blekongesenges el mo er a Dios, e a Jesus a kikedir a ngkedel a kngtil a Adam. Me seikid e ngmlo uchul a omelatk el kirir a rengelekel a Adam.—Rom 5:19; 1 Korinth 15:21, 22.

<sup>12</sup> A Biblia a mesaod a ringel el lechilarm a Jesus er a uchei er a kodellel el kmo ngmeringel el chelebed, me a meringel el kodall el deleel el ngar er a teluo el kerrekar. (Johanes 19: 1, 16-18, 30; Bebil er a Omesodel, el ngar er a 235-6 el llel tia el babier) Ngera uchul me ngmle kirel a Jesus el kmal mlo chuarm? Ngar er a ulebongel el bliongel er tia el babier, e a Satan a milsemai er a Jehovah a lsekum e ngngar er ngii a chad el mesiungel el mle sebechel el melemolem el outekangel a ringel e blak a rengul el mesiou er ngii. Me a loutekangel a meringel el ongarm el mlo er ngii e lolemo-

11. Ngmekerang e sebechel a ta el chad e mo olubet el kirir a rebetok el chad?

12. Ngerang a mlo bleketakl el oak a ringel el lechilarm a Jesus?

lem el blak a rengul, e a Jesus a kmal mle ungil el onger er tia el omelsemai. A Jesus a mileketeklii el kmo a cherrungel el chad el ngar er ngii a klisichel el mimokl el melilt a tekoi, a mle sebechel el mtekangel a ngii di el ngerang el loruul a Diabelong el mo er ngii e lomelemii a cherrungel el blakerreng el mo er a Dios. A Jehovah a locha kmal mle dmeu a rengul er a lomes er a blakerreng er ngika el kmal betik er a rengul el Ngelekel!—Osisechakl 27:11.

<sup>13</sup> Ngmilekerang a char er a olubet e mekekad? Ngar er a Nisan 14, er a rak er a 33 el oltirakl er a kalender er a Rechijudea, e a Dios a milecherei ngika el cherrungel el diak a kngtil el Ngelekel me te mekdir. Me seikid, e a Jesus a tilengetengii a cherrungel el klengar er ngii er a klechad el di mle ta el lordersii e merekong. (Hebru 10:10) Edei el klebesei er a uriul, e a Jehovah a ulekisii el diak el ua chad, e ngbai lmuut el mo er sel di mla blekerdelel a klengar er ngii er a lengar er a eanged. Ngar er a eanged, e a Jesus a uldersii el mo er a Dios sel kerresel a tengetengel a cherrungel el klengar er ngii er a klechad el mo olubet el kirir a rengelekel a Adam. (Hebru 9:24) A Jehovah a kilengei er ngii el tengetengel a Jesus el ua olubet, el ngii a mle usbechall el mo oltobed er a klechad er a cheungel a klsibai er a klengit me a kodall.—Rom 3:23, 24.

### **NGERA SEBEHEL EL MO BELKUL A OLUBET EL KIREM**

<sup>14</sup> Me alta e kede ngar er a klengit, engdi ngsebeched el loldeu a rengud er a mekreos el klengeltengat el olubet a uchul. Ka me bo domes a bebil er a klungiaol el kired er a chelechang me a ngar er a medad el klebesei el tia el mekreos el sengk el mla er a Dios a uchul.

<sup>15</sup> *A klausubes er a klengit.* Kid a mludiukes er a diak el

---

13. Ngmlekerang e mekekad a olubet?

14, 15. A bo denguu a klausubes el kirel a kngtid, e ngngera kired el meruul?

ΙΗΣΟΥΣ ΟΝΑΣ ΖΩΡΑΙΟΣ  
Ο ΒΑΣΙΛΕΥΣ ΤΩΝ ΙΟΥΔΑΙΩΝ

*A Jehovah a milskid  
a di ta el Ngelekel el  
mo olubet el kired*



cherrungel el klengar a uchul me kede meringel el melasem el meruul a melemalt. Kede mo er a klengit el oeak a omelekinged me a omerelled, engdi ngoeak a olubet el tengetengel a Jesus, e ngsebeched el ngmai a klausubes el kirel a kngtid. (Kolose 1:13, 14) Engdi a bo denguu a cho- uaisei el klausubes, e ngkired el mera el mo er a bult. Me ngoeak a klaumerang er kid er a olubet el tengetengel a Ngelekel, e ngkmal kired el mo ngariou a rengud e melu- luuch el mo er a Jehovah el olengit a klausubes.—1 Johanes 1:8, 9.

<sup>16</sup> *A klikiid el uklatk er a medal a Dios.* A mekngit el ukltked a sebechel el beot el rullid el mo diak a omeltked e mo omdasu el kmo ngdiak a ultuteled. Ngoeak a klausubes el denguu el oeak a olubet, e alta e ngdiak demecherrungel engdi a Jehovah a rullid el mo sebeched el mengull er ngii el klikiid a ukltked. (Hebru 9:13, 14) Tia el tekoi a rullid el mo mimokl el mengedecheduch er a Jehovah el oeak a nglunguuch. (Hebru 4:14-16) A dolemolem er a klikiid el ukltked e ngbudech a uldesued, e mo ungil a rengud er a te- koi el doruul, e mo dmeu a rengud.

<sup>17</sup> *A omelatker a diak a ulebengelel el klengar el ngar er a paradis el chutem.* A Rom 6:23 a kmo: “Ele uduudel ra kle- ngit a kodall.” Ngdochelii el kmo: “Ngdi ngat el grazia ra Dios a diak a ullebengelel klengar el ngara Kristus Jesus el Rubak er kid.” Ngar er a 3 el Bliongel er tia el babier, e kede milsaod aike el klengeltengat el mo er ngii er sel merael el mei el Paradis er tia el chutem. (Chocholt 21:3, 4) Ngii el ro- kui el klengeltengat er a ngar er a medad, el uldimukl er ngii a klengar el diak a ulebengelel el cherrungel a klisichel a be- denged a sebechel el mo uaisei e le Jesus el mlad el kired.

16. Ngera rullid el mo sebeched el klikiid a ukltked e mengull er a Dios? E ua ngera kerresel a chouaisei el klikiid el ukltkel a chad?

17. Ngera el klengeltengat a mlo er ngii el kodellel a Jesus el kired a uchul?



*A demengal el mo  
medengei a betok el kirel  
a Jehovah a ta er a rolel e  
kede ochotii el kmo kede  
oba omereng el saul el  
kirel tia el olubet  
el sengk er ngii  
el mei er kid*

Me a bo dolai ngii el klengeltengat e ngkmal kired el mo olecholt a omereng el saul er kid er sel sengk el olubet.

### **KE MEKERANG E OLECHOLT ER A OMERENG EL SAUL ER KAU?**

<sup>18</sup> Ngera me ngkmal kired el mo oba dmolech el omereng el saul el mo er a Jehovah el kirel a oketmeklel a olubet? A sengk a kmal ileakl el mekreos er a rengud a lsekum kede medengei el kmo a chad el milskid a kmal chilitii a klou el temel, me a blakerreng er ngii el meruul er ngii, me a lechub e ngklou el udoud a lechilitii el kirel. Ngkmal mo dmeu a rengud sel desa el kmo ngii el sengk a olechotel a mera el bltikerreng er ngii el chad el mei er kid. A olubet a kot el mekreos er a rokui el sengk, e le ngkmal klou el omelenget a lurruul er ngii a Dios me bo el sebechel el metkmokl. A Johanes 3:16 a kmo: “A kllungel a bltkil a rengul a Dios era belulechad a uchul me ngmilsa dital Ngelekel.” A olubet a kot el ngarbab el ochotel a bltikerreng er a Jehovah el mei er kid. Ngdirrek el omeketakl er a bltkil a rengul a Jesus, el kilengei el mo odersii a klengar er ngii el kired.

---

18. Ngera me kede mereng a sulel a Jehovah el kirel a oketmeklel a olubet?

(Johanes 15:13) Me tia el sengk el olubet a kmal kirel el olte-  
rekokl a rengud er a bltkil a rengul a Jehovah me a Ngelekel  
el mei er kid.—Galatia 2:20.

<sup>19</sup> Me ke mekerang e ochotii a omereng el saul el kirel tia  
el olubet el sengk er a Dios? Momuchel el mo *medengei a  
Imuut el betok el kirel ngika el Ngarbab el Omeskid a Sengker, el  
Jehovah.* (Johanes 17:3) A omesubel a Biblia el obengkel tia  
el babier a sebechel el ngosukau, el meleketek a klemede-  
ngei er kau er a Jehovah, me a bltikerreng er kau el mo er  
ngii a mo dmolech me ngmo soam el oldeu er a rengul.  
—1 Johanes 5:3.

<sup>20</sup> *Molecholt a klaumerang er a tenget el olubet er a Kris-  
tus.* A Jesus a dilu el kmo: “Me ngikel oumera ra Ngalek a  
mo oba diak a ullebengelel klengar.” (Johanes 3:36) Kede  
mekerang e olecholt a klaumerang er kid el mo er a Je-  
sus? Tia diak el mocholt el loeak a di omelekoi. A Jakobus  
2:26 a kmo: “A kloumera el diak chomerellel a ulekoad.”  
Me a mera el klaumerang a obeketakl el oeak a ureor, me a  
lechub a omerellel. Me a ta er a roel e kede ochotii a kla-  
umerang er kid er a Jesus a oeak a debo er sel tkurrebab el  
klisiched el oltirakl er a kerebil el oeak a tekoi el dolekoi me  
a doruul.—Johanes 13:15.

<sup>21</sup> *Bo er aike el Chedaol el Blsoil er a Rubak el ngar er ngii er  
a bek el rak.* Sel kesus er a Nisan 14, er a rak er a 33, e a Jesus  
a kiltmeklii a ileakl el tekoi el lomekedong er ngii a Biblia el  
kmo ng “blsoil ra Rubak.” (1 Korinth 11:20; Matteus 26:26-  
28) Tiang a dirrek el okedongall el kmo ngomekltked er a  
kodellel a Kristus. A Jesus a kiltmeklii tiang el mlo olenge-  
seu er a rechapostol er ngii me a rokui el mera el Kristiano

---

19, 20. Ke mekerang e ochotii a deuil a rengum er a olubet el sengk  
er a Dios?

21, 22. (a) Ngera uchul me ngkired el mo er a Chedaol el Blsoil er  
a kodellel a Jesus er a bek el rak? (b) Ngera mo soadel er a 6 me a 7  
el Bliongel?

er a uriul er tir el mo melatk el kmo nguleak a kodellel el ua cherrungel el chad, e a klengar er ngii a mlodars el mo olubet. Me ngdilu el kmo: “Me ko mo meruul el uaisei el omekltkui er ngak.” (Lukas 22:19) Me a debo er a Chedaol el Blsoil e ngomeklatk er kid er a klou el bltkil a rengul a Jehovah me a Jesus el ullecholt el mei er kid el loeak a olubet. Me kede olecholt a omereng el saul er kid el loeak sel debo er a Chedaol el Blsoil el meketmokl er a bek el rak el omeklatk er kid er a kodellel a Jesus.\*

<sup>22</sup> Me a olubet el lekiltmeklii a Jehovah a kmal mekreos el sengk. (2 Korinth 9:14, 15) Tia el mekreos el sengk a dirrek el sebechel el mo uchul a klungiolir a rulekoad. A 6 me a 7 el Bliongel a mo smodii er kid el kmo ngmekerang e mo uaisei.

\* A Imuut el betok el teкои el kirel a belkul a Chedaol el Blsoil er a Rubak, a omomes er a Bebil er a Omesodel, er a 236-8 el llel.

#### AIKE EL LOLISECHAKL A BIBLIA

- A olubet a rolet e a Jehovah a mo olsobel er a rechad er a klengit me a kodall.—Efesus 1:7.
- A Jehovah a kiltmeklii a olubet er sera lodureklii a di ta el Ngelekel el mei er a beluulechad el me mad el kired.—1 Johanes 4:9, 10.
- Ngoeak a olubet, e ngsebeched el ngmai a klausubes el kirel a klengit, e mo kliikiid a ukltked, e mo oba omelatk er a diak a ulebengelel el klengar.—1 Johanes 1:8, 9.
- Kede ochotii el kmo kede oba omereng el saul el kirel a olubet el loeak sel bo dodengei a betok el kirel a Jehovah, e dolecholt a klau-merang er kid er a olubet el tengetengel a Jesus, e debo er a Chedaol el Blsoil el kirel a kodellel.—Johanes 3:16.

## **Te Ngar er Ker a Rulekoad?**

**Ngera duubech el mei er kid sel demad?**

**Ngera uchul me kede mad?**

**Ngmo mechelaod a rengud a bo dodengeli  
a klemerang el kirel a kodall?**

AIKA el ker a lolatk a rechad el mla mo betok el telael el rak. Ngmeklou a ultutelel e le kede di mechell e cherur a kodall me a rebetik er a rengud me te mad.

<sup>2</sup> Ngar er a uchei el bliongel, e kede milsaod el kmo ngmilekerang a olubet el tengetengel a Jesus Kristus er a lebekengii a rael el mo er a diak a ulebengelel el klengar. Kede dirrek el silubii el kmo a Biblia a ouchais el kirel a taem el “mo diak a kodall.” (Chocholt 21:4) Engdi chelechang e kede dirk mad. A mellomes a rengul el King el Salomon a dilu el kmo: “A re chad a medengei el kmo te mo mad.” (Olisechakl 9:5) Me alta e kede melasem el kiei el kemanget el taem, engdi kede dirrek el dirk melebedebek el kmo ngera mo duubech el mei er kid sel demad.

<sup>3</sup> A lemad a rebetik er a rengud e ngmekngit a rengud. E locha mo oker el kmo: ‘Ngera dilubech el mo er tir? Te ngar er a ringel? Ngsebechir el mesekid? Ngsebeched el ngosuterir? Ngsebeched el lmuut el mo kaseues?’ A klechelid a rokui el meskid a kerous el nger. A rebebil a olisechakl el kmo a lsekum ngungil a klengar er kau, e ke mo er a eanged, e a lemekngit e ke mo medul er a basio er

---

1-3. Ngera el ker a loker a rechad el kirel a kodall, e ngera el nger a lomesterir a kakerous el klechelid?



a ringel. A kuk bebil a olisechakl el kmo sel lemad a chad e ngmo er a belurir a redeleb el mo obengterir a rebeldekir. Me a ngar er ngii a rebebil el lolisechakl el kmo a chad sel lemad e ngmo er a beluu er a iou el mo mukerrekeriil, e a uriul er isei e nglmuut el me ngar el kuk ta er a chad me a lechub e ngmechell el kuk mo ngodech el kmung ngerang el ngar el bleob.

<sup>4</sup> Aika el rokui el osisechakl a oba ta el uldasu el kmo nngngar er ngii a kmung ngerang er kid el melemolem el ngar, sel lemad tia el meues el bedenged. Me a doltirakl a lolekoi a oumesingd el klechelid er a irechar el mei er a chelechang, e kid a uai a doeak a kmung ngerang el roel e di kiei el diak a ulebengelel, el sebeched el omes e orrenges e omdasu. Engdi tiang ngmekerang e sebechel el mo uaisei? A klisichel a bedenged el melechesuar a tekoi, el uldimukl er a uldesued, a rokui el ulekuak er a urerel a no er a bdelud. E sel lemad a chad e a no er a bdelul a mo diak el oureor. A klisiich el melebedebek a tekoi, e melechesuar er a rengud me a bedenged, a omeruul el diak el sebechel el di ngii el ileakl e melemolem el oureor el oeak a kora mengasireng el roel. Ngii el rokui el mo diak el oureor sel lemad a no er a bdelul a chad.

### NGERA MERA EL DUUBECH SEL LEMAD A CHAD?

<sup>5</sup> A Jehovah el Ulemeob a no er a bdelud a ungil el medengei el kmo ngera duubech sel lemad a chad. Me ngoeak a tekingel el Biblia, e ngmesaod er a blekerdelir a rulekoad. Me ngbleketakl el olisechakl el kmo: *A chad sel lemad, e ngmo dibus el mo diak el ngar er a ngii di el ker.* A kodall a ikrel a klengar. Me a rulekoad a diak el lomes el ka lorrenge me a ka lomdasu. Ngdiak a di telkib er a bede-

4. Ngera el uchetemel a uldasu el kirir a rulekoad a losisiu er ngii a betok el klechelid?

5, 6. Ngera ngolisechakl a Biblia el kirel a blekerdelir a rulekoad?

nged el melemolem el ngar er a uriul er a demad. Me a diak a diak el ngemed el kmung ngerang el tuobed er a bedenged e melemolem el ngar.\*

<sup>6</sup> A uriul er a Salomon er a lolekoi el kmo a redingar a medengei el kmo te mo mad, e ngmilluches el kmo: “E ngdi rulekoad a *diak a ngeral lodengei*.” E a uriul, e ngliluut el mesaod er tia el uchetemel a klemerang er a lolekoi el kmo a rulekoad a diak el loubtikerreng me a ka louketui, me a dirrek el “diak le bor ngii a ureor ma uldasu ma lechub e ng klemedengei ma lechub e le llomeserreng er a [chelsel a debull].” (Olisechakl 9:5, 6, 10) A Psalm 146:4 a dirrek el melekoi el kmo a chad sel lemad, “e a rokui el uldesuel a mo mekimd.” Me kid a medmad me ngdiak lolemolem a klengar er kid a lemad a bedenged. Me tia el klengar el doldeu a rengud er ngii a di ua ngeuil a kandalang. Sel lemad ngii el ngau, e ngdi mo diak e merekong el diak el bo er ker.

### AIKE EL LULLEKOI A JESUS EL KIREL A KODALL

<sup>7</sup> A Jesus Kristus a millekoi el kirel a blekerdelir a rulekoad. Ngmilsaod er a Lazarus, el ble lodengelii el chad el ngii a mlad. Me ngdilu er a redisaiplo er ngii el kmo: “A sechelid el Lazarus a imiit a medal.” A redisaiplo er ngii a mle cheleuid a uldesuir, me te ulemdasu el kmo a Jesus a milsaod er a Lazarus el kmo ngmechiuau el olengull er a secherel. Me a Jesus a mocha mesaod el kmo: “A Lazarus a mla mad.” (Johanes 11:11-14) Ka mutebengii a Jesus el lomekesiu er a kodall el mo er a ulengull me a cheliuau. Me a Lazarus a dimlak el ngar er a eanged me a ka lebla er a beluu er a ngau. Ngdimlak el lolsiuekl er a rechanghel me a

---

\* Lmuut el betok el omesodel tia el tekoi, a ngar a Bebil er a Omesodel, er a 239-42 el llel tia el babier.

lechub a rebeldekel. Ngdirrek el dimlak el mechell el kuk mo ta er a chad. Ngdi ullengull el ngar er a kodall, el di ua lsal imiit a medal el dimlak el lomerrous. Ngar er ngii a lmuut el bebil er a bades el omekesiu er a kodall el mo er a cheliuau. El ua tiang, sera lobetech er a bad el mad a di-saiplo el Stefanus, e a Biblia a kmo 'ngiliit a medal.' (Rellir 7:60) A apostol el Paulus a dirrek el milluches el kirir a re-bebil er a rechad er a taem er ngii el mla mo "mechiuau" el ngar er a kodall.—1 Korinth 15:6, NW.

<sup>8</sup> Ngdimlak el telbilel a Dios er a kot el uchul el kirir a rechad el mo mad. A Jehovah a milebii a chad el mle kirel el kiei el diak a ulebengelel el ngar tia el chutem. Me ngdi ua aike el dulsuub er a uchei, ngmilechititerir tirka el kot el obekel er a klebokel el paradis, e ulemekngeltengat er tir er a cherrungel el klisichel a bedengir. Ngngar er ngii a ngii di el chedam me a lechub e ngchedil el soal a rengelekel a bo el charm er a rengelel a cheluodel me a kodall? Ngkmal diak! Me a Jehovah a kmal mle betik a rengul er a rengelekel e mle soal a lolemolem a klengar er tir el ngar er a deurreng er tia el chutem. A Biblia a melekoi el kirir a rechad el kmo: "Ngmo lmuut er a urungulir el kiei el diak a ulebengelel me nglilia er a chelsel a rengrir." (Olisechakl 3: 11, NW) Me a Dios a milebid el oba uldasu el soad el kiei el diak a ulebengelel. E milskid a techall el mo sebeched el lomelemii ngii el urunguled.

### A UCHUL ME A RECHAD A MAD

<sup>9</sup> Me ngngera uchul me a rechad a mad? A bo dode-ngelii a nger er tiang, e ngkired el mo omes er a tekoi el dilubech er a dirk ble el ta el sechal me a ta el redil a mla

8. Kede mekerang e medengei el kmo a kodellir a rechad a dimlak el telbilel a Dios?

9. A Jehovah ngngera ngullekebai er a Adam, e ngera me tia el llach a dimlak el meringel el bo el lolengesenges er ngii?

er tia el chutem. A Biblia a mesaod el kmo: “[A Jehovah a] ulemekeroul a bek el bedengel a kerrekar er ngii el mle klebokel e ourodech a ungil rodech.” (Genesis 2:9) Engdi ngmla er ngii a chimo el tekoi el lullekebai er tir er ngii. A Jehovah a dilu er a Adam el kmo: “Ng di subed cho mongang a redechel a rokui el kerrekar el ngar a chelsel a sers, e ngdi sel kerrekar er a mo medengei a ungil ma mekngit a diak monga er a redechel. Ele sel sils el mkelii e kom mad.” (Genesis 2:16, 17) Tia el llach a dimlak el meringel, e le ngkmal mle betok a kerrekar el mle sebechir el menga redechel. Engdi chelechang e ngmocha er ngii a ileakl el techall el mo sebechir el olecholt a omereng el saul er tir el mo er Ngike el milsterir a rokui el tekoi el mo lmuut er a cherrungel el klengar er tir. Me a blekongesenges er tir a mo olecholt er a omengull er tir el mo er a omengederederel a Demerir el ngar er a eanged, me a uldesuir el sorir a ulekrael el mla er ngii el mei.

<sup>10</sup> Ngklengitterreng, e le tirke el kot el obekel a ngileltii el mo diak el olengesenges er a Jehovah. A Satan a uleker er a Eba el oeak a bersoech el kmo: “Ng meral dilu Dios el kmo ng diak kom mongang a redechel a ngii di le kerrekar el ngar a chelsel a sers?” Me a Eba a ulenger el kmo: “Ng di subed aki monga ngii di le rodech er a kerrekar el ngar a sers, e ngdi sel kerrekar el ngar a belngel a diak el subed. A Dios a dilu el kmo ng diak le kiram el menga er a

---

10, 11. (a) Te milekerang tirke el kot el obekel e mlo diak el lolengesenges er a Dios? (b) E ngera uchul me a blekerdelel a Adam me a Eba er a bo lak el lolengesenges a kmal mle klou el tekoi?



*Ngmlo er ker  
a ngeuil?*

redechel sel kerrekar, ma dirrek el diak kimorutech er ngii; ele lsekum aki kolii, ma lechub e aki rutechii e aki mad.”  
—Genesis 3:1-3.

<sup>11</sup> Me a Satan a dilu el kmo: “Ng kmal diak le merang, ng diak bo mad. A Dios a melekoi el ua isei ele ng medengei el kmo sel bo mkelii e ng mo mellomes a rengmiu, e mo ua ingii el mo medengei a ungil ma mekngit.” (Genesis 3: 4, 5) A Satan a mle soal a Eba a bo el loumerang el kmo

*A Jehovah a rirelleterir a rechad  
el mo kiei el diak a ulebengelel  
el ngar er tia el chutem*



ngmo klungiolel a lekeli sel blul el rodech. E le ngmo se-  
 bechel el di ngii el meliit a melemalt me a diak el melemalt  
 el tekoi el kirel e meruul aike el soal. A Satan a dirrek el  
 uleltelechakl el kmo a Jehovah a dimlak el lolekoi a kle-  
 merang el kirel aike el mera el mo duubech a bo el kelii a  
 rodech. A Eba a mlo oumerang er a Satan, me ngchilebngii  
 a ta er ngii el rodech e mlenga er ngii. E a uriul e ngmilsa  
 bechil me ngdirrek el milenga er ngii. Te mle ungil el me-  
 dengei el kmo te meruul er a tekoi el ble el bleketakl a Dios  
 el dmu er tir el kmo *ngdimlak* el kirir el mo meruul er ngii.  
 Me a lekeli sel rodech, e ngmle durengrir el mo diak el lo-  
 lengesenges er a kmal mle beot el tekoi el meldung er tir.  
 Te ullecholt el kmo te uluuketui er a Demerir el ngar er  
 a eanged e dimlak el sorir a omengederederel. Chouaitia  
 el omeruul el diak el olecholt a omengull el mo er a Ule-  
 meob er tir a kmal diak a roel el musubes!

<sup>12</sup> El ua tiang: Ngua ngera uldesuem a lsekum ke uleme-  
 kerreu e ulemekeroul er a ngelekem el mo klou e ngii a  
 mo diak el lolengesenges er kau er a teletael el olecholt el  
 kmo ngkmal diak el longull me a diak el betik a rengul er  
 kau? Ngulterekokl el kmal mo mekngit a rengum. Me ka  
 bo molebedebek er sel kngtil a rengul a Jehovah el kirel a  
 Adam me a Eba er a lengiltii el mo omtok er ngii.

<sup>13</sup> Ngmlo diak a ungil el uchul me a Jehovah a ome-  
 chei a klengar er a Adam me a Eba me lolemolem el  
 diak a ulebengelel. Me te mlad el mo dibus, el di ua le-  
 dilung a Dios. Ngdimlak lemoiuul a klengar er tir el mo  
 er a kmung ker. Kede medengeli tiang el oak aike el le-  
 dilung a Jehovah el mo er a Adam er a uriul er a bo lak

---

12. Ngera sebechel el ngosukid el mo medengeli a uldesuel a Je-  
 hovah el kirel a blekerdelel a Adam me a Eba er a bo el lomtok er  
 ngii?

13. Ngerang dilung a Jehovah el kmo ngmo duubech el mo er a  
 Adam a lemad, e tiang ngera belkul?

el lolengesenges er ngii el kmo: “Mluut el mor a chutem el ngii cho mlengai er ngii. Ele kau a ulebeob er a chutem, me ke lmuut el mo chutem.” (Genesis 3:19) A Dios a milebii a Adam el ousbech a chebechab er a chutem. (Genesis 2:7) Uchei er isel taem, e ngdimlak a Adam. Me a Jehovah er a ledu el kmo a Adam a lmuut el mo moluut el mo er a chebechab, e ngbelkul a kmo a Adam a lmuut el mo er sel blekerdelel er a uchei el diak a klengar er ngii el chebechab.

*A Adam a mla er a chebechab el mei, me ngliluut el mo er a chebechab*



<sup>14</sup> A Adam me a Eba a mle sebechir el melemolem el ngar el me lmuut er a chelechang, engdi te mlad e le tir el ngileltii el mo diak el olengesenges er a Dios me te mlo er a klengit. Kid er a chelecha el sils a mad, e le sel klengit me a kodall el mla er a Adam a mlodidiuid el mei er kid a renglekir. (Rom 5:12) Sel klengit a di ua meknigtit el rakt el demludiukes er ngii el diak a ta el chad el sebechel el mochib er ngii. Me a telemellel el kodall me ngkmal klou el dellebeakl, me ngcherroued el diak el sechelid. (1 Korinth 15:26) Me kede oba omereng el saul e le Jehovah el kiltmeklii a rolet a olubet el me olsobel er kid er ngii el meknigtit el cheraro!

### **A DODENGELII A MERA EL BLEKERDELEL A KODALL E NGUCHUL A KLUNGIOLED**

<sup>15</sup> A osisechakl er a Biblia el kirel a blekerdelel a kodall a kmal mengelaod a rengud. E le ngdi ua aike el bla deues, a rulekoad a diak el charm a ringel me a ka el meknigtit a rengrir. Ngkmal diak a belkul el demedakt er tir e le ngdiak el sebechir el mekera er kid. Ngdiak el ousbech a ngelseuid me a diak el sebechir el ngosukid. Ngdiak el sebeched el mengedecheduch er tir, me tir a diak el sebechir el mengedecheduch er kid. Te betok el mengeteklel a klechelid a melekoi el kmo ngsebechir el ngosuterir tirke el mla mad, me a rechad el oumerang er tir a mo omesterir a udoud. Engdi a dodengeli a klemerang e ngsebeched el mukerreu me ngdiak demechblad er a rechad el olisechakl a cho- uaisei el blulak.

<sup>16</sup> A oumesingd el klechelid a diak el kengei aike el

---

14. Ngera uchul me kede mad?

15. Ngera uchul me ngmehelaod a rengud a bo dodengeli a klemerang el kirel a blekerdelel a kodall?

16. Ngtecha mengetikaik a osisecheklel a betok el klechelid, e oak ngera el rolet e ngmeruul el uaisei?



lolisechakl a Biblia el kirel a blekerdelir a rulekoad. E ngera uchul? E le osisecheklir a mla mechitikaik er a Satan. Oumesingd el klechelid a melekoi el kmo a rechad a diak el mera el mad, e le uriul er a lemad a bedengir e te mo memolem a klengar er tir er a kmung ker. A Satan a ousbech er tia el blulak el urrechomel er a lmuut el bebil er a blulak el mengesuseu er a rechad el mo cheroid er a Jehovah el Dios. El mekerang a leuaisei?

<sup>17</sup> Ngar er ngii a bebil er a klechelid el lolisechakl el kmo a chad a lsekum ngmekngit, e a uriul er a lemad e ngmo er a basio el bo lemukcharm er a ngau el diak a ulebengelel. Tia el losisechakl a oltuub er a Dios. A Jehovah a Dios er a bltikerreng me ngkmal diak bo el lomekcharm er a rechad el uaisei. (1 Johanes 4:8) Ngera uldesuem el kirel a chad el mengelebus er a ngalek el mlo diak el lolengesenges me ngorreked a chimal ngii el ngalek e melul er a ngau? Ngsebechem el mo olecholt a omengull er kau el mo er ngii el chad me a lechub e ngsoam el mo medengelelii? Ngkmal diak! Ke locha mo omdasu el kirel ngii el chad el kmo ngmera el mekngit el diak el chubechub. Me nguaisei, engdi a Satan a soal a bo doumerang el kmo a Jehovah a omekcharm er a rechad er a ngau el diak a ulebengelel.

<sup>18</sup> A Satan a dirrek el lousbech a bebil er a klechelid el mo olisechakl el kmo a uriul er a lemad a rechad e te mo bladek me a lechub e te deleb el kirir a redingar el mengull e mengebkall er tir. A doltirakl er tia el osisechakl, e tir el mlad a sebechir el mo mesisiich el sechelid me a lechub e te mo kdekudel el cherroued. A rebetok el chad a oumerang er tia el blulak me te medakt er a rulekoad,

---

17. Ngera uchul me a osisechakl el kirel a diak a ulebengelel el ringel a oltuub er a Jehovah?

18. A omengull er a rulekoad ngngilai a uchetemel er a ngera el blulekngel a klechelid?

e mengebkall e mengull er tir. Engdi a Biblia a olisechakl el kmo a rulekoad a mechiuaiu, me kid a redingar a kired el mengull er a di ta el mera el Dios el Jehovah, el ngii a Ulemeob er kid e omeskid aike el rokui el dousbech. —Chocholt 4:11.

<sup>19</sup> Me a omodengeli a klemerang el kirel a blekerdelel a kodall e ngkmal sebecchem el mukerreu me ngdiak mechetikaik er a blulak el lolisechakl a klechelid. Ngdirrek el sebecchel el ngosukau el mo bleketakl er a rengum a bebil er a osisecheklel a Biblia. El ua tiang, sel bo lebleketakl er a rengum el kmo a rechad a diak el di el moiuul a klengar er tir el mo kiei er a kmung ker er a uriul er a kodall, e sel telbiil el kirel a diak a ulebengelel el klengar el ngar er a paradis el chutem a mo er ngii a mera el belkul el kirem.

<sup>20</sup> A irechar, e a melemalt el chad el Job a uleker el kmo: “A lsekum ng mad a chad, e ng sebecchel lmuut el mo chad?” (Job 14:14) Ngsebecchel a chad el mechiuaiu er a kodall el lmuut el me ngar? A tekoi el lolisechakl a Biblia el kirel tiang a mengelaod a rengud, el ua aike el bo domes er a ongingil el bliongel.

19. A dodengeli a klemerang el kirel a blekerdelel a kodall e ngsebecchel el ngosukid el mo bleketakl a rengud a ngera el bebil er a osisecheklel a Biblia?

20. Ngera el ker a bo dosaod er a ongingil el bliongel?

#### AIKE EL LOLISECHAKL A BIBLIA

- A rulekoad a diak lomes me a ka lomdasu. —Olisechakl 9:5.
- A rulekoad a olengull; ngdiak el charm er a ringel.—Johanes 11:11.
- Kid a mad e le kid el mludiukes er a klengit el mla er a Adam.—Rom 5:12.

## A Mera el Omelatk el kirir a Remla Mad el Betik er a Rengum

**Kede mekera e medengei el kmo  
ngmera el mo er ngii a okiis?**

**Ngua ngerang a uldesuel a Jehovah el kirel  
a okisir a rulekoad?**

**Te rua techang a mo mokiis er a kodall?**

MOLATK er kau el leko ke chemiis er a kmal mekngit el cheraro, el mesisiich e bekerurt er kau. Ke ungil medengei el kmo ngdiak el chubechubechad e le ke mla mesang el mekodeterir a rebebil er a resechelim. Ke kmal merengum el chemiis, engdi ngii a di merael el merma kmeed er kau, me ngkmal dikea omeltkem. E ngii a kiul duum er bita er kau a chad el mle olsobel er kau. Ngkmal klou el cheroid a klisichel er ngika el cherrouem, e iaksok er kau el kmo ngmo olengeseu er kau. Ngulterekokl tia el tekoi el rullau el mo ungil a rengum!

<sup>2</sup> Kau a di ua *loltoir* er kau a cheraro. Kid el rokui a uaisei. Ngua aike el desiluub er sel mlo merek el bliongel, a Biblia a omekedong er a kodall el kmo ngcheraro. Ngdiak a ngii di el ta er kid el sebechel el chemiis el mo cheroid er ngii me a lechub el mochib er ngii. Oumesingd er kid a mla mesa ngika el cheraro a lengai a klengar er a rebetik er a re-

---

1-3. Ngera el cheraro a oltoir er kid el rokui, e ngera uchul me a domes a lolisechakl a Biblia e ngmeskid a telkib el ongelaod?

ngud. Engdi a klisichel a Jehovah a lmuut el kmal ngarbab er a klisichel a kodall. A Jehovah a ngike el betik a rengul el chad el me Olsobel, e iaksok el mo tomellii ngii el cheraro, el kodall, me ngdiak el lluat el mo er ngii. A Biblia a olisechakl el kmo: “E ngikel mo kot luriul el cherarou el mo nguemed a kodall.” (1 Korinth 15:26) Tia mera el ungil el chais!

<sup>3</sup> Ka domes er ngika el cheraro el kodall a lolemall er kid. A doruul er tiang, e ngsebechel el ngosukid el mo oba omereng el saul el kirel a telbilel a Jehovah el kmo a rulekoad a lmuut el mo ngar. (Isaia 26:19) Ngoeak a omelatk er a okiis, e te lmuut el me ngar.

### **SEL LEMAD A BETIK ER A RENGUM**

<sup>4</sup> Ngngar er ngii a betik er a rengum el mla mad? A ringel, klengiterreng, me a uldasu el mla tmurk er a bek el cheldechuul a rokui el kmal mo diak el mutekangel. Cho-uaiseikid el taem, e ngkmal kired el mo er a Tekingel a Dios el kirel a ongelaod. (2 Korinth 1:3, 4) A Biblia a ngosukid el mo bleketakl a rengud er a uldesuel a Jehovah me a Jesus el kirel a kodall. A Jesus, el kmal mle cherrungel el okesiul a Demal, a mle medengelii a rengelel a lemad a betik er a rengud. (Johanes 14:9) A Jesus sel ngar er a Jerusalem e ngmle blechoel el mo oldingel er a Lazarus me a rucedal, er a Maria me a Martha, el kiliei er a di mle kmeed el beluu er a Bethany. Te kmal mle ungil el sechelei, e le Biblia a kmo: “A Jesus a mle betik a rengul ra Martha ma merrengel, ma Lazarus.” (Johanes 11:5) Engdi ngdi ua aike el desiluub er sel bliongel er a uchei, a Lazarus a mlad.

---

4. (a) Ngera me a blekerdelel a Jesus el bedul a mlad el betik er a rengul a olisechakl er kid a uldesuel a Jehovah? (b) A Jesus ngmilkebechii a ngera el ileakl el klausechelei?

<sup>5</sup> Ngmle ua ngerang a uldesuel a Jesus er a lemad a sechelil? A bades a ouchais er kid el kmo a Jesus a mlo obengterir a rechedal me a resechelil a Lazarus el ngar er a klengiterreng. A Jesus er a leseterir e ng “kmal mlo meringel ra rengul el mekngit a rengul.” Ngii el bades a melemolem el kmo, “Ma Jesus a lilangel.” (Johanes 11: 33, 35) A Jesus ngmle mekngit a rengul e le ngii el kmal di-kea omeltkel? Ngdiak, e le ngmle medengei el kmo ngdi kmedung e a kmal mengasireng el tekoi a mo duubech. (Johanes 11:3, 4) Engdi ngdirk millechesuar a klengiterreng el mlo er ngii el kodall a uchul.

<sup>6</sup> Tia el kngtil a rengul a Jesus a sebechel el melisiich a rengud. Ngosischeklid el kmo a Jesus me a Demal el Jehovah a ouketui a kodall. Engdi a Jehovah el Dios a sebechel el omtok e mo mesisiich er ngii el cheraro! Me ka me bo desang el kmo a Dios ngirellii a Jesus el mo sebechel el meruul a ngerang.

### **“LAZARUS, BE MTOBED!”**

<sup>7</sup> A Lazarus a mle delekull er a chelsel a ii, me a Jesus a ullengit me lenguu sel bad el mle tengetengel a siseball er ngii el ii el oridii. A Martha a ullekebai er tiang, e le uriul er a eua el klebesei e a bedengel a Lazarus a locha mla omuchel el merael el mo mechut. (Johanes 11:39) A domes er tiang el ngar er a osengel a klechad, e ngkol ngera el omelatk a dirk ngar er ngii?

<sup>8</sup> A bad a militai, e a Jesus a uleldiu el klou a ngerel el kmo: “Lazarus, be mtobed!” Me ngngera dilubech?

---

5, 6. (a) Ngmilekerang a Jesus er a lomes er a rechedal me a resechelil a Lazarus el ngar er a klengiterreng? (b) Ngera uchul me a kngtil a rengul a Jesus a smisiich a rengud?

7, 8. Ngar er a osengir a rechad, e sel blekerdelel a Lazarus ngera uchul me ngkora ua el sal mlo diak a omelatk el kirel, engdi ngerang mirruul er ngii a Jesus?

“Me ngikal mlad a tobedang.” (Johanes 11:43, 44) Ngsebechem el mesa sel deuil a rengrir tirke el chad el mla er sei? A Lazarus a ble lochederir, ngchederir, ngsechelirir, me a lechub e ngkiliei er a bita er tir, tir el rokui el mle mendengi el kmo ngmlad. Engdi, ngkakid el luueta el merma dechor el teloi er tir. Te betok el chad a ulterekokl el kmal ulemechull er a Lazarus el dmeu a rengrir. Ngmera el klou el klisiich er a bebul a kodall a mlocholt er tiang!

<sup>9</sup> A Jesus a dimlak el du el kmo ngdi mle ngii e rullii tia el mengasireng el tekoi. Ngar er a nglunguchel er a uchei er a lomekedong er a Lazarus el me tuobed, e ngmileke-teklii el kmo a Jehovah a mle Uchul a okisir a rulekoad. (Johanes 11:41, 42) A okisel a Lazarus a di ta er aike el etiu el osisiu a blekerdelel el ongasireng el llechukl er a Tekingel a Dios.\* Me ngmo dmeu a rengud a donguiu e dosuub ngii el tekoi. Ngosisecheklid el kmo a Dios a diak el longetukl er a rechad, e le tirke el milekiis a ngar er ngii er tir a rengeasek me a remechuodel, me a resechal me a redil, me a rechad er a Israel me a rediak. Ngmera el klou el deurreng a desa er aika el cheldechoduch! El di ua tiang, a Jesus er a lokisii a ngeasek el ekebil er a kodall, e a demal me a delal a “kmal mlo imis el dmeu a rengrir.” (Markus 5: 42, NW) Nguaisei, a Jehovah a milsterir a ungil el uchul a deuil a rengrir me ngulterekokl el diak el mereched el obes er ngii.

<sup>10</sup> Me nguaisei, engdi tirke el lulekisterir a Jesus a liluut el mad. Tiang belkul a kmo ngdimlak a belkul a lolekiis er

---

\* Aike el bebil er a omesodel a okiis a debetik er a 1 King 17:17-24; 2 King 4:32-37; 13:20, 21; Matteus 28:5-7; Lukas 7:11-17; 8:40-56; Relilir 9:36-42; me a 20:7-12.

---

9, 10. (a) A Jesus ngmilekerang er a lomeketakl er ngike el uchul a klisiich el olekiis er a Lazarus? (b) Ngera mo klungioled a bo donguiu a loleko a Biblia el kirel a okiis?

tir er a kodall? Ngkmal diak leuaisei. Aika el cheldechcheduch er a Biblia a olterekokl er a kmal klou a ultutelel el klemerang e meskid a omelatk.

### **A TEKOI EL DESUUB ER A CHISEL A OKIIS EL MLA ER NGII**


<sup>11</sup> A Biblia a olisechakl el kmo a rulekoad a “diak a ngeral lodengei.” Te mla mad me ngdikea el ngar er a ngii di el ker. A cheldechchedechal a Lazarus a meketeklii tiang. Uriul er a lluut el me ngar, e a Lazarus nguldeu a rengrir a rechad el kirel a omesodel a klengar el ngar er ngii er a eanged? Me a lechub ngulemekdakt er tir er a kdekudel el chisel a beluu er a ngau? Ngdiak. Ngdiak a ngerang el ngar er a Biblia el ouchais a chouaisei el tekingel a Lazarus. Chelsel aike el eua el klebesei el ble lulekoad, e ngdimlak a “ngeral lodengei.” (Olisechakl 9:5) A Lazarus a di milechuiuai el ngar er a kodall.—Johanes 11:11.

<sup>12</sup> A cheldechchedechal a Lazarus a dirrek el olisechakl er kid el kmo a okiis a mera el tekoi el ngar er ngii el diak di el kora di cheldechcheduch el chelid. A Jesus a ulekisii a Lazarus er a mederir a rebetok el ocholt. Ngmo lmuut er a remengeteklel a klechelid el uluuketui er a Jesus me ngdimlak el sebechir el loumededenger er tia el ongasi-reng. Me te bai millekoi el kmo: “Ngikal chad [el Jesus] ngrulla betok lolangch. E kid a mekerang?” (Johanes 11:47) Te betok a mlo omes er ngika el mlokiis er a kodall el chad. Tia mlo uchul e ngliluut el mo betok el chad a mlo olecholt a klaumerang er tir er a Jesus. Te mle sebechir el mesang er a tekoi el dilubech el mo er a Lazarus el kmo, a Jesus a mera el mlodurokl er a Dios el mei. Tia

---


11. A chisel a okisel a Lazarus, ngmekera lolterekokl er a klemerang el lolekoi er ngii a Olisechakl 9:5?

12. Ngera uchul me ngsebechel el ulterekokl a rengud el kmo a okisel a Lazarus a mera el dilubech?



*A Elias a ulekisii  
a ngelekel a mellakl el dil.  
—1 King 17:17-24*

*A apostol el Petrus a  
ulekisii a Kristiano el  
redil el ngklel a Dorkas.  
—Rellir 9:36-42*



*A okisel a Lazarus er a kodall  
a mlo uchul a kmal klou el  
deurreng.—Johanes 11:38-44*



el tekoi a kmal mle bleketakl a uchul me a rebebil er a remengeteklel a klechelid er a Rechijudea a mlo melib a kodellel a Jesus me a Lazarus.—Johanes 11:53; 12:9-11.

<sup>13</sup> Tia ngkora klebelung a dekengei el kmo a okiis a mera el mla er ngii? Ngdiak, e le Jesus a ullisechakl el kmo a ta er a klebesei e “tirikel rokui el ngara debull” a mo mekiis. (Johanes 5:28) A Jehovah a Ulemeob a rokui el klengar. Me a leuaisei, e ngkol meringel er kid el mo oumerang el kmo ngsebechel el olutii a osisiu el klengar el msa chad? Ngulterekokl el klou er tia el omeruul a di mo ultuil er a omelebedebekel a Jehovah. Ngika ngsebechel el lotketerir tirke el betik er a rengud el ulekoad? Ngngar er ngii a diak lemochur a ildisel el btuch el ngar er a eanged, engdi a Dios a ulemngakl a dersta me a dersta er ngii! (Isaia 40:26) Me a leuaisei, e a Jehovah a ulterekokl el sebechel el dobedebek a bek el komakai el teletelir a rebetik er a rengud, e kltmokl el mo olluut a klengar er tir.

<sup>14</sup> Engdi ngua ngera osengel a Jehovah el kirel a okisir a rulekoad? A Biblia a olisechakl el kmo ngkmal semeriar el mo olekiis er a rulekoad. A melemalt el chad el Job a uleker el kmo: “A lsekum ng mad a chad, e ng sebechel lmuut el mo chad?” (Job 14:14) A Job a milsaod el kirel a omengiil el ngar er a debull el mo er sel taem el Dios a mo lotkii el lmuut el okisii. Me ngdilul er a Jehovah el kmo: “Ke mo omekedong, e ngak a mo onger er kau. E le ngkesos a rengum el kirel a urerel a chimam.”—Job 14:15, NW.

<sup>15</sup> Ka di molebedebek er tiang! A Jehovah a kmal ou-

---

13. Ngera me ngsebeched el oumerang el kmo a Jehovah a mera el sebechel el olekiis er a rulekoad?

14, 15. Ngdi ua ledilung a Job, ngua ngera uldesuel a Jehovah el kirel a okisir a rulekoad?

reng el mo olekiis er a rulekoad el lmuut el me ngar. Tia ngdiak el sal oldeu a rengud sel bo dodengei el kmo nguaisei a uldesuel a Jehovah? Engdi kuk mekerang a okiis er a ngar er a medad el klebesei? Te rua techang a mo mekiis, e mekiis el mo er ker?

### **“TIRIKEL ROKUI EL NGARA DEBULL”**

<sup>16</sup> A omesodel a okiis el ngar er a Biblia a olisechakl er kid a betok el kirel a okiis el mo er ngii er a ngar er a medad el taem. A rechad el mloluut a klengar er tir a mlo sebechir el liluut el mo dmak tir me a rebetik er a rengrir. A okiis er a kodall el mo er ngii er a ngar er a medad el taem a lmuut el mo ungil. Ngdi ua aike el desiluub er a 3 el Bliongel, a moktek er a Dios a mle soal a beluulechad el rokir a bo el paradis. Me seikid, e a rulekoad a diak bo el bekiis el mo er a chelsel a beluulechad el ngar er ngii a mekemad me a delengerenger me a secher er a chelsel. Ngmo er ngii a techellir el mo kiei el mo cherechar el ngar er a chelsel a beluulechad el ngar er a budech me a deurreng.

<sup>17</sup> Te rua techang a mo mekiis? A Jesus a dilu el kmo “tirikel rokui el ngara debull” a me tuobed. (Johanes 5:28, 29) Ngdi osisiu, a Chocholt 20:13 a melekoi el kmo: “Ma daob a ulelteterir tirikel mlad el ngara chelsel, ma Kodall ma Hades me ngulelteterir tirikel mlad el ngara chelsel.” A “Hades” a melutk el mo er a debellel a klechad. (Momes er a Bebil er a Omesodel, er a 242-4 el llet.) A debull a mo bechachau. E le tirke el betok el biliol el olengull el ngar er ngii a rokui el lmuut el me ngar. A apostol el Paulus a millekoi el kmo: “Ngmorngii chokiis rar melemalt mar diak le melemalt.” (Rellir 24:15) Tia nnggera belkul?

---

16. A rulekoad te mo mekiis el mo er a ua ngera el blekeradel?

17. Ngmo ua ngera klungel a okiis el mo er ngii?

<sup>18</sup> A ‘remelemalt’ a uldimukl er tir tirke el betok el chad el donguiu el kirir el ngar er a chelsel a Biblia, el kiliei er a uchei er a lemei er a beluulechad a Jesus. Nglocha sebechem el mo lotkii a Noah, Abraham, Sarah, Moses, Ruth, Esther me a relmuut el bebil. A bebil er tirkaikid el sechal me a redil el ullecholt a klaumerang er tir el mo er a Dios a losaod er tir a Hebru er a 11 el bliongel. Engdi a ‘remelemalt’ a dirrek el uldimukl er tir tirke el mesiuangel a Jehovah el mlad er a chelecha el taem er kid. Kede oba omereng el saul el kirel a omelatker a okiis e le ngsebechel el rullid el mo mimokl er a dekted el mad.—Hebru 2:15.

<sup>19</sup> E kuk mekerang tirke el chad el dimlak el losiou er a Jehovah el dimlak a ta el bo lodengeli? Tirka el betok el biliol el “diak le melemalt” a diak el obes er tir. Tir me te dirrek el mo mokiis er a kodall e mo er ngii a techellir el mo mesuub el kirel a mera el Dios e mo mesiou er ngii. Ngar er a chelsel a ta el telael el rak, e a rulekoad a mo mekiis e mo er ngii a techellir el mo teloi er a ruumerang el ngar tia el chutem el mesiou er a Jehovah. Tia kmal mo ungil el taem. Tiaikid sel taem el lomekedong er ngii a Biblia el kmo ng Sils er a Kerrekeriil.\*

<sup>20</sup> Tiang belkul a kmo a rokui el chad el mle ta el lengar, te rokui el lmuut el mo mekiis er a kodall? Ngdiak. A Biblia a melekoi el kmo a rebibil er a rulekoad a ngar er a “Gehenna.” (Lukas 12:5) A Gehenna a ngiluu a ngklel er a blil a ulenguotel el mla er a ikrel a Jerusalem er a irechar. A

---

\* Kirel a lmuut el betok el omesodel a Sils er a Kerrekeriil me a teko el bo el ultuil er ngii e oukerrekeriil, e momes er a Bebil er a Omesodel, er a 244-6 el llel tia el babier.

---

18. Te rua techang a uldimukl er a ‘remelemalt’ el mo mekiis, e tia el omelatker ngera ngrullii el eko er kau?

19. Te rua techang tirke el “diak le melemalt”? Me a Jehovah ngoeak a klechubechub e omesterir a ngera el techall?

20. Ngerang a Gehenna, e rua techang a mo er ngii?

cheklechir a rulekoad me a ulenguotel a lullul er isei. A cheklechir a rechad el mlechoit er sei a lulemes a Rechijudea el kmo ngdimlak el rredemelel a omelakl me a okiis. Me seikid, e a Gehenna a mle melemalt el okesiul a diak a ulebengelel el tellemall. Me alta e a Jesus a ngar er ngii a ngerechelel el mo oukerrekeriil er a redi ngar me a rulekoad, engdi a Jehovah ngii ngike el mo olterekokl er a kerrekeriil. (Rellir 10:42) Me ngdiak bo lolekiis er a rechad el bla loukerrekeriil er tir el kmo te mekngit el chad e diak el sebechir el mengodech a blekerdelir.

### A "OKIIS EL MO ER A EANGED"

<sup>21</sup> A Biblia a dirrek el melekoi el kirel a kuk ta er a okiis, el ngii a "okiis el mo er a eanged." Ngdi chimo el uaisei el okiis a losaod er ngii a Biblia, el ngii a okisel a Jesus Kristus.

<sup>22</sup> Uriul er a lokodir a Jesus, e a Jehovah a dimlak el becherei ngika el blak a rengul el Ngelekel me lolemolem el ngar er a chesel a debull. (Psalm 16:10; Rellir 13:34, 35) A Dios a ulekisii a Jesus el me ngar engdi ngdimlak el oba bedengel a klechad. A apostol el Petrus a mesaod el kirel a Kristus el kmo "ngmlo chad e mokoad, e mlukngar" me bo el sebechel el mo er a di mla blekerdelel a klengar er ngii er a lengar er a eanged. (1 Petrus 3:18) Tia mera el ongasi-reng e le Jesus a luueta el mocha ngar el ua mesisiich el anghel! (1 Korinth 15:3-6) A Jesus a mle kot el chad el ngilu chouaitia el chetengakl el blekerdelel a okiis. (Johanes 3:13) Engdi ngdiak el di el ngii el tang a mekiis el uaisei.

<sup>23</sup> A Jesus a mle medengei el kmo ngdi kmedung e nglmoot el mo er a eanged, me ngdilu er a reblak a rengrir

---

21, 22. (a) Ngera kuk ta er a bedengel a okiis el ngar er ngii? (b) Ngtecha ngike el mle kot el nguua a okiis el mo er a eanged?

23, 24. Te rua techang a rullii a "kekerel delebechel" er a Jesus, e mo tela ildisir?

el obengkel el kmo ngmo 'mendedmokl' er a basio el kirir er isei. (Johanes 14:2) A Jesus a millekoi el kirir tirkaikid el mo er a eanged el obengkel el kmo te "kekerel delebechel." (Lukas 12:32) Te tela el chad a uldimukl er a chelsel itia el kekerei el cheldebechel er a reblak a rengrir el Kristiano? Ngar er a Chocholt 14:1, e a apostol el Johanes a melekoi el kmo: "E a ksal omes, e mesang, a Ngelekel a sib [el Jesus Kristus] a dechor ra Rois el Zion, ma dart ma chokouang ma cheual telael el chad el obengkel, el ngarngii a ngklel a Ngelekel a sib ma ngklel a Demal el llechukl ra medal a bderrir."

<sup>24</sup> Tirka el 144,000 el Kristiano, el uldimukl er a reblak a rengrir el apostol er a Jesus, a mo mekiis el mo nguu a klengar el ngar er a eanged. A okisir, ngmo er ngii er a oi-ngerang? A apostol el Paulus a milluches el kmo ngmo duubech er a taem er a demiel a Kristus. (1 Korinth 15:23) Ngdi ua aike el bo mosuub er a 9 el Bliongel, kid a kiei er a chelsel ngii el taem er a chelechang. Me tirke el dirk medechel el ngar er a ulecherangel er a 144,000 er a chelecha el taem er kid sel lemad, e ngdi obutek a mederir e tir a mekiis er a kodall el mo nguu a klengar el ngar er a eanged. (1 Korinth 15:51-55) Engdi tia el klou el ildois er a klechad a oba omelatkl el mo mekiis er a kodall er a ngar er a medad el taem el mo kiei er a chelsel a Paradis el chutem.

<sup>25</sup> A Jehovah a ulterekokl el mo mesisiich er a cherroued el kodall, me ngmo okngemedii el mo cherechar! (Isaia 25:8) Engdi ke locha mo melebedebek el kmo, 'A remekiis el mo nguu a klengar el ngar er a eanged, ngngera te mo meruul er sei?' Te mo uldimukl er a mengasireng el omengederederel a Renged. Kede mo mesuub a lmuut el betok el kirel ngii el kabelment el ngar er a ongingil el bliongel.

---

25. Ngera mo soadel er a ongingil el bliongel?

### AIKE EL LOLISECHAKL A BIBLIA

- A omesodel a okiis el ngar er a Biblia a meskid a ulterekokl el omelatk.—Johanes 11:39-44.
- A Jehovah a kmal kesos a rengul el mo olekiis er a rulekoad el lmuut el me ngar.—Job 14:13-15.
- Tirke el rokui el ngar er a debull a mo mekiis er a kodall.—Johanes 5:28, 29.

*Ngar er a paradis, e a rulekoad a lmuut el mo mekiis  
e mo dmak tir me a rebetik er a rengir*



## **Ngerang a Rengedel a Dios?**

**Ngera ngouchais er kid a Biblia el kirel  
a Rengedel a Dios?**

**Ngera ngmo meruul er ngii?**

**Ngoingerang e ngmo meruul a soal a  
Dios er tia el chutem?**

TE BETOK el miliol el chad el meliuekl er a beluulechad a medengeli el nglunguuch el lebilecherei a Jesus el ua lekerebai er a lolisechakl er a redisaipto er ngii el meluluuch. Tiang a kmal klou a belkul el nglunguuch, me a omesodel aike el kot el edei el tekoi er ngii, a mo ngo-sukau el suub a lmuut el betok el kirel aike el mera el lolisechakl a Biblia.

<sup>2</sup> Ngar er a uchelel, e a Jesus a dilu er a rulerrenges er ngii el kmo: "Misei e moluluuch el ua ika el kmo: 'A Demmam el ngara eanged, le mechedaol a ngklem. A rengedem le mei, ma uldesuel a rengum le meruul ra belulechad el ua chomerellel ra eanged.'" (Matteus 6:9-13) Ngua ngera klungel a ultutelel aika el kldei el tekoi el lo-lengit el ngar er tia el nglunguuch?

<sup>3</sup> Ngkmal betok a bla desuub el kirel a ngklel a Dios el Jehovah. E dirrek el mla telkib el smaod a soal me aike el bla el rruul me a tekoi el dirk medechel el bo el lo-

---

1. Ngera el mrael a chisel el nglunguuch a bo dorritter er ngii?

2. Ngera edei er aike el tekoi el Jesus a ullisechakl er a redisaipto er ngii el mo meluluuch el kirel?

3. Ngera kired el mo medengei el kirel a Rengedel a Dios?

ruul el kirel a klechad. Engdi a Jesus ngmillekoi el kirel a ngerang er a ledu er kid me doluluuch el kmo: “A rengedem le mei”? Ngerang a Rengedel a Dios? E a mei er ngii ngmekera bo el longebkall me a lechub e longedaol er a ngklel a Dios? Tia el tekoi el Renged a lemei, ngngera de-leuill er ngii me a omerellel a soal a Dios?

### NGERANG A RENGEDEL A DIOS

<sup>4</sup> A Rengedel a Dios a kabelment el kiltmeklii a Jehovah el Dios e di mle ngii el ngiltii a king er ngii. Me ngtecha ngika el King er a Rengedel a Dios? Ng Jesus Kristus. A Jesus el ua King a kuk ngar er a bab er a rokui el chad el mengedereder e okedongall el “Rubak rar rubak e King rar king.” (Chocholt 17:14) Ngngar er ngii a klisichel el mo meruul a lmuut el betok el ungil el tekoi el kuk betok er a bla el rruul a *ngii di* el chad el mla mengedereder.

<sup>5</sup> A Rengedel a Dios ngmo mengedereder el ngar er ker? Me a Jesus ngngar er ker? Ke locha melebedebek er obla msuubii el kmo te milekudir er a teluo el kerrekar, engdi ngii a liluut el mekiis er a kodall. Telkib el taem er a uriul er isei e ngngilasech el mo er a eanged. (Rellir 2:33) Me a Biblia a omekedong er a Rengedel a Dios el kmo ng “rengedel el ngara eanged.” (2 Timoteus 4:18) Me alta ngngar er a eanged, engdi ngmo mengedereder er a be-luulechad.—Chocholt 11:15.

<sup>6</sup> Ngera rullii a Jesus el kmal ungil el Merreder? A kot, e ngdiak el mad. A lomekesiu er a Jesus me a remerreder el chad, e a Biblia a omekedong er ngii el kmo ngngike el “diak le ngemed [a] klengar” er ngii. (Hebru 7:16) Tiang a belkul a kmo aike el rokui el ungil el tekoi el bo el loruul

4. Ngerang a Rengedel a Dios, e techa King er ngii?

5. A Rengedel a Dios ngngar er ker e mengedereder er a ngerang?

6, 7. Ngera rullii a Jesus el kmal ungil el Merreder?



a Jesus a melemolem el ngar er ngii el mo cherechar. E ngii a *ulterekokl el mo* meruul a meklou e ungil el tekoi.

<sup>7</sup> Ka molebedebek er a ulaoch er a Biblia el kirel a Jesus el kmo: “A klisichel a Rubak a mo msa llomesereng, ma klemedengei, ma duch el mo mengedereder er a re chedal. Ng mo medengeli a soal a Rubak e mo meluu er ngii, e mo metik er a deureng el ngar omesiungel. Ng diak bo loukerrekeriil el okiu a ikel le ues ma ikel le renges; ng mo melemalt el oukerrekeriil er a re mechebuul, e mesebechakl a llemeltir a re ngariou a rengrir.” (Isaia 11:2-4) Aika el tekoi a ochotii el kmo a Jesus a mo melemalt e chubechub el Merreder el mo mengedereder er a rechad el ngar er a beluulechad. Kau ngdiak el soam el mo chederedall er a uaisei el merreder?

<sup>8</sup> Tiakid a ta er a klemarang el kirel a Rengedel a Dios el kmo: A Jesus a mo er ngii a rechad el mo obengkel el mengedereder. El di ua tiang, a apostol el Paulus a dilu er a Timoteus el kmo: “Ma doutekangel, e kede dirrek el mo mengedereder lobengkel.” (2 Timoteus 2:12) Nguaisei, a Paulus me a Timoteus me a lmuut el bebil er a reblak a rengrir el chad el lullilt er tir a Dios a mo mengedereder el obengkel a Jesus el ngar er a Rengedel a eanged. Te tela el chad a mo er tir a uaisei el techall?

<sup>9</sup> Ngdi ua aike el ulebeketakl er a 7 el Bliongel er tia el babier, a apostol el Johanes a lebilsa ues el kirel a “ngelekel a sib [el Jesus Kristus el] dechor ra Rois el Zion [el ngii a deruchellel er a omengedereder el ngar er a eanged], ma dart ma chokouang ma cheual telael el chad el obengkel, el ngarngii a ngklel a Ngelekel a sib ma ngklel a Demal el llechukl ra medal a bderrir.” Tirka el 144,000 te rua techang?

8. Te rua techang a mo mengedereder el obengkel a Jesus?

9. Te telang a mo mengedereder el obengkel a Jesus, e oingerang e a Dios a mlo omuchel el melilt er tir?

A Johanes a di ngii el ouchais er kid el kmo: "Itirikai tirikel obengkel a Ngelekel a sib el mor sel ngiidi le ker el le bor ngii; itirikai tirikel mlengubet el mlara delongelir ar chad el mo kot el rodech el kirel a Dios ma Ngelekel a sib." (Chocholt 14:1, 4) Me tirka tirke el blak a rengrir el ulebengkel a Jesus Kristus el mle ileakl el mengilt el mo mengedereder el ngar er a eanged el obengkel. Me a uriul er a lebekiis er a kodall el mo ngmai a klengar er tir er a eanged, "e te mo mengedereder ra belulechad" el obengkel a Jesus. (Chocholt 5:10) Me ngulemuchel er a taem er a rechapostol el mrael el mei, e a Dios a millilt er a reblak a rengrir el Kristiano el mo mengerrungel er tia el ochur el 144,000.

<sup>10</sup> Me a longetmokl el kirel a Jesus me a re 144,000 el mo mengedereder er a klechad e a kmal klou el bltkil a rengul a Dios a mlocholt. E le kot, e a Jesus a ungil el mendengei el kmo ngua ngerang a chelitechetul me a rengelel a klechad. A Paulus a dilu el kmo a Jesus "a diak lak el sebechel chuub a chelitechetud, ele ngua kid el mlor ngii chomengarm el kirel a bek el tekoi, ngdi ngii a dimlak le bora klengit." (Hebru 4:15; 5:8) Me a rechad el mo obengkel el mengedereder me te dirrek el chilarm er a rengelel a klechad e uluutekangel. Me a lmuut el tang, te dirrek el chilarm er a diak el cherrungel el klengar, e mle kirir el outekangel a bek el bedengel a secher. Te ulterekokl el mo oba ungil el klemedengei er aike el mondai el bo el chelebangel a rechad!

### **NGERANG MO MERUUL ER NGII A RENGEDEL A DIOS?**

<sup>11</sup> A Jesus er a ledu el kmo a redisaiplo er ngii a kirir

---

10. Ngera me ngochotel a bltkil a rengul a Dios a bo longedereder er a klechad a Jesus me a re 144,000?

11. Ngera uchul me a Jesus a dilu er a redisaiplo er ngii el kmo ngkirir el meluluuch el kirel a soal a Dios me ngmo meketmokl er a eanged?

el meluluuch el olengit er a Rengedel a Dios me lemei, e ngdirrek el dilu el kmo ngkirir el olengit me a soal a Dios lemeruul er tia el “belulechad el ua chomere-llel ra eanged.” A Dios a ngar er a eanged, me a reblak a rengrir el anghel er ngii a mengetmokl aike el soal er a eanged. Ngar er a 3 el Bliongel, e kede silubii el kmo a mekngit el anghel a mlo diak loruul a soal a Dios e chil-tikikii a Adam me a Eba el mlo er a klengit. Ngar er a 10 el Bliongel, e kede mo mesuub a lmuut el betok el osisecheklel a Biblia el kirel ngii el mekngit el anghel, el ngii a dodengeli el Satan el Diabelong. A Satan me a re-bebil er a rechanghel el ngileltii el mo oltirakl er ngii a lebilechititerir, me ngmle telkib el taem el lolemolem el kiei er a eanged. Me seikid, e ngdimlak el rokui el ngar er a eanged a mirruul a soal a Dios. Tia el blekeradel a mo kirel el mengodech sel bo el omuchel el mengede-reder a Rengedel a Dios. Ngike el mlo king, el Jesus Kristus, a mle kirel el mo oumekemad er a Satan.—Chocholt 12:7-9.

<sup>12</sup> A ongingil el ulaoch a smodii a tekoi el kirel el mo duubech el kmo: “Mitia e ak rirengesii a kloul ngor el ngara eanged el kmo, ‘Chelecha e ngmla morngii cholsobel, ma klisiich, ma renged ra Dios er kid, ma kli-sichel chomerreder ra Kristus er ngii, le ngikel oltutakl rar udam er kid el oltutakl er tir ra medal a Dios ra llo-mes ma klebesei a mla obidokl el moriou.’ ” (Chocholt 12:10) Ke miltab aike el teblo el meklou a ultutelel el te-koi el losaad tia el bades? A kot, e a Rengedel a Dios el ngar er a cheungel a Jesus Kristus a omuchel el menge-dederer. E a ongerung, e a Satan a obidokl er a eanged el meriou el mei er a chutem.

---

12. Ngera el teblo el meklou a ultutelel el tekoi el dilubech a losaad a Chocholt 12:10?

<sup>13</sup> Ngera mlo rsel aika el teblo el meklou a ultutelel el tekoi el mlo er ngii? Kede menguii el kirel a tekoi el dilubech er a eanged el kmo: “Misei e kemiul eanged me tirikel kiei el ngara chelsel, bo le kloul dmeu a rengmiu!” (Chocholt 12:12) Nguaisei, tirke el blak a rengrir el anghel el ngar er a eanged a oldeu a rengrir e le Satan me a remekngit el anghel er ngii a mla mo dibus me a rokui el medechel er a eanged a di tirke el blak a rengrir el mo er a Jehovah e merekong. Me ngngar er ngii a cherrungel el dikea lemetemall el budech me a kltarreng er isei. Me a soal a Dios a merella er a eanged.

<sup>14</sup> E kuk mekera tia el chutem? A Biblia a kmo: “Ngdi kom chebuul, kaul chutem ma daob, ele diabelong a mocha medengei el kmo ngkekedeb a taem er ngii, me ngoba meringel cheldechuderreng lechika er kemiu!” (Chocholt 12:12) A Satan a kesib a rengul er a lemodik er a eanged e medengei el kmo ngkmal kedebengang a temel el medechel. Me ngoba ngasecherreng e omuchel a uldikel, me a lechub e ng “chelebuul” er a bebul a chutem. Kede lmuut el mo mesuub a betok el kirel aika el “chelebuul” el ngar er a ongingil el bliongel. Me sel dolatk er tiang, e kede mo oker el kmo, Ngmekera Rengedel a Dios a bo el loruul a soal el ngar er tia el chutem?

<sup>15</sup> Ka bo molebedebek el kmo ngera sel mle soal a Dios el kirel tia el chutem. Ke silubii tia el tekoi el ngar er a 3 el Bliongel. Ngar er a Eden, e a Dios a ulechotii el kmo ngmle soal tia el chutem a bo el paradisi el mui er a rediak el mad e melemalt el chad. A Satan a rirellii a Adam me a Eba me te mlo er a klengit, engdi tia el tekoi a di mla er

---

13. A Satan er a lemodik er a eanged e ngngera mlo rsel?

14. A Satan el mlodik el mei er tia el chutem ngmlo uchul a ngerang?

15. A Dios ngngera soal el kirel tia el chutem?

ngii a lerellii er a otutel a moktek er a Dios el kirel tia el chutem el dimlak el ngedechii. Ngdirk ngar er a telbilel a Jehovah el soal “a re melemalt a [bo el] ungilbesrir el kiei er a chelsel a beluu e mo oubeluu er ngii el di blechoel.” (Psalm 37:29) E a Rengedel a Dios a mo rullii tiang. El oeak a ngera el rolel?

<sup>16</sup> Ka molebedebek er a ulaoch el debetik er ngii er a Daniel 2:44. Ngar isei e kede menguiiu el kmo: “Me sel taem el lorreder tirkel king, e a Dios el ngar a eanged a mo toketekii a rengedel el mo diak a ulebengelel. Misel renged a diak a sebecchel el mo mesisiich er ngii, e ng bai mo okngemed a ikel bebil er a renged el rokui e sola e ngii a mo medechel el mo cherechar.” Tiang ngera ngouchais er kid el kirel a Rengedel a Dios?

<sup>17</sup> A kot, e ngouchais er kid el kmo a Rengedel a Dios a mo meketmokl er “sel taem el lorreder tirkel king” me a lechub e ngsel taem el dirk el ngar er ngii a bebil er a renged el mengedereder. Ongerung, e ngouchais er kid el kmo a Renged a di ngar er ngii el mo cherechar. Ngdiak a mo mesisiich er ngii me a ka bo el mutechei er a kuk ngodech el kabelment. Ongedei, e kede mesa el kmo ngmo er ngii a mekemad er a delongelel a Rengedel a Dios me aika el renged er tia el beluulechad, e a Rengedel a Dios a mo mesisiich er ngii el mekemad. Me a ulebongel er ngii, engdi mo ta el Rengedel a Dios a kabelment el mengedereder er a klechad. Me a rechad el mo chederedall er ngii a mo oldeu a rengrir er a kot el ungil el omengedereder el kol ta el bocha er ngii.

<sup>18</sup> Ngbetok a lolekoi a Biblia el kirel sel ulebongel el mekemad el mo er ngii er a delongelel a Rengedel a Dios me

---

16, 17. A Daniel 2:44 ngera ngouchais el kirel a Rengedel a Dios?  
 18. Ngera ngklel sel ulebongel el mekemad el mo er ngii er a delongelel a Rengedel a Dios me aika el kabelment er tia el chutem?

aika el kabelment er tia el beluulechad. El di ua tiang, ngolisechakl el kmo sel lolekeed a ulebongel, e a remekngit el anghel a mo omerk a blulak el mo mengeblad er a 'reking ra belulechad el rokir.' El ngera moktek er tir? Ngmo "chudelterir el kirel sel klaumekemad er sel kloul sils ra Dios, el Cherrengel el a klisiich." Me a reking er a beluulechad el rokir a mo cheldull er "sel lulngakl el Armageddon el tekoi ra Hebru." (Chocholt 16:14, 16) A tekoi el medung er a chelsel aika el teblo el bades a uchul me sel ulebongel el klautok er a delongel el a kabelment er a klechad me a Rengedel a Dios a okedongall el kmo ngmekemad er a Har-Magedon me a lechub e ng Armageddon.

<sup>19</sup> A Rengedel a Dios ngera ngmo kutmeklii el oeak a Armageddon? Ka molebedebek el kmo ngera soal a Dios el kirel tia el chutem? Ngmle moktek er a Jehovah el Dios el soal a beluulechad a bo el mui er a remelemalt e cherrungel el chad el ngar er a Paradis e mesiou er ngii. Ngera olekebai er a chouaisei el tekoi me ngdiak el metkmokl er a chelechang? A kot, e kid a ngar er a klengit, me kede mo smecher e mad. Engdi kede silubii er a 5 el Bliongel el kmo a Jesus a mlad el kired me bo el uchul e bo el sebeched el mo kiei el mo cherechar. Ke locha dirk melatk a tekoi el llechukl er a Evangkelio er a Johanes el kmo: "A kllungel a bltkil a rengul a Dios era belulechad a uchul me ngmilsa dital Ngelekel, me tirikel rokui loumera er ngii a diak bo lriid, e bai mo oba diak a ullebengelel klengar."—Johanes 3:16.

<sup>20</sup> A lmuut el ta er a mondai a kmo a rebetok el chad a meruul a mekngit el tekoi. Te omulak e mengeblad e ngar er a deleboes el omeruul. Ngdiak el *sorir* el meruul a soal a Dios, me te mo metemall sel lebo er ngii a

---

19, 20. Ngera olekebai a soal a Dios me ngdiak el sebechel el metkmokl er a chutem er a chelechang?

mekemedil a Dios er a Armageddon. (Psalm 37:10) Ngdirrek el kabelment el mengedereder er a chelechang a diak lolisiich er a rechad el mo meruul a soal a Dios. Ngbetok el kabelment a mechitechut, me a lechub e ngmekngit el mengedereder er a rechad, me a lechub e ngmeruul a betok el chelebirukel. A Biblia a bleketakl el melekoi el kmo: “A re bebil er a re chad er tial beluulchad a ngar ngii a klichir, e a re bebil a mo chuarm er tir.”—Olisechakl 8:9.

<sup>21</sup> Uriul er a Armageddon, e a rechad a mo ngar er a cheungel a di ta el kabelment, el ngii a Rengedel a Dios. Tia el Renged a mo meruul a soal a Dios el oak a betok el mengasireng el klengeltengat. El di ua tiang, ngmo choridii a Satan me a remekngit el anghel er ngii. (Chocholt 20:1-3) A klisichel a tengetengel a Jesus a mo motaut, me seikid e a reblak a rengrir el chad a dikea lluat el mo smecher el mad. Ngbai, ngar er a cheungel a omengederederel a Renged e a rechad a mo sebechir el kiei el mo cherechar. (Chocholt 22:1-3) A beluulechad a mo meketmokl el mo paradis. Seikid, e a Renged a mo remuul a soal a Dios er tia el chutem e mo odengesii a ngklel. Tiang a belkul a kmo ngar er a cheungel a Rengedel a Dios, e a rokui el chad a mo mengebkall er a ngklel a Jehovah.

### **OINGERANG E A RENGEDEL A DIOS A MO OUREOR?**

<sup>22</sup> A Jesus er a ledu er a rulebengkel el mo meluluuch el kmo, “A rengedem le mei” e ngmle bleketakl el kmo a Renged a dirkak el mei er seikid el taem. Me ngmlei er sera lengasech el mo er a eanged? Ngdimlak, e le Petrus me a

---

21. Ngmekerang a Renged a bo el loruul a soal a Dios er tia el chutem?

22. Ngera uchul me kede medengei el kmo a Rengedel a Dios a dimlak el mei er a dirk lengar er a chutem a Jesus me a dirrek el telkib el taem er a uriul er a lebekiis er a kodall?



*A Satan me a remekngit el anghel er  
ngii er a lemodik er a eanged e ngmlo  
uchul a chelebuul el mei er a chutem.  
Chouaika el chelebuul a di  
kmedung e ngmo nguemed*



Paulus a dul millekoi el kmo a uriul er a lemokiis a Jesus, e a ulaoch el ngar er a Psalm 110:1 a mlotaut er ngii er a ledu el kmo: "A [Jehovah] a dilu er a rubak er ngak el king el kmo, 'Bo mdengchokl er a kadekmek, el dimerkmo kngititerir a re cherrouem el mor eungel ochim.'" (Rellir 2:32-35; Hebru 10:12, 13) Ngmle kirel el mengiil er a uchei er a bo el omuchel el mengedereder.

<sup>23</sup> El ua klemengetel a ngerang? Ngar er aike el rak el ngar er a ulebengelel a 1800 me a uchelel a 1900, e a reblak a rengrir el ngalek er a skuul er a Biblia a mlekekokerir el mo medengei el kmo tia el taem er a omengiil a mo merek er a rak er a 1914. (Kirel tia el rak, e momes er a Bebil er a Omesodel er a 247-9 el llel tia el babier.) A tekoi el dilubech er a beluulechad er a rak er a 1914 a meketeklii el kmo a klemedengei el luleba tirka el blak a rengrir el ngalek er a skuul er a Biblia a mlemelemalt. A otutel a ulaoch er a Biblia a ochotii el kmo ngar er a 1914, e a Kristus a mlo King me a Rengedel a Dios a ulemuchel el mengedereder el ngar er a eanged. Me seikid, e kede mocha kiei er sel 'kedeb el taem' el dirk

---

23. (a) Ngoingerang e a Rengedel a Dios a mlo omuchel el mengedereder? (b) Ngera mo soadel er a ongingil el bliongel?

*Ngar er a cheungel a omengederederel a Renged, e a soal a Dios a mo meketmokl er tia el chutem el di ua omerellel er a eanged*



### AIKE EL LOLISECHAKL A BIBLIA

- A Rengedel a Dios a kabelment el ngar er a eanged el le King er ngii a Jesus Kristus, me a dirrek el 144,000 el chad el mlangilt el mo mendedederel el obengkel.—Chocholt 14: 1, 4.
- A Renged a mlo omuchel a omengederederel er a 1914, e seikid el taem el mei e a Satan a mla modik er a eanged el mei er tia el chutem.—Chocholt 12:9.
- Ngdi kmedung e a Rengedel a Dios a mo tomall a kabelment er a klechad, e a beluulechad a mo paradis.—Chocholt 16:14, 16.

medechel el kirel a Satan. (Chocholt 12:12; Psalm 110:2) Ngdirrek el sebeched el melekoi el oba otereklel a tekoi el kmo ngdi kmedung e a Rengedel a Dios a mo oureor el mo remuul a soal a Dios er tia el chutem. Tia ngdiak el kora kmal meang el chais el kirem? Ke oumerang el kmo ngklemerang? A ongingil el bliongel a mo ngosukau el mo mesa el kmo a Biblia a mera el olisechakl aika el tekoi.



## Kede Kiei er a “Uriul Sils”?

**Ngera el blekeradel er a chelecha el taem a  
meldung er a ulaoch?**

**A Tekingel a Dios ngmeleko el kmo ngmo ua  
ngera blekerdelir a rechad er a “uriul sils”?**

**Ngera el ungil el tekoi a louchais a Biblia  
el kirel a “uriul sils”?**

NGMLA ta el morrenges a chais er a razio me a lechub a TV e melatk el kmo, ‘Tiang mekeskelang el beluulechad?’ A meklou el bkaischembrungel el chelebuul a di kiul duubech me ngdiak a chad el sebecchel el medengelii a klukuk el kmo ngmo ua ngerang. (Jakobus 4: 14) Engdi, a Jehovah a medengei el kmo ngngera mo er ngii er a ngar er a medad. (Isaia 46:10) A irechar e a Tekingel el Biblia a dimlak di lomlaoch a meknngit el mo duubech, e ngdirrek el millekoi el kirel a betok el mengasireng el ungil el tekoi el mo er ngii er a kesai el taem er a medad.

<sup>2</sup> A Jesus Kristus a millekoi el kirel a Rengedel a Dios el mo torob a meknngit, e mo rullii a beluulechad el mo paradis. (Lukas 4:43) A rechad a mle sorir el mo medengei el kmo ngii el Renged ngmei er a oingerang. Me a redisaiplo er a Jesus a uleker el kmo: “Ngeral olangch

---

1. Ngsebeched el mesuub el kirel a ngar er a medad el taem er ker?  
2, 3. A redisaiplo te uleker er a Jesus a ngera el ker, me a Jesus ngmilekerang er a longer er tir?

a morngii kau sel mei, ma ullebongel ra taem ra belulechad?" (Matteus 24:3) Me ngulenger el kmo ngdi ta el Jehovah el Dios a medengeli el kmo ngoingerang a ulebengelel tia el blekeradel er a beluulechad. (Matteus 24:36) Engdi nguluuchais a tekoi el mo duubech er tia el chutem er a uchei er a Rengedel a Dios a bo el rellii a mera el budech me a ulekerreu el kirir a rechad. A tekoi el lulemlaoch a domes er a chelecha el taem!

<sup>3</sup> Uchei er a bo domes a olechotel a kmo kede kiei er a "ullebongel ra taem ra belulechad," e detelkib el mo omes er a mekemad el mla er ngii er a eanged. Ngdimlak a ta el chad el medengeli, engdi mlo rsel ngii el mekemad a ngar er ngii a lerirellii el mei er kid.

### A MEKEMAD ER A EANGED

<sup>4</sup> A uleak uchei el bliongel a milsaod el kmo a Jesus Kristus a mlo King el ngar er a eanged er a 1914. (Daniel 7:13, 14) Ngdi mle mereched er a uriul er a lenguu a klisichel a omengedereder er a Renged, e a Jesus a mlo ouedikel. A Biblia a kmo: "E mlornngii a mekemad ra eanged, el Mihael [kuk ta er a ngklel a Jesus] mar anghel er ngii a uluumekemad ra dragon [Satan el Diabelong]; ma dragon mar anghel er ngii me te mlo oumekemad."\* A Satan me a remekngit el anghel er ngii, a mlo mechitechut er a mekemad e ulebidokl el mei er a chutem. A reblak a rengrir el anghel a uleldeu a rengrir e le Satan me a remekngit el anghel er ngii a dikea el teloi er tir.

---

\* A olechotel a Mihael el ua ta er a ngklel a Jesus Kristus, a omomes er a Bebil er a Omesodel er a 250-51 el llel.

---

4, 5. (a) Ngera dilubech er a eanged er a uriul er a lenguu a deruchall er a kleking a Jesus? (b) A doltirakl er a Chocholt 12:12, e ngera mlo rsel sel mekemad el mla er ngii er a eanged?

Engdi a rechad a mlo ua lolekoi a Biblia el kmo: “Ngdi kom chebuul kaul chutem . . . ele diabelong a mocha medengei el kmo ngkekedeb a taem er ngii, me ngoba meringel cheldechuderreng lechika er kemiu!”—Chocholt 12:7, 9, 12.

<sup>5</sup> Ka momtab a tekoi el mo duubech er a uriul er a mekemad er a eanged. Ngar er a klou el cheldechuderreng er ngii, e a Satan a mekdubech a chelebuul me a ringel el kirir a rekiei er a chutem. Ke mo mesang er a uriul el kmo kid a kiei er a chouaitia el taem er a chechang, engdi ngdi kirel a ‘kekedeb el taem.’ A Satan a medengelii tia el tekoi. Me a Biblia a melekoi el kirel tia el taem el kmo ng “uriul sils.” (2 Timoteus 3:1) Ngkmal dmeu a rengud e le ngdi kmedung e a Dios a mo tomellii a klisichel a Diabelong el mengetikaiik er tia el beluulechad! Ka me bo domes a bebil er a tekoi el lullemlaoch a Biblia el dubechang er a chechang, el meketeklii el kmo kede kiei er a uriul el sils me a Rengedel a Dios a di kmedung e ngmo mesterir tirke el betik a rengrir er a Jehovah a klengeltengat el diak a ulebengelel. A kot, e bo dorri-



ter a eua el telengtengil a olangch el lullekoi a Jesus el kmo ngmo olengchelel a taem el dekiei er ngii.

### MEKLOU EL TEKOI EL MO DUUBECH ER A URIUL EL SILS

<sup>6</sup> *“Ngmo kautok ar beluu mar beluu, ma renged ma renged.”* (Matteus 24:7) Aika el mereko el dart el rak e te kmal betok el miliol el chad a mlad er a mekemad. A ta er a chad er a reksi er a Britain a milluches el kmo: “Aika el mereko el dart el rak a kot el ngarbab a ildisir a rechad el mloload a doltirakl a lluches el tekoi er a reksi. . . . Ngdart el rak el di lullemolem a mekemad, e kmal mle kesai el taem el dimlak a uleketmokl el delebechel er a resoldau el kautok er a kmung ker.” A chais el mla er a cheldebechel el mesuub a blekeradel er a beluulechad a melekoi el kmo: “Ngedei el taem el chachisois a ildisir a rechad el meltemall er a mekemad er a chelsel aika el mereko el dart el rak, el kuk betok er a remlad er a uldekial aike el mekemad el mla er ngii er aike el 1900 el rak er a uchei er ngii.” Te betok el miliol el chad a mlo chuarm a

6, 7. Ngmekera tekingel a Jesus el kirel a mekemad me a ngelsonges er a kall e moutaut er a chelecha el sils?



ringel e le rebetik er a rengrir a mlad el mekemad a uchul. Kau me nglocha dirrek el ngar er ngii a betik er a rengum el uaisei.

<sup>7</sup> *"Morngii a bosech."* (Matteus 24:7) A remesuub el merriter a te koi a melekoi el kmo ngkmal mla mo obdois a oketmeklel a kall er a chelsel aika el mereko el 30 el rak. Engdi, a ngelsonges er a kall a melemolem el ngar er ngii e le rebetok el chad a diak a ududir el omechar me a diak a chutem el omekeroul a kelir er ngii. Ngar er a chelsel a betok el dirk omekeroul a keizai er ngii el beluu, e te betok el biliol el chad a di sebechir el kiei el ousbech er a chimo el kluk el meriou er a ta el sils e merekong. Ngoumesingd er tir a chuarm a meringel el klengerenger. A chelechad er a UN el omtebechel er a rolet a ukeruul er a beluulechad a melekoi el kmo, a ngelsengesel a eiyo er a bedengir a rechad a uchul a kodellir a rebetok er a eim el miliol el ngalek er a bek el rak.

<sup>8</sup> *"E morngii a mekloul desiu."* (Lukas 21:11) A doltirakl aike el lo-

8, 9. Ngera olecholt el kmo a ulochel a Jesus el kirel a desiu me a bekoieuiul el rakt a mla tmaut?





kekoi a *U.S. Geological Survey* e ngmo er ngii a bekord el 19 el mesisiich el desiu er a bek el rak el sebechel el tomall a blai e tmiud a chutem. E bek el rak el ngar er ngii a desiu el mesisiich el sebechel el ongakngk a blai el me mereked er a chutem. A mla motobed el chais a ochotii el kmo te betok er a eru el miliol el chad a mlad er sera rak er a 1900 el me er chelechang el desiu a uchul. Me a lmuut el ta er a chais a kmo: “Alta ngmla ngosechekl a tekoi er a *science*, engdi ngdiak a kmal klekakerous er a ildisir a rechad el mad er a desiu er a ngar er a mong me chelechang.”

<sup>9</sup> “*E morngii a bekoieuiul el rakt.*” (Lukas 21:11) Alta e a tekoi er a ukeruul a kmal mla olengeriakl, engdi a mechut me a beches el rakt a dul charm er ngii a klechad. A ta er a chais el mlotobed a kmo, a 20 el rakt el sal medengei a rechad el uldimukl er ngii a tb me a malaria me a cholera, a mlo medbedubech er a chesel aika el mereko el teruich el rak, e a bebil er ngii a mengal menglang a domkar. A lekesengil e nnggar er ngii a 30 el beches el rakt, el bebil er ngii a diak a remedengei a kerul e sebechel mekodir a chad.



## A RECHAD ER A URIUL EL SILS

<sup>10</sup> Ileakl er aike el mo er ngii el blekeradel er a be-luulechad el louchais, e a Biblia a dirrek el louchais el kmo aike el uriul el sils a mo medangch el oeak a ngeldechel a blekerdelir a rechad. A apostol el Paulus a mesaod a blekerdelir a rechad el bo domes. Ngar er a 2 Timoteus 3:1-5 e kede menguiu el kmo: "A ikel uriul sils ra belulechad a morngii er ngii a blsechel a ringel." Me a domes a bebil er aikang, e a Paulus a dilu el kmo a rechad a mo

- *betik a rengrir er a di tir*
- *e nguibes a udoud*
- *e omtok er a redemerir me a rederrir*
- *e diak lodenge saul*
- *e diak lechubechub*
- *e diak el delodau*
- *e teleberechel*
- *e betik a rengrir er a tametereng el kuk ngar er a uchei er a lebetik a rengrir er a Dios*
- *te teletelel a ngar er a omeluu er a Dios e mengoit er a klisichel ngii el tekoi*

<sup>11</sup> A rechad el kiei er a beluam te uaisei? Te ulte-rekokl el mla mo uaisei. Ngar er ngii a meknngit a blekerdelir el chad er a ngii di el ker. Tiang a ochotii el kmo ngdi kmedung e a Dios a mo olekngemed er

10. Ngera el blekerdelir a rechad el lomlaoch a 2 Timoteus 3:1-5 a domes er a chelecha el sils?

11. Ngmekera Psalm 92:7 a losaod er a tekoi el mo duubech el mo er a remeruul a chelebirukel?

tir, e le Biblia a kmo: "A re dengerenger a sebechir el mo meklou el ua chudel, ma re meruul a meknngit a sebechir el mo ungil er a ikel loruul; e ngdi te di mo metemall."—Psalm 92:7.

### TEKOI EL MO ER NGII EL KIREL A KLUNGIOLED

<sup>12</sup> A uriul el sils a mera el mui er a chelebuul el di ua lulemlaoch a Biblia. Engdi ngngar er tia el meringel el beluulechad, e ngngar er ngii a ungil el tekoi el mla meketmokl er a delongelir a remengull er a Jehovah.

<sup>13</sup> A babier er a Daniel a ulemlaoch el kmo, "*A mera el klemedengei a mo obdois.*" (NW) Tiang mo oingerang? Ngmo er ngii er a "taem er a ulebongel." (Daniel 12:4) Ngileakl er sera 1914 el mei, e a Jehovah a ullengeseu er a remera el sorir el mo mesiou er ngii el mo meleketek a klemedengei er tir er a Biblia. Ngmla mukeroul a klemedengei er tir er a klemerang el kirel a ngklel a Dios me a moktek er ngii, me a olubet el tengetengel a Jesus Kristus, me a blekerdelir me a okisir a rulekoad. Te mla suubii el kmo ngua ngerang a lekiei el mo uchul a klungiaol el kirir e loldanges er a Dios. Ngdirrek el mla mo bleketakl a klemedengei er tir el kirel a urerel a Rengedel a Dios me a blekerdelel a bo losmechokl er tia el chutem. Ngera te meruul el loba tia el klemedengei? Tia el ker a ngoikid el mo er a ta er a ulaoch el dirrek el toutang er a chelecha el uriul el sils.

<sup>14</sup> A Jesus Kristus a ulemlaoch el kirel a "ullebongel ra taem ra belulechad" el kmo, "*Me tial evangkelio*

---

12, 13. Ngmekerang a "mera el klemedengei" e mo obdois er a "taem er a ulebongel"?

14. Ngua ngera klungel a ureor er a berkel a ungil el chais er a Renged er a chelecha el sils, e rua techang a omerk er ngii?

*ra rengedel a Dios a mo oberk ra belulechad el rokir.*" (Matteus 24:3, 14) Meliuekl er a beluulechad el rokir, e a ungil el chais el kirel a Renged—el kmo tia ngngera el Renged, e ngera ngmo meruul, e mekera demukngel-tengat er ngii—a obereka er a betok er a 235 el beluu el ngar er a betok er a 500 el omelekoi. Te betok el miliol el Sioning er a Jehovah a blak a rengrir el omerk er a ungil el chais el kirel a Renged. Te mla er a "bek el renged, ma klebliil rar chad, ma bliongel rar chad, ma chomelekoi" el mei. (Chocholt 7:9) A Resioning a mesuub el obengterir a rebetok el miliol el chad, el sorir el mo medengei el kmo ngerang mera el lolisechakl a Biblia, el diak locheraol. Sel bo dedebedebek a tekingel a Jesus el kmo a remera el Kristiano a mo "muketui rar chad el rokui," e tia mera el mengasireng el otutel a ulaoch!—Lukas 21:17.

### KE MO MEKERANG?

<sup>15</sup> Me a Isal betok a ulaoch er a Biblia el toutang er a chelecha el sils, e ngdiak mkengei el kmo kede kiei er a uriul el sils? Uriul er a loberk tia el ungil el chais el mo er sel urebetellel er a rengul a Jehovah, e a "ullebongel" a ulterekokl el mei. (Matteus 24:14) A "ullebongel" a melekoi er a taem el Jehovah a mo choroid a rokui el chelebirukel er tia el chutem, e mo ousbech er a Jesus me a remesiich el anghel er ngii el mo olekngemed er tirke el rokui el durengrir el omtok er Ngii. (2 Thesalonika 1:6-9) A Satan me a remekngit el anghel er ngii a mo diak longetikaik aika el renged. Uriul er isei, e a

---

15. (a) Kau ke oumerang el kmo kede kiei er a uriul el sils, e ngera uchul? (b) A "ulebongel" ngmo uchul a ngerang el kirir tirke el omtok er a Jehovah me tirke el kongei el chederedall er a Rengedel a Dios?

***“Me tial evangkelio ra  
rengedel a Dios a mo  
oberk ra belulechad el  
rokir.”—Matteus 24:14***



Rengedel a Dios a mo omekngeltengat er tirke el rokui el kongei el chederedall er a melemalt el omengedederel.—Chocholt 20:1-3; 21:3-5.

<sup>16</sup> Me a lekeda ulebongel er tia el blekeradel er a Satan, e ngkired el di kid el oker el kmo, ‘Ngera kirek el meruul er ngii?’ Ngrolel a llomeserrenge a dolemolem el mesuub el kirel a Jehovah me aike el soal a bo doruul. (Johanes 17:3) Bo el blak a rengum el mesuub er a Biblia, e mrelii el mo kse er kau el blechoel el obengterir a rechad el sorir el meruul a soal a Jehovah. (Hebru 10:24, 25) Bo el blak a rengum el melai aika el klemedengei el bla lotobed a Jehovah el Dios el kirir a rechedal el meliuekl er a beluulechad el rokir, e mruul a omelodech el mousbech er a klengar er kau me bo ldeu a rengum er a kengei er a Dios.—Jakobus 4:8.

<sup>17</sup> A Jesus a ulemlaoch el kmo a ruumesingd er a rechad a mo diak el lomtab a olengchelel a kmo kede kiei er a uriul el sils. Me a temellir a remeruul a chelebirukel a kmal di mereched el mei er a taem el diak lodengeli el ua merechorech a lemei er a klebesei, el oumesingd el chad a kmal kibetiekl er ngii. (1 Thesalonika 5:2) A Jesus a milengelechel el kmo: “Le be ldum a Ngelekel a chad e ngua sel taem ra Noah. Er ser uche ra le me eeleb e te mlenga e melim, e mo bechiil e melibuk a chebechiil, el mo lmuut er sel sils ra bocha lsiseb ra Arhe a Noah, e sola e dimlak lolechesiu el mo lmuut er sera le me eeleb el okngemedeterir el rokui, ma le me Ngelekel a chad e ngdirrek el uaisei.”—Matteus 24:37-39.

16. A omokerang e ngolecholt er a llomeserrenge?

17. Ngera uchul me a temellir a remekngit a okibetekelterir a rebetok el chad?

<sup>18</sup> Sei a uchul me a Jesus a dilu er a rulerrengees er ngii el kmo: "Mkekerengemiu ma rengmiu lak bo loberaod er chomelechemakl, ma cheltelaol ra rrom, ma ulekerreu er tial klengar, me lak dilemereched el mer kemiu sel sils el ua bedikl el omdechtem er kemiu; ngmei el mor tirikel rokui el kiei er bebul a chutem ra belulechad el rokir. Mdiblechoel mengkar, e moluluuch el olengit a klisiich me bo lsebechiu el chemiis era ikal mochu er ngii el tekoi, e bo mdechore [el lekengei er kemiu] er medal a Ngelekel a chad." (Lukas 21:34-36) Me ngrolel a llomesereng a desichedekl aika el tekingel a Jesus er a chesl a rengud. E le tirke el ngmai a kengei er a Jehovah el Dios me a "Ngelekel a chad" el Jesus Kristus, a ngar er ngii a omeltkir el mo suobel er a ulebengelel tia el blekeradel er a Satan e mo kiei el diak a ulebengelel el ngar er a mengasireng el beches el chutem el kmal di kmedang!—Johanes 3:16; 2 Petrus 3:13.

18. Ngera el omengelechel er a Jesus a kmal kired el sichedekl er a rengud?

#### AIKE EL LOLISECHAKL A BIBLIA

- A uriul el sils a obeketakl el oeak a mekemad, bosech, desiu, me a bekoiueiuul el rakt.—Matteus 24:7; Lukas 21:11.
- Ngar er a uriul el sils, e te betok a mo betik a rengrir er a di tir, me a udoud, me a tametereeng e mo diak el betik a rengrir er a Dios.—2 Timoteus 3:1-5.
- Ngar er aika el uriul el sils, e a ungil el chais er a Renged a oberkang er a beluulechad el rokir.—Matteus 24:14.

## A Rechanghel—Ngera Te Meruul el Mei er Kid?

**A rechanghel te olengeseu er a rechad?**

**Te mekerang a remekngit el anghel a longetikaik er a rechad?**

**Ngkired el medakt er a remekngit el anghel?**

A BO dodengeli a chad e kede blechoel el mo medenge-  
lii a telkib el chisel a telungalek er ngii. Me ngdi osisiu, a  
bo dodengeli a Jehovah el Dios a uldimukl er a bo dode-  
ngelterir a rechanghel el ngar er a telungalek er ngii. Me  
ngngera urerir a rechanghel er a chesel a oketmeklel a  
moktek er a Dios? Ngngar er ngii a bla el rruul el mei er  
a klechad? Ngngar er ngii a lerellii er a klengar er kau?

<sup>2</sup> A Biblia a betok el dart el taem el lolekoi el kirir a re-  
changhel. Ka me bo domes a bebil er aike el lolekoi. A  
rechanghel te mla er ker el mei? A Kolose 1:16 a kmo: “A  
rokuil tekoi el ikel ngara eanged ma ikel ngara chutem . . .  
a uleak ngii [Jesus Kristus] el meruul.” Me a rokui el ang-  
hel a lulemeob er tir a Jehovah el Dios el oeak ngike el  
kot el Ngelekel. Ng tela ildisir? A Biblia a olecholt el kmo  
te betok el dart el miliol el anghel a ulebeob, e rokui el  
kmal mesisiich.—Psalm 103:20.\*

---

\* A Chocholt 5:11 (NW) a melekoi el kirir a remelemalt el anghel  
el kmo: “A ildisir a mle tela el teruich el tela el tela el teruich el te-  
lael.” (Footnote) Me a Biblia a olecholt el kmo te betok el dart el mi-  
liol el anghel a ulebeob.

- 
1. Ngera me ngkired el soad el mo mesuub el kirir a rechanghel?
  2. Ngtechang a ulemeob er a rechanghel, e tela ildisir?

<sup>3</sup> A Tekingel a Dios el Biblia, a ouchais er kid el kmo sera lobeob a chutem e a “re anghel a uleldiu er a deurreng.” (Job 38:4-7) Me a rechanghel a mle meketeket el ngar er ngii er a uchei er a lobeob a rechad me a beluulechad. Tia el bades a olecholt el kmo a rechanghel a melechesiu a tekoi, e le ngmelekoi el kmo te “uleldiu er a *deurreng*.” Seikid el taem, e a rokui el anghel a mle chedal a ta el telungalek el dmak el mesiou er a Jehovah el Dios.

### A NGESO ME A ULEKERREU EL MLA ER A RECHANGHEL

<sup>4</sup> Sera leseterir a rekot el chad el obeob, e a reblak a rengrir el anghel a ullecholt a klemeriarreng er tir el kirel tia el omerollet el mocha klou el telungalek, me a dirrek el oketmeklel me a otutel a telbilel a Dios. (Osisechakl 8: 30, 31; 1 Petrus 1:11, 12) Engdi kltekotel a taem el merael el mei, e a rechanghel a omes er a ruumesingd el telungalek el obult el mo cheroid e mo diak losiou er ngike el betik a rengul el Ulemeob er tir. Tia el tekoi a ulterekokl el rirelleterir tirke el blak a rengrir el anghel el mo mekngit a rengrir. Engdi sel lobult a ta el chad el lmuut el mo er a Jehovah, e ngkmal mo dmeu a rengrir a rechanghel. (Lukas 15:10) A rechanghel a dirrek el kerekikl aike el duubech el mo er a remesiungel a Jehovah a uchul me ngbetok el taem el lousbech er tir el mo melisiich e omekerreu er a reblak a rengrir el mesiungel el ngar er a beluulechad. (Hebru 1:7, 14) Me bo domes a bebil er a olechotel.

<sup>5</sup> A reteru el anghel a ngilsuir a melemalt el chad el Lot

- 
3. A Job 38:4-7 ngera ngouchais er kid el kirir a rechanghel?
  4. Ngmekera Biblia a lochotii el kmo a reblak a rengrir el anghel a semeriar a tekoi el loruul a rechad?
  5. Ngera el kerebai er a ulengesuir a rechanghel a debetik er a Biblia?



me a rengelekel el redil er a lecheteklterir el tuobed er a beluu, me lak lemetemall er sera lolekngemed a meknngit el mats er a Sodom me a Gomorrah. (Genesis 19:15, 16) Betok el dart el rak er a uriul, e a profet el Daniel a ulebi-dokl er a blil a laion, engdi ngdimlak el mekesakl e dilu el kmo: "A Dios a ulderchii a anghel er ngii me ng mutek a ngerel a laion." (Daniel 6:22) Ngar er a kot el dart el rak, e a anghel a ultebedii a Petrus er a blil a kelebus. (Rellir 12:6-11) A rechanghel a dirrek el ullengeseu er a Jesus er a uchelel a urerel er tia el chutem. (Markus 1:13) Ngdi-rrek el uchei er a kodellel a Jesus, e a ta er a anghel a mlo er ngii me ng "melisiich er ngii." (Lukas 22:43) Nglocha kmal milengelaod er a Jesus er a chelsel aika el meklou a ultutelel el taem er a klengar er ngii!

<sup>6</sup> Chelecha el sils, e a rechanghel a dikea be ldum er a mederir a remesiungel a Dios. Me alta e ngdiak el meues, engdi tirka el mesisiich el anghel er a Dios a dirk omeke-rreu er a rechedal, el ileakl el ngar er aike el tekoi el mo uchul a telemellel a deleuill er tir me a Dios. A Biblia a kmo: 'A anghel er a RUBAK a mengkar er tirkel meluu er ngii e sobecheklterir er a kdekudel.' (Psalm 34:7) Ngera me aika el tekoi a mengelaod er kid? E le ngii el ngar er ngii a remekngit el anghel el sorir el melemall er kid! Tirka te rua techang? E ngar er ker el mei? Te mekerang a lolasem el melemall er kid? A bo debetik a nger er aikang, e hall e detelkib el mo mesaod a tekoi el dilubech er a uchelel a reksi er a klechad.

## **A RECHANGHEL EL CHERROUED**

<sup>7</sup> Ngdi ua aike el desiluub er a 3 el Bliongel, a ta

- 
6. (a) Te mekerang a rechanghel a lomekerreu er a rechedal a Dios er a chelecha el sils? (b) Ngera el ker a bo domes er a chechchang?  
7. Ngmlo ua klungel a ngerang a klisichel a Satan el omult er a rechad el mo cheroid er a Dios?

er a rechanghel er a Dios a mlo oureng el soal el mo mengedereder er a rebebil me ngmlo omtok er a Dios. Uriul e ngmlo okedongall el Satan el Diabelong. (Chocholt 12:9) Chelsel aike el 16 el dart el rak er a uriul er a lebulekngii a Eba, e a Satan a mlo sebechel el melteterir a ruumesingd el chad el kiliei er sel taem el mo cheroid er a Dios, el di mlo medechel a remekesai el blak a reng-rir el chad el ua Abel me a Henok me a Noah.—Hebru 11:4, 5, 7.

*“A Dios a ulderchii a anghel er ngii  
me ng mutek a ngerel a laion.”  
—Daniel 6:22*



<sup>8</sup> Ngar er a taem er a Noah, e a rekuk bebil er a rechanghel a mlo omtok er a Jehovah. Te milechei a basio er tir er a telungalek er a Dios el ngar er a eanged, e mlei er tia el beluulechad e riruul a bedengir el mo ua bedengir a rechad. E ngera uchul? Ngar er a Genesis 6:2 (NW) e ngkmo: “E a rebebil er a rengelekel a [mera el] Dios a mocha omes er a rengelekir a rechad el redil el kmo te mle klebokel, me te mocha melai er a rebecherir er tir, el tirke el rokui el lullilt er tir.” Engdi a Jehovah a dimlak di el bechei aika el omerellir tirka el anghel, me a dirrek el mekngit el blekerdelir a rechad el mlo oltirakl er tir me di lullemolem. Me nggirellii a klou el ieleb el uleknghemedeterir a rokui el chad el mla er a chelebirukel, e di mle tirke el blak a rengir el mesiuangel a lulelsobel er tir. (Genesis 7:17, 23) Me a remlo omtok el anghel a mlormel el chemoit a bedengir er a klechad, e liluut el mo er a eanged el ua anghel e mlo obengkel a Diabelong el ngii a mlo okedongall el “bderrir ar mekngit el [anghel].”—Matteus 9:34.

<sup>9</sup> Tirke el diak el bekongesenges el anghel er a lluut el mo er a eanged, e te mlo meleuaoch el dikea basio er tir er a chesel a telungalek er a Dios, el ua mengeteklir el Satan. (2 Petrus 2:4) Me alta e chelechang e ngdikea el sebechir el lmuut el melodech a bedengir el mo ua rechad, engdi te dirk mesisiich el mengetikaik er a rechad el mo meruul a mekngit. A mera er ngii, ngoeak a ulengesuir tirkaikid el mekngit el anghel, e a Satan a “mengeuid ra belulechad el rokir.” (Chocholt 12:9;

---

8. (a) Te mleker a rebebil er a rechanghel e mlo mekngit el anghel? (b) A lsobel er a Ieleb er a taem er a Noah, e ngmle kirir el mekerang?

9. (a) Ngera dilubech el mo er a remekngit el anghel er a lluut el mo er a eanged? (b) Ngera kede mo mesaod el kirir a remekngit el anghel?

1 Johanes 5:19) El oeak a ngera el roel? Te blechoel el ousbech a roel a omengeblad. (2 Korinth 2:11) Me bo dosaod a bebil er ngii el tekoi.

### **A REMEKNGIT EL ANGHEL NGMEKERANG A LONGETIKAIK**

<sup>10</sup> A remekngit el anghel a mengeblad er a rechad er a betok el roel. A tekoi er a oltuubladek, me a olai, me a omes a tet me a kerrekerul a chad, me a omtab a ngerel a charm e omloach a tekoi er a ngar er a medad el klebesei, me aike el uai ngii el omeruul a rokui el chelsechusem er a remekngit el anghel. A Biblia a olekebai aika el omeruul e mengelechel er kid el mo omekiai a ngii di el ngerang el chelsechusem er ngii. (Duteronomi 18:10-12; Galatia 5:19-21) Me ngua chad er a omenged a lousbech a kakerous el bedengel a uaol, a remekngit el anghel a ousbech a kakerous el bedengel a omeruul el mengetikaik er a rekakerous el bedengir a rechad el mo er a cheungel a klisichir.

<sup>11</sup> A ta er a uaol el ousbech er ngii a omengelil. Ngerang a omengelil? Tiang a omelasem el mo medengei a tekoi er a ngar er a medad el klebesei me a lechub e ngskel a tekoi el diak a remedengei. A bebil er a telengtengil a omengelil a omes a tet me a kerrekerul a chad, me a usbechel a kat, me a omtab a ngerel a charm e omloach, me a omenguiu el chim, me a skel a berrotel el omesodel me a lechub e ngolengchelel a tekoi el ngar er a berrous. Alta e te betok a omdasu el kmo ngdiak a ngera el temellii, engdi a Biblia a kmal bleketakl el olecholt el kmo a remengelil me a remekngit el anghel a

---

10. Ngera el bedengel a "uaol" a lousbech a remekngit el anghel el mengetikaik er a rechad el mo er a cheungel a klisichir?

11. Ngerang a omengelil, e ngera me ngkired el mengeroid er kid er ngii?

dmak el oureor. El ua tiang, ngar er a Rellir 16:16-18 e ngmelekoi el kirel a “tal blekall ra [mekngit el anghel] er chongelil el sibai el dil lolsiseb a betok el klungiaol el morar merrederel” el urridii tia el duch er ngii er a lemodik a remekngit el anghel el tuobed er ngii.

<sup>12</sup> A ta er a roel e a remekngit el anghel a mengetikaik er a rechad a oeak a oltuubladek. A rechad el mengeiung er a kodellel a betik er a rengrir a blechoel el mecheblad el mo olab a cheleuid el uldasu el kirir a rulekoad. A oltuubladek a sebechel el mesaod a ileakl el tekoi, me a lechub e ngmengedecheduch el di ua ngerel ngike el mlad. Sei a uchul me a rebetok a oumerang el kmo a rulekoad a dirk ngar, me a dolasem el mengedecheduch er tir e ngsebechir el ngosuterir a redi ngar el chederir el mo outekangel a kngtil a rengrir. Engdi a ngii di el uaisei el “ongelaod” a klsuul e kengaol. E ngera uchul? E le remekngit el anghel a sebechir el mesuub a ngerir a remlamad e omesterir a rultuubladek a tekoi el kirel ngike el mlad el chad. (1 Samuel 28:3-19) Ngdirrek el ua aike el desiluub er a 6 el Bliongel, a rulekoad a mla mo dibus el dikea el ngar er a ngii di el ker. (Psalm 115:17) Seikid, e a rultuubladek a mla mecheblad er a remekngit el anghel e meruul a tekoi el omtok a soal a Dios. (Isaia 8:19) Me bo mkerekikl el oltngakl er tia el kmal bedochel el uaol el lousbech er ngii a remekngit el anghel.

<sup>13</sup> A remekngit el anghel a diak di el longeuud er a rechad e te dirrek el omekdakt er tir. Chelecha el sils, e a Satan me a remekngit el anghel er ngii a medengei el kmo ngkmal di medechel a ‘tedeb el taem’ e ngmo diak

---

12. Ngera me ngkmal kengaol a dolasem el mengedecheduch er a rulekoad?

13. A rebetok el mle medakt er a remekngit el anghel ngmlo sebechir el mekerang?



*A remekngit el anghel a ousbech a kakerous el  
tekoi el mengeblad er a rechad*

el sebechir el meruul a ngerang, a uchul me nglmuut el mengal mla mo mekngit a blekerdelir. (Chocholt 12:12, 17) Me nguaisei engdi te betok el telael el chad el kili-ei er a bek el sils el di medakt er a remekngit el anghel a mla mo mimokl er a dektir. Te milekerang e mlo sebechir el mo uaisei? Ngera sebechel a chad el meruul er ngii a lsekum e ngchelsechusem er a tekoi el rullii el mo er a cheungel a klisichir a remekngit el anghel?

### **NGMEKERANG A DOLTNGAKL ER A REMEKNGIT EL ANGHEL**

<sup>14</sup> A Biblia a ouchais el kmo kede mekerang e oltngakl er a remekngit el anghel e mo mimokl er tir. Ka molebe-debek er a kerebai er a Rekristiano er a kot el dart el rak el mla er a Efesus. A rebebil a mle chad er a olai er a uchei

---

14. Ngmekerang a bo demimokl er a klisichir a remekngit el anghel, el ua Rekristiano er a kot el dart el rak el mla er a Efesus?



## KEDE MEKERANG E OMTOK ER A REMEKNGIT EL ANGHEL

- Mchoit a rokui el klalo el chelsechusem er a tekoi er a omengelil me a olai me aike el uai ngii
- Mosuub er a Biblia
- Moluluuch el mo er a Dios

er a bo le Kristiano. Te milekerang er a lolasem el mo mimokl er a klisichir a remekngit el anghel? A Biblia a kmo: “Mar betok er tirikel uluuelai a ngila hong er cholai er tir lotobed e sileseb er mederir el rokui.” (Rellir 19:19) Me a rebeches el Kristiano er isei a milechei a ungil el ke-rebai el kirir a rechad el sorir el oltngakl er a remekngit el anghel er a chelecha el sils. A rechad el sorir el mesi-ou er a Jehovah a kirir el chemoit a rokui el tekoi el ngar er ngii er tir el ngii a ulekuak er a tekoi er a omengelil, olai, me aike el uai ngii el omeruul. Tiang a uldimukl er ngii a babier, katsudo, bilt, me a ongngak el melisiich a tekoi er a remekngit el anghel e meruul el mo kora ungil el tekoi el lomeksemeriar a rengrir a rechad. Uldimukl er aikang aike el klalo el dousbech el bereked er a bedenged el ua olbiungel me a klilt el omekerreu er kid er a mekngit.—1 Korinth 10:21.

<sup>15</sup> Sesei el rak er a uriul er a ReKristiano el ngar er a Efesus er a letemall a babier er tir er a olai, e a apostol el Paulus a milluches el mo er tir el kmo: “Kede bai oumekemad . . . [er a remekngit el anghel].” (Efesus 6:12) A remekngit el anghel a dimlak el bo el mesaul e lemeterob. Te dirk millasem el osiik a cheldechulel e te mo mesisiich. Me ngngera mle kirir el lmuut el mo meruul er ngii tirke el Kristiano? A Paulus a dilu el kmo: “E a ngarbab er ngii mnguu chomekreakl el kloumerang, me lsebechiu loba lomekoad a rokuil balech el ngau er ngikel mekngit [Satan].” (Efesus 6:16) A lora el mo mesisiich a omekreakl el klaumerang er kid, e kede mengal mo mesisiich el omtok er a remekngit el anghel.—Matteus 17:20.

<sup>16</sup> Me kede mekera melisiich a klaumerang er kid?

---

15. A bo domtok er a klisichir a remekngit el anghel, e ngera kired el meruul er ngii?

16. Kede mekerang e melisiich a klaumerang er kid?



Ngoeak a dosuub er a Biblia. A klisichel a cheuatel a ultuil er a klisichel a omekedecheraol er ngii. Me nguaisei, a klisichel a klaumerang el diak el lolmesim a kmal klou el ultuil er a klisichel a uchetemel, el ngii a mera el klemedengei er a Biblia. A lsekum kede menguiu e mesuub er a Biblia er a bek el sils, e a klaumerang er kid a mo mesisiich. Me ngua mesisiich el cheuatel, a chouaisei el klaumerang a mo omekerreu el omart er kid er a ome-ngetikaik er a remekngit el anghel.—1 Johanes 5:5.

<sup>17</sup> Ngera dirrek el mle kirir a Rekristiano er a Efesus el mo meruul? Te uluusbech er a klou el ulekerreu e le te kiliei er a mats el mle mui er a omengull el mo er a remekngit el anghel. Sei a uchul me a Paulus a dilu er tir el kmo: “E bo blechoel meluluuch.” (Efesus 6:18) Kid me kede kiei er a beluulechad el mui er a omengull el mo er a remekngit el anghel a uchul, me ngkired el blak a rengud el meluluuch el kirel a ulekerreuil a Jehovah me bo el sebeched el omtok er a remekngit el anghel. Ngkmal kired el ousbech er a ngklel a Jehovah er a chel-sel a nglunguched e le ‘ngklel a [Jehovah] a mesisiich el cheuatel me a melemalt a remurt el mor ngii e mo selebechakl.’ (Osisechakl 18:10) Me ngkmal kired el melemolem el meluluuch el mo er a Dios me ‘longkar er kid er ngikel mekngit,’ el Satan el Diabelong. (Johanes 17:15) A Jehovah a ulterekokl el onger chouaisei el nglu-  
nguuch el oeak a blakerreng.—Psalm 145:19.

<sup>18</sup> A remekngit el anghel a kmal kengaol, engdi ngdiak el kired el medakt er tir a lsekum kede omtok er

---

17. Ngera el tekoi a kirel a chad el mo meruul er ngii me bo el se-bechel el omtok er a remekngit el anghel?

18, 19. (a) Ngera me ngulterekokl a rengud el kmo kede mo mesisiich er a klakoad el omtok er a remekngit el anghel? (b) Ngera el ker a bo longer er ngii a ongingil el bliongil?

a Diabelong e olekeed er kid er a Dios e meruul a soal. (Jakobus 4:7, 8) A klisichir a remekngit el anghel a telkael. Te mlekelebus er a taem er a Noah, e chelechang e te chelebangel er a ulebongel el kerrekereiil el kirir er a ngar er a medad. (Judas 6) Molatk el kmo kid a dirrek el lomekerreu er kid a remesisiich el anghel er a Jehovah. (2 King 6:15-17) Te kmal semeriar el mesekid el mo mesisiich el omtok er a remekngit el anghel. Me ngua dedu el kmo te choeng er kid el mo mesisiich. Mada dolemolem el kiei el kmeed er a Jehovah me a telungalek er ngii er a reblak a rengrir el anghel. Dongeroid er kid er a ngii di el bedengel a tekoi er a omengelil me a olai me aike el uai ngii e dolemolem el oltaut a omellach er a Tekingel a Dios. (1 Petrus 5:6, 7; 2 Petrus 2:9) E seikid e kede ulterekokl el mo kats er a klakoat el omtok er a remekngit el anghel.

<sup>19</sup> Ngera me a Dios a ulemechei er a remekngit el anghel me a chelebirukel el uchul me a rechad a kmal chuarm? Tia el ker a bo el onger er ngii a ongingil el bliongel.

#### AIKE EL LOLISECHAKL A BIBLIA

- A reblak a rengrir el anghel a mo olengeseu er a reblak a rengrir el mesiou er a Jehovah. —Hebru 1:7, 14.
- A Satan me a remekngit el anghel er ngii a mengeblad er a rechad e omult er tir el mo cheroid er a Dios.—Chocholt 12:9.
- A omoruul a soal a Dios e momtok er a Satan el Diabelong, e ngmo chemiis er kau. —Jakobus 4:7, 8.

## **Ngera me a Dios a Omechei a Ringel Me Ngngar er Ngii?**

**A Dios nguchul a ringel el ngar  
er a beluulechad?**

**Ngera el mondai a dilubech er a  
sers er a Eden?**

**Ngmekerang a Dios a bo losmechokl a  
telemellel a ringelel a klechad?**

URIUL er a kmal meringel el mekemad el mla er ngii er a ta el beluu, e a rebetok el telael el redil me a rengalek el mlad a lullakl er tir er a chimo el klou el debull el dilechor a kerus el meliuekl er ngii. A derta er ngii el kerus a mla er ngii a llechukl el kmo: "Ngera uchul?" A lebebil er a taem e tia sel kot el meringel el ker el loker er ngii a rechad. A rechad a mekngit a rengrir e oker er ngii sel lebo er ngii a mekemad, meklou el tellemall, rakt, me a lechub a delengerenger el ngmai a klengar er a rebetik er a rengrir el diak a telemellir, e tomall a rekeblirir, me a lechub e ngrulleterir el kmal mo chuarm. Ngsorir el mo medengei el kmo ngera uchul me a chouaisei el chelebuul a mo er tir.

<sup>2</sup> Ngera uchul me a Dios a omechei a ringel me ngngar er ngii? A lsekum a Jehovah el Dios a olab a bek el klisiich, e betik a rengul, e mellomes a rengul, e melemalt, e ngera uchul me a beluulechad a kmal mui er a klauketui me a chelebirukel? Ngmla ta el molebedebek aika el tekoi?

---

1, 2. Ngua ngera el ringel a lechebangel a rechad er a chelecha el sils? E aika ngmo uchul e te mo oker a ngerang?



### *A Jehovah a mo torob a rokui el ringel*

<sup>3</sup> Ngmekngit a doker el kmo ngera me a Dios a omechei a ringel me nngnar er ngii? A rebebil a suebek a rengrir el kmo a loker a chouaisei el ker e ngbelkul a kmo ngolengesonges a klaumerang er tir, e diak el olecholt a omengull el mo er a Dios. Engdi a omonguiiu er a Biblia e ke mo metik el kmo a reblak a rengrir el milluu er a Dios a uleker a osisiu el te-koi. El uai tiang, a profet el Habakuk a uleker er a Jehovah el kmo: “Ng kol ngera uchul me ke rullak el mes a ua isel che-lebuul ma mekngit? A omelemall ma mekngit el bekeu el omeruul a di iliuekl er ngak. Ng ngar ngii a klakoad ma klau-toketok er ker me ker.”—Habakuk 1:3.

<sup>4</sup> A Jehovah nguluungeroel er a profet el Habakuk er a lo-ker er a chouaisei el ker? Ngdimlak. A Dios a bai uldak aika el tekoi el kmal mle blak a rengul a Habakuk el oker er a chelsel a Biblia. A Dios a dirrek el ngilsuir el mo bleketakl a klemedengei er ngii el kirel a tekoi e menglou er a klaume-rang er ngii. A Dios a soal el meruul er a osisiu el tekoi el kirem. Molatk el kmo a Biblia a olisechakl el kmo, ‘A Dios a chomekerreu er kau.’ (1 Petrus 5:7) A Dios a lmuut el kmal

3, 4. (a) Ngera me ngdiak el mekngit a doker er a uchul me a Dios a ulemechei a ringel me nngnar er ngii? (b) Ngera uldesuel a Jeho-vah el kirel a chelebirukel me a ringel?

louketui a chelebirukel me aike el ringel el lukdubech, el kuk ngar er a uchei er a uldesuel a ngii di el chad el kirel ngii el tekoi. (Isaia 55:8, 9) Me a leuaisei, e ngera uchul me ngkmal klou a ringel er tia el beluulechad?

### **NGERA ME NGKMAL KLOU A RINGEL?**

<sup>5</sup> A rechad a mla mo er a remengeteklel a klechelid me a resensei er tir el mo oker el kmo ngera me ngkmal klou a ringel. Ngbetok el taem e a nger el lengai a kmo a rokui el ringel a soal a Dios, e le ngdi mle uchelel e ngoterekokl a rokui el tekoi el mo duubech, el uldimukl er ngii a tekoi el mo uchul a chelebuul me a ringel. Te betok a ledu er tir el kmo a urerel a Dios a berrotel me a lechub e ngngii a uchul me a rechad a mad, el uldimukl er a rengalek, me bo el sebechel el melai er tir el mo er a eanged el mo obengkel. Engdi ngua aike el bla msuub, a Jehovah a kmal diak el omekdubech a ngii di el mekngit. A Biblia a kmo: “A Olab a Bek el Klisiich el Dios a diak loruul a mekngit; ng kmal diak loruul a chebirukel el mor a ngii di le chad.”—Job 34:12.

<sup>6</sup> Ke medengei el kmo ngera me a rechad a oltelechakl er a Dios el kirel a rokui el ringel er a beluulechad? Oumesingd el taem, e te oltelechakl er a kot el ngarbab el Dios e le tomdasu el kmo ngngii a mera el mengedereder er tia el beluulechad. Ngdiak lodengeli a beot engdi ngklou a ultutelel el klemerang el lolisechakl er ngii a Biblia. Ke silubii tia el klemerang el ngar er a 3 el Bliongel el kmo ngike el mera el merreder er tia el beluulechad a Satan el Diabelong.

<sup>7</sup> A Biblia a kmo: “A belulechad el rokir a chederdall er ngi-

---

5. Ngera bebil er a omesaod el leko nguchul me a rechad a mo chelebangel a ringel, engdi ngngera ngolisechakl a Biblia?

6. Ngera me a rechad a mecheuid e oltelechakl er a Dios el kirel a ringel el ngar er ngii er a beluulechad?

7, 8. (a) Ngmekerang a beluulechad a lolecholt er a blekerdelel a merredelel? (b) Ngmekerang e a diak el cherrungel el klechad me a “taem ma bkaischembrungel” el dirrek el uchul me ngngar er ngii a ringel er a klengar?

kel meknngit.” (1 Johanes 5:19) Omkerekikl el melebedebek er ngii, e ngdiak el uaisei? Tia el beluulechad a di olecholt er a blekerdelel ngike el diak el meues el meknngit el anghel el ngii a “mengeuid ra belulechad el rokir.” (Chocholt 12:9) A Satan a ouketui, e mengeblad, e soal el omekcharm er a rebebil. Me seikid e a beluulechad, el cheltikaik er ngii, a mui er a klauketui me a omengeblad me a meknngit el omeruul el omekcharm er a rebebil. Tia ta er a uchul me ngklou a ringel.

<sup>8</sup> A ongerung el uchul me ngngar er ngii a ringel a ua aike el dulsaod er a 3 el Bliongel el kmo a rechad a diak el mecherungel e ngar er a klengit er a lekot el mukdubech a ultok er a chelsel a sers er a Eden el mei. A rengar er a klengit el chad a blechoel el kautok el kaiberober a omerreder, el mo uchul a mekemad, orimel, me a ringel. (Olisechakl 4:1; 8:9) A ongedei el uchul me ngngar er ngii a ringel, a ngar er a “taem me a bkaischembrungel” el tekoi el duubech. (Olisechakl 9:11, NW) E le ngngar er a beluulechad el diak a Jehovah el Mengedereder el lomekerreu er ngii, e a rechad a mo chuarm e le lta te ngar er a meknngit el basio er a meknngit el blsechel.

<sup>9</sup> Ngkmal uchul a ongelaod el kired sel dodengei el kmo a Dios a diak el ngii a uchul a ringel el decharm. Ngdiak el ngii a uchul a mekemad, delengerenger, orimel, me a lechub e ngmeklou el telemellel a beluu el mo uchul me a rechad a kmal mo chuarm. Me nguaisei, engdi ngkmal kired el mo medengei el kmo, Ngera uchul me a Jehovah a omechei aika el ringel me ngngar er ngii? A lsekum ngii a kot el mesisiich e ngulterekokl el ngar er ngii a klisichel el mo torob aikang. Me a leuaisei, e ngera orreked er ngii? Ngika el betik a rengul el Dios el bla bo dodengeli a ulterekokl

---

9. Ngera uchul me ngulterekokl a rengud el kmo ngngar er ngii a ungil el uchul me a Jehovah a omechei a ringel me ngmelemolem el ngar er ngii?



*A ngalek er a skuul ngkuk ungil el medengei  
a tekoi er a sensei er ngii?*

el ngar er ngii a ungil el uchul me nguaisei.—1 Johanes 4:8.

### **A MERINGEL EL TEKOI A DILUBECH**

<sup>10</sup> A bo dodengei el kmo ngera uchul me a Dios a ulemechei a ringel, e ngkired el mo melebedebek er sel taem er a lomuchel a ringel. A Satan er sera lechitikikii a Adam me a Eba el mo diak el olengesenges er a Jehovah, e ngdilubech a kmal klou a ultutelel el ker. Ngdimlak el ker el kirel a *klisichel* a Jehovah. E le Satan a mle ungil el medengei el kmo ngdiak a telkelel a klisichel a Jehovah. Me ngbai milekdebechii a ker el kirel a *llemettel* a Jehovah el *mengedereder*. Me a lomekedong er a Dios el kmo ngomulak e orreked a ungil el tekoi el diak el omesterir a rechederedellel, e a Satan a ultelechakl el kmo a Jehovah a meknigil el mengedereder. (Genesis 3:2-5) Me ngua ledilu el kmo a rechad a bai ungil er tir a lak longedereder er tir a Dios. Tiang a ultok er a *omengederederel* me a lechub a llemettel a Jehovah el mengedereder.

10. A Satan ngulemekdubech a ker el kirel a ngerang, e milekerang er a loruul el uaisei?

<sup>11</sup> A Adam me a Eba a mlo omtok er a Jehovah. Me a omerellir a di ua ledilu el kmo: 'Ngdiak ki mousbech er a Jehovah el Merreder er kemam. Ngsebecham el di kemam el melilt el kiram a melemalt me a chebirukel el tekoi.' Ngmekerang a Jehovah a bo losmechokl er tia el mondai? Ngmekerang a losisecheklterir a rokui el mellomes a rengrir el blebelel el kmo tirka el mlo omtok a ngar er a cheleuid e bai sel rolel el lekiltmeklii a Dios el kirir a bai mera el mle ungil? Ngngar er ngii a chad el locha mo melekoi el kmo ngbai mle kirel a Dios el di okngemedeterir tirka el mlo omtok e kuk omeob er a rebeches el chad. Engdi a Jehovah a dillii a moktek er ngii el kmo ngmo omekeek er a beluulechad er a rengelekel a Adam me a Eba, e mle soal a bo lekiei el ngar er a paradis el chutem. (Genesis 1:28) A Jehovah a *blechoel* el oltaut a telbilel. (Isaia 55:10, 11) Me a luleknge-medeterir tirka el mlo omtok er a chelsel a sers er a Eden, e ngdimlak el monger a ker el mlukdubech el kirel a omengederederel a Jehovah.

<sup>12</sup> Ka bo domes er a ta el okesiu. Ka molebedebek er a ta el sensei el melasem el olengeseu er a rengalek er a skuul el mo meduch el oltobed er a nger er a ta er a chelechedal a ochur. E a ta er a mellomes a rengul e soal el di omtok el ngalek er a skuul a dmua el kmo sel rolel ngika el sensei a loltobed er a nger er sel ochur a cheleuid. Me ngua ledu el kmo ngika el sensei a diak lemeduch, e ngii el ngalek el omtok a bai medengelii a ungil el rolel a bo el oltobed a nger er ngii el ochur. A rebibil er a rengalek er a skuul a omdasu el kmo ngmelemalt, me te dirrek el mo melekoi el omtok. A leuaisei, e ngmo mekerang ngika el sensei? A lsekum ngotobedeterir tirka el omtok el ngalek er rikl, e ngmo ua ngerang

---

11. Ngera me a Jehovah a dimlak di lokngemedeterir tirke el ulemtok el mla er a Eden?

12, 13. Ka momekesiu er a blekerdelel a Jehovah er a lebecherei a Satan me bo longederedel er a beluulechad me a uchul me a Dios a milechititerir a rechad me ngdi tir el mengedereder er tir.



a uldesuir tirke el kuk bebil er a rengalek er a skuul? Ngdiak bo el lomdasu el kmo ngike el ulemtok el ngalek me tirke el ulebengkel a mle melemalt? Ngsebechir a rokui el ngalek el ngar er a chelsel sel delemerab el mo diak longull er ngii el sensei, e le te mo omdasu el kmo ngmle chetil el mo chemolt el kmo ngcheleuid a uchul me nguleltobed er tirke el bebil. Engdi nglocha ngera mo duubech omko ngike el sensei a mecherei ngii el omtok el ngalek me bo lochotii el mo er a rokui el chad el kmo ngmekera loltobed er a nger er sel ochur.

<sup>13</sup> A Jehovah a mirruul er a osisiu el tekoi. Molatk el kmo tirke el mlo omtok el mla er a Eden a dimlak di ble el tir el tang a kiliei er sel taem. Te mla er ngii a rebetok el miliol el anghel el ulemes a tekoi el dilubech. (Job 38:7; Chocholt 5:11) Me a tekoi el lurruul er ngii a Jehovah el mlo er tirke el ulemtok a ngar er ngii a lerellii el mo er a rechanghel me a rokui el mellomes a rengrir el blebelel a Dios er a uriul. Me a leuaisei, e ngngera ngmirruul er ngii a Jehovah? Ngmilecherei a Satan me ngmo olecholt er a roel a longedereder er a rechad. A Dios a dirrek el milechititerir a rechad me ngdi tir el mengedereder er tir el ngar er a cheungel a ulekrael er a Satan.

<sup>14</sup> Ngike el sensei el ngar tia el okesiu a medengei el kmo ngike el omtok el ngalek me tirke el bebil er a rengalek er a skuul el obengkel a ngar er a cheleuid. Engdi ngdirrek el medengei el kmo a lebesterir a techall el mo omeketakl er a tekoi el lolekoi er ngii e ngsebechel el mo klungiolir a rokui el ngalek el ngar tia el klass. Me sel lobeketakl el kmo a loruul er ngii tirka el omtok el ngalek a diak el melemalt, e tirke el rokui el melemalt a rengrir el ngalek a rokui el mo sebechir el mesang el kmo ngdi ngike el sensei a rredemelel a ounge Rachel er a osisechakl el kirir. E a uriul er isei, e ngul-

---

14. Ngera el klungiaol a mo er ngii e le Jehovah el tilbir el mechititerir a rechad me ngdi mo tir el mengedereder er tir?

terekokl el kmal di mesubed a rengrir sel lesa sensei er tir el loltobed er a ngii di el ngalek el mo omtok er a klass. Me ngdi osisiu, a Jehovah a medengei el kmo ngmo klungio-lir a rokui el melemalt a rengrir el chad me a rechanghel, a lesa Satan me tirke el bebil er a rulemtok el mo mekngit a omengederederir, me a rechad lebeketeklii el kmo ngdiak el sebechir el di tir el mengedereder er tir. Me ngdi ua Jeremia er a irechar, te ulterekokl el mo sebechir el suubii tia el klou a ultutelel el klemerang el kmo: “RUBAK, ak medengei el kmo ng diak a chad el medengeliu a le bor ngii er a ngar medal, e diak a chad el sebechel el chodereder a blekekel.”—Jeremia 10:23.

### NGERA ME NGKMAL KEMANGET EL TAEM?

<sup>15</sup> Ngera uchul me a Jehovah a ulemechei a ringel me ngmelemolem el kmal kemanget el taem? E ngera uchul me ngdiak el terob a mekngit el tekoi me lak el duubech? Ka bo molebedebek a eru el tekoi el ngike el sensei el ngar er sel okesiu a *diak* bo loruul. A kot, ngdiak bo lorrob er ngike el omtok el ngalek er a skuul me lak bo lolecholt er a omesodel. E a ongerung, ngii el sensei a dirrek el *diak* bo lolengeseu er ngike el ngalek er a skuul el mo omeketakl er a tekoi el losaod er ngii me bo el ungil. Me nngar er a osisiu el blekeradel, e ka momes a eru el tekoi el Jehovah a kmal diak el bo loruul. A kot, e ngdiak bo lorrob er a Satan

15, 16. (a) Ngera uchul me a Jehovah a milechei a ringel me ngmelemolem el ngar er ngii el kmal kemengeta el taem? (b) Ngera uchul me a Jehovah a dimlak lorrob a tekoi el ua mekngit el delengerenger me lak el duubech?

***A Dios a mo ngosukau el mo outekangel a ringel***



me tirke el loltirakl er ngii er a omelasem er tir el mo omek-etakl el kmo te melemalt. Me seikid a uchul me ngmle klou a ultutelel el lomesterir a taem. Me ngngar er a chelsel aika el betok el telael el rak er a reksi er a klechad, e a rechad a mla sebechir el melasem a betok el bedengel a omerredel. A klechad a kmal mla olengeriakl er a roel a omesubel a beluulechad me a omebelel a klalo me a lmuut el bebil er a tekoi, engdi chelebirukel, chelebuul, delengerenger, me a mekemad a mla merael el mengal mo mekngit. Me a ome-ngederederir a rechad a mla *obeketakl* el kmo ngdiak el ungil.

<sup>16</sup> Ongerung, a Jehovah a diak el olengeseu er a Satan er a omengederederel er tia el beluulechad. E le lsekum a Dios a mo olekebai a mekngit el delengerenger, e tiang diak el ua lolengeseu er a omengederederir tirka el mlo omtok er ngii? A loruul el uaisei, e a Dios ngdiak bo el relleterir a rechad el mo omdasu el kmo a rechad a *sebechir* el di tir el mengedereder er tir el diak a ngera el tellemall el lukdubech? A lsekum a Jehovah a mo meruul a chouaisei el tekoi, e ngmocha teloi er a blulak el ngar er ngii. Engdi “a Dios [a] diak lomulak.” —Hebru 6:18.

<sup>17</sup> Engdi ngmo klsakl aika el betok el tellemall el mla duubech er a klemengetel a taem el ngar er ngii a ultok el mo er a Dios? Ngkired el melatk el kmo a Jehovah a kot el mesisiich. Me ngsebechel el mult e sumechokl a bek el ringelexel a klechad. Me ngdi ua aike el bla desuub el kmo, a telemellel tia el chutem a mo mesmechokl sel bo el Paradis a beluulechad. A telemellel a klengit a mo mesuld el oeak a klaumerang er a tenget el olubet er a Jesus, me a telemellel a kodall a mo diak el oeak a okiis. A Dios a mo ousbech er a Jesus el mo “tomall a urerel a Diabelong.” (1 Johanes 3:8)

---

17, 18. Ngera ngmo meruul a Jehovah el kirel aika el tellemall el mla duubech e le rechad el mengedereder me a dirrek el ongetikaik er a Satan a uchul?

Ngmo meruul aika el rokui er a ungil el blsechel. Me ngsebechel el mo dmeu a rengud e le ngii el dimlak lemereched el meruul er tiang, me a kllourenge er ngii a meskid a techall el mo sebeched el suubii a klemerang e mo mesiou er ngii. (2 Petrus 3:9, 10) Me chelecha el mitil a taem, e a Dios a blak a rengul el osiik er a remera el mengull e olengeseu er tir el mo outekangel a ngii di el ringel el bo el chelebangel er a chesel tia el mekngit el beluulechad.—Johanes 4:23; 1 Korinth 10:13.

<sup>18</sup> A rebebil a locha melatk el kmo, Aika el ringel a sebechel el dimlak el bo er ngii omko Dios er a lebebi a Adam me a Eba e ngrirelleterir el *diak el sebechir* el mo omtok er ngii. A bo donger er tia el ker, e ngkirem el mo melebedebek er sel kmal mekreos el sengk el lebilskau a Jehovah.

### NGMEKERANG A OMOUSBECH ER A SENGK EL MLA ER A DIOS?

<sup>19</sup> Ngua aike el mla er a 5 el Bliongel, a rechad a ulebeob el sebechir el mimokl el melilt a tekoi. Kau ke kol melechesuar er a kerresel tia el sengk? A Dios a mileob a diak el mochur a ildisel el charm, el rokui el di mengitengtik el oltirakl a ulterekokl el teletelel a omerellel a tekoi el ngar er a chelsir. A rechad a mla meob a mesil el sebechel meruul a tekoi el di oltirakl aike el ulterekokl el prokuram el lilecha er a chesel. Kid nglocha mlo dmeu a rengud omko Dios a milebid el uaisei? Ngdiak, ngdmeu a rengud el sebeched el mimokl el melilt el kmo kede mo ua ngera el chad, e ua ngera el rollel a klengar a soad me a ua ngera el klausechelei a domekdubech me a lmuut el bebil. Ngsoad el melechesuar a ilmokl, e tiaikid a soal a Dios a bo el deu a rengud er ngii el tekoi.

<sup>20</sup> A Jehovah a diak el deu a rengul er a omesiou el oak

19. Ngera el mekreos el sengk a lebilskid a Jehovah, e ngera me ngkired el mo kerekikl el mengeluolu er ngii?

20, 21. Kede mekerang e ousbech er tia el sengk er a mimokl el omelilt er sel kot el ungil el rollel, e ngera me ngsoad el uaisei?

a orimel. (2 Korinth 9:7) El ua tiang: Ngngerang a ngar er uchei el odeuir a rengul a chedam me a chedil—ngngalek el melekoi el kmo “Ngbetik a renguk er kau,” e le ngii el mlo-durch el mo melekoi el uaisei me a lechub e ngmimokl el melekoi el uaisei e le ngmera el mla er a chelsel a rengul? Me a ker a kmo, *Ke* mekera omousbech er a mimokl el uldesuem el lebilskau a Jehovah? A Satan me a Adam me a Eba a ulle-cholt a kot el mekngit el usbechel a mimokl el uldesuir, e le te ultngeklii a Jehovah el Dios. Kau ke mo mekerang?

<sup>21</sup> Ngngar er ngii a techellem el mo ousbech er tia el mengasireng el sengk er a mimokl el omelilt er a kot el ungil el roel. Ngsebechem el mo teloi er a rebetok el miliol el chad el mla ngiltii el mo dechor er a bita er a Jehovah. Te oldeu er a rengul a Dios e le ngblak a rengrir el omeketakl el kmo a Satan a bulak e diak el ungil el merreder. (Osisechakl 27:11) Kau a dirrek el sebechem el mo uaisei el oeak a omolilt er a melemalt el roel a klengar. Tia el tekoi a mo soadel er a ongingil el bliongel.

#### AIKE EL LOLISECHAKL A BIBLIA

- A Dios a diak el uchul a mekngit el bleke-radel el ngar er ngii er a beluulechad.—Job 34:10.
- A lomekedong er a Dios el kmo ngbulak e orreked a ungil el kirir a rechederedellel, e a Satan a ulemekdubech a ker el kirel a llemel-tel a Jehovah el mengedereder.—Genesis 3: 2-5.
- A Jehovah a mo ousbech er a Ngelekel, el Merreder er a Rengedel a Messias, el mo merrob a rokui el ringelel a klechad e sume-chokl a bek el telemellel.—1 Johanes 3:8.

## **Kede Kiei el Oldeu er a Rengul a Dios**

**Ke mekerang e mo sechelil a Dios?**

**Ngoeak a ngera el roel e ke uldimukl er a omelsemai er a Satan?**

**Ngera el omeruul a diak el loldeu er a rengul a Jehovah?**

**Ke mekera e kiei el oldeu er a rengul a Dios?**

NGUA ngera el chad a omngiltii el mo sechelim? Ke ultere-kokl el soam a chad el losisiu a osengiu me a klemeriarreng er kemiu, me aike el momdasu el kmo ngmeklou a ultutelel el tekoi. Ke locha dirrek el soam el kmeed er a chad el melemalt e bekokeuii.

<sup>2</sup> Ngar er a reksi er a klechad, e a Dios a millilt er a rebebil er a rechad el mo kmeed er ngii el sechelil. El ua tiang, a Jehovah a ulemekedong er a Abraham el kmo ngsechelil. (Isaia 41:8; Jakobus 2:23) E melekoi el kirel a David el kmo 'ngsoal a rengul' e le ngmle soal a blekerdelel. (Rellir 13:22) E mle "betik a rengul" er a profet el Daniel.—Daniel 9:23.

<sup>3</sup> Ngera uchul me a Jehovah a ulemes er a Abraham, David, me a Daniel el kmo te sechelil? Ngdilu er a Abraham el kmo: "Kullengesenges a tekingek." (Genesis 22:18) Me a Jehovah a olekeed er ngii er tirke el ngariou a rengrir e meruul aike el ledu er tir. Ngdilu er a rengalek er a Israel el

---

1, 2. Te rua techang a lulemes er tir a Jehovah el mle sechelil?

3. Ngera uchul me a Jehovah a melilt er a rebebil er a rechad el mo sechelil?

kmo: 'Kom mo olengesenges er ngak, mak mo Dios er kemiu me kemiu a mo chedak.' (Jeremia 7:23) Me a omolengesenges er a Jehovah, e ngdirrek el sebechem el mo sechelil!

### A JEHOVAH A MELISIICH ER A RESEHELIL

<sup>4</sup> Ka molebedebek er a belkul a dousechelei er a Dios. A Biblia a kmo a Jehovah a osiik a techall el mo "omesterrir a klisichir tirkel blak a rengrir er ngii." (2 Kronika 16:9) Ngmekera Jehovah a lolecholt er a klisichel el kired? A ta er a roel a lolekoi er ngii a Psalm 32:8 el kmo: "Ak [Jehovah] mo osisecheklau er a rael el kirem el merael er ngii; ak mo osisecheklau e meskau a ngesou er a ungil uldasu."

<sup>5</sup> Chouaisei el ulekerreuil a Jehovah a kmal odeu a rengud! E le Jehovah a meskau a ulekrael el mousbech e omes er kau a omoltaut. *Ngsoal* el ngosukau el mo outekangel a ringel me a omelsemai el omchelebangel. (Psalm 55:22) Me a omosiou er a Jehovah el oba rengum el rokir, e ngsebechel el mo ulterekokl a rengum el ua milluches er a psalm er a ledu el kmo: "Ak di blechoel el medengei el kmo a RUBAK a obengkek; ng di kmeed, me ng diak a ngeral simesmengak." (Psalm 16:8; 63:8) Me a Jehovah a sebechel el ngosukau el mo kiei el oldeu er a rengul. Engdi nngangar er ngii a cherrouel a Dios el soal el merrob er kau me lak moruul er tiang.

### A OMELSEMAI ER A SATAN

<sup>6</sup> A 11 el Bliongel a mesaod er a Satan el Diabelong er a lolsemai er a omengederderel a Dios. A Satan a dilu el kmo a Dios a omulak, e uleltelechakl el kmo ngdiak el melemalt a omerellel e le ngdimlak el becherei a Adam me a Eba me di el tir el mo melilt a ungil me a mekngit el kirir. Uriul er a

4, 5. Ngmekerang a Jehovah a lolecholt er a klisichel el kirir a rechedal?

6. Ngera mle ultelecheklel a Satan el kirir a rechad?

Adam me a Eba er a lebo er a klengit me a beluulechad er a lebocha lemui er a rechad, e a Satan a kuk mlo omekdu-bech a ker el kirel a mera el uldesuir a rechad e te mesiou er a Dios. Me ngua ledilu el kmo, 'A rechad a diak el losiou er a Dios e le tir el betik a rengrir er ngii. Me a obeskak a te-chall e ngebechek el meltii a *ngii di el chad* el mo omtok er a Dios.' A tekoi el dilubech el mo er a Job a olecholt el kmo a Satan a oumerang er tia el tekoi. Ngtechang a Job, e mlekerang e soiseb er a chelsel tia el omelsemai er a Satan?

<sup>7</sup> A Job a kiliei er a bekord el 3,600 el rak er a mla me mong. Ngmle ungil el chad, e le Jehovah a dilu el kmo: "Ng diak a ngar a beluulchad el blak a rengul e ungil el ua ingii. Ng meluu er ngak e kerekikl el diak a ngeral le rellii el meknigt." (Job 1:8) A Job a kmal uleldeu er a rengul a Dios.

<sup>8</sup> A Satan a uluumededenger er a mera el uchul me a Job a mesiou er a Dios. Me ngdilu er a Jehovah el kmo: "Ke milengkar er ngii ma telungalek er ngii ma bek el kloklel. Kulemekngeltengat a bek el tekoi el loruul, e mla msa kmal betok el kerbou el mekekii a beluu el rokir. Chomko ke ngmai er ngii a ikel bek el lolab, e ng di mo ngar medam e siuesau."—Job 1:10, 11.

<sup>9</sup> A Satan a uluutekangel el kmo a Job a di milsiou er a Dios el kirel a omeksaul el lolai. Ngdirrek el kmo a lsekum a Job a measem, e ngulterekokl el mo ikrii a Dios. Me ngmilekerang a Jehovah er a longer er tia el omelsemai? A uldesuel a Job el mle uldimukl er tia el omelsemai a uchul, me a Jehovah a milecherei a Satan me ngmlo melasem er ngii. Ngoeak tiang, e a bltikerreng er a Job el mo er a Dios a mle sebechel el obeketakl—a lemla er ngii me a lemlak.

---

7, 8. (a) Ngera rirellii a Job el mle ileakl er a rechad er a taem er ngii? (b) Ngmilekerang a Diabelong e mekdubech a klaumededenger el kirel a blakerreng er a Job?

9. Ngmilekerang a Jehovah er a longer er a omelsemai er a Satan, e ngera uchul?





*A Job a mlukngeltengat el  
blakerreng er ngii a uchul*

## A JOB A MEASEM

<sup>10</sup> A Satan a di mle mereched el mo melasem er a Job el ngar er a betok el roel. A bebil er a chermel a mlerechorech me a bebil a mloload. E a ruumesingd er a remesiungel a lulekodeterir. Tia mlo uchul a renglel a kerrekerengel. NgImuut el klou el chelebuul a mlo er a Job er a lemad a re-teruich el ngelekel er a eolt. Engdi a lengar er a chelsel aika el betok el chelebuul, e “a Job a dimlak le bor a klengit el ol-telechakl er a Dios.”—Job 1:22.

<sup>11</sup> A Satan a dimlak bo lemesubed a rengul. Nglocha ulemdasu el kmo alta e a Job a sebechel el outekangel a bo lak a kloklel me a remesiungel me a rengelekel, engdi a bo el secher e ngmo omtok er a Dios. Me a Jehovah a milecherei a Satan me ngulsecherii a Job er a kmal mekn- git e meringel el rakt. Engdi ngmo lmuut er tia el tekoi me ngdimlak el rellii a Job me loridii a klaumerang er ngii er a Dios. Ngbai “kmal mlo chebuul a Job e ngdi dimlak a tal ngeral le delii el omtok er a Dios!”—Job 2:10.

<sup>12</sup> A Job a dimlak lodengei el kmo a Satan a mle uchul aika el mondai er ngii. Ngdimlak lodengelii sel omelsemai er a Diabelong el kirel a omengederederel a Jehovah, me ngulemdasu el kmo ngDios a mle uchul a mondai er ngii. (Job 6:4; 16:11-14) Engdi ngdi millemolem er a blakerreng er ngii el mo er a Jehovah. Me a ultelecheklel a Satan el kmo a Job a di milsiou er a Dios e le ngii el di millatk er a di ngii a ulebeketakl el klsuul.

<sup>13</sup> A blakerreng er a Job a milsa Jehovah a mesisiich el nger el kirel a delengulel a Satan. A Job a mera el mle

---

10. Ngera el ringel a blo lecharm a Job, me ngmilekerang?

11. (a) Ngera el ongeru el ultelechakl a lerirelii a Satan el kirel a Job, e milekera longer er ngii a Jehovah? (b) Ngmlo ua ngera Job er a lebo er ngii a meringel el rektel?

12. Ngmilekera Job er a longer er a omelsemai er a Diabelong?

13. A blakerreng er a Job ngmlo uchul a ngerang?

sechelil a Jehovah, me ngmlukngeltengat er a Dios el kirel a blakerreng er ngii.—Job 42:12-17.

### KE MEKERA E ULDIMUKL ER NGII

<sup>14</sup> A omelsemai el kirel a blakerreng el mo er a Dios el lulekdebechii a Satan a dimlak di el kirel a Job. Kau me ke dirrek el uldimukl er ngii. Tiang a bleketakl el meues er a Te-kingel a Jehovah er a Osisechakl 27:11 (NW) el kmo: “Bo el mellomes a rengum e rungalek me modeuir a renguk, me bo el sebechek el onger er ngike el omekako er ngak.” Aika el tekoi el milluches er a betok el dart el rak er a uriul er a kodellel a Job, a olecholt el kmo a Satan a dirk melenguul er a Dios el kirel a blakerreng er a remesiungel. A dekiei el omo-tech er a rengul a Jehovah, e kede olengeseu el omsang a nger el kirel sel klsuul el ultekengel a Satan, me kede oldeu er a rengul a Dios. Ngua ngera uldesuem el kirel tiang? Alta obo muaisei, e ngbelkul a kmo ngmo kirem el melodech a bebil er a blekerdelel a klengar er kau, engdi tia ngdiak el sal chetengakl el tekoi a lsebeched el olengeseu el onger er a blulekngel a Satan?

<sup>15</sup> Mutab a tekingel a Satan el kmo: “A *chad* a mo meiubet a rengul er a bek el tekoi el kirel a klengar er ngii me lak le mad.” (Job 2:4) A lolkoi el kmo “a chad,” e ngmileketeklii el kmo a ultekengel a dimlak di el kirel a Job e ngbai mle kirir a *rokui* el chad. Ngkmal kirem el mtebengii tiang. E le Satan a dirrek el uluumededenger er a blakerreng er *kau* el mo er a Dios. Ngkmal soal mesekau el mo diak molengese-nges er a Dios e ochotii a roel a llemalt sel bo mchebangel a ringel. Ngmekerang a Satan a lolasem el meruul er tiang?

<sup>16</sup> Ngua aike el dulsuod er a 10 el Bliongel, a Satan a ous-

14, 15. Ngera uchul me ngsebeched el melekoi el kmo a omelsemai er a Satan el kirel a Job a motaut el mo er a *rokui* el chad?

16. (a) Ngoeak a ngera el roel e a Satan a melasem el mengeroid er a rechad er a Dios? (b) Ngmekerang a Diabelong e lousbech aika el osisiu el tekoi el omtok er kau?

bech a betok el kakerous el cheldechuu el mengeroid er a rechad er a Dios. Ngdirrek el orrouk er a rechad el ua “choteb el laion el merael el meliuekl losiik ra bo le dekeueklii.” (1 Petrus 5:8) Me ngsebechel el meues a urerel sel sekum a resechelim me a rechedam me a redi ngodech el chad a mo omtok er a blakerreng er kau el melasem el mo mesuub er a Biblia e oltaut a tekoi el mosuub.\* (Johanes 15:19, 20) Ngar er a kuk bitang, e a Satan a “meruul er a teletelel el leko ngchanghel ra llomes.” (2 Korinth 11:14) Ngsebechel el ousbech a tekoi el diak el mekngit e mekekakil el mengesuseu er kau el mo cheroid er a roel a klengar el lekengei er ngii a Dios. Ngsebechel el ousbech a tekoi el mengitechut er a rengum, el ua sel lerellau el mo omdasu el kmo ke kmal mekngit el diak a roel e modeuir a rengul a Dios. Me a Satan a leua “choteb el laion” me a lechub e leua “anghel er a llomes,” me ngii a di osisiu a omelsemai er ngii el kired el kmo: A bo mchebangel a ringel me a omelsemai, e ngmo diak mosiou er a Dios. Ngmekera omonger er tia el omelsemai, e meketeklii a blakerreng er kau el mo er a Dios el ua Job?

### OLENGESENGES A LLECHUL A JEHOVAH

<sup>17</sup> Ngsebechem el onger er a omelsemai er a Satan sel omkiei el omotech er a rengul a Dios. Ngera uldimukl er tiang? A Biblia a onger el kmo: “Bo le betik a rengum er a RUBAK el Dios er kau er a rengum el rokir ma klengar er kau el rokir ma klisichem el rokir.” (Duteronomi 6:5) A bltikerreng er kau el mo er a Dios sel lorael el mo klou, e a urungulem el mo meruul a soal a mengal mo mesisiich. A Johanes a

---

\* Tiang a diak el belkul a kmo tirke el omtok er kau a lomtebechel er tir a Satan. Engdi a Satan a chelid er tia el mekngit el blekeradel, me a beluulechad el rokir a ngar er a cheungel a klisichel. (2 Korinth 4:4; 1 Johanes 5:19) Me kede mesa el kmo ngdiak el betok el chad a mo sorir a doltirakl er a Dios, me a rebebil a mo omtok er kau.

---

17. Ngera sel kot el klou el uchul me kede olengesenges a llechul a Jehovah?

milluches el kmo: “Tial tekoi el kmo, ngbetik a rengud ra Dios, a melekoi ra bo dolab a llechul.” Me a lebetik a rengum er a Jehovah er a rengum el rokir, e ke mo metik el kmo a “llechul a diak le meringel.”—1 Johanes 5:3.

<sup>18</sup> Ngerang aika el llechul a Jehovah? A bebil er ngii a mesaod a tekoi el kired el mengeroid er kid er ngii. El ua tiang, ka momes er a box el ngariou, er a dai el kmo “Mongeroid

18, 19. (a) Ngera bebil er a llechul a Jehovah? (Momes er a box el ngariou.) (b) Kede mekera e medengei el kmo a Dios a diak longechir a tekoi el medeel er kid?

## MONGEROID ER KAU ER AIKE EL LOUKETUI A JEHOVAH

**Koad el chad.**—Exodus 20:13; 21:22, 23, *NW*.

**Deleboes.**—Levitikus 20:10, 13, 15, 16; Rom 1:24, 26, 27, 32; 1 Korinth 6:9, 10.

**Tekoi er a Omengelil, Olai, me aike el uai ngii.**—Duteonomi 18:9-13; 1 Korinth 10:21, 22; Galatia 5:20.

**Omengull el Bleob.**  
—1 Korinth 10:14.

**Cheltelaol er a rrom.**  
—1 Korinth 5:11.

**Rechorech.**—Levitikus 6:2, 4; Efesus 4:28.

**Blulak.**—Osisechakl 6:16, 19; Kolose 3:9; Chocholt 22:15.

**Ngibes.**—1 Korinth 5:11.

**Ngasechereng.**—Osisechakl 22:24, 25; Malakai 2:16; Galatia 5:20, 21.

**Terrekakl el rokel a chel-decheduch.**—Levitikus 19:16; Efesus 5:4; Kolose 3:8.

**Mekngit el usbechel a rassech.**—Genesis 9:4; Rellir 15:20, 28, 29.

**Diak el kengei el osiik a lousbech a telungalek er ngii.**—1 Timoteus 5:8.

**Teloi er a mekemad me a balatiks er a beluulechad.**  
—Isaia 2:4; Johanes 6:15; 17:16.

**Usbechel a dekool me a mekngit el kar.**—Markus 15:23; 2 Korinth 7:1.

er Kau er Aike el Louketui a Jehovah.” Ngbedukl er ngii a tekoi el Biblia a bleketakl el kmo ngmekngit. Sel dekot el omes er ngii, e a bebil er a omeruul el lomasech a kora diak el sal mekngit. Engdi obo mkerekikl el melebedebek aike el bades, e kulterekokl el mes a llemesel a llechul a Jehovah. A omeldechel a blekerdelem a locha kot el meringel el ome-lsemai el bla bo mchelebangel. Me nguaisei, engdi a dekiei el omotech er a rengul a Dios e ngmo uchul a klou el deuil a rengud. (Isaia 48:17, 18) E tiang a tekoi el kmal sebechem el meruul er ngii. Kede mekera e medengei?



<sup>19</sup> A Jehovah a diak el longerechir er kid a tekoi el diak el sebeched el meruul. (Duteronomi 30:11-14) Ngungil medengei a dechad me a telkelel aike el sebeched. (Psalm 103:14) A Jehovah a dirrek el sebechel el meskid a klisiched el mo olengesenges er ngii. A Paulus a milluches el kmo: “A Dios a blak a rengul, me ngdiak di lak loltaut er kemiu raikel medeel er kemiu lomengarm e le merekong, ngdirrek el rullemiu el mo sebechiu el mtekengeliu chomengarm, e kudmeklii a rokel a chiis.” (1 Korinth 10:13) Me a lengesukau el mo outekangel, e a Jehovah dirrek el sebechel el meskau a “diak le metuk el klisiich.”—2 Korinth 4:7.

### **OMEKEROUL A BLEKERADEL EL KENGEI A DIOS**

<sup>20</sup> Ngklemerang el kmo ngbetok a kired el meruul el mo oldeu er a rengul a Jehovah, er a bai di dongeroid er kid er a tekoi el ouketui. Ngdirrek el kirem el mo betik a rengum er aike el lebetik a rengul er ngii a Dios. (Rom 12:9) Kau ngdiak bai el soam el kmeed er a rechad el ta osengiu, klemeriarreng er kemiu, me a uldesuiu el kirel a tekoi? A Jehovah me ngdirrek el uaisei. Me mosuub el mo betik a rengum er aike el tekoi el mekreos er a rengul a Jehovah. A bebil er ngii a losaad er a Psalm 15:1-5, el ngar er ngii e kede menguiu el kirir a rechad el lomes er tir a Dios el kmo te sechelil. A resechelil a Jehovah a olecholt a blekeradel el lolekoi a Biblia el kmo ngrodech er a oureor el klisichel a Dios. Nguldikumukl er ngii a blekeradel el ua “bltikerreng, ma deourreng, ma budech, ma kllourreng, ma blekokuii, ma ungilreng, ma blakerreng, ma delemedemek, ma chomeongerem.”—Galatia 5:22, 23.

<sup>21</sup> A oblechoel el menguiu e mosuub er a Biblia e ngse-

---

20. Ngera el blekerdelel a Dios a kirem el omekeroul, e ngera me ngklou a ultutelel?

21. Ngera ngosukau el mo omekeroul a blekeradel el kengei a Dios er a klengar er kau?

bechem el mongeseu el mo omekeroul er a chelsem a blekeradel el kengei a Dios. Sel omosuub el mo medengei a soal a Dios e ngmo sebechem el meruul a uldesuem el mo oltirakl a uldesuel. (Isaia 30:20, 21) Me a lorael el mo mesisiich a bltikerreng er kau el mo er a Jehovah, e ngmengal mo soam el kiei el meruul a soal.

<sup>22</sup> Kede ousbech a ducherreng el mo sebeched el kiei el oldeu er a rengul a Jehovah. A Biblia a omekesiu er a omeidechel a blekerdeled el ua domedobed a mechut el bail e domail er kid er a beches. (Kolose 3:9, 10) Engdi a melluches er a Psalm a millekoi el kirel a llechul a Jehovah el kmo: “[Ak] nguu omeksullek a kulengesenges.” (Psalm 19:11) Kau me ke dirrek el mo metik el kmo a omkiei el omotech er a rengul a Dios, e ngmo uchul a betok el omeksaul. E a omoruul el uaisei, e ke onger er a omelsemai er a Satan me ke odeuir a rengul a Jehovah!

22. Ngera sebechem el mo kutmeklii a omkiei el omotech er a rengul a Dios?

#### AIKE EL LOLISECHAKL A BIBLIA

- Ngsebechem el mo sechelil a Dios sel omolengesenges er ngii.—Jakobus 2:23.
- A Satan a milsemai er a blakerreng er a rokui el chad.—Job 1:8, 10, 11; 2:4; Osisechakl 27:11.
- Ngkired el mengeroid er kid er a omeruul el diak el kengei a Dios.—1 Korinth 6:9, 10.
- Ngsebeched el oldeu er a rengul a Jehovah sel bo douketui aike el tekoi el louketui e bo el betik a rengud er aike el lebetik a rengul er ngii.—Rom 12:9.



## A Osengel a Dios el kirel a Klengar

**Ngua ngera osengel a Dios el kirel a klengar?**

**Ngua ngera osengel a Dios el kirel a omelecheb  
er a rengalek?**

**Kede mekera e olecholt a omengull el kirel a  
klengar?**

A PROFET el Jeremia a kmo: “Ngdi RUBAK a meral Dios. Ingii a ngar el Dios.” (Jeremia 10:10) A Jehovah el Dios a dirrek el Ulemeob a rokui el dingar. A rechanghel a millekoi el mo er ngii el kmo: “Ele kau a mileob a rokuil tekoi, ma rokuil tekoi a ngarngii luleltirakl a uldesuel a rengum e ulebeob.” (Chocholt 4:11) Ngar er a cheliteklel el oldanges er a Dios, e a King el David a dilu el kmo: “Kau a uchelel a rokui el klengar.” (Psalm 36:9) Me a klengar a sengk el mla er a Dios el mei.

<sup>2</sup> A Jehovah a dirrek el oltekau a klengar er kid. (Rellir 17:28) Ngomeskid a keled, imeled, eolt el douteliil, me a chutem el dekiei er ngii. (Rellir 14:15-17) Ngulemeskid aikang el oak a roel e ngsebeched el oldeu a rengud er a klengar. Engdi a bo doldeu a rengud er a klengar el mo er sel tkurrebab el sebeched, e ngkired el mo mesuub a llechul a Dios e mo olengesenges.—Isaia 48:17, 18.

### **DOLECHOLT A OMENGULL EL KIREL A KLENGAR**

<sup>3</sup> A Dios a soal a dongull a klengar. El ua tiang, a ngelekel a Adam me a Eba er a Kain a kmal mlo kesib a rengul er a ochellel er a Abel. A Jehovah a ulemeklatk er ngii el kmo a ngesechel a

1. Ngtecha ulemeob a rokui el dingar?
2. Ngerang meruul a Dios el oltekau a klengar er kid?
3. Ngmle ua ngera osengel a Dios el kirel a okodellel a Abel?

rengul a sebechel el choitikikii el mo er a klengit. Engdi ngdimlak lorrenges e ‘milekudir ochellel er a Abel.’ (Genesis 4:3-8) Me a Jehovah a kilebsengii el kirel a okodellel a ochellel.—Genesis 4:9-11.

<sup>4</sup> Betok el telael el rak er a uriul, e a Jehovah a milsterir a rengalek er a Israel a llach el mlo olengeseu er tir el mo mesiou er ngii er a rolet el lekengei er ngii. Aika el llach a lebilsterir el uleak a profet el Moses a uchul me a lebebil er a taem e ngokedongall el kmo Llach er a Moses. A ta er ngii a kmo: “Lak bo momekoad.” (Duteronomi 5:17) Tiang a ullecholt el kmo a Dios a ulemes a klengar er a rechad el kmal mekreos me ngkirir a rechad el dirrek el omes a klengar er a rebebil el kmo ngmekreos.

<sup>5</sup> E kuk mekerang a klengar er a dirkak lemechell el ngalek? A Llach er a Moses a kmo: “A resechal a le kakoad el temellii a dioll el redil me ngmechelleterir a rengelekel engdi ngdiak a mad, e ngike el tilemellii a ulterekokl el mo obals el oltirakl a bo el dung a bechil ngii el redil, e kmal kirel el mo mengkad a blsel el lokiu a kerrekeriil. Engdi a lsekum ngmlo er ngii a kodall, e a blsel a mo klengar el kirel a klengar.” (Exodus 21: 22, 23, NW) A okodellel a ngalek el dirk ngar er a omecherellel a delal a mle mekngit. Ngmerang, ngmo lmuut er a uaisei el klengar me ngmekreos er a osengel a Jehovah. (Psalm 127:3) Tiang a belkul a kmo a omelecheb er a rengalek a mekngit.\*

<sup>6</sup> A dongull a klengar a uldimukl er ngii a doba melemalt el uldasu el kirir a rebebil. A Biblia a kmo: “Tirikel rokui louketui er chodam er tir chomekoad, me ko medengei el kmo, ngdiak a ta lomekoad el ngarngii ra chelsel a diak a ullebengelel

---

\* A rubekel el sorir el mesebech a klungel a telungalek er tir a sebechir el ousbech a kakerous el klekedall me a rolet a dorrob a kldiull. Tia el omeruul a diak el omtok a omellach er a Biblia.

4. Ngar er a Llach er a Moses, e ngmilekera Dios er a lolisiich er a melemalt el osenged el kirel a klengar?
5. Ngkirel mo ua ngera osenged el kirel a omelecheb er a rengalek?
6. Ngera me ngdiak el kired el ouketui er a rebebil er a rechad?

## KEDE OLECHOLT A OMENGULL EL MO ER A KLENGAR

---



- el oek sel lak dolemall er a dirkak el mechell el ngalek



- el oek a dongoit a diak el kliiid el kse er kid



- el oek a domadel a risel a bek el kltui el mo er a rechad el ngar er a rengud

klengar.” (1 Johanes 3:15) Me a lsoad a diak a ulebengelel el klengar, e ngkmal kired el madel el chemoit a rokui el risel a kltui er a chelsel a rengud, e le kltui a risel a oumesingd el meklou el uldikel me a tellemall el ngar er ngii. (1 Johanes 3:11, 12) Ngkmal klou a ultutelel a bo dosuub el mo betik a rengud er a tang me a tang.

<sup>7</sup> E kuk mekera dolecholt a omengull el kirel a klengar er kid? A rechad a diak el sorir el mad, engdi te betok a mo cherur a kodall el tekoi er a omilil me a ongelaod a uchul. El ua tiang, te betok el chad a ousbech a decool, melamech a buuch, melungel a cheluch, me a lechub e te ousbech a mekngit el kar, el di kirel a omilil me a deuil a rengrir. Aika el klekedall a tomall a bedenged e sebechel el mekodeterir a rechad el ousbech. A chad el mo er ngii a kse er ngii el ousbech aika el klekedall a diak lomes er a klengar el ua lechedaol. Aika el omeruul a diak leklikiid er a osengel a Dios. (Rom 6:19; 12:1; 2 Korinth 7:1) Me a dosiou er a Dios er a roel el lekengei er ngii, e ngkmal kired el chemoit a chouaika el omeruul. A doruul el uaisei, alta e ngmeringel er kid, engdi a Jehovah a sebechel el meskid a ngeso el dousbech. Ngdirrek el dmeu a rengul el mesekid el kerekikl a klengar er kid el ua lemekreos el sengk el mla er ngii el mei.

<sup>8</sup> Me a dongull a klengar, e kede blechoel el kerekikl a bek el tekoi el doruul me lak bo el duubech a tellemall. Ngdiak bo demeterekakl me a diak bo doruul a tekoi el mo cherur a kodall el osiik a tametereng. Kede mengeroid er kid er a terrekakl el bekall me a uldikel me a lechub e ngkengaol el roel a omilil, el ua aike el klekool el dengar er a kedidai e melechesokl el meriou me a kuk bebil. (Matteus 4:5-7) A llechul a Dios el mo er a rechad er a Israel er a irechar a kmo: “Sel momekedechor er a beches el blai [el di melemalt a chedoel], e ke loa sersel a chedoel el meliuekl, me ng diak bo le telemellem a le rebet a chad er ngii el mad.” (Duteronomi 22:8) Me a doltirakl er

---

7. Ngera bebil er a tekoi el loruul a rechad el ngii a diak el olecholt er a omengull el kirel a klengar?

8. Ngera uchul me ngkired el blechoel el kerekikl a tekoi el doruul me ngdiak a tellemall el duubech?

tia el omellach, e ngkired el meruul a basio el ua oridekill er a rekeblid me ngdi ungil me lak a chad el mesibas me a lechub e lekoll er ngii el metemall. A lengar er ngii a mlim, e ngkirem el kerekikl er ngii me ngdiak demekesakl a domekall er ngii. Ngdiak el kirem el mecherei a blim me a lechub a mlim me bo el uchul a tellemall el kirem kau me a rebebil.

<sup>9</sup> E kuk mekerang a klengar er a charm? Ngdirrek el chedaol er a osengel a Ulemeob. A Dios a kongei a okodellel a charm el kirel a omengang, bail el dousbech, me a lechub e kede omerkerreu er kid er a kengaol el sebecel mo duubech. (Genesis 3: 21; 9:3; Exodus 21:28) Engdi a domekcharm a charm me a lechub e domekoad el di diak a uchul me a rsel e ngmekngit, e le kede olecholt el kmo ngkmal diak domekerreu el kmo a klengar a chedaol.—Osisechakl 12:10.

### **OLECHOLT A OMENGULL EL KIREL A RASECH**

<sup>10</sup> Uriul er a Kain er a lokodir a ochellel er a Abel, e a Jehovah a dilu er ngii el kmo: “A rsechel ochellem a oldiu el ngar a chutem el mer ngak el soal melaitechei.” (Genesis 4:10) A Dios er a lolekoi el kirel a rsechel a Abel, e ngmillekoi el kirel a klengar er ngii. A Kain a ngiluu a klengar er a Abel, me ngmle kirel el mo obals. Me ngua dedu el kmo a rsechel me a lechub a klengar er a Abel a lilangel el mo er a Jehovah me bo lolaitechei el kirel. Tia el deleuill er a klengar me a rasech a dirrek el mleues er a uriul er a Ieleb er a taem er a Noah. Uchei er a Ieleb, e a rechad a di milengang a rodech, iasai, mungi, me a rua miich. Uriul er a Ieleb, e a Jehovah a dilu er a Noah me a rengelekel el sechal el kmo: “Chelechang e ng sebecchem el mengang a rokui el charm ma dellomel; ele kmla meskau el kirel kelem.” Engdi Dios a ullekebai er tir el kmo: “Ngar ngii a tal kall el diak le kiriu el menga er ngii, el ngii el kall a techel a charm el ngar ngii a

---

9. A lsekum kede mengull a klengar, e ngera kirel el mo omerelled el mo er a charm?

10. Ngmilerang a Dios e olecholt el kmo nngngar er ngii a deleuill er a klengar me a rasech?

rsechel, ele rasech a uchul a klengar.” (Genesis 1:29; 9:3, 4) Me ngbleketakl a osengel a Jehovah el kmo ngomes a klengar me a rsechir a reblebelel el osisiu.

<sup>11</sup> Ke dolecholt a omengull er kid el kirel a rasech a lak dongang. Ngar er a llach el lebilsterir a rechad er a Israel, e a Jehovah a dilu el kmo: “Ngdi diak monga rasech er sel mongang er ngii el techel a charm, ele klengar a ngar a rasech me ng diak le kiriu el menga er a klengar el uldak er a techel a charm. Ngdiak monga rasech. Kom ochebelii er a chutem el di ua ralm.” (Duteronomi 12:23, 24) Me a llechul a Dios el kmo ngdiak mongang a rsechel a charm el ble el kot el msa Noah er a bekord el 800 el rak er a uchei a dirk el ble lemesisiich el oltaut er ngii. A osengel a Jehovah a mle bleketakl el kmo: A remesiungel a mle subed el longa techel a charm engdi rsechel a dimlak. Ngmle kirir el oiitel a rsechel el mo er a chutem, el ua lebelkul a kmo tolluut er a klengar er ngii el charm el mo er a Dios.

<sup>12</sup> A osisiu el llach a mlo er a Rekristiano. A rechapostol me a rebebil er a rechad el uluungerachel er a rulebengkel a Jesus er a kot el dart el rak, a mlo kldibel el mlo melib el kmo ngngera el llach a mle kirir el mo oltirakl er a chelsel a rokui el ongdibel er a Rekristiano. Me ngoeak a ulekrael er a oureor el klisichel a Dios, e ngmeltib el kmo ngdiak a ngii di el tekoi el mo omekbe-raod er tir engdi te kirir el mo omekiai a uldars el mo er a bleob el chelid, me a rasech, me a ulebeng a telii [mechei a rasech me ngdi ngar er a chelsel a techel a charm], me a deleboes. (Rellir 15:28, 29; 21:25) Me ngkmal kired el melemolem el ‘omekiai er kid er a rasech.’ Ngar er a osengel a Dios, e a doruul er tiang e ngdi osisiu a klungel a ultutelel ngii me a domekiai er kid er a omengull el bleob me a lechub a deleboes el omeruul.

---

11. Ngera el usbechel a rasech a lullekebai er ngii a Dios er a taem er a Noah?

12. Ngera el llach el kirel a rasech a lengiluu el uleak a ulekrael er a Dios er a kot el dart el rak el ngar er ngii a belkul el kired er a chelechang?

<sup>13</sup> A llach el kirel a domekiai er kid er a rasech nguldumukl er a oidel a rasech? Chochoi. Ngsebeched el omekesiu er ngii el ua tiang: Ka me dedu el kmo a toktang a dilu er kau el kmo ngkirem el omekiai er kau er a rrom. Tiang belkul a kmo ngdiak el sebechem el melim engdi ngsebechem el merus er ngii el oltuu er a ngurd er a bedengem? Ngkmal diak. Me a domekiai er kid er a rasech e ngbelkul a kmo ngdiak dekengei a oidel a rasech el oak a ngurd me a ngii di el keskelel a bedenged.

<sup>14</sup> Me ngngera mo duubech a lsekum a Kristiano a kmal klou el telemall me a lechub e ngousbech er a klou el botk? Omko seikid el taem e a toktang a kmo ngkmal kirel lousbech a rasech e le lak e ngmad, e ngmekerang? Ngulterekokl el diak el soal el mad. Ngar er a blakerreng er ngii el mengeluolu er a klengar el mekreos el sengk el mla er a Dios, e ngmo kongei a bebil er a bedengel a ukeruul el diak el uldimukl er ngii a mekngit el usbechel a rasech. Me ngmo osiik a roel a ukeruul, a lengar er ngii, el ousbech a betok el klekedall el sebechel el telkib el taem el lomtechei a rasech me a urerel er a chsel a bedenged a rehad.\*

<sup>15</sup> A Kristiano ngmo melemall a llechul a Dios el mo olsobel er a klengar er ngii el telkib el taem er a chsel tia el blekeradel er a beluulehad? A Jesus a dilu el kmo: "Ngikel soal losobelii a klengar er ngii a mo oridii, e ngikel oridii a klengar er ngii el ngak a uchul a mo metik er ngii." (Matteus 16:25) Ngkmal diak el soad el mad. Engdi a dolemall a llechul a Dios el melasem el olsobel a klengar er kid er a chelechang, e ke doridii a tchelled el mo kiei el diak a ulebengelel. Me kede bai olecholt er a llomeserreng a dotuil a klaumerang er kid er a melemalt el

---

\* Kirel a omesodel a klekedall el ousbech el omtechei a oidel a rasech, e momes er a 13-17 el llel a babier el dai er ngii a kmo *How Can Blood Save Your Life?* (Ngmekera Rasech a Losebelii a Klengar er Kau?) el ultebedii a Resioning er a Jehovah.

---

13. Ka momekesiu er a uchul me a llach el mo omekiai a rasech a uldimukl er ngii a tekoi er a oidel a rasech.

14, 15. A lsekum a toktang a mo dmu el uase a Kristiano a kirel el ousbech a oidel a rasech, e ngmo mekerang, e ngera uchul?

llechul a Dios, el klou a rengud el kmo a lengar er ngii a ngii di el tekoi el duubech el mo uchul e kede mad, e ngike el Omeskid a Klengar a mo lotkid er a taem er a okiis, e mo olutii el mei er kid a klengar er kid el ngii a mekreos el sengk.—Johanes 5:28, 29; Hebru 11:6.

<sup>16</sup> Chelechang, e a remesiungel a Dios a blak a rengrir el oltirakl a ulekrael er ngii el kirel a tekoi er a rasech. Ngkmal diak el kengei el menga er a ngii di el telelel el ngar er a kall. E diak el kengei a usbechel el ngar er a ukeruul el lengar er ngii. Te oumerang el kmo ngike el Ulemeob a rasech a ungil medengei a ungil el kirir. Kau ke oumerang el kmo ngmera el uaisei?

### **A DI TA EL MELEMALT EL USBEHEL A RASECH**

<sup>17</sup> A Llach er a Moses a millisiich er a di ta el melemalt el usbechel a rasech. A Jehovah a millekoi el kirel a roel a omesiou el mle kirir el oltirakl er ngii a rechad er a Israel er a irechar el kmo: “A klengar er a bek el outeliil a ngar a rasech ma uchul ma RUBAK a dilu el kmo a rokui el rasech a mo moiitel er a olengetongel el mo melai a kngterir a re chad el mengeroid. Ma rasech el ngii a klengar a melai a klengit el mo cheroid.” (Levitikus 17:11) A rechad er a Israel er a lebo er a klengit, e ngmle sebecbir el osiik a klausubes el oeak a omelenget el charm, e a bebil er a rsechel ngii el charm a lulemlecha er



*A Isekum a toktang er kau a dmu er kau el kmo ngkirem el omekiai a rrom, e ke mo merus el olsiseb er a ngurd er a bedengem?*

16. A remesiungel a Dios ngkirir el mo ua ngera uldesuir el kirel a tekoi er a rasech?

17. Ngar er a Israel er a irechar, e ngera sel di mle chimong el usbechel a rasech el lekilengei er ngii a Jehovah?



a olengetongel er sel templo el tento, e a uriul e te mirruul el uaisei er a templo er a Dios. Me a di mle ta el melemalt el usbechel a rasech a mla er a chouaisei el omelenget.

<sup>18</sup> A remera el Kristiano a diak el ngar er a cheungel a Llach er a Moses, me ngdiak lolenget a charm me a ka lolecha rsechel er a blil a olengetongel. (Hebru 10:1) Engdi, a usbechel a rasech el ngar er a olengetongel er a taem er a rechad er a Israel er a irechar a millutk el kirel sel mekreos el tengetongel a Ngelekel a Dios, el Jesus Kristus. Me ngua aike el dulsuub er a 5 el Bliongel, a Jesus a uldersii a klengar er ngii er a klechad el kired er sera lebechei a rsechel me bo lemoitel el tenget. E seikid e nnggilasech el mo er a eanged el di mle ta el taem el uleba kerresel tia el mloiitel el rsechel el mo oldars er ngii el mo er a Dios. (Hebru 9:

18. Ngera el klengeltengat a sebeched el ngmai el oeak a mloiitel el rsechel a Jesus?

***Ke mekera e ochotii el kmo ke omekerreu  
er a klengar me a rasech?***



11, 12) Tia el tekoi a kiltmeklii a uchetemel a klausubes el kirel a klengit, e milekengii a techall el kired el mo sebeched el mo nguu a diak a ulebengelel el klengar. (Matteus 20:28; Johanes 3:16) Me ngbleketakl el imis el klou a ultutelel a usbechel a rasech! (1 Petrus 1:18, 19) Me ngdi oak a klaumerang er tia el mloiitel el rsechel a Jesus e kid a mochu sebeched el mo suobel.

<sup>19</sup> Ngkmal sebeched el mo oba klou el omereng el saul el mo er a Jehovah el Dios el kirel a mekreos el klengar er kid. Me tiang diak el rellid el mo soad el mo ouchais er a rebebil el kirel a techall el mo nguu a diak a ulebengelel el klengar el oak a klaumerang er kid er a tengetengel a Jesus? A uldesuel a Dios el kirel a klengar er a rebebil a kirel el oremelid el mo meruul er tia el tekoi el oba klemeriarreng me a blakerreng. (Esekiel 3:17-21) A dekerekikl el blak a rengud el rullii tia el ngerachel, e ngmo sebeched el melekoi el ua apostol el Paulus el kmo: “Ngdiak a ngerechelek ra rsechiu el rokui, ele ngdimlak kulechib er ngak el olecholt er kemiu ra telbilel a rengul a Dios el rokir.” (Rellir 20:26, 27) A douchais er a rechad el kirel a Dios me a moktek er ngii a kmal ungil el roel e kede ochotii el kmo ngngarbab a uldesued me a osenged el kirel a klengar me a rasech.

19. Ngera kired el meruul er ngii me bo lak demukngerachel ‘er a rsechir a rokui’ el chad?

#### AIKE EL LOLISECHAKL A BIBLIA

- A klengar a sengk el mla er a Dios el mei.  
—Psalm 36:9; Chocholt 4:11.
- A omelecheb a mekngit, e le klengar er a dirkak el mechell el ngalek a mekreos er a osengel a Dios.—Exodus 21:22, 23; Psalm 127:3.
- Kede mengull a klengar me ngdiak bo doruul a mo uchul a telemellel.—Duteronomi 5:17.
- Kede omes a rasech el kmo ngchedaol a lak dongang.—Rellir 15:28, 29.

## **A Rolel e a Telungalek er Kau a Mo er Ngii a Deurreng er Ngii**

**Ngmekera chad e mo ungil el bechiil el sechal?**

**Ngmekera redil e mo ungil el bechiil el redil?**

**Ngera uldimukl er a dungil el oungek?**

**Te mekera rengalek e ngosuir a telungalek el mo er  
ngii a deurreng er ngii?**

A JEHOVAH el Dios a soal a telungalek er kau a lebo er ngii a deurreng er ngii. A Biblia a meskid a ulekrael el kirir a derta me a derta el chad er a ta el telungalek, e smaod aike el ngerachel el soal a Dios a bo loruul. Me a rechedal a telungalek a loltaut aika el ngerechelir el oltirakl a omellach er a Dios, e ngmo uchul a deurreng. A Jesus a dilu el kmo: “A Imuut el [dmeu a rengul a] ngikel orrenge a tikingel a Dios e olab!”—Lukas 11:28.

<sup>2</sup> A lebo er ngii a deurreng er a telungalek er kid e ngkired el mo medengei el kmo a telungalek a mleuuchel er a Jehovah, el ngii a lulemekedong er ngii a Jesus el kmo ng ‘Demad.’ (Matteus 6:9) Ngii el ulemekdubech a telungalek a uchul e ngulterekokl el medengei el kmo ngerang a odeu a rengrir. (Efesus 3:14, 15) Me ngngera ngolisechakl a Biblia el kirel a ngerechelir a rederta el chad er a telungalek?

### **A TELUNGALEK A MLUKDUBECH ER A DIOS**

<sup>3</sup> A Jehovah a milebeterir a rekot el chad, el Adam me a Eba,

- 
1. Ngera sel uchul a deurreng er a klengar er a telungalek?
  2. A deurreng er a telungalek ngultuil er kid el mo medengei a ngerang?
  3. Ngmekera Biblia a losaod er a uchelel a telungalek, e ngera me kede medengei el kmo a tekoi el lolekoi a klemerang?

e mekur a chebechielir. Ngulemekingar er tir er a klebokel el paradis er a chutem, el sers er a Eden, e dilu er tir me bo loungalek. A Jehovah a dilu el kmo: “Bo le betok a re ngelekiu, ma ruldidellet a rsechiu bo le kiei er ker me ker er a beluulchad.” (Genesis 1:26-28; 2:18, 21-24) Tiang a diak el kora di delbochel el cheldechoduch, e le Jesus a ulechotii el kmo a tekoi el lolekoi a Genesis el kirel a uchelel a telungalek a mle klemerang. (Matteus 19:4, 5) Me alta kede chelebangel a kmal betok el mondai me a klengar a diak el ua sel moktek er a Dios el kirel, engdi ka me bo domes el kmo ngera me ngsebechel el dirk mo er ngii a deurreng er a telungalek.

<sup>4</sup> A rederta el chad er a telungalek a sebechir el olengeseu el meruul er a telungalek me ngmo er ngii a deurreng er ngii sel loukerebai er a Dios a lolecholt a bltikerreng. (Efe-sus 5:1, 2) Engdi kede mekerang e oukerebai er a Dios a lak el sebeched el mesang? Ngsebeched el mo medengei a blekerdelel a Jehovah e le ngii el uldureklii a di ta el Ngelekel el mei er a chutem. (Johanes 1:14, 18) Me a lengar er a chutem, e ngika el ngalek, el Jesus Kristus, a mle ungil el ulemekesiu er a Demal er a bek el omerellel a tekoi a uchul me a domes e dorrenges er ngii, e ngdi ua dulebengkel a Jehovah e dorrenges er Ngii. (Johanes 14:9) Me a dosuub er a bltikerreng el lullecholt er ngii a Jesus e doltirakl er a kerebil, e a rederta er kid a sebeched el mo olengeseu el menglou a deurreng er a telungalek er kid.

### **A KEREBAI EL KIRIR A REBECHIIL EL SECHAL**

<sup>5</sup> A Biblia a melekoi el kmo a omerellir a rebechiil el sechal el mo er a rebecherir a kirel el mo ua omerellel a Jesus el mo er a redisaiplo er ngii. Ka molatk er tia el ulekrael el

---

4. (a) Ngmekera e a rederta el chad er a telungalek a lolengeseu el melisiich er a deurreng er a telungalek? (b) Ngera me a omesubel a klengar er a Jesus a klou a ultutelel el kirel a deurreng er a telungalek? 5, 6. (a) Ngmekera e a omerellel a Jesus el mo er a ongdibel a lere-lii a ungil el kerebai el kirir a rebechiil el sechal? (b) Ngera kirel a chad el meruul er ngii me bo lenguu a klausubes er a klengit?

ngar er a Biblia el kmo: “Kemiul sechal, bo le betik a rengmiu rar bechemiu, *el ua Kristus el mlo betik a rengul ra eklesia, me ngdi mle ngii lodersii el kirel* . . . Me dilerrek ar sechal el mo betik a rengrir rar becherir el ua le betik a rengrir ra bedengir. E ngikel betik a rengul ra bechil a betik a rengul ra di ngii. Le ngdiak a chad louketui ra di bedengel, te bai omekeroul e omecheliu, *el uaia Kristus el uaisei ra eklesia.*” —Efesus 5:23, 25-29.

<sup>6</sup> A bltikerreng er a Jesus el mo er a ongdibel er a redisaiplo er ngii a kutmeklii a cherrungel el kerebai el kirir a rebechiil el sechal. E le alta te dimlak el cherrungel, e ngdi Jesus a “mle betik a rengul er tir el mora ullebongel,” e tilengetengii a klengar er ngii el kirir. (Johanes 13:1; 15:13) Me ngdi osisiu, a rebechiil el sechal a muchelechel el kmo: “Bo [*molemolem el*] betik a rengmiu rar bechemiu, e lak le mekngit a ngeriu er tir.” (Kolose 3:19) Ngera mo ngosuir a bechiil el sechal el mo oltaut a chouaisei el omellach, e ileakl aike el taem el bechil el redil a mo meruul a tekoi el diak lolecholt er a llomeserreng? Ngkirel el mo melatk a cheleuid el loruul me a dirrek aike el tekoi el kirel meruul me bo el sebechel el nguu a klausubes er a Dios. Ngkirel el ousubes er tirke el mo er a klengit el omtok er ngii, el uldimukl er a bechil el redil. Engdi bechil me ngdirrek el kirel el mo meruul er a osisiu el tekoi. (Matteus 6:12, 14, 15) Me ngkol sebechem el mesa sel uchul me a rebebil a melekoi a ungil el chebechiil el kmo ngdeleuill er a reteru el chad el meduch el kausubes?

<sup>7</sup> A rebechiil el sechal a dirrek el kirir el mo omtab er a blekerdelel a Jesus el mle blechoel el melatk er a redisaiplo er ngii. Ngmillatk a telkelel a sebechir el meruul me a dirrek aike el ousbech. El ua tiang, sera lesal mesula bedengir, e ngdilu er tir el kmo: “Moibngemiu rar chad el mora diak

---

7. Ngera el tekoi a lullatk a Jesus, el mlo uchul a ngera el kerebai el kirir a rebechiil el sechal?

ar chad er ngii, me mtelkib lolengull.” (Markus 6:30-32) A rebechiil el redil me te rredemelel a chouaisei el omelatk. A Biblia a mesaod er tir el kmo te ‘mechitechut . . . el klekedall’ el kirir a rebechiil el sechal el mo ‘mengull’ er tir. E ngerang? E le rebechiil el sechal me a rebechiil el redil a dul “oudiukes ra grazia ra klengar.” (1 Petrus 3:7) A rebechiil el sechal a kirir el melatk el kmo ngblakerreng er a chad, el diak el ngii el sechal me a lechub el redil, seikid a rullii a chad el mo mekreos er a osengel a Dios.—Psalm 101:6.

<sup>8</sup> A Biblia a melekoi el kmo a bechiil el sechal el “betik a rengul ra bechil a betik a rengul ra di ngii.” E le ngua lullekoi a Jesus, a chad me a bechil el redil a dikea “lterung, ele te *ta ku el chelechad*.” (Matteus 19:6) Me a tekoi er a durs a kirel el di ngar er a delongelir el terung. (Osisechakl 5:15-21; Hebru 13:4) Ngsebechir el meruul er tiang a lsekum ngmo diak di lolatk er a di tir e mo melatk aike el lousbech a rebecherir. (1 Korinth 7:3-5) Ngutebengall a uleklatk el kmo: “Le ngdiak a chad louketui ra *di bedengel, te bai omekeroul e omecheliu*.” Me a rebechiil el sechal a kirir el mo betik a rengrir er a rebecherir el di ua lebetik a rengrir er a di tir, el melatk el kmo ngkirir el mo mesaod er tir el mo er a bderrir, el Jesus Kristus.—Efesus 5:29; 1 Korinth 11:3.

<sup>9</sup> A apostol el Paulus a millekoi el kirel a “mekeald el bltikerreng ra Kristus Jesus.” (Filipi 1:8) Ngii el mekeald el bltikerreng el lullecholt er ngii a Jesus a kmal mle sorir a rechad, e uleldeu a rengrir tirke el redil el mle disaiplo er ngii. (Johanes 20:1, 11-13, 16) Me a rebechiil el redil a oureng a chouaisei el mekeald el bltikerreng el mla er a rebecherir el sechal.

---

8. (a) Ngmekera e a bechiil sechal el “betik a rengul ra bechil a betik a rengul ra di ngii”? (b) A ‘ta el chelechad’ ngbelkul a ngerang el kirel a bechiil el sechal me a bechiil el redil?

9. Ngera el blekerdelel a Jesus a lolekoi er ngii a Filipi 1:8, e ngera me a rebechiil el sechal a kirir el olecholt er tia el blekeradel el mo er a rebecherir?

## A KEREBAI EL KIRIR A REBECHIIL EL REDIL

<sup>10</sup> A telungalek a bo el ungil, e ngkirel el ngar er ngii a bdelul. Ngmo lmuut er a Jesus me ngdirrek el mle chederedall er a Bdelul. “Ma bdelul a Kristus a Dios” el ua “bdelul a redil a sechal.” (1 Korinth 11:3) A omengull er a Jesus el mo er a omengederederel a Dios a kmal ungil el kerebai el mei er kid e le kede rokui el di chederedall er a kmung techang.

<sup>11</sup> A rediak el mecherrungel el chad a meruul a cheleuid e blechoel el mo olecholt el kmo te olengesonges el diak el ungil el bdelul a delengchokl. Me ngungil el lokerang a bechiil el redil? Ngdiak el kirel el melenguul a loruul a bechil me a lechub e lolasem el omerober er a omengederederel. Ngbai kirel el mo melatk el kmo ngar er a osengel a Dios, e a chad el chelellakl e medemedemek a rengul a kmal mekreos. (1 Petrus 3:4) Me a lolecholt er a chouaisei el blekeradel, e ngsebechel el metik el kmo ngbeot er ngii el oltaut er a ngerechelel el lebilsa Dios el mo mengull er a bechil el mo lmuut er aike el blekeradel el sebechel el mo uchul a omelsemai. A Biblia a dirrek el kmo: “Kemiul redil, bo mongull rar bechemiu.” (Efesus 5:33) Engdi ngkuk mekerang omko bechiil el sechal a diak el kengei er a Kristus el ua le Bdelul? A Biblia a mengelechel er a rebechiil el redil el kmo: “Bo mchederdall rar bechemiu, ma le ngarnгии er tir a diak lolengesenges a tikingel a Dios, e bo lsebechir lobult ra blekerdeliu ar becherir el cheklmuk, sel lomes a blekerdeliu el *meluu* e klikiid.”—1 Petrus 3:1, 2.

<sup>12</sup> Me a bechil a ledak el ngar er a ta el omengull me a lak, engdi a bechiil el redil a dirk olecholt a omengull er

---

10. Ngmekera Jesus e ungil el kerebai el kirir a rebechiil el redil?

11. Ngkirel el mo ua ngera uldesuel a bechiil el redil el mo er a bechil el sechal, e tiang ngerang mo rullii el kirel a blekerdelel?

12. Ngera me ngdiak el mekngit a lsekum a bechiil el redil a oeak a omengull e lolecholt er a uldesuel?



***Ngera el ungil el kerebai a lekiltmeklii a Sara  
el kirir a rebechiil el redil?***

ngii a losaad er a uldesuel el kuk ngodech er a uldesuel a bechil el kirel a tekoi. A osengel er a tekoi a sebechel el melemalt, me ngsebechel el mo uchul a klungiolel a telungalek er tir a lsekum a bechil el sechal a oresges er ngii. Alta Abraham a dimlak el kengei er a uldesuel a bechil, engdi a Sara a mildesuii a ungil el semecheklel a mondai el mla er ngii er a chelsel a telungalek er tir, me a Dios a dilu er a Abraham el kmo: “Bor a ikel ledu er kau a Sara.” (Genesis 21:9-12) Me nguaisei, engdi a lsekum a bechiil el sechal a mla oterekeklii a uldesuel el kirel a tekoi el ngii a diak el omtok a llechul a Dios, e a bechiil el redil a olecholt er a omengull er ngii a bo lolisiich er a uldesuel a bechil.—Rel-lir 5:29; Efesus 5:24.

<sup>13</sup> Me a loltaut er a ngerechelel, e a bechiil el redil a kmal betok a sebechel el meruul el omekerreu er a telungalek er ngii. El ua tiang, a Biblia a olecholt el kmo a rebechiil el redil a kirir el mo “betik a rengrir rar becherir mar ngelekir,

---

13. (a) A Titus 2:4, 5 ngmengelehel er a rebechiil el redil el mo meruul a ngerang? (b) Ngera ngmeleko i Biblia el kirel a rebechiil el chad el mo chacheroid me a lechub e te merort a chebechielir?



e lulserechakl a rengrir, e lulekidakl, e loureor a tekoi ra blirir, e lungil, e loltirakl rar becherir.” (Titus 2:4, 5) A bechiil el redil e chedil el meruul aika el tekoi a sebechel mo ngmai a omengull me a bltikerreng er a telungalek er ngii. (Osisechakl 31:10, 28) A chebechiil a deleuill er a teru el diak el mecherrungel el chad a uchul me ngmo duubech a blekeradel el sebechel mo uchul e te mo chacheroid me a lechub e te mo merort a chebechielir. A Biblia a kongei er a rebechiil el chad me te mo chacheroid el ngar er a ileakl el blekeradel. Me nguaisei, engdi tiang a diak di el beat e derellii el tekoi, e le Biblia a mellach el kmo: “A redil lak bo le cheroid ra bechil . . . e dirrek a sechal lak lorort ra chebechielel ngii ma bechil.” (1 Korinth 7:10, 11) Me ngkmal di

***Ngera sebechir a ruungalek el suubii er a omerellel a Jesus el mo er a remekereki el ngalek?***



ta el laokreng el lerellii a ta er tirka el obekel a sebechel el msa ngike el tang a uchetemel a dertel a chebechielir el ol-tirakl er a Bades.—Matteus 19:9.

### **A KEREBAI EL KIRIR A RUUNGALEK**

<sup>14</sup> A omerellel a Jesus el mo er a rengalek a kiltmeklii a cherrungel el kerebai el kirir a ruungalek. A rebebil er a lasem el merrob er a rengalek me lak lebo lekeed er a Jesus, e ngdilu el kmo: “Bechiiteterir ar mekekerel ngalek me le mer ngak, e lako molekebai er tir.” A Biblia a ouchais el kmo ‘ngulemechull er tir e ulemor a chimal er bebrir, el ulemek-ngeltengat er tir.’ (Markus 10:13-16) Me a lsekum a Jesus a milengoit a taem el kirir a remekereki el ngalek, e kau ngdiak el dilerrek el kirem el uaisei el mo er a rengelekem? Te ousbech, a diak di el dertelkib er a bereberriid el temem, e ngbai kmal klou er ngii. Ngkirem el mengoit a taem el mo olisechakl er tir, e le seikid a tekoi el Jehovah a mellach er a rechedam me a rechedil el mo meruul er ngii.—Duteronomi 6:4-9.

<sup>15</sup> Sel lorael a beluulechad el mengal mo mekngit, e a rengalek a ousbech er a redemerir me a rederrir el mo omekerreu er tir er a rechad el sorir el melemall er tir, el ua tirke el osiik er a bo loruul a mekngit el tekoi er a durs el obengterir. Ka molebedebek er a Jesus er a lomekerreu er a redisaiplo er ngii, el ngii a lsal uluubltikerreng el lomekedong er tir el kmo te mekekeri el ngalek. Sera lobdechem el di mle telkib e ngmo okodall, e a Jesus a kiltmeklii a rolel a chiis el kirir. (Johanes 13:33; 18:7-9) Me a omoungalek, e ngkmal kirem el mo kerekikl el klekar a bek el loruul a Diabelong el melasem el mo melemall er a rengelekem. Ngkmal di che-roid e ke mengelechel er tir el kirel a tekoi el sebechel el mo

---

14. Ngmle ua ngera omerellel a Jesus el mo er a remekereki el ngalek, e ngera te ousbech er ngii a rengalek er a redemerir me a rederrir?

15. Ngera sebechir a ruungalek el chad el meruul el mo omekerreu er a rengelekir?

duubech.\* (1 Petrus 5:8) E le ngdirkak a ta el taem er a reksi el uai chelechang el kmal betok a tekoi el sebechel mo to-mall a ulekerreu el kirel a klisichel a bedengir, me a deleuill er tir me a Dios, me a otireklir er a tekoi er a kldung.

<sup>16</sup> Sel kesus er a uchei er a kodellel a Jesus, e a redisaiplo er ngii a mle kaititekangel er a delongelir el kmo ngtecha er tir a mle ngarbab. Engdi a Jesus a dimlak lengasech a rengul er tir, e bai uleba bltikerreng e millemolem el olenge-seu er tir el oeak a tekingel me a omerellel. (Lukas 22:24-27; Johanes 13:3-8) Me a omoungalek, e ngsebechem el mesa el kmo ngmekera omoltirakl er a kerebil a Jesus sel momeklemalt er a rengelekiu? Ngmera el tekoi el kmo te ousbech a omellach, engdi a omellach el domesterir a kirel el ngar er a “ungilbesul el telkael” e diak el oeak a ngasechereng. Ngkmal diak el soam el di diak momdasu a tekoi e molekoi el di “ua saider el merus.” (Jeremia 30:11, NW; Osisechakl 12:18) A blekerdelel a omellach el moruul er ngii a kirel el rullii a ngelekem el mo sebechel el mesang er a uriul el kmo ngmle melemalt.—Efesus 6:4; Hebru 12:9-11.

### A KEREBAI EL KIRIR A RENGALEK

<sup>17</sup> Ngsebechir a rengalek el mesuub er a Jesus? Chochoi, ngsebechir! Ngoeak a kerebil, e a Jesus a ulechetii el kmo te mekera rengalek a lolengesenges er a redemerir me a rederrir. Ngdilu el kmo: “Ak di melekoi a ikel lulsisecheklak er ngii a Chedam.” E dilechelii el kmo: “Ele kdiblechoel meruul a ikel

---

\* Mouchais er a rengelekiu me lak el kengei er a ngii di el chad el mo merutech a mekkellel a bedengir e mongelechel er tir el kirir a rechad me a lechub e ngbasio el sebechel el mo uchul a telemellir. A Imuut el bebil er a ngeso el mo omekerreu er a rengalek a debetik er a 32 el bliongel er a babier el dai er ngii a kmo *Learn From the Great Teacher*, el lultebedii a Resioning er a Jehovah.

---

16. Ngera sebechir a ruungalek el suub er a blekerdelel a Jesus a lo-renges e losmechokl a chelitecheterir a redisaiplo er ngii?

17. Ngoeak a ngera el roel e a Jesus a kiltmeklii a cherrungel el kerebai el kirir a rengalek?

soal." (Johanes 8:28, 29) A Jesus a ullengesenges er a Demal el ngar er a eanged, me a Biblia a meleko i er a rengalek el kmo ngkirir el mo olengesenges er a redemerir me a rederrir. (Efesus 6:1-3) Me alta Jesus a mle cherrungel el ngalek, engdi ngullengesenges er a demal me a delal er tia el chutem, el Josef me a Maria, el dimlak lemecherrungel. Tia el tekoi a ulterekokl el millisiich er a deurreng er a derta me a derta el chad er a telungalek er a Jesus!—Lukas 2:4, 5, 51, 52.

<sup>18</sup> Ngsebechir a rengalek el osiik a rolel e te mo ua Jesus me bo loldeu a rengrir a redemerir me a rederrir? Ngklemerang, a remekere i el chad a metik er ngii el meringel a lolengesenges er a redemerir me a rederrir, engdi tia soal a Dios a loruul er ngii. (Osisechakl 1:8; 6:20) A Jesus a mle blechoel el olengesenges er a Demal el ngar er a eanged, el mo lmuut er aike el kmal meringel el taem. A ta er a taem el Dios a mle soal a Jesus a bo loruul er a tekoi el kmal mle meringel, e a Jesus a dilu el kmo: "Mnguu tial kob [a tekoi el mle kirel el meruul er ngii] el choridii er ngak." Me nguaisei engdi a Jesus a rirellii a tekoi el lullekoi er ngii a Demal e le ngmle medengei el kmo a Demal a mle medengei a ungil el kirel. (Lukas 22:42) Me a losuub el mo bekongesenges, e a rengalek a oldeu a rengrir a redemerir me a rederrir me a dirrek el Demerir el ngar er a eanged me ngkmal mo dmeu a rengul.\*—Osisechakl 23:22-25.

<sup>19</sup> A Diabelong a milengarm er a Jesus, me ngkmal ulterekokl a rengud el kmo ngdirrek el mo mengetikaik er

---

\* Ngdi sel sekum a chedam me a chedil a meleko i er a rengelekir me te mo melemall a llechul a Dios, e seikid e ngmelemalt a lak lolengesenges er tir a rengelekir.—Rellir 5:29.

18. Ngera me a Jesus a mle blechoel el olengesenges er a Demal el ngar er a eanged, e techa mo dmeu a rengul sel sekum a rengalek a olengesenges er a redemerir me a rederrir?

19. (a) Ngmekera Satan e mengesuseu er a rengalek? (b) A meknngit el blekerdelir a rengalek ngerang rullii el mo er a rechedam me a rechedil?

a remekereki el chad el mo meruul a chelebirukel. (Matheus 4:1-10) A Satan el Diabelong a ousbech a orimel el mla er a rekldemed, me ngsebechel el mo meringel er kid el oltngakl. Me ngkmal klou a ultutelel el kirir a rengalek el diak bo lobengterir a remeruul a meknngit. (1 Korinth 15: 33) A ngelekel a Jakob er a Dina a uluusechelei er a rechad el dimlak longull er a Jehovah, me ngmlo uchul a betok el tellemall el dilubech. (Genesis 34:1, 2) Ka molebedebek er a klou el klengiterreng el mo duubech er a telungalek sel sekum a ta er a chad er a chesel a telungalek a mechesechusem er a deleboes el omeruul!—Osisechakl 17:21, 25.

### SEL UCHUL A DEURRENG ER A TELUNGALEK

<sup>20</sup> A mondai er a telungalek a beot a semecheklel a lsekum e ngmotirakl a omellach er a Biblia. E le sel doltirakl ngii el omellach e ngmo uchul a deurreng er a telungalek. Me seikid e kemiu el bechiil el sechal, bo el betik a rengmiu er a rebechemiu, me a omerelliu el mo er tir bo el ua omerrellel a Jesus el mo er a ongdibel er ngii. Kemiu el bechiil el redil, mongull er a omerredelir a rebechemiu,

moltirakl er a kerebai el kirel a ungil el bechiil el redil el losaad er ngii a Osisechakl 31:10-31. Kemiu el

20. A bo loldeu a rengrir er a klengar er a telungalek er tir, e ngera kirir a rederta el chedal a telungalek el meruul?

*Ngera kirir a remekereki el chad el mo melatk sel bo el chelebangel a omelsemai?*



chedam me a rechedil, molisechakl er a rengelekiu. (Oli-sechakl 22:6) Kemi u el chedam, bo 'mungil el merreder ra blimiu e mulsechakl ra bek el tekoi.' (1 Timoteus 3:4, 5; 5:8) Me kemi u el ngalek, molengesenges er a redemmiu me a redelemiu. (Kolose 3:20) Ngdiak a ta el chad el ngar er a chelsel a telungalek el cherrungel, e le rokui el chad a meruul a cheleuid. Me bo el ngariou a rengmiu e mkaiuengit a klausubes er a delongeliu.

<sup>21</sup> A Biblia a mera el ngar er ngii er ngii a kmal betok el mekreos el omellach me a ulekrael el kirel a klengar er a telungalek. Ngdirrek el olisechakl er kid el kirel a beches el blekeradel er a Dios me a paradis el chutem el mo mui er a redmeu a rengrir el chad el mengull er a Jehovah. (Chocholt 21:3, 4) Ngmera el ungil el omelatk a ngar er ngii er a ngar er a medad! Ngmo lmuut er a chelechang, me ngsebeched el oldeu a rengud er a klengar er a telungalek a bo doltirakl a omellach er a Dios el debetik er a Tekingel el Biblia.

21. Ngera el ungil el omelatk a ngar er ngii er a ngar er a medad, e mekera e sebeched el mo oldeu a rengud er a klengar er a telungalek er kid er a chelechang?

#### AIKE EL LOLISECHAKL A BIBLIA

- A rebechiil el sechal a kirir el mo betik a rengrir er a rebecherir el redil el di ua lebetik a rengrir er a di tir.—Efesus 5:25-29.
- A rebechiil el redil a kirir el betik a rengrir er a telungalek er tir e mengull er a rebecherir el sechal.—Titus 2:4, 5.
- A ruungalek a kirir el mo betik a rengrir e olisechakl e omekerreu er a rengelekir.—Duteonomi 6:4-9.
- A rengalek a kirir el mo olengesenges er a redemerir me a rederrir.—Efesus 6:1-3.

## Omengull el Kengei er Ngi a Dios

**A rokui el klechelid ngoldeu er a rengul a Dios?**

**Kede mekerang e dongchii a mera el klechelid?**

**Te rua techang a mera el mengull er a Dios el  
ngar tia el chutem er a chelecha el sils?**

A JEHOVAH el Dios a betik a rengul er kid e soal a do-  
lai a klungioled er a ulekrael el lomeskid. A dongull er  
ngii el ngar er a mera el roled, e ngmo dmeu a rengud  
e choibngid er a betok el mondai er a klengar. Ngdirrek  
el sebeched el ngmai a klengeltengat me a ngeso el mla  
er ngii. (Isaia 48:17) Ngkmal betok el klechelid a mele-  
koi el kmo te olisechakl a klemerang el kirel a Dios. Engdi  
ngkmal kakerous a osisechekkir el kirel a kmo ngtecha  
Dios e ngera soal a bo doruul.

<sup>2</sup> Ke mekera e mo medengalii a melemalt el roled a  
omengull el mo er a Jehovah? Ngdiak a belkul el mo-  
suub e momekesiu a osisechakl er a rokui el klechelid.  
Ngdi ngkirem el suubii el kmo ngerang *mera* el lolise-  
chakl a Biblia el kirel a mera el omengull. El ua tiang:  
Ngar er a betok el beluu, e ngngar er ngii a mondai er a  
usbechel a diak el mera el udoud. A lsekum te milskau a  
ureor el mo meleakl ngii el diak el mera el udoud, e ke

---

1. Ngera el klungiaol a bo dengai a dongull er a Dios el ngar er a me-  
lemalt el roled?

2. Kede mekera e suubii a melemalt el roled a omengull el mo er a  
Jehovah, e ngera el okesiu a ngosukid el mo medengalii tiang?

mo mekerang? Ngkirem el mo medengei a rokui el diak el mera el udoud? Ngdiak. Ngbai klungiolem a omchoit a temem el suubii a *mera* el udoud. E le obo modengeli a mera el udoud e ngmo beot er kau el dmangch a diak el mera el udoud. Me ngdi osisiu, a dosuub el mo medengei a olengchelel a mera el klechelid, e ngmo sebeched el mes a klsuul el klechelid.

<sup>3</sup> Ngklou a ultutelel el dongull er a Jehovah er a rolet el lekengi er ngii. Te betok a oumerang el kmo a rokui el klechelid a oldeu er a rengul a Dios, engdi a Biblia a diak el olisechakl el uaisei. Ngdirrek el diak el sebechel a chad el di melekoi el kmo ng Kristiano e lungiang. A Jesus a dilu el kmo: “Ngdiak el tirikel rokui el dmu er ngak el kmo, ‘Rubak, Rubak,’ a mo soiseb ra rengedel a eanged, ngdi tirikel meruul a soal a Demak el ngara eanged a mo soiseb.” Me a leuaisei, e a lsoad el mo nguu a kengei er a Dios e ngkmal kired el mo medengei el kmo ngera soal a doruul e mo meruul. A Jesus a ulemekedong er tirke el diak loruul a soal a Dios el kmo te “meruul a chelebi-rukul.” (Matteus 7:21-23) Me ngua aike el diak el mera el udoud, a klsuul el klechelid a diak a ultutelel e bai kmal klou a letemellii.

<sup>4</sup> A Jehovah a mesterir a rokui el chad a techall el mo nguu a diak a ulebengelel el klengar. Engdi a bo dekiei el diak a ulebengelel el ngar er a Paradis, e ngkired el mengull er a Dios el ngar er a melemalt el rolet me a blekerdelel a klengar er kid er a chelechang a lekengi er ngii. Engdi te kmal betok a diak el kengei er tiang. Sei a uchul me a Jesus a dilu el kmo: “Bo msiseb er chobutek el siseball; e a siseball el mora tellemall a klou, ma rael er

---

3. Ngdi ua ledilu Jesus, ngngera kired el meruul er ngii a lsoad a kengei er a Dios?

4. Ngngera belkul a tekingel a Jesus el kirel aike el teblo el rael, e rael el mo er ker?



ngii a meteu, me te betok ar chad el soiseb er ngii. E a si-seball el mora klengar chobutek, ma rael er ngii a kekerei, me te mekesai ar chad el metik er ngii.” (Matteus 7:13, 14) A mera el klechelid a omekrael el mo er a diak a ulebe-ngelel el klengar, e a klsuul el klechelid a omekrael el mo er a tellemall. A Jehovah a diak el soal a bo el metemall a ngii di el chad a uchul e ngomesterir a rokui a techall el mo mesuub el kirel. (2 Petrus 3:9) Me a rorel a dongull er a Dios a mera el sebechel el mo uchul a klengar me a le-chub a kodall el kired.

### A ROLEL A DEDENGCHII A MERA EL KLECHELID

<sup>5</sup> Ngmekera e sebeched el metik er a ‘rael el mora kle-ngar’? A Jesus a dilu el kmo a mera el klechelid a mo bleketakl el loeak a rorel a klengar er a rechad er ngii el klechelid. Ngdilu el kmo: “Kom dongcheterir era rodech er tir. . . . Nguaisei el bek lungil kerrekar chourodech a ungil rodech.” (Matteus 7:16, 17) Me tirke el ngar er a mera el klechelid a sebeched el dongcheterir el oeak a klaumerang er tir me a blekerdelir. Me alta ngdiak el me-cherrungel e mo meruul a cheleuid, engdi a rengar er a mera el omengull a dmak el ua ta el cheldebechel e osiik el mo meruul a soal a Dios. Ka me bo domes a elolem el tekoi el olengchelir a rengar er a mera el klechelid.

<sup>6</sup> *A rechedal a Dios a melai a rokui el osisecheklir er a Bi-blia.* A Biblia a di ngii el kmo: “Ele chedaol Llechukl el rokui a melluches luleak a [r]eng ra Dios, me ngngarngii a blkul er chosisechakl, ma chomellach, ma chomekme-lemalt, ma chomekrael el mora llemalt, el kirel ma chad ra Dios bo lsiich a kedmeklel el kirel a ungil lurreor, me le


5. Kede mekera e dongcheterir a rengar er a mera el klechelid?

6, 7. Ngua ngera osengir a remesiungel a Dios el kirel a Biblia, e nge-ra kerebil a Jesus el kirel tiang?

## A REMENGULL ER A MERA EL DIOS

---

- a otuil a osisecheklir er a Biblia
- a mengull er a di ta el Jehovah e olecholt er a ngklel
- a kaiuecholt a mera el bltikerreng er a delongelir
- a kongei er a Jesus el kmo nnggii a osobel el lebilskid a Dios
- a diak el teloi er tia el beluulechad
- a omerk er a Rengedel a Dios el kmo ngdi ta el omelatk el kirir a rechad



mekedmokl el mecherrungel.” (2 Timoteus 3:16, 17) Me a loluches el mo er a rekldemel el Kristiano, e a apostol el Paulus a dilu el kmo: “Ser cho mrenges a tikingel a Dios el ki mulsisechakl er kemiu e kom ngilai el tikingel a Dios, el diak le ua ltikingel a chad, e ngmeral tikingel a Dios.” (1 Thesalonika 2:13) Me seikid, e a klaumerang me a teko el loruul a rengar er a mera el klechelid a diak el oak e osengir a rechad me a lechub e ngsiukang er a beluu, e ngbai mlengai er a Tekingel a Dios, el Biblia.

<sup>7</sup> A Jesus Kristus a rirellii a ungil el kerebai el blechoel el melai a osisecheklel er a Tekingel a Dios. Me a lolu-luuch el mo er a Demal, e ngdilu el kmo: “A tikingem a klemerang.” (Johanes 17:17) Nguluumerang er a Tekingel a Dios, me a rokui el teko el lullisechakl a uleltirakl a Bades. Ngmle blechoel el melekoi el kmo: “Ngellechukl el kmo.” (Matteus 4:4, 7, 10) E a uriul e ngmo melekoi a teko el llechukl er a bades. Me ngdi osisiu, a rechedal a Dios er a chelecha el sils a diak el lolisechakl a di uldesuir. Te oumerang el kmo a Biblia a Tekingel a Dios, me te ous-bech er ngii el uchetemel a rokui el osisechekliir.

<sup>8</sup> *A rengar er a mera el klechelid a mengull er a Jehovah el di ngii el tang, e olecholt er a ngklel.* A Jesus a dilu el kmo: “Bo mongull el meluluuch ra [Jehovah] el Dios er kau, e di le ngii cho mosiou er ngii.” (Matteus 4:10) Me a remesiungel a Dios a di ta el Jehovah a longull er ngii. Tia el omengull a uldimukl er ngii a bo louchais er a ngklel me a blekerdelel el mo er a rokui el chad. A Psalm 83:18 a kmo: “Ng di kau el tang a RUBAK, ke ngarbab el merre-der er a beluulchad el rokir.” A Jesus a kiltmeklii a kerebai er a lolengeseu er a rebebil el mo medengeliu a Dios, el ua lullekoi er a nglunguchel el kmo: “Ak mla mo ochotii a ngklem er tirikel chad el mngiliiteterir ra belulechad

8. Ngera uldimukl er a omengull er kid el mo er a Jehovah?

el meskak.” (Johanes 17:6) Me a remera el mengull er a chelecha el sils a olisechakl er a rebebil el kirel a ngklel a Dios, moktek er ngii, me a blekerdelel.

<sup>9</sup> *A rechedal a Dios a olecholt er a merang e diak a chelechei er ngii el klaubltikerreng er a delongelir.* A Jesus a dilu el kmo: “Cho bo mkaubltikerreng, e te mo medengelke-miu a rokuil chad el kmo kom [o]bengkek.” (Johanes 13: 35) A rekot el Kristiano a mla er ngii a chouaisei el klaubl-tikerreng er a delongelir. A klaubl-tikerreng el oltirakl er a Dios a sebechel el mo mesisiich er a klekakiakl er a bedengir a rechad, deruchellir er a buai, me a lechad er ngii el beluu, e rulleterir el mo dmak el ngar er a mesisiich el diak el metemall el ochull er a mera el klodam. (Kolose 3:14) A rengar er a klsuul el klechelid a diak a chouaisei el bltikerreng er a klodam er a delongelir. Kede mekera e medengei? E le tir el omekoad er a rebebil er tir el kuk ngodech a rekebelurir me a lechub a kleblillir. A remera el Kristiano a diak el bo er a mekemad el mo omekoad er a rudam er tir el Kristiano me a ngii di el chad. A Biblia a kmo: “Itiaikid a meketeklii a klekakerous erar ngelekel a Dios mar ngelekel a [D]jabelong el kmo: ngikel diak loruul a llemalt a dimlak le ngara Dios el mei, me ngikel diak le betik a rengul er chodam er ngii me nguaisei . . . ngkired el mo dul kaubl-tikerreng, e lak bo de ua Kain el mlar ngikel mekngit el mei, me ngmilekudir a chochelel.”—1 Johanes 3:10-12; 4:20, 21.

<sup>10</sup> Ngulterekokl el mera el bltikerreng a ousbech er a lmuut el klou er a di bo lak domekoad er a rebebil. A remera el Kristiano a mera el ngar er a rengrir e ousbech a temir, klisichir, me a klokliir, el kaingeseu e kasisiich er a delongelir. (Hebru 10:24, 25) Te kaingeseu er a delongelir

---

9, 10. Te mekerang a remera el Kristiano a lekaiuecholt a bltikerreng er a delongelir?

sel lengar er ngii a meklou el chelebuul me a tellemall er a beluu, e bleketakl a omerellir el mo er a rechad. Te ol-taut er a klengar er tir sel omellach el ngar er a Biblia el kmo 'moruul a ungil el mora ngiidil chad.'—Galatia 6:10.

<sup>11</sup> *A remera el Kristiano a kongei er a Jesus Kristus el kmo nngngii a roel a osobel el mla er a Dios el mei.* A Biblia a kmo: "Ngdiak cholsobel el ngara ngodech, ele ngdiak a ngodech el ngakl el ngar cheungel a eanged el le bilsterir ar chad el bo de sobel er ngii." (Rellir 4:12) Me ngua aike el dules er a 5 el Bliongel, a Jesus a uldersii a klengar er ngii el olubet el kirir a rebekongesenges el chad. (Matteus 20:28) Me a dirrek, ngii a telutk el King er a Dios el ngar er a Rengedel el ngar er a eanged e mengedereder er a beluulechad. A Dios a dirrek el soal a bo dolengesenges er ngii e doltirakl a osisecheklel a lsoad a diak a ulebengelel el klengar. Sei a uchul me a Biblia a kmo: "Me ngikel oumera ra Ngalek a mo oba diak a ullebengelel klengar; e ngikel diak lolengesenges ra Ngalek a diak bo lesa kle-ngar."—Johanes 3:36.

<sup>12</sup> *A remera el mengull er a Dios a diak el teloi er a beluulechad.* Sera lengar er a kerrekeriil er a medal a Pilatus el chad er a Rom el milerredel, e a Jesus a dilu el kmo: "A rengedek a diak le ngar tial belulechad." (Johanes 18:36) Me a ngii di el beluu el lekiei er ngii, a remera el oltirakl er a Jesus a chederedall er a Rengedel el ngar er a eanged, me te melemolem el diak bo el teloi er a balatiks er tia el beluulechad me a ngii di el klautok er a chelsel. Me nguaisei, engdi a remengull er a Jehovah a diak bo loruul a ngii di el ngerang el mo merrob er a rebebil er a omelilt er tir el mo soiseb er a cheldebechel er a balatiks, me a le-

11. Ngera me ngkired el kongei er a Jesus Kristus el kmo nngngii a roel osobel el mla er a Dios?

12. Ngera uldimukl er tia el kmo ngdiak deteloi er a beluulechad?

chub e te remurt el mo er a deruchall er a omerredel, me a lechub e te sengkio. Me alta remera el mengull er a Dios a diak lolab el mo er a ngii di el chelechad er a balatiks, engdi te kerekikl el oltirakl a mla moterekokl el llach er a beluu. E ngerang? E le Tekingel a Dios a mellach er tir el mo “olengesenges ra klisiich el ngar chomerreder” er a kabelment. (Rom 13:1) Engdi sel lebo leketouch a tekoi el soal a Dios a doruul me a tekoi el longerechir er ngii a kabelment, e te mo oltirakl a kerebai er a rechapostol er a ledu el kmo: “Ngkired loltirakl ra Dios ra bai doltirakl rar chad.”—Rellir 5:29; Markus 12:17.

<sup>13</sup> *A remera el oltirakl er a Jesus a omerk el kmo ngdi ta el Rengedel a Dios a omelatk el kirir a rechad.* A Jesus a dilu el kmo: “Tial evangkelio ra rengedel a Dios a mo oberk ra belulechad el rokir, el kirel locholt el bedul a bek el renged; e sola e ngmochu ullebongel.” (Matteus 24:14) Me a remera el oltirakl er a Jesus Kristus a diak loli-siich er a rechad el mo omes er a remerreder er a klechad el kirel a semecheklel a mondai er tir, e te bai omerk el kmo a Rengedel a Dios el ngar er a eanged a di ta el sei-kid a omelatk el kirel a klechad. (Psalm 146:3) A Jesus a ullisechakl er kid el mo meluluuch el kirel a cherrungel el kabelment el kmo: “A rengedem le mei, ma uldesuel a rengum le meruul ra belulechad el ua chomerellel ra eanged.” (Matteus 6:10) A Tekingel a Dios a uluuchais el kmo tia el Rengedel a eanged a mo “okngemed a ikel bebil er a renged el rokui [el mengedereder er a chelechang] e sola e ngii a mo medechel el mo cherechar.”—Daniel 2:44.

<sup>14</sup> Me a domtab aika el bla desaod, e di lekau el oker

13. A remera el oltirakl er a Jesus ngua ngera osengir er a Rengedel a Dios, me te mo mekerang?

14. Ngera el klechelid a omoumerang el kmo ngoltirakl aike el kirir el meruul a rengar er a mera el omengull?

er kau el kmo: 'Nngnera el cheldebechel er a klechelid a melai a rokui el osisecheklel er a Biblia e olecholt er a ngklel a Jehovah? E olecholt er a roel a bltikerreng el ke ngei er ngii a Dios, me a klaumerang el ngar er a Jesus, e diak el teloi er a beluulechad, e omerk el kmo a Rengedel a Dios a di ta el omelatk el kirir a rechad? A domes a rokui el cheldebechel er a klechelid el meliuekl er a beluule-

*A omosiou er a Jehovah el obengterir a rechedal, e ke mo ngmai a lmuut el betok er aike el bo moriid*



chad, e ngngera er ngii a meruul aikang?’ Ngbleketakl el kmo te Sioning er a Jehovah.—Isaia 43:10-12.

### NGERA KE MO MERUUL ER NGII?

<sup>15</sup> A di dedu el kmo kede oumerang er a Dios e ngdiak el di el seikid e lungiang el loldeu er a rengul. E le Biblia a melekoi el kmo ngmo lmuut er a remekngit el anghel me te oumerang el kmo ngngar er ngii a Dios. (Jakobus 2:19) Engdi ngbleketakl el diak loruul a soal a Dios e diak el oba kengei er ngii. Me a bo lekengei er kid a Dios, e ngdiak di doumerang el kmo ngmera el ngar er ngii e le-merekong e ngdirrek el kmal kired el mo meruul a soal. Ngdirrek el kired el mo cheroid er a klsuul el klechelid e smisichid el orekedii a mera el omengull.

<sup>16</sup> A apostol el Paulus a ulechotii el kmo ngkmal diak el kired el mo teloi er a klsuul el omengull. Ngmilluches el kmo: “Misei, e ngdilu Rubak el kmo, ‘mtobed ra chelsir el mo cheroid er tir, e lako morreek a idokel; me kngiikemiu.’” (2 Korinth 6:17; Isaia 52:11) Me a remera el Kristiano a mengeroid er tir er a ngii di el ngerang el chelsechusem er a klsuul el omengull.

<sup>17</sup> A Biblia a olecholt el kmo a rokui el bedengel a klsuul el klechelid a uldimukl er a “Kloul Babilon.”\* (Chocholt 17:5) Tia el ngakl a mekltkid er a mats er a Babilon er a irechar, el mleuuchel er ngii a klsuul el

---

\* Lmuut el bebil er a omesodel a Kloul Babilon el omtechei er a cheddellel a klsuul el klechelid er a beluulechad, a ngar er a Bebil er a Omesodel, er a 251-2 el llel.

---

15. Ngera soal a Dios a doruul el uldimukl er a klaumerang er kid er ngii?

16. Kede mekerang aike el tekoi el rullid el mo teloi er a klsuul el klechelid?

17, 18. Ngera “Kloul Babilon,” e ngera me ngorechudel el de ‘tobed er a chelsel’?



klechelid er a uriul er a ieleb er a sils er a Noah. Ngbetok el osisechakl me a omeruul el debetik er a chelsel a klsuul el klechelid a mleuuchel er a Babilon er a irechar. El ua tiang, a rechad er a Babilon a milengull a Trinidad, me a lechub e te uldekial a tedei el dios el di mo tang. Chelecha el sils, e a Trinidad a kmal klou a ultutelel el osisechakl er a betok el klechelid. Engdi a Biblia a bleketakl el lolisechakl el kmo ngngar er ngii a di ta el mera el Dios, el Jehovah, me a Jesus Kristus el Ngelekel. (Johanes 17:3) A rechad er a Babilon a dirrek el uluumerang el kmo a rechad a ngar er ngii a delbengir el sel lemad a bedengir e ngii a tuobed e di melemolem el ngar. Chelecha el sils, e a klaumerang el kirel a debek me a lechub e ngreng el diak el mad e sebechel el mo chuarm er a beluu er a ngau a osisechakl el debetik er ngii er a oumesingd el klechelid.

<sup>18</sup> Me a omengull er a Babilon er a irechar a mla oberk er a beluulechad el rokir a uchul, e a Kloul Babilon a sebedhed el kmo ngmelutk er a cheldellel a klsuul el klechelid er a beluulechad el rokir. A Dios a ulemlaoch el kmo tia el cheldellel a klsuul el klechelid a mo uker er a di mereched el tellemall. (Chocholt 18:8) Ngsebechem el mesa uchul me ngkmal klou a ultutelel el meklau el mo cheroid er a ngii di el keskelel a Kloul Babilon? A Jehovah el Dios a soal kau a 'chomtobed er a chelsel' el di mereched er a chelechang el dirk el ngar er ngii a taem el sebechem el meruul el uaisei.—Chocholt 18:4.

<sup>19</sup> Sel omtibir el mo diak moruul a tekoi el loruul a klsuul el klechelid, e a rebebil a mo diak el sorir el obengkem. Engdi a omosiou er a Jehovah el obengterir a rechedal, e ke mo ngmai a lmuut el betok er aike el bo moriid. Me ngua rekot el disaiplo er a Jesus el chiloit a bebil er a tekoi e mlo oltirakl er ngii, e kau me ngmo er ngii a rebetok el odam me a ru-

19. Ngera ke mo ngmai el oak a omesiungem el mo er a Jehovah?

dos er kau el kldemem er a klaumerang. Ke mo chedal a klou el telungalek er a rebetok el miliol el mera el Kristiano el meliuekl er a beluulechad el tir a olecholt er a mera el bltikerreng el eko er kau. Ngdirrek el mo er ngii a kmal ungil el omeltkem el mo kiei el diak a ulebengelel er a chel-sel “sel mei el belulechad.” (Markus 10:28-30) E a lora el taem el mei, e tirke el chilitau el klaumerang er kau a uchul a locha mo sebechir el mesa el kmo ngera ngolisechakl a Biblia e dirrek el mo mengull er a Jehovah.

<sup>20</sup> A Biblia a olisechakl el kmo a Dios a di kmedung e ngmo okngemedii tia el mekngit el blekeradel er a beluulechad e mo mtechir er a melemalt el beches el blekeradel el ngar er a cheungel a omengederederel a Rengedel. (2 Petrus 3:9, 13) Ngkmal mo mengasireng a blekeradel er a beluulechad er isel taem! E ngar er a chel-sel isei el melemalt el beches el blekeradel, e ngmo er ngii a di ta el mera el klechelid, me a di ta el mera el bedengel a omengull. Tiang diak el roel a llomeserreng a lsekum ke mo meruul aike el meklou a ultutelel el tekoi el bo moruul e ngmo sebechem el mo teloi er a rengar er a mera el omengull er a chelecha el taem?

20. Ngera ngar er ngii er a ngar er a medad el kirir a rengar er a mera el klechelid?

#### AIKE EL LOLISECHAKL A BIBLIA

- Ngngar er ngii a di ta el mera el klechelid.—Matteus 7:13, 14.
- A mera el klechelid a medangch el oak a osisecheklel me a tekoi el loruul.—Matteus 7:16, 17.
- A Resioning er a Jehovah a mengull el ngar er a roel el kengei er ngii a Dios.—Isaia 43:10.

## **Bo Mdechor el kirel a Mera el Omengull**

**Ngera ngolisechakl a Biblia el kirel  
a usbechel a bleob me a omengull er a rebladek?**

**Ngera osengir a Rekristiano el kirel  
a chedaol el sils er a klechelid?**

**Ngmekerang a omosaod er a klaumerang er kau el  
mo er a rechad e diak mtemall a rengrir?**

OMKO ke rirenges el kmo ngmla er ngii a chad el dilakl a dok el komi er a basio el chomkiei er ngii, e chelechang e ngmocha melemall a klengar er a rechad, e ke mekerang? Ke ulterekokl el melukl, engdi uriul e ngdirk suebek a rengum el melebedebek el kmo, 'Ngak ak miltemall er a dok me a lechub e ngdiak?'

<sup>2</sup> Kede ngar er a osisiu el blekeradel sel dosaod a klsuul el klechelid. A Biblia a olisechakl el kmo a chouaisei el omengull a mla mukidokel er a diak el klikiid el osisechakl me a omeruul. (2 Korinth 6:17) Sei a uchul me ngklou a ultutelel el mtobed er a "Kloul Babilon," el cheldellel a klsuul el klechelid er a beluulechad el rokir. (Chocholt 18:2, 4) Ke mla rullii tiang? A leuaisei, e ngkired el chotengau. Engdi, ngdiak di mtobed er a klsuul el klechelid el merekong. Ngkirem el di kau el oker er kau er a uriul el kmo: 'Ngdirk ngar er ngii a chesechesemel a klsuul el omengull el ngar er ngak?' Ka momes a bebil er a okesiu.

---

1, 2. Ngera el ker a kirem el oker er kau er a uriul er a omtobed er a klsuul el klechelid, e ngera me ngklou a ultutelel?



### BLEOB ME A OMENGULL ER A REBLADEK

<sup>3</sup> A rebebil a mla er ngii a bleob me a lechub e ngchaltar er a rekeblirir el betok el rak. Kau me ke uaisei? A lsekum ke smau el omes a bleob er a chelsel a omengull er kau, e nglocha kora mo ngodech sel moluluuch el mo er a Dios e lak a bleob el momes. A bebil er ngii a locha kmal soam. Engdi Dios ngii a olterekokl er a teletelel a omengull el mo er ngii, e a Biblia a olisechakl el kmo ngdiak el soal a dous-bech a bleob. (Exodus 20:4, 5; Psalm 115:4-8; Isaia 42:8; 1 Johanes 5:21) Me bo multerekokl el dechor el kirel a *mera* el omengull e mtemall a ngii di el kloklem el chelsechusem er a *klsuul* el omengull, e bo moba osengel a Jehovah el “ouketui.”—Duteronomi 7:25.

<sup>4</sup> A omengull er a rebladek me a ruldigel a debull el

3. (a) Ngera ngmelekoi a Biblia el kirel a usbechel a bleob, e ngera me a osengel a Dios a sebechel el mo meringel er a rebebil el konge er ngii? (b) Ke mo mekerang a kloklem el chelsechusem er a klsuul el omengull?

4. (a) Kede mekera e medengei el kmo ngdiak a ultutelel a omengull er a rebladek? (b) Ngera me a Jehovah a ulekebai er a rechedal me lak lousbech a ngii di el bedengel a oltuubladek?

osiik a ngeso er a remla mad, a tekoi el debetik er a chelsel a betok el klsuul el klechelid. A uchei er a lsubii a klemelang er a Biblia, e a rebebil a uluumerang el kmo a rulekoad a kiei er a belurir a redeleb e sebecbir el olengeseu me a lechub e te tomelleterir a redi ngar. Alta kau me ke dirrek el mellasem el omotech a rengrir a rebladek. Engdi ngua desiluub er a 6 el Bliongel, a remla mad a diak dirk lolemolem el ngar, el ngar er a kmung ker, me ngdiak a ultutelel el dongedecheduch er tir. Me a ngii di el tekoi el leko ngmla er a rebetik er a rengud el ulekoad el mei, a mera er ngii a mla er a remekngit el anghel. Sei a uchul me a Jehovah a ulekebai er a rengalek er a Israel me lak longedecheduch er a rulekoad me a lechub e loruul a ngii di el bedengel a oltuubladek.—Duteronomi 18:10-12.

<sup>5</sup> A lsekum e ke uluusbech a bleob me a lechub e ke milengull er a rebladek, e ngungil el mokerang? Monguiiu e molebedebek a bades er a Biblia el olecholt a uldesuel a Dios el kirel aika el tekoi. Moluluuch el mo er a Jehovah er a bek el sils el olecholt er a urungulem el mo dechor el kirel a mera el omengull, e molengit er ngii me lengesukau el mo omdasu el uai ngii.—Isaia 55:9.

### **A KURISMAS—A DIMLAK EL LONGEDAOL ER NGII A REKOT EL KRISTIANO**

<sup>6</sup> A omengull er a chad a sebecchel el mukidokel er a klsuul el klechelid el loeak a omerellel a chedaol el sils el ua Kurismas. A Kurismas a leko ngcherellel a Jesus Kristus el longedaol er ngii a oumesingd el klechelid el leko te Kristiano. Engdi ngdiak a olechotel el kmo a redisaiplo er a Jesus er a kot el dart el rak a mlengedaol er tia el sils. A babier el *Sacred Origins of Profound Things* a kmo: “Eru el dart

---

5. Ngebechem el mekerang a lsekum e ke uluusbech a bleob me a lechub e ke milengull er a rebladek?

6. A Kurismas a leko ngmengedaol er a ngerang, e a rulebengkel a Jesus er a kot el dart el rak te mirruul er ngii?

el rak er a uriul er a cherellel a Kristus, e ngdimlak a mede-  
ngelii el kmo ngmle oingerang el sils, e di mle mekesai el  
chad a mle semeriar er ngii.”

<sup>7</sup> A redisaiplo er a Jesus a ble lodengelii a sils er a che-  
rellel, me tir a ulterekokl el dimlak el longedaol er ngii. E  
le *The World Book Encyclopedia* a kmo: “A rekot el Kristia-  
no a ulemes er a omerellel a tanziobi er a ngii di el chad el  
kmo ngmle siukang er a rechad el dimlak el Kristiano.” A  
Biblia a melekoi el kirel a omerellel a tanziobi er a reteru  
el merreder el dimlak longull er a Jehovah. (Genesis 40:20;  
Markus 6:21) A omerellel a tanziobi a dirrek el lurruul el  
mengebkall a kakerous el klsuul el chelid er a irechar. El ua  
tiang, ngar er a May 24, e a rechad er a Rom a milengedaol  
er a cherellel a chelid el dil el Diana. E a ongingil sils, e te  
mengedaol er a cherellel a chederir el sils, el Apollo. Me a  
omerellel a tanziobi a mle tekoi er a klsuul el omengull, el  
dimlak loruul a remera el Kristiano.

<sup>8</sup> A ta er a uchul me a Rekristiano er a kot el dart el rak a  
dimlak loruul er a tanziobi er a Jesus, e le te locha mle me-  
dengei el kmo a tanziobi a mle uldimukl er a cheleuid el  
uldedelid el klaumerang er a rechad. El ua tiang, te betok el  
chad er a Grik me a Rom a uluumerang el kmo ngngar er  
ngii a chelechad el reng el me oldingel sel lemechell a chad,  
e mo omekerreu er ngii el chad er a klemengetel a klengar  
er ngii. A babier el *The Lore of Birthdays* a melekoi el kmo:  
“Ngika el chelechad el reng a ngar er ngii a mengasireng el  
deleuill er ngii me ngike el chelid el uluutanziobi er sel sils el  
lemlechell er ngii ngike el chad.” Me ngulterekokl a Jehovah  
el diak el deu a rengul er a ngii di el tekoi el doruul el ru-  
llii a Jesus el mo chelsechusem er a cheleuid el uldedelid el

7. A omerellel a tanziobi ngmle telengtengil a ngera el tekoi er a  
taem er a redisaiplo er a Jesus?

8. Msodii a deleuill er a tanziobi me a cheleuid el uldedelid el kla-  
umerang er a rechad.

klaumerang er a rechad. (Isaia 65:11, 12) Me nngnera me te kmal betok el chad a mengedaol er a Kurismas?

### A UCHELEL A KURISMAS

<sup>9</sup> Ngbetok el dart el rak er a uriul er a kodellel a Jesus e a rechad a mlochu meruul er a tanzioibi er ngii er a December 25. Engdi tiang a *dimlak* el cherellel, e le cherellel a Jesus a mla er a October.\* Me nngnera me ngmlengilt a December 25? A rechad el leko te mlo Kristiano a mle “sorir tia el sils a bo losisiu ngii me a klsel a ungil el klebesei el luruul er ngii el kirel a ‘cherellel a mesisiich el sils’ el mle chelid er a Rom.” (*The New Encyclopædia Britannica*) Sel leblsechel a kelekolt, me lemechitechut a kleldelel a sils, e a rechad el uluuchelid er a sils a mirruul a ungil el klebesei me bo el sebechir el oleker er a sils el mlo er a cheroid el omerael me lluut el me remei. Tiaikid el December 25 a lomdasu el kmo ngtsel sils el lulemichel a omerollel a sils el me remei. Me a loreng a rengrir a remla er aika el ome ngull el mlo Kristiano, e a remengeteklel a klechelid a mlo oltirakl a omerellel tia el ungil el klebesei e rirellii el leko ngchedaol el sils er a “Rekristiano.”<sup>#</sup>

<sup>10</sup> A uchelel a Kurismas el kmo ngmla er a klsuul el ome ngull a meketeket el lodengeliu a rechad. Ngdimlak el ngar er a Biblia a uchul, e ngngar er aike el rak el ulemichel er a 1600 e ngmle mekull a omerellel a Kurismas er a chelsel a England me a bebil er aike el beches el beluu el lulekdu-

\* Momes er a Bebil er a Omesodel, er a 252-4 el llel.

<sup>#</sup> A Saturnalia a dirrek el mla er ngii a lerellii er tia el omelilt er a December 25. Tia el ungil el klebesei a lulengedaol er ngii a rechad er a Rom er a December 17-24 el mengebkall er a chederir er a sers. Te uluumur, e mlengitakl e meloik, e kaubresent er tiaikid el sils.

9. Ngmilekerang a December 25 e mlengilt el mo sils el longedaol er a cherellel a Jesus?

10. Ngera uchul me a bebil er a rechad a dimlak el loruul a Kurismas er a ngar er a mong?

bech er a Merikel. A ngii di el chad el ullengull er a ureor a le Kurismas a ulebals. Engdi ngdi mle telkib e aika el mechut el siukang a liluut el mo haeri, e meldechel er a lmuut el bebil el beches. Me a Kurismas a liluut el mo klou a ultutelel el chedaol el sils er a chelsel a betok el beluu. Engdi ngchelsechusem er a klsuul el klechelid a uchul, me a resorir el omotech er a rengul a Dios a diak el longedaol er ngii me a ngii di el chedaol el sils el uchelel a mlengai er a klsuul el omengull.\*

### **A UCHELEL NGKLOU A ULTUTELEL?**

<sup>11</sup> A rebebil a kongei el kmo aike el chedaol el sils el ua Kurismas a mlengai er a klsuul el omengull engdi ngdiak el omdasu el kmo ngmekngit a loruul. A oumesingd el chad a diak el omdasu el kirel a klsuul el omengull sel loruul aika el chedaol el sils, e le aikang a di mesterir a techall a telungalek el mo dmak. A lsekum kau me ke omdasu el uaisei e ngdiak el bltikerreng er kau el mo er a klsuul el klechelid e ngbai bltikerreng er kau el mo er a telungalek er kau, sei a rullii el mo meringel er kau el dechor el kirel a mera el omengull. Me bo el ulterekokl a rengum el kmo a Jehovah el uchelel a telungalek a soal a lungil a deleuill er kau me a rechedam. (Efesus 3:14, 15) Engdi ngsebechem el melisiich er a deleuill er kemiu el oak a rolel el lekengei er ngii a Dios. A apostol el Paulus a milluches el kirel a tekoi el kmal kired el melatk er ngii el kmo: “Mo morriter el kmo ngnggera ikel metechii a rengul a Rubak.”—Efesus 5:10.

<sup>12</sup> Ke locha omdasu el kmo a uchelel aika el chedaol el

---

\* A osengir a remera el Kristiano el kirel a bebil er a chedaol el sils a ngar er a Bebil er a Omesodel er a 254-5 el llel.

11. Ngera me a rebebil a mengedaol a ulengull el sils, e ngera kired el melatk er ngii?

12. Momekesiu er sel uchul me ngkired el omekiai a siukang me a ungil el klebesei el dimlak el klikiid a uchelel.



sils a diak a ngera el rellii er a omengedolel er a chelechang. Me a leuaisei, e ngmera el klou a ultutelel a kmo ngmla er ker el mei? Chochoi. El ua tiang: Omko ke milsang a kiande el ngar er a dobu, e ngulterekokl el diak bo molai er ngii el menga er ngii e le ngkikiongel. Me ngua isel kiande, aika el chedaol el sils alta ngkora ungil me ngolechau a rengud, engdi ngmlengai er a mekikiongel el basio. Me a bo dedechor el kirel a mera el omengull, e ngkired el mo oltirakl a omellach er a apostol el Paulus el mo er a remera el mengull er a Dios el kmo: "Lako morreek a idokel."—2 Korinth 6:17; Isaia 52:11.

### MOBA SEKUTABERRENG EL KIRIR A REBEBIL

<sup>13</sup> Ngsebechem el mo chelebangel a omelsemai sel omngiltii el diak moltirakl a chedaol el sils. El di ua tiang, a rechad el mdak el oureor a locha mo rrau a rengrir el kmo ngera me ngdiak mobengterir el oungil el klebesei. Ke mo mekerang a loubresent el eko er kau a chad? Ngmekngit a chomolai? Ke mekerang a lsekum a bechim a diak el oba klaumerang er kau el kirel aika el tekoi? Ke mekerang e rulleterir a rengelekem el mo diak el omdasu el kmo ngngar er ngii a olengesonges er tir e le tir el diak el ngar er aika el chedaol el sils?

<sup>14</sup> A sekutaberreng a dousbech er

13. Ngera el omelsemai a sebechel el duubech sel lak bo mteloi er a omerellel a chedaol el sils?

14, 15. Ke mekerang a loutkeu er kau er a ileakl el sus er a chedaol el sils me a lechub e le ngar er ngii a chad el soal el oubresent el eko er kau?

*Ke kongei el menga  
er a kiande el  
omngiluu er  
a dobu?*



ngii el mo medengei a ungil doruul er a chelsel a bek el blekeradel. A luluutkeu er kau er a ileakl el sus er sel chedaol el sils, e moba omengull e moreng a sulel ngike el chad. Engdi a lsekum e ngchad el blechoel el mkasoues me a lechub e ke oureor el obengkel, e nglocha soam el dmung a telkib el betok el tekoi el oba sekutaberreng. A Biblia a mengelechel el kmo: “Mdiblechoel lousbech a medememek el cheldecheduch, el ulsar, me bo modengei a ikel kiriu longer ra dertal chad.” (Kolose 4:6) Mkerekikl el diak lemetengel a osengem er a rebebil e msodii a delecherum el oba sekutaberreng. Beketeklii el kmo ngdiak momtok a kldibel me a klaubresent engdi ngsoam el meruul ngii el tekoi er a kuk di ngodech el taem.

<sup>15</sup> Engdi ke mekerang a lebeskau a bresent? Tia kmal el di mo ultuil er a blekeradel el ngar er ngii. A ulemeskau a bresent a sebechel el kmo: “Ak medengei el kmo ngdiak mongedaol er tia el sils, engdi ngdirke soak el omeskau tiang.” A leuaisei e ke locha mo melatk el kmo a omnguu ngii el bresent e ngdiak el osisiu ngii me a oblo mte-loi er a ungil el klebesei el kirel sel chedaol el sils. Engdi, a lsekum me ngika el ulemeskau a dimlak el lodengeliu a klaumerang er kau, e ngsebechem el subedii el kmo ngdiak mongedaol er sel sils. Tiang a mo ngosukau el mo smodii a uchul e ke nguu a bresent engdi ngdiak moubresent el mo er ngii er seikid el sils. Engdi ngbai rolel a llomeserreng a omkotouar er a bresent a lsekum a chad el ulemeskau a mle bleketakl a uldesuel el kmo kau a diak omeral oltirakl er a klaumerang er kau me a lechub e ke beot el choitii a klaumerang er kau el kirel a omelai el bresent.

### **OMERELLEM EL MO ER A TELUNGALEK ER KAU**

<sup>16</sup> A telungalek er kau a lak el oba klaumerang er kau

---

16. Kede mekerang e olecholt a sekutaberreng el kirel a tekoi el ruoll el kirel a chedaol el sils?

el kirel aika el tekoi, e ngkirem el mo oba sekutaberreng. Engdi ngdiak a ultutelel el mkaititekangel el kirel a bek el omerellel a chedaol el sils. Mongull a uldesuir el di uai kau el soam a longull er a uldesuem. (Matteus 7:12) Molechib er kau er a tekoi el chusechesemau er a omerellel a chedaol el sils. Engdi ngdirk kirem el oba tabesul el uldasu el kirel aike el tekoi el ruoll er a uchei me a lechub e nguriul er aika el chedaol el sils. Engdi ngkmal kirem el diak moruul a tekoi el sebechel el mo tomellii a ungil el ukltkem.—1 Timoteus 1:18, 19.

<sup>17</sup> Ke mekerang e rulleterir a rengelekem el mo diak el omdasu el kmo ngmo er ngii a olengesonges er tir a lak el ngar er aika el ungil el klebesei el diak el oltirakl er a Biblia? Oumesingd er ngii a di mo ultuil er a tekoi el moruul er aike el bebil er a taem er a chelsel a rak. A rebebil er a ruungalek a olecheuekl a taem el oubresent el mo er a rengelekir. A ta er aike el kot el ungil el sengk el sebechem el mesterir a rengelekem a temem me a bltkil a rengum.

### **MORUUL ER A MERA EL OMENGULL**

<sup>18</sup> A bo moldeu er a rengul a Dios, e ngkirem el otngakl a klsuul el omengull e mo dechor el kirel a mera el omengull. Ngerang a uldimukl er tiang? A Biblia a kmo: “E bo de kasisiich el omekses a bltikerreng ma ungil lomeruul, e lak de ua blekerdelir a bebil rar chad el mengoit chongdibel er kid, e bai de kachelechel, e domes er ngiil Sils lolekeed, me de mengal mo uaisei.” (Hebru 10: 24, 25) A miting er a Rekristiano a taem el moldeu er a rengum el mengull er a Dios el ngar er a roel el lekengei er

17. Ke mekerang e ngosuterir a rengelekem el mo diak el omdasu el kmo te olengesonges a lomes er a rebebil el meruul a chedaol el sils?

18. Ngmekerang e a bisem el mo er a miting er a Rekristiano a lengesukau el mo dechor el kirel a mera el omengull?



*A doruul er a mera el  
omengull e ngmo uchul a  
mera el deureng*



ngii. (Psalm 22:22; 122:1) Ngar er ngii el miting e a reblak a rengrir el Kristiano a “kasiich” er a delongelir.—Rom 1:12.

<sup>19</sup> A ta er a rolel e ngsebechem el dechor el kirel a mera el omengull a oak sel omongedecheduch er a rebibil el kirel aike el mosuub er a Biblia el obengterir a Resioning er a Jehovah. A rebetok a mera el “oldoseb a telrir e lmanigel a rengrir” el kirel aike el meknigil el duubechang er a beluulechad er a chelechang. (Esekiel 9:4) Ke locha medengelterir a rebibil el dirrek el uaisei. Ngera me ngdiak bai mouchais er tir er a omeltkem el mlengai er a Biblia el kirel a ngar er a medad? Sel mteloi er a remera el Kristiano e mouchais er a rebibil el kirel a mengasireng el klemerang el bla msuub er a Biblia, e ke mo melechesuar el kmo aike el tekoi el dirk mle medechel er a rengum el kirel a omerrellel a siukang er a klsuul el omengull a mekokil el merael el mo diak. Ngulterekokl el kmal mo dmeu a rengum e mo ngmai a betok el klengeltengat a lsekum ke dechor el kirel a mera el omengull.—Malakai 3:10.

19. Ngera me ngklou a ultutelel el mouchais er a rebibil el kirel a tekoi el bla msuub el mla er a Biblia?

#### AIKE EL LOLISECHAKL A BIBLIA

- A bleob me a omengull er a rebladek a diak dousbech el ngar er a mera el omengull.  
—Exodus 20:4, 5; Duteronomi 18:10-12.
- Ngmeknigil a deteloi er aike el ungil el klebesei el mlengai er a klsuul el omengull.  
—Efesus 5:10.
- A remera el Kristiano a kirir el oba sekuta-berreng sel losaod er a klaumerang er tir el mo er a rebibil.—Kolose 4:6.

## **Mokedau er a Dios el Ngar er a Nglunguuch**

**Ngera me ngkired el meluluuch el mo er a Dios?**

**Ngera kired el meruul me bo de morenges  
er a Dios?**

**Ngmekerang a Dios a longer a nglunguched?**

A DOMEKESIU er ngii er tia el klou el melidiul, e a beluu-lechad a kmal imis el kekerei. Me ngngar er a osengel a Jehovah, el “ngikel milebii a eanged ma chutem,” e aika el renged er a klechad a di ua telngimech er a chimo el baket el ralm. (Psalm 115:15; Isaia 40:15) Engdi a Biblia a kmo: “Ng kmeed er tirkel rokui el omekedong er ngii, el tirkel mera er a rengrir omekedong er ngii. Ng mesterir a lousbech tirkel rokui el meluu er ngii; ng orrenge ongtedir.” (Psalm 145:18, 19) Ka di bo molebedebek er a belkul tiang! A mesisiich el Ulemeob a kmeed er kid e orrenge er “tirkel mera er a rengrir omekedong er ngii.” Kede mera el ngeltengat er a techall el sebeched el mo er a medal a Dios el ngar er a nglunguuch!

<sup>2</sup> Engdi a lsekum e ngsoad a Jehovah a lorrenge a nglunguched, e ngkired el meluluuch el ngar er a roel el kengei er ngii. Kede mekerang e uaisei a lak dodengei a lolisechakl a Biblia el kirel a nglunguuch? Ngklou a ultutelel a bo dodengei el kmo a Biblia ngngerang melekoel el kirel, e le nglunguuch a ngosukid el mo kmeed er a Jehovah.

---

1, 2. Ngera me a nglunguuch a kmal klou el klengeltengat, e ngera me ngkired el mo medengei a osisecheklel a Biblia el kirel?

## **NGERA ME KEDE MELULUUCH EL MO ER A JEHOVAH?**

<sup>3</sup> A ta er a klou el uchul e ngkired el meluluuch el mo er a Jehovah a ngii el melisiich er kid el mo meruul el uaisei. A Tekingel a kmo: "Lak el sebek a rengmiu ra ngiidi le ngerang, e di moba chomereng el saul loldars a nglunguuch ma chongit ra bek el tekoi el subedii a Dios ra ikel molengit. Ma diak le metuk ra klemedengei rar chad el budech ra Dios a mo kokar a rengmiu ma chomelebedebekiu el ngara Kristus Jesus." (Filipi 4:6, 7) Me ngulterekokl el diak el soad el di choitii a chouaisei el oeak a klechubechub e a Dios a kiltmeklii el tekoi el kired!

<sup>4</sup> A Imuut el ta er a uchul a kmo a deblechoel el meluluuch el mo er a Jehovah e ngsmisichii a deleuill er kid me ngii. A remera el kausechelei a diak di el chadecheduch sel lebo er ngii a lousbech, e te bai kausemeriar me a klausechelei er tir a mengal mo mesisiich sel lemimokl el kaiuecholt a uldesuir el kelatk e lekaukerreu. A deleuill er kid me a Jehovah me ngkmeed el osisiu. Ngoeak tia el babier, e ke mla suub a betok el lolisechakl a Biblia el kirel a Jehovah me a blekerdelel me a moktek er ngii. Ke mla suubii el kmo ngsebechel el mo er ngii a deleuill er kau me ngii. A nglunguuch a meskau a techall el mo olecholt a uldesuem me aike el ngar er a rengum el mo er a Demam el ngar er a eanged. Sel omoruul el uaisei, e ke olekeed er kau er a Jehovah.—Jakobus 4:8.

## **NGERA KIREL EL MERUUL?**

<sup>5</sup> A Jehovah ngorrenges a rokui el nglunguuch? Ka mo—

- 
3. Ngera ta er a uchul me kede meluluuch el mo er a Jehovah?
  4. A deblechoel el meluluuch e ngmekerang a lsisichii a deleuill er kid me a Jehovah?
  5. Ngera ochotii el kmo a Jehovah a diak el orrenges a rokui el nglunguuch?

*“Ngikel milebii a  
eanged ma chutem”  
a kongei el orrenge  
a nglunguched*



latk a tekoi el dilung el mo er a rulemtok el ngalek er a Israel er a temel a profet el Isaia el kmo: “Cho msal kmal meluluuch, me ngak a di diak bo kurrenges, ele chimomiu a chelsechusem er a klengit.” (Isaia 1:15) Me ngngar er ngii a bebil er a blekeradel el sebechel el rullii a Dios el mo diak el orrenge a nglunguched. Me a nglunguched a bo lemorranges er a Dios, e ngngar er ngii a bebil er a tekoi el kired el meruul.

<sup>6</sup> A kot e ngkired el mo oba klaumerang. (Markus 11: 24) A apostol el Paulus a milluches el kmo: “Ma lak a kloumerang e ngdiak el sebechel mo dmeu a rengul a Dios, ele tirikel sorir lolekeed er tir er ngii a diak le iit loumera el kmo ngngarngii a Dios, e dirrek loumera el kmo tirikel osiik er ngii a le besterir chomeksulir.” (Hebru 11:6) A doba mera el klaumerang e ngdiak el belkul a kmo kede di mo medengalii a Dios el kmo ngngar er ngii, e orrenge e onger a nglunguched e merekong. Ngbai mocholt el oeak a omerelled, me ngkirel a

6. A bo lorranges a nglunguched a Dios, e ngngera ngaruchei el tekoi el kirel ngar er ngii er kid, e mekerang a dolecholt er ngii?



blekerdelel a klengar er kid er a bek el sils el omeketakl er tiang.—Jakobus 2:26.

<sup>7</sup> A Jehovah a dirrek el soal a rechad el meluluuch el mo er ngii a bo loba klengariourenge e lolekoi a tekoi el mera el ngar er a chelsel a rengrir. Kid ngdiak el ngar er ngii a ungil el uchul e kede olecholt a klengariourenge a dongedecheduch er a Jehovah? A rechad sel lebo er ngii a techellir el mo er a medal a king me a lechub e ng president, e te mong el olecholt er a omengull er tir el kirel sel ngarbab el deruchellel. A teleteled a debo er a medal a Jehovah a kirel el olecholt er a lmuut el dmolch el omengull! (Psalm 138:6) E le ngii a “Dios el Olab a Bek el Klisiich.” (Genesis 17:1) Me sel doluluuch el mo er a Dios, e a blekerdeled a debo er a medal a kirel el olecholt el kmo kede oba klengariourenge e melechesuar a deruchelled er medal el kmal diak dengerang. A chouaisei el klengariourenge a rullid el mo meluluuch el mera el ngar er a rengud, el diak di domelekl a nglunguched el di omasech a tekoi el mla mo kse er kid el meleko. —Matteus 6:7, 8.

<sup>8</sup> A lmuut el ta er a kired el meruul er ngii me lemoresnges a nglunguched er a Dios, a kired el meruul a tekoi el oltirakl a nglunguched. El ua tiang, a doluluuch el kmo, “Beskemam er chelechal sils a kelel a tal sils,” e ngkired el mo er a tkurrebab el sebeched el meruul a ngii di el ureor el ngar er ngii el sebeched. (Matteus 6:11; 2 Thesalonika 3:10) Me a doluluuch el mo mesisiich er a chelitechetud, e ngkired el kerekikl el mengeroid er kid er a tekoi el sebechel choitikikid. (Kolose 3:5) Obengkel aike el dousbech er a bek el sils, e ngdirrek el ngar er ngii a ker el kirel a nglunguuch el soad a lemonger.

7. (a) Ngera me ngkired el olecholt a omengull a doluluuch el mo er a Jehovah? (b) Sel doluluuch e kede mekerang e olecholt a klengariourenge e meleko a tekoi el mera el ngar er a rengud?

8. Ngmekerang a doruul a tekoi el oltirakl a nglunguched?

## KER EL KIREL A NGLUNGUUCH A MONGER

<sup>9</sup> *Kede meluluuch el mo er a techang?* A Jesus a ullisechakl er a rulebengkel el mo meluluuch el mo er a 'Demad el ngar er a eanged.' (Matteus 6:9) A leuaisei, e a nglunguched a kirel el di mo er a Jehovah el Dios e merekong. Engdi, a Jehovah a soal a doluluuch el melechesuar er sel deruchel-lel a di ta el ngelekel el Jesus Kristus. Me ngua desiluub er a 5 el Bliongel, a Jesus a mlodurokl el mei er a beluulechad el me olubet el melubet er kid er a cheungel a klengit me a kodall. (Johanes 3:16; Rom 5:12) Ngii a ngike el mlengilt el Ngarbab el Prist e Chad er a Kerrekeriil. (Johanes 5:22; Hebru 6:20) Sei a uchul, me a Biblia a omekrael er kid el mo oldars a nglunguched el oeak a Jesus. Ngii el Jesus a dilu el kmo: "Ngak a rael, e klemerang, e klengar; me ngdiak a chad el mora Chedam a lak lokuu ngak." (Johanes 14:6) A bo lemorenges a nglunguched, e ngkired el meluluuch el *di mo er a Jehovah el loeak* a Ngelekel.

<sup>10</sup> *Ngkirel el ngar er ngii a ileakl el teleteled a doluluuch?* Ngdiak. A Jehovah a diak longerechir a ulterekokl el teleteled e le Biblia a olisechakl el kmo ngsebeched el meluluuch el ngar er a betok el kakerous el teletael, el uldimukl er ngii a dedengchokl, deterrob, doutubuach, me a lechub e kede dechor. (1 Kronika 17:16; Nehemia 8:6; Daniel 6:10; Markus 11:25) A klou a ultutelel a diak el sel teletelel a doluluuch el meues er a rechad, e ngbai sel melemalt el uldasu el dohang. Ngar er a urered er a bek el sils me a lechub e ngsel bo dechebangel a bkaischembrungel, e kede blechoel el di ngar er aike el dengar er ngii e meluluuch er a chesl a rengud, alta e ngdimlak a chad el medengei, engdi a Jehovah a orrenges a uaisei el nglunguched.—Nehemia 2:1-6.

9. Kede meluluuch el mo er a techang, e oeak a techang?

10. Ngera me ngdiak a ileakl el teleteled a doluluuch?

<sup>11</sup> *Ngerang a sebeched el meluluuch el kirel?* A Biblia a kmo: “A dolengit a ngiidi le ngeral tekoi el oltirakl a uldesuel a Dios e ngrongesii ngiil ongtid.” (1 Johanes 5:14) Me ngsebeched el meluluuch el kirel a ngii di el tekoi el oltirakl er a soal a Dios. Ngsoal a Dios a doluluuch el kirel a tekoi el dolatk? Chochoi! A doluluuch el mo er a Jehovah e ngdi ua dongedecheduch er a ungil el sechelid, el sebeched el mimokl el ‘subedii er a ikel ngar a rengud.’ (Psalm 62:8) Ngmelemalt el tekoi a dolengit er a oureor el klisichel a Dios me lengesukid el mo meruul a llemalt. (Lukas 11:13) Ngdirrek el sebeched el olengit a ulekrael el mo meruul a mellomes el omelilt me a klisiich el mo outekangel a meringel el taem. (Jakobus 1:5) A debo er a klengit, e ngkired el olengit a klausubes el loeak a tengetengel a Kristus. (Efesus 1:3, 7) Engdi ngdiak el soad el di meluluuch el kirel a tekoi el di kired el merekong. Kede dirrek el meluluuch el kirir a rebebil, el ua telungalek er kid me a reklmeded er a omengull.—Rellir 12:5; Kolose 4:12.

<sup>12</sup> A tekoi el kirel a Jehovah a kirel el mo kot el meklou a ultutelel er a chysel a nglunguched, e le ngngar er ngii a ungil el uchul e kede oldanges er ngii e oureng a sullel er a rokui el klungiolel. (1 Kronika 29:10-13) A Jesus a milskid a kerebai er a nglunguuch, el ngar er a Matteus 6:9-13, el lolisechakl er kid el mo meluluuch el kirel me a kot e a ngklel a Dios bo lemechedaol. E a ongingil, e a Rengedel a Dios lemei me a uldesuel a rengul lemeruul er a chutem el uai a omerellel er a eanged. Uriul er aika el meklou a ultutelel el tekoi el kirel a Jehovah, e ngmlochu omasech a tekoi el ike el di kired. Me a deruul a tekoi el kirel a Dios el mo meklou a ultutelel el tekoi er a chel-

11. Ngerang a bebil er a tekoi el dolatk el melemalt a doluluuch el kirel?

12. Kede mekerang e remuul a tekoi el kirel a Jehovah el mo kot er a chysel a nglunguched?

sel a nglunguched, e kede olecholt el kmo ngdiak dolatk a di klungioled.

<sup>13</sup> *Ngkirel el ua ngerang a klemengetel a nglunguched?* A Biblia a diak el loluk a klemengetel a nglunguchel a chad a di lengii el tang me a loluluuch el ngar er a buai. A nglunguuch a sebechel el di kedeb er a uchei er a blengur, me a lechub e ngkemanget el louchais aike el ngar er a rengud el mo er a Jehovah. (1 Samuel 1:12, 15) Engdi a Jesus a ulemtok er a rechad el merruul a mekemanget el nglunguuch el di kirel a ues. (Lukas 20:46, 47) A cho-uaisei el nglunguuch a diak el kengei a Jehovah. A klou a ultutelel a kmo kede meluluuch el ngar er a rengud, me a klemengetel a nglunguuch el kengei a Dios a di mo ultuil er a blekeradel el ngar er ngii me a usbechellel er sel taem.

<sup>14</sup> *Ngua ngerang a kdemel a nglunguched?* A Biblia a melisiich er kid el 'diblechoel el meluluuch' e 'lak demekimd el meluluuch.' (Lukas 18:1; Rom 12:12; 1 Thesalonika 5:17) Nguaisei, engdi aika el tekoi a diak el belkul a kmo ngkmal kired el meluluuch el mo er a Jehovah er a bek el bung er a klok. Ngbai mengelechel er kid a Biblia el mo blechoel el meluluuch, el oureng a sulel a Jehovah el kirel a klungiolel el mei er kid e osiik er ngii el kirel a ulekrael me a ongelaod me a klisiich. Ngungil a rengud e le kede medengei el kmo a Jehovah a diak loluk er a klemengetel me a kdemel a lsebeched el mengedecheduch er ngii el oak a nglunguuch. A lsekum e kede mera el oba omereng el saul el kirel a techall er a nglunguuch, e ngulterekokl el mo er ngii a betok el techelled el meluluuch el mo er a Demad el ngar er a eanged.

13. A Biblia ngolecholt a ngerang el kirel a klemengetel a nglunguuch el kengei a Dios?

14. Ngera belkul sel lolisiich er kid a Biblia me 'lak demekimd el meluluuch,' e ngera me tia el tekoi a mengelaod a rengud?

<sup>15</sup> Ngera me ngkired el kmo "Amen" er a ulebongel er a nglunguuch? A tekoi el "amen" a belkul a kmo "nguaisei" me a lechub e ng "bo leuaisei." A okesiu el ngar er a Biblia a ochotii el kmo ngmelemalt a dedu "Amen" er a ulebe-ngelel a nglunguched me a nglunguuch el ngar er a buai. (1 Kronika 16:36; Psalm 41:13) Sel dedu "Amen" er a ule-bengelel a nglunguched, e kede melisiich el kmo a tekoi el dedilung a mera el mla er a rengud. A lekekerei me a le-klou a ngered el dmu "Amen" er a nglunguchel a chad el ngar er a buai, e kede ochotii el kmo kede kongei aike el uldasu el meldung.—1 Korinth 14:16.

### ROLEL A DIOS A LONGER A NGLUNGUCHED

<sup>16</sup> A Jehovah ngmera el longer a nglunguuch? Nguai-sei! Me ngulterekokl a rengud el kmo "[Ngike el] Onger a nglunguuch" a mo onger a nglunguchir a rebetok el mi-liol el chad el loldars el mera el ngar er a rengrir. (Psalm 65:2) A Jehovah a onger a nglunguched el oak a betok el kakerous el roel.

<sup>17</sup> A Jehovah a ousbech er a rechangel er ngii me a remesiungel el ngar er tia el chutem el mo onger a nglu-  
nguuch. (Hebru 1:13, 14) Ngbetok a rechad el milluluuch el kirel a ngeso el mo medengelii a Biblia e di mle telkib el taem er a uriul e a remesiungel a Jehovah a mlo metik er tir. A chouaisei el chais a meketeklii el kmo a rechang-hel a omekrael er a ureor er a berkel a klumech. (Chocholt 14:6) Me a longer a nglunguched er a taem el demera el ousbech a ngeso, e a Jehovah a sebechel el mekrolii a ta

---

15. Ngera me ngkired el kmo "Amen" er a ulebengelel a nglungu-  
ched me a nglunguuch el ngar er a buai?

16. Ngera el tekoi el kirel a nglunguuch a sebechel el mo ulterekokl  
a rengud er ngii?


17. Ngera me ngsebeched el kmo a Jehovah a ousbech er a rechang-  
hel me a remesiungel er tia el chutem el mo onger a nglunguched?

er a Kristiano el me ngosukid.—Osisechakl 12:25; Jakobus 2:16.

<sup>18</sup> A Jehovah el Dios a dirrek el ousbech er a oureor el klisichel me a Tekingel, el Biblia, el onger a nglunguchir a remesiungel. Ngsebechel el onger a nglunguched el kirel a ngeso el mo outekangel a ome-lsemai el oeak sel lomeskid a ulekrael me a omelisiich

18. Ngmekerang a Jehovah a lousbech er a oureor el klisichel me a Tekingel el onger a nglunguchir a remesiungel?

*A nglunguchem a sebechel  
el morenges er a ngii  
di el taem*



*A longer a nglunguched, e a Jehovah a sebechel el mekrolii a ta er a Kristiano el me ngosukid*

el okiu a oureor el klichel. (2 Korinth 4:7) Ngblechoel a nger er a nglunguched el kirel a ulekrael el debetik er a Biblia, el ngar er ngii e a Jehovah a ngosukid el mo melilt a tekoi el oba llomeserreng. Kede metik a bades el ngosukid sel dosuub er a Biblia me aike el babier el mesaod a tekoi er a Biblia, el di ua tia el babier. A suobel el kired el mo melebedebek a mocholt er kid el oeak a tekoi el medung er a miting er a Rekristiano me a lechub a ta er a remechuodel.—Galatia 6:1.

<sup>19</sup> A lsekum a Jehovah a kora ua lemeoud el onger a nglunguched, e ngdiak el belkul a kmo ngdiak el sebechel el onger. Ngbai diak dobes el kmo ngonger a nglunguched el oltirakl er a soal me a temel. Ngmede ngei a dousbech me a teletelel a lomekerreu el ngaruchei er kid. Ngmechikid me kede melemelem 'el olengit, e osiik, e melngod er a chesimer.' (Lukas 11:5-10) A cho uaisei el telekangel a ochotii el mo er a Dios el kmo a urunguled a kmal mesisiich me a klaumerang er kid a ulterekokl. A Jehovah a dirrek el onger a nglunguched el ngar er a roel el diak el sal bleketakl er a osenged.

---

19. Ngera kired el melatk er ngii a lsekum a nglunguched a kora ua lak lemonger?



El ua tiang, ngsebechel el onger a nglunguched el kirel a omelsemai el dechelebangel, el diak el cheridii ngii el omelsemai, e ngbai di meskid a klisiich el mtekengelii.—Filipi 4:13.

<sup>20</sup> Kede oba klou el omereng el saul e le Ulemeob a kmeed er tirke el meluluuch el omekedong er ngii! (Psalm 145:18) Me bo dungil el ousbech er tia el mekreos el techall er a nglunguuch. A deuaisei, e ngmo dmeu a rengud el mengal el olekeed er kid er a Jehovah, el Ngike el Onger a nglunguuch.

20. Ngera me ngkired el ousbech er tia el mekreos el techall er a nglunguuch?

#### AIKE EL LOLISECHAKL A BIBLIA

- A deblechoel el meluluuch el mo er a Jehovah e nngosukid el mo kmeed er ngii.—Jakobus 4:8.
- A bo lemoreseng er a Dios a nglunguched, e ngkired el meluluuch el ngar er a klaumelang e oba klengariourenge e melekoi a tekoii el mera el ngar er a rengud.—Markus 11:24.
- Ngkired el meluluuch el di mo er a Jehovah el oeak a Ngelekel.—Matteus 6:9; Johanes 14:6.
- A Jehovah, el “[Ngike el] Onger a nglunguuch” a ousbech er a rechangel er ngii, remesiungel er tia el chutem, oureor el klisichel me a Tekingel el mo onger a nglunguuch.—Psalm 65:2.



## Techolb me a Deleuill er Kau me a Dios

**Ngua ngerang a techolb er a Kristiano?**

**Ngera kirem el meruul e ngmochu  
sebechem el metecholb?**

**Ngmekerang a chad a loruul er a  
telbilel a rengul?**

**Ngera sel ileakl el uchul me  
kede mo metecholb?**

“MESANG, tia ralm! Ngarngii a telemellel a knguu a techolb chelid?” Tia keril a ta el chad er a Ethiopia er a kot el dart el rak. A Kristiano el ngklel a Filipus a dirk mileketeklii el mo er ngii el kmo a Jesus a ngike el mla er a telbiil el Messias. A tekoi el siluub el mla er a Bades a kmal rirtechii a rengul, me ngii el chad er a Ethiopia a ullecholt el kmo ngsoal el mo metecholb!—Rellir 8: 26-36.

<sup>2</sup> A lsekum e ke mle kerekikl el mesuub aiike el uleak uchei el bliongel el obengkel a ta er a Sioning er a Jehovah, e ke locha mla mo kltmokl el oker el kmo, ‘Ngera merrob er *ngak* me ngdiak bo kmetecholb?’ Ke ulterekokl el mla suubii a iaksok el kirel a diak a ulebengelel

1. Ngera me ngike el chad er a Ethiopia a ullengit el mo metecholb?
2. Ngera me ngkirel el mo blak a rengum el melatk er a techolb?

klengar el ngar er a Paradis. (Lukas 23:43; Chocholt 21: 3, 4) E dirrek el mla suubii a mera el blekerdelir a rulekoad me a omelatk er a okiis. (Olisechakl 9:5; Johanes 5: 28, 29) E dirrek el locha mla mo obengterir a Resioning er a Jehovah el ngar er aike el miting er tir e mla mesang el kmo ngua ngera otireklir er a mera el klechelid. (Johanes 13:35) E a ngarbab er ngii, e ke ulterekokl el mla mo omekeroul er a deleuill er kau me a Jehovah el Dios.

<sup>3</sup> Ke mekerang e ochotii el kmo ngsoam el mesiou er a Dios? A Jesus a dilu er a rulebengkel el kmo: “Mora el mora rokuil renged el rulleterir ar chad el mo Obengkek, e *molecholb er tir.*” (Matteus 28:19) A Jesus a kiltmeklii a kerebai er a bo lemetecholb er a ralm, el dimlak el di loliim er ngii me a lechub e loleiitel a ralm er a bdelul. (Matteus 3:16) A “techolb” a mlengai er a tekoi er a Grik el “olduleb.” Me seikid e a Rekristiano a lemetecholb e te mo moduleb er a ralm.

<sup>4</sup> A rokui el chad el sorir el mo er ngii a deleuill er tir el obengkel a Jehovah el Dios a kirir el mo metecholb. A techolb a ochotii el mo er a buai el kmo ngsoam el mo mesiou er a Jehovah e dmeu a rengum el meruul a soal. (Psalm 40:7, 8) Engdi a uchei er a bo el sebechem el mo metecholb, e ngngar er ngii a bebil er a tekoi el kirem el meruul.

### KLEMEDENGEI ME A KLAUMERANG A USBECHALL

<sup>5</sup> Ke mla nguu sel kot el bakes. Tiang a sel *molai a*

3. (a) A Jesus ngmilsterir a rulebengkel a ngera el omellach?  
(b) Ngua ngerang a teletelel a lemetecholb a chad?


4. A techolb ngerang olecholt er ngii?

5. (a) Ngera kot el bakes el loruul er ngii a chad el melatk er a techolb? (b) Ngera me ngklou a ultutelel a miting er a Rekristiano?

*klemedengei* el kirel a Jehovah el Dios me a Jesus Kristus, el loeak a ulterekokl e ulecheuech el omesubel a Bibla. (Johanes 17:3) Engdi ngkmal betok a kirem el mesuub. A Rekristiano a sorir el mukeek er ‘a bek el llomeserreng ma utebengel a tekoi . . . me bo lsal medengeliu a uldesuel a Dios.’ (Kolose 1:9) Ngkmal klou a ultutelel el obo er aike el miting er a Resioning er a Jehovah e le ngsebechel el ngosukau el mo melechel a *klemedengei* er kau el kirel a Dios.—Hebru 10:24, 25.

<sup>6</sup> Ngdiak el belkul a kmo ngkirem el mo medengei a rokui el lolekoi a Bibla e mochu sebechem el metecholb. Ngike el chad er a Ethiopia a mla er ngii a *telkib* el *klemedengei* er ngii, engdi nguluusbech a ngeso el mo omeketakl a bebil er a Bades. (Rellir 8:30, 31) Kau me nglocha betok a kirem el mo mesuub. E a mera er ngii a diak a telkael er a omesuub el kirel a Dios. (Olisechakl

6. Ngua klungel a ngera el *klemedengei* er a Bibla a kirem el mo obang er a uchei er a bo el sebechem el metecholb?



3:11) Engdi uchei er a bo el sebechem el metecholb, e ngkirem el mo medengei e mo kongei a lekesengil e ngike el uchetemel a osisechakl er a Biblia. (Hebru 5:12) A chouaisei el osisechakl a uldimukl er ngii a klemerang el kirel a blekerdelir a rulekoad me a klungel a ultutelel a ngklel a Dios me a Rengedel.

<sup>7</sup> Engdi ngdiak di el klemedengei el merekong a usbechall, e le “lak a kloumerang e ngdiak el sebechel mo dmeu a rengul a Dios.” (Hebru 11:6) A Biblia a ouchais er kid el kmo a rebebil er a rechad er a Korinth er a irechar er a lrenges a klemechir a Rekristiano e te “mlo oumerang, me te meltecholb.” (Rellir 18:8) Me ngngar er a osisiu el roel, e a omesubem er a Biblia a kirel el rulau el mo *oumerang* el kmo a Biblia a mera el milluches el luleak a ngelsuil a Dios. Ngkirel el ngosukau el mo er ngii a klaumerang er kau er a telbilel a Dios me a klischel a osobel el loeak a tengetengel a Jesus.—Josua 23:14; Rellir 4:12; 2 Timoteus 3:16, 17.

### OUCHAIS ER A KLEMERANG EL MO ER A RECHAD

<sup>8</sup> A klaumerang sel lemukeroul er a chelsel a rengum, e ngmo meringel er kau el lorreked er ngii el di kirem. (Jeremia 20:9) Ke mo melechesuar er a klou el klemeriarreng er kau el soam el mo ouchais er a rebebil el kirel a Dios me a moktek er ngii.—2 Korinth 4:13.

<sup>9</sup> Ngsebechem el ouchais er a klemerang er a Biblia

---

7. A omesuub el kirel a Biblia ngngerang rullii el eko er kau?

8. Ngera rullau el mo soam el ouchais er a rebebil a tekoi el bla msuub?

9, 10. (a) Ngsebechem el omuchel el ouchais a klemerang el mo er a reua techang? (b) Ngera kirem el meruul er ngii a lsoam el mo teloi er a uleketmokl el ureor er a berkel a klumech el loruul er ngii a Resioning er a Jehovah?

el mosuub sel mongedecheduch er a rechedam, resechelim, retonari er kau me a rehad er a urerem. A lorael a taem el mei, e ngmo soam el mo teloi er a uleketmokl el ureor er a berkel a klumech el loruul er ngii a Resioning er a Jehovah. Seikid el taem, e mimokl el mesaod er ngii kau me ngike el mesuub el obengkem. A lsekum ke kora rredemelel tia el ureor er a berkel a klumech, e ngmo moterekokl a taem el kau me ngike el sensei er kau a mo mengedecheduch er a reterung er a remechuodel er a ongdibel.

<sup>10</sup> Tiang a dirrek el ngosukau el mo ungil el mendengelterir a rebibil er a remechuodel el klekar er a delebechel er a Dios. (Rellir 20:28; 1 Petrus 5:2, 3) A lsekum e te mesa el kmo ngbleketakl er a rengum e oumerang aike el uchetemel a osisechakl er a Biblia, me a blekerdelel a klengar er kau a oltirakl a omellach er a Dios, e mera el soam el mo ta er a Resioning er a Jehovah, e te mo subedau el kmo ngsebechem el mo teloi er tia el ureor er a berkel a klumech el ua ta er a dirkak el metecholb el chad el omerk er a ungil el chais.

<sup>11</sup> Me a lechub, e ngdirk kirem el mo melodech er a blekerdelel a klengar er kau me a bebil er a kse er kau er a uchei er a obo mteloi er a ureor er a berkel a klumech. Tiang a uldimukl er ngii a tekoi el murruul el dimlak a medengei. Me a uchei er a omolengit el mo ta er a dirkak el metecholb el chad el omerk er a klumech, e ngkirem el mo cheroid er a oberoed el klengit, el ua deleboes, cheltelaol er a rrom, me a usbechel a meknngit el kar.—1 Korinth 6:9, 10; Galatia 5:19-21.

---

11. Ngera el omelodech a kirir a rebibil el meruul er a uchei er a bo el sebechir el mo teloi er a ureor er a berkel a klumech?

## OBULT E MO CHEROID ER A DIMLA KLENGAR

<sup>12</sup> Ngar er ngii a lmuut el bebil er a bakes el kirem el melai er a uchei er a techolb. A Petrus a kmo: “Mi-sei e mobult er a kngtmiu e bo mchau a Dios.” (Rellir 3: 19) A dobult e ngbelkul a kmo kede mera el ouuchel a rengud er a tekoi el durruul. A chad el kiliei el ngar er a deleboes a kirel el mo er a *bult*, me a chad el kiliei el kliiid a klengar er ngii me ngdirrek el ousbech el meruul el uaisei. E ngera uchul? E le rokui el chad a ngar er a klengit e ousbech er a klausubes er a Dios. (Rom 3: 23; 5:12) Uchei er a obo mosuub er a Biblia, e ngdimlak modengei el kmo ngngera soal a Dios, me ngulterekokl el dimlak el sebechem el kiei el cherrungel el oltirakl a soal. Sei a uchul me ngklou a ultutelel el bo er a bult.

<sup>13</sup> Uriul er a lebo er a bult a chad e ngkirel el *mo cheroid er aike el lurrul* e mo ‘chemau a Dios.’ Ngdiak di bo louuchel a rengum e lemerekong. Ngkirem el mo otngeliklii a dimla blekerdelel a klengar er kau e tibir a rengum el mo melemolem el meruul a llemalt er a chelecha el mong. Me a omobult e bo mcheroid er a mekngit el murruul a bebil er a bakes el kirem el melai er a uchei er a bo metecholb.

## MORUUL ER A TELBILEL A RENGUM

<sup>14</sup> Ngar er ngii a lmuut el ta er a klou a ultutelel el bakes el moruul er ngii er a uchei er a techolb. Ngkirem el *tibir a rengum* el mo er a Jehovah el Dios.

---

12. Ngera me ngklou a ultutelel a lebo er a bult a chad?

13. Ngerang a belkul a bo decheroid er aike el durruul?

14. Ngerang a klou a ultutelel el bakes el kirem el meruul er ngii er a uchei er a techolb?

<sup>15</sup> Sel moluluuch el rullii a telbilel a rengum el mo er a Jehovah, e ke iaksok el msang a cherrungel el blaker-reng er kau el mo cherechar. (Duteronomi 6:15) Engdi ngera me a chad a mo meruul er tiang? Ka me dedu el kmo ngngar er ngii a chad el mengetut er a redil el lolatk el mo bechil. Sel lorael el mo medengeliu ngii el redil e lomes a ungil el blekerdelel, e ngmengal mo soal, me ngulterekokl el mo melekoi a chebechiil er ngii. Me alta chebechiil a mo dochel a betok el ngerachel el kirel ngika el sechal, engdi ngbltikerreng a rullii el mo meruul er tia el klou a ultutelel el bakes.

<sup>16</sup> Sel bo modengeliu e bo el betik a rengum er a Jehovah, e ngmo soam el mesiou er ngii el mo er sel tkurrebab el sebechem. A ngii di el chad el soal el mo ol-tirakl er a Ngelekel a Dios, el Jesus Kristus, a kirel el 'choitii a klechad er ngii.' (Markus 8:34) Kede meruul er tiang el loeak sel doterekeklii el kmo a urunguled me a turrekong er kid a diak el bo el terebengid el olecholt a cherrungel el blekongesenges el mo er a Dios. Me a uchei er a techolb, e a omerellel a soal a Jehovah el Dios a kirel el mo kot el klou a ultutelel el tekoi er a klen-gar er kau.—1 Petrus 4:2.

## **BO MESISIICH ER A DEKTEM**

<sup>17</sup> A rebebil a omai er a rengrir a meruul a telbilel a rengrir el mo er a Jehovah e le te medakt el meruul er tia el kmal klou a ultutelel el bakes. Te locha bekikl er sel ngerachel el bo lobang e le tir el mla tibir a rengrir el mo er a Dios. Te medakt a bo lak el sebechir el lomo-

---

15, 16. Ngera belkul sel mrelii a telbilel a rengum el mo er a Dios, e ngera rullii a chad el mo meruul er tiang?

17. Ngera me a rebebil a omai er a rengrir el meruul a telbilel a rengrir el mo er a Dios?

lem a telbilel a rengrir e le kingtir a rengul a Jehovah, me te melatk el kmo ngbai ungil a lak loruul er a telbilel a rengrir.

<sup>18</sup> Sel lebo el betik a rengum er a Jehovah, e ngmo soam el rullii a telbilel a rengum e mo mesiou er ngii e mo er sel tkurrebab el sebechem el oltirakl er ngii el telbilel a rengum. (Olisechakl 5:4) A uriul er a omrellii a telbilel a rengum, e ngulterekokl el soam el mo “ngar el rodemii a rengul a Rubak, el meral odeuir a rengul.” (Kolose 1:10) A bltkil a rengum el mo er a Dios a uchul, e ngdiak bo momdasu el kmo ngmeringel a omoruul a soal. Ke ulterekokl el mo kongei a tekoi el lulluches a Johannes el kmo: “Tial tekoi el kmo, ngbetik a rengud ra Dios, a melekoi ra bo dolab a llechul. E ngiil llechul a diak le meringel.”—1 Johannes 5:3.

<sup>19</sup> Ngdiak el belkul a kmo ngkirem el mo cherrungel er a uchei er a omrellii a telbilel a rengum el mo er a Dios. A Jehovah a medengeli a telkelem e diak longerechir er kau el mo meruul a tekoi el engelakl er a sebechem. (Psalm 103:14) Ngsoal a obo mungil er aike el moruul e mo olengeseu er kau. (Isaia 41:10) Ngsebechel el mo ulterekokl a rengum el kmo a omoumerang el ultuil er a Jehovah er a rengum el rokir, e “ngii a mo ochotii er kau a melemalt el rael.”—Osisechakl 3:5, 6.

### **MOCHOTII A TELBILEL A RENGUM EL LOEAK A TECHOLB**

<sup>20</sup> Sel bo molebedebek aika el bla desaod, e

---

18. Ngerang a rullau el mo tibir a rengum el mo er a Jehovah?

19. Ngera me ngdiak el kirem el medakt el meruul er a telbilel a rengum el mo er a Dios?

20. Ngera me a telbilel a rengul a chad el mo er a Jehovah a diak el lolemolem el di tekingel a ta el chad?





*A ngeiul a mera el  
klemengei er a Tekingel a  
Dios a klou a ultutelel el  
bakes el kirel a techolb*

*A klaumerang a rullau  
el mo ouchais a moumerang  
el mo er a rechad*



ngsebechel el ngosukau el mo meruul er a telbilel a rengum el mo er a Jehovah el loeak a nglunguuch. A rokui el mera el betik a rengrir er a Dios a dirrek el kirir el mo 'olecholt ra ngerir e mosobel.' (Rom 10:10) Ngmerang a omoruul er tiang?

<sup>21</sup> Msbedii ngike el odam el omtebechel er a chelechad er a remechuodel er a ongdibel el omngar er ngii, er a uldesuem el soam el mo metecholb. E ngii


21, 22. Ke mekerang e 'olecholt ra ngerem' a klaumerang er kau?

a mo oterekekelterir a rebebil er a remechuodel el mo omelekl el obengkem a ker el kirel aike el uchetemel a osisechakl er a Biblia. A lsekum tir el mechuodel a kongei el kmo ke rredemelel, e te mo subedau el kmo ngebechem el mo metecholb er a ongingil el techall.\* A cheldecheduch el omelekl er a belkul a techolb a

\* A techolb a loruul er aike el meklou el ongdibel er a Resioning er a Jehovah er a bek el rak.

***Ke mla rullii a telbilel a  
rengum el mo er a  
Dios el loeak a  
nglunguuch?***

***A techolb a belkul a kmo  
a chad a mad el kirel a  
dimla blekerdelel a  
klengar er ngii e mo ngar  
el meruul a soal a Dios***



blechoel el ngar er ngii er seikid el taem. E seikid e ngike el oltobed er a cheldechoduch a mengemedaol er a rokui el mo metecholb el mo onger a teblo el beot el ker el ta er a roel e te 'olecholt ra ngerir' a klaumerang er tir.

<sup>22</sup> Ngtecholb seikid a mo ochotau el mo er a buai el kmo ke mla tibir a rengum el mo mesiou er a Jehovah e mla mo ta er a Sioning er ngii. Tirke el mo metecholb a moduleb a bedengir el rokir er a ralm el olecholt el kmo te tilib a rengir el mo mesiou er a Jehovah.

### **A BELKUL A TECHOLB EL OMNGUU**

<sup>23</sup> A Jesus a dilu el kmo a redisaiplo er ngii a mo metecholb el oba ngklel a Chedam me a Ngalek me a oureor el klisichel a Dios. (Matteus 28:19) Tiang a belkul a kmo a chad el mo metecholb a kongei er a omerredelel a Jehovah el Dios me a Jesus Kristus. (Psalm 83:18; Matteus 28:18) Ngdirrek el kongei er a usbechel me a urerel a oureor el klisichel a Dios.—Galatia 5:22, 23; 2 Petrus 1:21.

<sup>24</sup> A techolb a omtechei er a kmal klou a ultutelel el tekoi. Sel omoduleb er a cheungel a ralm e ngomtechei er a kmo ke mad el kirel a dimla blekerdelel a klengar er kau. E a omtetekerekl er a ralm e ngolecholt el kmo ke mocha ngar el meruul a soal a Dios. Molatk el kmo, a telbilel a rengum a mlo er a Jehovah el Dios, el dimlak el bo er a ureor, uldesuir a rechad, bebil er a

---

23. Ngera belkul a techolb el oba ngklel a Chedam me a Ngalek me a oureor el klisichel a Dios?

24, 25. (a) A techolb ngomtechei a ngerang? (b) Ngera el ker a kirel el mo monger?

rechad me a lechub e ngcheldebechel. A telbilel a rengum me a techolb a di uchelel a ungil el klausechelei er kau me a Dios.—Psalm 25:14.

<sup>25</sup> A techolb a diak el lolterekokl er a osobel. E le Jesus a dilu el kmo: “Ngdi ngikel outekangel el mo lmuut ra ullebongel a mosobel.” (Matteus 24:13) Me a techolb a di uchelel. A denguu a osobel el mla er a Dios e ngkired el ‘omekedelad er kid ra chelsel a bltikerreng ra Dios.’ (Judas 21) Tia ngngera belkul? Ngmekerang a domekedelad er kid er a chelsel a bltikerreng er a Dios? A ongingil el bliongel a mo meskid a nger er aikang.

#### AIKE EL LOLISECHAKL A BIBLIA

- A Rekristiano a bo lemetecholb e a bedengir el rokir a mo moduleb er a ralm el diak di loliim er tir.—Matteus 3:16.
- A bakes el kirel a techolb a omuchel er a omelai el klemedengei e mo olecholt er a klaumerang, el uriul er ngii e a chad a mo er a bult, e mo cheroid er a mekngit el luruul, e rullii a telbilel a rengul el mo er a Dios.—Johanes 17:3; Rellir 3:19; 18:8.
- A omoruul er a telbilel a rengum el mo er a Jehovah, e ngkirem el choitii a klechad er kau, el uai a rechad el chiloit a klechad er tir e mo oltirakl er a Jesus.—Markus 8:34.
- A techolb a omtechei er a chad el ua lemad el kirel a dimla klengar er ngii e bo lengar el meruul a soal a Dios.—1 Petrus 4:2.

## Molemolem el Ngar er a Bltikerreng er a Dios

**Ngera belkul a bo lebetik a rengud er a Dios?**

**Ngmekerang a dolemolem el ngar er a  
bltikerreng er a Dios?**

**A Jehovah ngua ngera lomekngeltengat er tirke el  
melemolem el ngar er a bltikerreng er ngii?**

*A Jehovah ngmo  
omertelem er  
aika el taem er  
a ses el eolt?*

MOLATK er kau el lekong meses a eolt e ke merael er a rael. A eanged a mocha che-delekelek, e ngar er ngii a bisebusech me a derumek, e ngii a ongmengmii a chull. Me ke orreched el osiik er a bo momdor er ngii. E a omomes er a bkul ngii el rael, e ke mesang a ungil el omderungel, el kora kmal mesisiich, e medidirt, el kmal ungil a obo er ngii. Ke ulterekokl el kmal dmeu a rengum el kirel!

<sup>2</sup> Kid a kiei el ua dengar er a ses el eolt. A blekeradel er a beluulechad a mekngit e mengal el merael el mo mekngit. Engdi ngngar er ngii a omderungel el sebechel el omerkerreu er kid er a tellemall. Tiang ngerang? Mutab a lolisechakl a Biblia el kmo: “[A chad] a sebechel dmu [er a Jehovah] el kmo, ‘Kau osebecheklek e klekerengek!

---

1, 2. Chelecha el sils e kede metik a ungil el omderungel er ker?

Kau a Dios er ngak; ak uumeral ulsirs er kau.'"—Psalm 91:2.

<sup>3</sup> Ka molebedebek er tiang! A Jehovah, el Ngike el Ulemeob e Oba Uldekial a Omerreder er a eanged me a chutem a sebechel el mo sebechekled. Ngsebechel el omekerreu er kid e le ngkuk mesisiich er a ngii di el techang me a lechub a ngii di el ngerang el me omtok er kid. Me a demetemall e ngsebechel el remuul el mo ungil a rokui el mekngit el dilubech el mei er kid. Kede mekerang e rullii el mo chosebechekled? Ngkired el otuil a klaumerang er kid er ngii. A Tekingel a Dios a dirrek el mengelechel el kmo: "Momekedelad er kemiu ra chelsel a bltikerreng ra Dios." (Judas 21) Nguaisei, ngkired el mele-molem er a klaubltikerreng er kid me a Demad el ngar er a eanged. Seikid e ngmo ulterekokl a rengud el kmo ngsebechekled. Engdi kede mekerang e sebeched el mekur a chouaisei el deleuill?

### **BO MOLECHESUAR E MONGER ER A BLTIKERRENG ER A DIOS**

<sup>4</sup> A dolemolem el ngar er a bltikerreng er a Dios, e ngkired el mo oba omereng el saul el kirel a ochotel a bltkil a rengul a Jehovah el mei er kid. Ka molebedebek a bebil er a osisecheklel a Biblia el bla msuub er tia el babier. A Jehovah el Ngike el Ulemeob, a milskid a beluulechad el mo delengchekled. Ngmilekekii er a obdois el kall me a ralm, kerruul el mengai er a lukel a klengar, bek el bedengel a charm, me a klebokel er a osenged el basio. A Dios, el mle uchul a omelecheselel a Biblia, a ullecholt er a ngklel me a blekerdelel el mei er kid. A Tekingel a dirrek el olecholt el kmo nguldureklii a Jesus el betik er a rengul el Ngelekel

---

3. Kede mekerang e rullii a Jehovah el mo chosebechekled?

4, 5. Ngera bebil er a rokel e a Jehovah a ullecholt er a bltikerreng el mei er kid?



el mei er a beluulechad, e mi-lecherei me ngmo chuarm e mad el kired. (Johanes 3:16) A chouaisei el sengk a meskid a omelatk er a ungil el klengar er a ngar er a medad.

<sup>5</sup> A omeltked er a ngar er a medad a dirrek el ultuil er a tekoi el rirellii a Jehovah el ngii a kabelment el ngar er a eanged, el Rengedel a Mesias. Ngdi kmedung e ngmo torob a rokui el ringel e mo rullii tia el chutem el mo paradis. Ka di molatk er tiang! Ngmo sebeched el kiei el ngar er a budech me a deurreng el mo cherechar. (Psalm 37:29) Engdi chelechang, e a Dios a mla meskid a ulekrael el kmo ngmekera dekiei el oltirakl er a kot el ungil el rokel a klengar. Ngmla meskid a sengk er a nglunguuch, el ngii a techall er a mimokl el cheldech duch el obengkel. Aikang a di bebil er aike el rokel e a Jehovah a olecholt er a bltikerreng er ngii el mei er a klechad me a derta el chad el uai kau.

<sup>6</sup> A klou a ultutelel el ker el kirem el mo melatk er ngii a kmo: Ngmekera kunger er a bltikerreng er a Jehovah? Te betok a mo kmo, "Ngkirek el di mo betik a renguk er a Jehovah." Kau me ke omdasu el uaisei? A Jesus a dilu el kmo tiaikid a kot el ngarbab er a rokui el llach el kmo: "Bo le betik a rengum er a Rubak el Dios er kau er a rengum el rokir, ma klengar er kau el rokir, ma uldesuem el rokir." (Matteus 22:37) Ngar er ngii a betok el uchul e ngmo betik a rengum er a Jehovah el Dios. Engdi sel *momdasu* el kmo ngngar er ngii a chouaisei el bltikerreng er kau, engdi seikid a omousbech er ngii el mo betik a rengum er a Jehovah er a rengum el rokir, klengar er kau el rokir, me a uldesuem el rokir?

---

6. Ngmekera monger er a bltikerreng er a Jehovah el eko er kau?

<sup>7</sup> El ua losaod a Biblia, a bltikerreng el mo er a Dios a diak el di luldasu. E le alta ngklou a ultutelel, engdi tiang a dirk uchelel sel mera el bltikerreng el bo dolechesuar el mo er ngii. Ngsebeched el omekesiu er ngii el ua tiang, a tane er a apol a klou a ultutelel el kirel a okedbechel tia el ourodech el kerrekar. Engdi a lsekum e ngsoam el menga apol, e ngulterekokl el diak el soam a di lebeskau a tane er ngii. Ngar er a osisiu el roel, a uldasu el kmo ngbetik a rengud er a Dios a dirk uchelel. A Biblia a olisechakl el kmo: “Tial tekoi el kmo, ngbetik a rengud ra Dios, a melekoi ra bo dolab a llechul. E ngiil llechul a diak le meringel.” (1 Johanes 5:3) Me a bo lemerang e a bltikerreng er kid el mo er a Dios a kirel el mo ourodech a ungil el rodech el mocholt el oak a omeruul.—Matteus 7:16-20.

<sup>8</sup> Kede olecholt a bltikerreng er kid el mo er a Dios

7. A uldesued el kmo ngbetik a rengud er a Dios, ngdi seikid a usbechall? Mosaod.

8, 9. Ngmekera dolecholt er a bltikerreng me a omereng el saul er kid el mo er a Dios?

***A bltikerreng er kau el mo er a Jehovah a ua ngau el kirem el olsiu er ngii me ngdi melemolem el kmard***





sel doltirakl a llechul e doltaut er a chelsel a klengar er kid. Ngdiak el sal meringel a doruul el uaisei, e le llechul a Jehovah a rruul el mo olengeseu er kid el mo kiei el dmeu a rengud e ungil a klengar er kid. (Isaia 48:17, 18) Sel dekiei el oltirakl a ulekrael er a Jehovah, e kede ochotii el mo er a Demad el ngar er a eanged el kmo kede mera el oba omereng el saul el mo er aike el bla el rruul el mei er kid. Ngklengiterreng e le te mekesai er a chelechang a olecholt a omereng el saul. Ngdiak el soad el mo diak doreng a saul, el ua rechad el kiliei er a taem el dirk el ngar tia el beluulechad a Jesus. A Jesus a ulemekungil er a reteruich el kemkom, engdi *ngdi mle ta* er tir a mlo oureng a sulel. (Lukas 17:12-17) Kede ulterekokl el soad el mo ua ngike el uleba omereng el saul, e diak el soad el mo uai tirke el tetiu!

<sup>9</sup> Me ngngera el llechul a Jehovah a kired el mo oltirakl? Kede mla suub a betok er ngii er a chelsel tia el babier, engdi hall e bo domelekl a bebil. A doltirakl a llechul a Dios e ngngosukid el mo melemolem el ngar er a bltikerreng er ngii.

### MLUUT EL MENGAL MO KMEED ER A JEHOVAH

<sup>10</sup> Omesuub el kirel a Jehovah a klou a ultutelel el bakes el olekeed er kid er ngii. A lengar er ngii a ngar er a kelekolt er rikel el mekerasem me ngmilseb er a ngau e ngmecherei ngii el ngau me ngmad? Ngdiak, nglocha bai di omelecha idungel me ngmelemolem el kmard e mekeald. Me ngua idungel el meruul er a ngau me ngdi kmard, e a “klemedengei er a Dios” a meruul er a bltikerreng er kid el mo er a Jehovah me ngdi mesisiich.—Osisechakl 2:1-5.

10. Msodii el kmo ngera me ngklou a ultutelel el dolemolem el melai a klemedengei el kirel a Jehovah el Dios.

<sup>11</sup> A Jesus a mle soal a rulebengkel a lolemolem a btikerreng er tir el mo er a Jehovah me a mekreos el Tekingel er a klemerang me di lengar el mesisiich el kmard. Uriul er a okisel, e ngullisechakl er a reteru er a redisaiplo er ngii a bebil er a ulaoch el ngar er a chelsel a Chuodel el Renged el tilaut er ngii. Me ngngera dilubech? Uriul e te dilu el kmo: "Sera longedecheduch er kid ra rael, me sera lole-daes a chedaol llechukl e ngkora kilard a rengud?" —Lukas 24:32.

<sup>12</sup> Sera omkot el mo medengei a mera el lolisechakl a Biblia, e ke ulterekokl el kmal mlo dmeu a rengum, e blak a rengum, e mlo betik a rengum er a Dios. Te betok a dirrek el mlo melechesiu el uaisei. Engdi a omelsemai er a chelechang a kmo, ngmekera e melemolem el mesisiich a btikerreng er kid e mekera dengesuir el mo mukeroul. Ngdiak el soad el oltirakl er a blekeradel er tia el beluulechad el lullekoi er ngii a Jesus el kmo: "Ngmo mekelekolt a btikerreng rar betok." (Matteus 24:12) Ke mekerang e a btikerreng er kau el mo er a Jehovah me a klemerang er a Biblia a diak el bo lemekelekolt?

<sup>13</sup> Molemolem el melai a klemedengei el kirel a Jehovah el Dios me a Jesus Kristus. (Johanes 17:3) Molebedebek aike el mosuub el ngar er a Biblia e di lekau el oker el kmo: "Tia ngngera ngosisecheklak el kirel a Jehovah el Dios? Ngera lmuut el bebil er a uchul el lebeskak el mo betik a renguk er Ngii el oba renguk el rokir, uldesuek el rokir, me a klengar er ngak el rokir?" (Psalm 77:12) A chouaisei el omelebedebek a rullii a btikerreng er kau el mo er a Jehovah me ngdi mesisiich el kmard.

---

11. A osisecheklel a Jesus ngera ngrirellii er a rulebengkel?

12, 13. (a) Ngua ngera bltkil a rengir a ruumesingd el chad er a chelechang el mo er a Dios me a Biblia? (b) Kede mekerang e a btikerreng er kid a diak el bo lemekelekolt?

<sup>14</sup> A ta er a roel e ngmongeseu a bltikerreng er kid el mo er a Jehovah me ngdi melemolem el kmard a oeak sel deblechoel el meluluuch. (1 Thesalonika 5:17) Ngar er a 17 el Bliongel, e kede silubii el kmo a nglunguuch a mekreos el sengk el mla er a Dios. Ngua deleuill er a rechad el mo mesisiich el oeak a mimokl el cheldecheduch er a delongelir, a deleuill er kid me a Jehovah a melemolem el mekereker sel deblechoel el meluluuch el mo er ngii. Ngklou a ultutelel a debechei a nglunguched me lak di bo el ua lebechachau el omelekoi el di domelekl el diak a mera el belkul. Ngkired el mengedecheduch er a Jehovah el ua ngalek a longedecheduch er a betik er a rengul el chedam. Ngsoad el mo mengedecheduch el oba omengull, engdi ngdirrek el kired el siojiki e mimokl el ouchais aike el ngar er a rengud. (Psalm 62:8) Nguaisei, a omesubed er a Biblia el di kid el tang me a nglunguuch el ngar er a rengud a meklou a ultutelel el telengtengil a omengull er kid, e ngosukid el mo melemolem el ngar er a chesel a bltikerreng er a Dios.

### **BO EL DEU A RENGUM EL NGAR ER A OMENGULL ER KAU**

<sup>15</sup> A omesubed er a Biblia el di kid el tang me a nglunguuch a roel a omengull el doruul el di kid. Engdi chelechang, e bo dosaod er a ta er a telengtengil a omengull el doruul er a buai: sel dongedecheduch er a rebebil el kirel a klaumerang er kid. Kau ngmla ta el moruul er tiang? A leuaisei, e ke ulterekokl el mle dmeu a rengum er tia el ungil el techall. Sel douchais a klemerang el bla desuub el kirel a Jehovah el Dios, e kede meruul er tia el kmal klou a ultutelel el ngerachel el mloterekokl er a rokui

---

14. Ngmekera nglunguuch e ngosukid el meruul er a bltikerreng er kid el mo er a Jehovah me ngdi mesisiich?

15, 16. Ngera me ngmelemalt a domes er a ureor er a berkel a klu-mech el kmo ngmekreos e techall el demlukngeltengat er ngii?

el mera el Kristiano, el ngii a berkel a ungil el chais er a Rengedel a Dios.—Matteus 24:14; 28:19, 20.

<sup>16</sup> A apostol el Paulus a ulemes er a omesiungel el kmal mle mekreos. (2 Korinth 4:7) Sel omongedecheduch er a rechad el kirel a Jehovah me a moktek er ngii sei a kot el ungil el ureor el sebechem el meruul er ngii. E le ke mesiou er a kot el ungil el Mastang, el sebechel el mo uchul a kot el ngarbab el klungiolem. Sel omteloi er tia el ureor, e ke olengeseu er a remelemalt a rengrir el mo olekeed er tir er a Demad el ngar er a eanged e mo merael er a rael el mo er a diak a ulebengelel el klengar! Ngera ngodech el odeu a rengud el ureor el ua tiang? Me a lmuut el tang, a omouchais el kirel a Jehovah me a Tekingel e ngkilungii a klaumerang er kau e smisichii a bltikerreng er kau el mo er ngii. Me a Jehovah a dmeu a rengul er aike el omoruul. (Hebru 6:10) Sel omechesang el meruul er a chouaisei el ureor e ke mongeseu el mo melemolem el ngar er a chel-sel a bltikerreng er a Dios.—1 Korinth 15:58.

<sup>17</sup> Ngklou a ultutelel a dolatk el kmo tia el ureor er a berkel a klumech a orechudel er a chelechang. E ngerang? A Tekingel a Dios a kmo: “A kloul sils er a RUBAK a kmedang, ng kmal kmeed me ng di mereched el mei.” (Sefania 1:14) Nguaisei, sel taem a kmal di mereched el mei sel lokngemedii tia el blekeradel er a beluulechad a Jehovah. Me ngkmal kired el mo mengelechel er a rechad! Ngkirir el mo medengei el kmo chelechang e ngmla mo taem el lolilt er a Jehovah el mo Merredelir. E le ulebongel a “diak bo le meoud.”—Habakuk 2:3.


<sup>18</sup> A Jehovah a soal a dongull er ngii el ngar er a buai

17. Ngera me a berkel a klumech a kmal orechudel er a chelecha el sils?

18. Ngera me ngkired el mengull er a Jehovah el ngar er a buai el teloi er a remera el Kristiano?

el teloi er a remera el Kristiano. A uchul me a Teki-  
ngel a kmo: “E bo de kasiich el omekses a bltikerreng  
ma ungil lomeruul, e lak de ua blekerdelir a bebil rar  
chad el mengoit chongdibel er kid, e bai de kache-

*A Jehovah a soal obo moldeu er  
a rengum er a “meral klengar.”  
Kau ke kongei er a okedongel?*



lechel, e domes er ngiil Sils lolekeed, me de mengal mo uaisei." (Hebru 10:24, 25) Sel dobengterir a rekldemed el ngar er a omengull er a ongdibel er a Rekristiano e ngmeskid a kmal ungil el techall el sebeched el mo mengebkall e mengull er a betik er a rengud el Demad. Kede dirrek el kateketek e kasisiich.

<sup>19</sup> Sel dobengterir a rebebil er a remesiungel a Jehovah, e kede smisichii a bltikerreng me a klausechelei er kid el ngar er a chelsel a ongdibel. Ngklou a ultutelel a domes a ungil el blekerdelir a rebebil, el uai a Jehovah el omes a ungil er kid. Lak momdasu el kmo a rekldemem er a klaumerang a mecherrungel. Molatk el kmo a rokui el chad a melasem el omekeroul er a ungil el deleuill er tir el obengkel a Dios, engdi ngkakerous a dauch er a okurulir. Ngdirrek el diak dobes el kmo a rokui el chad a mo er a cheleuid. (Kolose 3:13) Sel omolasem el omak a kmes el deleuill el obengterir tirke el betik a rengrir er a Jehovah, e ke mo melechesuar el kmo ke mukeroul el mo klou el chad er a Tekingel a Dios. Nguaisei, a omongull er a Jehovah el obengterir a rekldemem er a klaumerang e nnggosukau el mo melemolem el ngar er a chelsel a bltikerreng er a Dios. Ngmekera Jehovah a lomesterir a omeksullir tirke el blak a rengrir el mengull er ngii me te melemolem el ngar er a chelsel a bltikerreng er ngii?

### **MODERSAU EL MO MELAI ER A "MERAL KLENGAR"**

<sup>20</sup> A Jehovah a omesterir a omeksullir a reblak a rengrir el mesiungel a klengar, engdi ngua ngera el klengar? Kau ke mera el ngar er a chechang? Oumesingd er kid a medengei el kmo ngbleketakl a nger er tiang, e le kede outeliil, e mengang, e melim, me kede ultrerekokl el ngar.

---

19. Ngmekera doureor el melisiich er a bltikerreng er a chelsel a ongdibel er a Rekristiano?

20, 21. Ngera "meral klengar," e ngera me ngkmal ungil el omelatk?

Me sel sal dmeu a rengud, e ngsebeched el kmo, "Tiaikid a *mera* el klengar!" Engdi, a Biblia a ochotii a klou a ultutelel el tekoi el kmo ngdiak a chad er a chelechang el *mera* el ngar.

<sup>21</sup> A Tekingel a Dios a mengelechel er kid el mo "nguu a klengar, el meral klengar." (1 Timoteus 6:19) Aikang a ochotii el kmo a "meral klengar" a dolatk el mo nguu er a ngar er a medad el taem. Nguaisei, sel bo demecherrungel, e kede mo melechesuar er sel mera el belkul a tekoi el ngar, e le kede mocha kiei el oltirakl er sel mle mera el telbilel a Dios el kired. Me sel bocha dekiei el ngar er a paradis el chutem el cherrungel a klisichel a bedenged, e ngar er a budech, e dmeu a rengud, e seikid e kede mocha oldeu a rengud er a "meral klengar," el ngii a diak a ulebengelel el klengar. (1 Timoteus 6:12) Tiang diak el sal kmal ungil el omelatk?

<sup>22</sup> Kede mekerang e "nguu a klengar, el meral klengar"? Ngar er a osisiu el bades e a Paulus a milengelechel er a Reksritiano "me loruul a ungil" e "bo le merau ra ungil lurreor." (1 Timoteus 6:18) A leuaisei e ngbleketakl el kmo ngklou er ngii a ultuil er a bo doltaut a klemerang el bla desuub er a Biblia. A tekingel a Paulus a dimlak el belkul a kmo kede oureor el *mengereker* er tia el "meral klengar" el oak a omerelled er a ungil el ureor. E le tia el mengasireng el omelatk er a klengar el bo denguu a di ultuil er a "grazia ra Dios." (Rom 5:15) Engdi, a Jehovah a dmeu a rengul el lomesterir a omeksullir tirke el blak a rengrir el mesiou er ngii. Ngsoal el mesekau el mo kiei el oba "meral klengar." A chouaisei el ngar er ngii a deurreng er ngii e budech el diak a ulebengelel el klengar, a medechel er a ngar er a medad el kirir tirke el melemolem el ngar er a chsel a bltikerreng er a Dios.

---

22. Ke mekerang e "nguu a klengar, el meral klengar"?

<sup>23</sup> A derta me a derta er kid a sebeched el di kid el oker er kid el kmo, ‘Ngak ak mesiou er a Dios er sel rolel el lolecholt er ngii a Biblia?’ A dekerekikl el meruul er a nger er kid me di el choi er a bek el sils, e kede ngar er a melemalt el rael. Ngsbeched el mo ulterekokl a rengud el kmo a Jehovah a omerteled e mo omekerreu er a reblak a rengrir el chedal el mo engelakl er aika el mekngit el taem er tia el mekngit el blekeradel. Ngdirrek el mo osebelid el osisebid er a beches el blekeradel el di kmedang. Ngmera el mo dmeu a rengud er isei el taem! E ulterekokl el meral mo dmeu a rengud e le kede rirellii a melemalt el omelilt er a chelechang! A omoruul el uaisei e ke mo oldeu a rengum er a “meral klengar,” el klengar el diak a ulebengelel el oltirakl er sel telbilel a Jehovah el Dios!

23. Ngera me ngklou a ultutelel el dolemolem el ngar er a bltikerreng er a Dios?

#### AIKE EL LOLISECHAKL A BIBLIA

- Kede olecholt a mera el bltikerreng el mo er a Dios sel dolab a llechul e doltirakl a omellach el mla er a tekingel.—1 Johanes 5:3.
- A dosuub a Tekingel a Jehovah, e doluluuch el mo er ngii el mera el ngar er a rengud, e dolisechakl er a rebebil el kirel, e dongull er ngii el ngar er aike el miting er a Rekristiano, e kede mongeseu el mo melemolem el ngar er a chelsel a bltikerreng er a Dios.—Matteus 24:14; 28:19, 20; Johanes 17:3; 1 Thesalonika 5:17; Hebru 10:24, 25.
- Tirke el melemolem el ngar er a chelsel a bltikerreng er a Dios a ngar er ngii a omeltkir el mo oldeu a rengrir er a “meral klengar.” —1 Timoteus 6:12, 19; Judas 21.



# BEBIL ER A OMESODEL

---

SUOBEL	LLEL
A Belkul me a Usbechel a Chedaol el Ngklel a Dios . . . . .	225
Ngmilekerang a Ulochel a Daniel a Louchais er a Demiel a Messias . . . . .	228
A Jesus Kristus a Ngike el Mla er a Telbiil el Messias . . . . .	230
A Dios Ngdi Tang Me a Lechub e Te Tedei? . . . . .	232
Ngkirir a Rekristiano el Ousbech a Kerus er a Omengull er Tir? . . . . .	235
Chedaol el Blsoil er a Rubak —A Omengetmeklel a Mengebkall er a Dios . . . . .	236
Ngngar er Ngii a Kmung Ngerang el Tuobed er a Bedenged —E Melemolem el Ngar er a Uriul er a Kodall? . . . . .	239
Ngngerang a Sheol me a Hades? . . . . .	242
Ngngerang a Sils er a Kerrekeriil? . . . . .	244
1914—A Klou a Ultutelel el Rak er a Ulaoch er a Biblia . . . . .	247
Ngtecha Mihael el Bderrir a Rechanghel? . . . . .	250
A “Kloul Babilon” a Obeketakl . . . . .	251
A Jesus Ngmilechell er a Ongeteruich me a Ongeru el Buil? . . . . .	252
Ngkired el Mengull a Chedaol el Sils? . . . . .	254

## A Belkul me a Usbechel a Chedaol el Ngklel a Dios

NGAR er a oidel a Biblia el mousbech er ngii, e ngua ngerang a oidel a Psalm 83:18? A *New World Translation of the Holy Scriptures* a oleiuid er tia el bades el kmo: “Me a rechad bo lodengelkau el kmo a ngklem a Jehovah, e di kau el tang a Kot el Ngar er Bab er bebul a beluulechad el rokir.” Ngar er ngii a lmuut el bebil er a oidel a Biblia el dirrek el melekoi a osisiu el tekoi. Engdi, ngbetok a diak el lousbech er a ngakl el Jehovah, e omtechei er ngii er a dui el ua “Rubak” me a “Dios.” Me nngnera kirel ngar er a chelsel tia el bades? Ngdui me a lechub e nngakl el Jehovah?

Tia el bades a melekoi el kirel a ngakl. Ngar er a kot el tekoi er a Hebru el luluusbech el meluches er a klou el tedebchel a Biblia, e a ileakl el ngakl a luluusbech er ngii er tiang. A llecheklel a mle יהוה (YHWH) el llechukl er a Hebru. Ngar er a tekoi er a Merikel e tia el ngakl a mloiuid el mo “Jehovah.” Tia el ngakl kede metik er ngii er a di ta el bades er a Biblia? Ngdiak. Ngar er aike el kot el llechukl er a Hebru el Bades er a Chuodel el Renged e tia el ngakl a debetik er ngii el bekord el 7,000 el taem!

*Ngklel a Dios el  
llechukl er a Hebru*

Ngua ngera klungel a ultutelel a ngklel a Dios? Ka bo molebedebek er a kerebai el nglunguuch el lebilskid a Jesus Kristus. Ngomuchel el kmo: “A Demmam el ngara eanged, le mechedaol a ngklem.” (Matteus 6:9) Uriul, e a Jesus a milluluuch el mo er a Dios el kmo: “Chedam, mkebkellii a ngklem!” Me a longer er ngii e a Dios a mla er a eanged e kmo, “Ak mla kobkellii, e lmuut el mo kobkellii.” (Johanes 12:28) Me ngbleketakl el kmo a ngklel a Dios a kmal klou a ultutelel. Me nngnera me a rebibil er a ruleiuid a babier a omtechei er a ngklel a Dios er a chelsel a Biblia er tir el lolab a dui?

Ngua lengar er ngii a teblo el uchul. A kot e te betok a melekoi el kmo tia el ngakl a diak el kired el ousbech er ngii e le

kot el omengiuvel a diak a medengeli. A tekoi er a Hebru er a irechar a lulluches el dimlak lousbech a omechelel a tekoi el ua a,e,i,o,u. Sei a uchul me ngdiak a chad er a chelechang el sebechel el ulterekokl el melekoi el kmo ngua ngerang a omengiuvel a YHWH. Engdi, a chouaisei el tekoi ngkirel el torebengid me ngmo diak dousbech er a ngklel a Dios? Ngar er a taem er a omelecheselel a Biblia, e tia el ngakl el Jesus a locha lulenguui er ngii el Yeshua me a lechub e ngmle Yehoshua el dirrek el diak a medengeli a ulterekokl el omengiuvel er a chelechang. Engdi a beluulechad el rokir a ousbech a kakerous el omengiuvel tia el ngakl el oltirakl a omelekingir. Alta ngdiak lodengeli a mera el omengiuvel er a kot el dart el rak, engdi ngdiak lomai er a rengrir el lousbech er ngii. Me ngdi osisiu, kau sel obo er a ta er a beluu e ngsebechem el mesa el kmo a omengiuir a rechad er a ngklem a telkib el ngodech el oltirakl a omelekingir. Me a tekoi el kmo ngdiak dodengeli a omengiuvel a ngklel a Dios er a irechar a diak el kirel el mo uchul me lak dousbech er ngii el ngakl.

A ongeru el uchul me a rechad a oltobed er a ngklel a Dios er a chelsel a Biblia er tir a oltirakl er a mle siukang er a Rechijudea er a kemanget el taem. Ngbetok er tir a millekoi el kmo ngkmal diak el kirel medung er a ngered a ngklel a Dios. Tia el klaumerang a mle ultuil er a cheleuid el otutel a llach el ngar er a Biblia el kmo: “Lak morrekakl er a ngklel a Jehovah el Dios er kau, e le Jehovah a ulterekokl el mo omals er ngike el merrekakl er a ngklel.”—Exodus 20:7, NW.

Tia el llach a ullekebai er a omerrekakl er a ngklel a Dios. Engdi ngullekebai er a usbechel el ngar er a omengull? Ngdiak. A remilluches er a Biblia el Tekoi er a Hebru (“Chuo-del el Testament”) a rokui el mle blak a rengrir el chad el kiliei el oltirakl a Llechul a Dios el lebilsterir a Rengalek er a Israel er a irechar. Engdi te mle blechoel el ousbech er a ngklel a Dios. El ua tiang, te uluusbech er ngii er a chelsel a betok el chelital el lulengitakl el dmak el ngar er a chelsel a omengull er tir. A Jehovah el Dios a dirrek el dilu er a remengull er ngii el mo omekedong er a ngklel, me a reblak a rengrir el mesiu-ngel a ullengesenges er tiang. (Psalm 148:5, 13; Rellir 2:21) Me

a Rekristiano er a chelechang a diak lomai er a rengrir el loeak a omengull e te ousbech er a ngklel a Dios el ua lurrual a Jesus.—Johanes 17:26.

Sera lutechir a ngklel a Dios el lolab a dui, e a ruleiuid er a Biblia a rirellii a kmal klou el cheleuid el tekoi. A Biblia a melisiich er a rechad el mo “ousechelei” er a Jehovah, engdi te mla rullii el kmal cheridang el dikea sebechel el mo kmeed er ngii. (Psalm 25:14) Ka molatk er a kmal ungil el sechelim. Ngua ngera kesengel a deleuill er kemiu a lemlak bo mode-ngelii a ngklel? Me ngdi osisiu, a lsekum a rechad a diak bo lodengellii a ngklel a Dios el Jehovah, e te mekera e mera el mo kmeed er ngii? Me a lmuut el tang, a lak lousbech er a ngklel a Dios, e ngdiak a klemedengei er tir er sel mengasireng el belkul. Tia el chedaol el ngklel a Dios ngngera belkul?

A Dios a di mle ngii el smodii a belkul a ngklel el mo er a blak a rengul el mesiungel er a Moses. A Moses er a loker er a ngklel a Dios, e a Jehovah a ulenger el kmo: “Ngak a Ngak.” (Exodus 3:14) A Rotherham el oidel a Biblia a uleiuid aika el tekoi el kmo: “Ak mo ngii di el techang el soak el mo ngii.” Me a Jehovah a sebechel el mo ngii di el techang el usbechall el mo oltaut a moktek er ngii.

A lsebechem el mo ngii di el chad el soam, e ngngera ke mo rullii el kirir a resechelim? A bo el secher a tang, e ngsebechem el mo toktang e omekungil er ngii. Me a lsekum ngmla er ngii a chebuul er a udoud, e ke mo merau el chad e ngosuir. Engdi a klemerang a kmo ngdi klebechel a sebechem el remuul. A omolemolem el mesuub er a Biblia, e ngmo mechas a rengum el kmo ngmekerang a Jehovah a *lebo lengii di lechad* el usbechall el mo oltaut a telbilel. E dmeu a rengul el ousbech er a klisichel el kirir a rebetik a rengrir er ngii. (2 Kronika 16:9) Aikaikid el klebekelel a omerellel a Jehovah a diak lutab a rechad el diak lodengellii a ngklel.

Ngbleketakl tia el ngakl el Jehovah el kirel el ngar er a Biblia. Me a dodengellii a belkul e dousbech er ngii er a omengull e kede mongeseu el mo kmeed er a Demad el ngar er a eanged el Jehovah.

## Ngmilekerang a Ulochel a Daniel a Louchais er a Demiel a Messias

A PROFET el Daniel a kiliei er a betok er a 500 el rak er a uchei er a cherellel a Jesus. Me nguaisei, engdi a Jehovah a uluu-chais er a Daniel a tekoi el rullii me ngmo beot a bo lolangch er a taem el lebo lemucheluch a Jesus me a lechub e ngmo mengilt el Messias me a lechub e ng Kristus. Ngmildung el mo er a Daniel el kmo: "Mutebengii tiang e bo modengelii. Sel taem el le tobéd a tekoi el bo lluut el meteketek a Jerusa-

### "EUID EL 70 EL RAK"

490 el rak

7 el sandei  
(49 el rak)

62 el sandei  
(434 el rak)

1 el sandei  
(7 el rak)

455

406

◀ B.C.E. | C.E. ▶

29

33

36

"A tekoi  
el lmuut el mo  
omekedechor  
... er a Jerusalem"



Jerusalem a lmuut el  
obekedechor



A Messias a  
me duum



A Messias a  
"mokoat"



Ulebengelel  
a "euid el  
70 el rak"



lem el mor sel le mei ngiil ngellitel er a Dios el merreder e ng mo 49 el rak. A Jerusalem a lmuut el mo meteketek el mor ngii a rael ma mesisiich el cheuatel, el mo dechor el 434 el rak.”—Daniel 9:25.

A bo dodengei el kmo ngoingerang e ngmei a Messias, e a kot e ngkired el mo medengei el kmo ngoingerang e kede omuchel el omechur. A doltirakl er a ulaoch, e ngomuchel er “sel taem el le tobbed a tekoi el bo lluut el meteketek a Jerusalem.” Tia el tekoi ngtilobed er a oingerang? A doltirakl a ledilung a Nehemia el ta er a remilluches er a Biblia, e a te-koi el tilobed el kirel a cheuatel er a Jerusalem el lmuut el mo obekedechor a mlo er ngii er “sel buil el Nisan, er a chel-sel ongelluich er a rak er a le king a Artakserses.” (Nehemia 2:1, 5-8) A rechad er a reksi a oterekeklii el kmo a rak er a 474 B.C.E.\* a mle kot el rak er a Artakserses el mengedereder el ua king. Me a leuaisei, e a ongelluich el rak er ngii er a ome-ngedereder a mle rak er a 455 B.C.E. Me chelechang e kede mla mo medengeliu a uchelel a taem er a ulochel a Daniel el kirel a demiel a Messias el kmo ngmle rak er a 455 B.C.E.

A Daniel a uluuchais el kmo ngmo ua klteketel a ngerang el taem a engelakl e ngmereku Messias el ngike el Merredel. A ulaoch a melekoi el kirel a “49 el rak” me a dirrek el “434 el rak,” el uldekial a 483 el rak.

Me a di kired el meruul er ngii er a chelechang a omechur. A domuchel er a rak er a 455 B.C.E. e domechur el 483 el rake kede mo tmurk er a rak er a 29 C.E. Tia sel rak el lemiltecholb a Jesus e mlo Messias!# (Lukas 3:1, 2, 21, 22) Tiang diak el sal mengasireng el otutel a ulaoch er a Biblia?

---

\* A [C.E.] el blingelel a taem er a reksi a omuchel er a kot el rak el mei er a chelecha el taem er kid, e a [B.C.E.] el blingelel a taem er a reksi a kuk ulemuchel er a kot el rak e merael el mo tmurk er a uchelel a klechad.

# Ngar er a rak er a 455 B.C.E. el mo er a 1 B.C.E. e ngngar er ngii a 454 el rak. E ngar er a 1 B.C.E. el mo er a 1 C.E. e ngngar er ngii a 1 el rak. E ngar er a 1 C.E. el mo er a 29 C.E. e ngngar er ngii a 28 el rak. Me a uldekial aika el kldei el ochur (454+1+28) a 483 el rak. A Jesus a mlo “mokoad” er a 33 C.E. el ngii a mle melengel sel mong me ng “euid el 70 el rak.”—Daniel 9:24, 26.

## A Jesus Kristus a Ngike el Mla er a Telbiil el Messias

---

A LOLENGESEU er kid el mo dongchii a Messias, e a Jehovah el Dios a ulemekrael el okiu a oureor el klisichel a betok el ulaoch er a Biblia el mo omeskid a komakai el omesodel a tekoi el kirel a cherellel, omesiungel, me a kodellel ngika el mla er a telbiil el me Olsobel er kid. Ngii el rokui el ulaoch er a Biblia a mlotaut er a Jesus Kristus, el kmal mle mengasireng a otutel el melemalt e komakai. A domekesiu er tiang, e me bo domes a bebil er a ulaoch el mildung el kirel a cherellel a Messias me a klengar er ngii er a lengalek.

A profet el Isaia a dilu el kmo a Messias a mei el lokiu a klengelakel er a King el David. (Isaia 9:7) A Jesus a mera el mlechell el uleak a uldidellel a rasech er a David.—Matteus 1:1, 6-17.

A Mika el ta er a profet er a Dios a ulemlaoch el kirel a ngalek el uriul e ngmo mengederedel el ngii a mo mechell er a “Bethlehem el Efrata.” (Mika 5:2) Sel taem er a cherellel a Jesus, e ngmla er ngii a teblo el beluu er a Israel el uluungakl er a Bethlehem. A ta er ngii a mla er a bita er a Nazareth el ngar er aike el chutem er a diluches e a tang a mla er a bita er a Jerusalem er a Judah. Sel Bethlehem el mle kmeed er a Jerusalem a mle okedongall er a uchei el kmo Efrata. Me a Jesus a milechell er isei el beluu el ua mildung er a ulaoch!—Matteus 2:1.

A lmuut el ta er a ulaoch er a Biblia a ouchais el kirel a Ngelekel a Dios el kmo ngmo mokedong el tuobed er a Egipten. A Jesus er a ltolechoi e te ngiluu el mo er a beluu er a Egipten. Uriul er a kodellel a Herodes e te ngiluu el lmuut el me remei, me ngmlotaut a ulaoch el mildung.—Hosea 11:1; Matteus 2:15.

Ngar er a *chart* el ngar er a 231 el llel, e aike el bades el beldukl er a cheungel a dai el kmo “Ulaoch” a ngar er ngii a komakai el tekoi el mildung el kirel a Messias. Moutekangel el omekesiu aikang ngii me aike el bades el beldukl er a cheungel a dai el kmo “Otutel.” A omoruul el uaisei e nglmuut el smisichii a klaumerang er kau er a klemerang el Tekingel a Dios.

## ULAOCH EL KIREL A MESSIAS

<b>TEKOI EL DILUBECH</b>	<b>ULAOCH</b>	<b>OTUTEL</b>
Mlechell er a kebliil er a Judah	Genesis 49:9, 10	Lukas 3:23-33
Mlechell er a klikiid el ekebil	Isaia 7:14	Matteus 1:18-25
Ngar er a klengelakel er a King el David	Isaia 9:7	Matteus 1:1, 6-17
A Jehovah a dilu el kmo Ngngelakel	Psalms 2:7	Matteus 3:17
Betok el chad a dimlak el loumerang er ngii	Isaia 53:1	Johanes 12:37, 38
Ngsiliseb er a Jerusalem el ngar er a ngelekel a roba	Sekaria 9:9	Matteus 21:1-9
Mloterau er a chad el mle kmeed er ngii	Psalms 41:9	Johanes 13:18, 21-30
Mloterau el kirel a 30 el silber el udoud	Sekaria 11:12	Matteus 26:14-16
Ngdi Imuk er a mederir a rultelechakl er ngii	Isaia 53:7	Matteus 27:11-14
Te milsa vinegar	Psalms 69:21	Markus 15:23, 36
Milrus	Isaia 53:5	Johanes 19:34, 37
Ngdiak a chiusesel el mecham	Psalms 34:20	Johanes 19:33, 36
Mildakl el teloi er a remerau	Isaia 53:9	Matteus 27:57-60
Mlokiis er a kodall	Psalms 16:10	Rellir 2:24, 27
Mlekebkall el mo er a kidekmel a Dios	Psalms 110:1	Rellir 7:56

Sel momes aika el bades e molatk el kmo aike el ulaoch a milluches er a betok el dart el rak er a uchei er a cherellel a Jesus. A Jesus a dilu el kmo: “Ngulterekokl mo tmaut a bek el tekoii el llechukl el kirek el ngara llach ra Moses ma llechukl rar profet ma psalm.” (Lukas 24:44) Me sel obeketeklii el loeak a Biblia er kau, e ke mo mesang el kmo ngtilaut aike el rokui el komakai el tekoii el mildung er a ulaoch el kirel!



## A Dios Ngdi Tang Me a Lechub e Te Tedei?

---

A RECHAD el loumerang er a Trinidad a melekoi el kmo a Chedam, me a Ngalek, me a Chedaol el Reng a di ta el Dios. Aika el kidei el chelechad a ledu el kmo ngdi tasemul a rokui el tekoi er tir, el ta klisichir, e rokui el dimlak a uchelir. A doltirakl er tia el osisechakl er a Trinidad, e a Chedam a Dios me a Ngalek me ngDios me a Chedaol el Reng me ngDios. Tir el tedei a di ta el Dios.

Te betok el loumerang er tia el losisechakl er a Trinidad a kongei el kmo ngdiak el sebechir el mesaod er ngii. Engdi te locha dirk melatk el kmo ngmlengai er a Biblia. Ngutebengall el kmo tia el tekoi el “Trinidad” a diak debetik er ngii er a chelsel a Biblia. Engdi a uldasu el kirel ngsebeched el metik er ngii er a chelsel? A bo donger er tiang, e me bo domes er a ta er a bades el betok el chad a melekoi el kmo ngmelisiich er a Trinidad.

### “A TEKOI A MLE DIOS”

A Johanes 1:1 a kmo: “A Tekoi a mlarngii ra uchelel, ma Tekoi a ulebengkel a Dios, ma Tekoi a mle Dios.” Ngar er a osisiu el bliongel er a uriul, e a apostol el Johanes a milketeklii el kmo a “Tekoi” a Jesus. (Johanes 1:14) Engdi ngii el Tekoi a okedongall el Dios a uchul me a rebebil a omdasu el kmo a Ngalek me a Chedam a dul tedebechel a chelechad er a ta el Dios.

Molatk el kmo tiaikid el tedebechel a Biblia a mle kot el meluches el ngar er a tekoi er a Grik. Uriul e a ruleiuid a ulemult aika el llechukl el tekoi er a Grik el mo er a bebil er a omelekoi. Engdi te betok el oleiuid a Biblia a dimlak el lousbech er a tekoi el ‘a Tekoi a mle Dios.’ E ngerang? Ngoeak a klemedengei er tir er a tekoi er a Grik el luluusbech er a omelecheselel a Biblia, e te miltebengii el kmo sel tekoi el “Tekoi a mle Dios” a mle kirel el moiuid el ngar er a kuk ta er a rolet. El ua ngerang? Aikakid a bebil er a olechotel: “A Logos [Tekoi] a mle ngar er a teletelel a kledios.” (*A New Translation of the Bible*) “A Tekoi a ulebengkel a Dios e mle ua teletelel a Dios.” (*The Translator’s New Testament*) A doltirakl aika el oidel a Biblia, e a Tekoi a diak el ngii a Dios. Engdi a ngarbab el deruchellel er a delongelir a reblebelel a Jehovah a uchul me ngmokedong el ua ta er a dios, el belkul a kmo ngolab a klisiich.

## BO MODENGEI A LMUUT EL BETOK EL TEKOI

Oumesingd el chad a diak lodengei a tekoi er a Grik el luluus-bech er a omelechesele a Biblia. Me ke mekerang e mo medengei a mle belkul a tekingel a apostol el Johanes? Ka molatk er tia el oke-siu: A sensei er a skuul a smodii a suobel el mo er a rengalek er a skuul. Uriul e tir el ngalek a mo kerous a omesodir er ngii el tekoi. Me te mekerang e sumechokl a klemedengei er tir? Ngsebechir el olengit er ngike el sensei el kirel a lmuut el bebil er a omesodel. Ngulterekokl el lesuub a lmuut el bebil er a tekoi el kirel e te mongeseu el mo bleketakl er a rengrir sel suobel. Me ngosisiu, a obo mungil el medengeli a belkul a Johanes 1:1, e momes er a Evangkelio er a Johanes el kirel a lmuut el bebil er a omesodel a deruchellel a Jesus. A omosuub a betok el tekoi el kirel tia el suobel e ke mongeseu el mo oba melemalt el uldasu.

El ua tiang, ka momtab a lulluches a Johanes er a 1 el bli-  
ngel er a 18 el kekerei el bades el kmo: “Ngdirekak a chad el mla mesa Dios.” Engdi te mla mesa Jesus, el Ngalek, e le Johanes a kmo: “Ma Tekoi a mlo chad e kiliei era delongeled, me kede miles a klebkellet.” (Johanes 1:14) Me ngmekera Ngalek e mo te-debechel a chelechad er Ngike el Chimong el Kedidai el Dios? A Johanes a dirrek el millekoi el kmo a Tekoi a “*ulebengkel* a Dios.” Ngmekerang e sebechel a chad el *lobengkel* a ta er a chad e a osisiu el taem e *ngngii* el chad? Ngar er a Johanes 17:3, e a Jesus a mle bleketakl el olecholt er a klekakerous er ngii me a Demal el ngar er a eanged er a lomekedong er ngii el kmo ng “dital meral Dios.” Ngar er a ulebengelel a Evangkelio er ngii e a Johanes a kmo: “E a ikal tekoi el lluches a kirel me bo moumerang el kmo a Jesus ngiil Kristus, el Ngelekel a Dios, me ko moumerang e oba ngklel el nguu a klengar.” (Johanes 20:31) Mutebengii el kmo a Jesus a dimlak el mokedong el kmo Dios, e ngbai Ngelekel a Dios. Aikaikid el lmuut el bebil er a tekoi el lebeskid a Evangkelio er a Johanes a kirel el meketeklii a klemedengei er kid el kirel a Johanes 1:1. Me a Jesus, a ta er a dios e le ngii el oba kmal ngarbab el deruchall engdi ngdiak el losisiu ngii me a Chimong el Kedidai el Dios.

## MOTEREKOKL A TEKOI EL MOUMERANG

Ka mluut el mo dobedebekii sel kerebil a sensei me a rengalek er a skuul. Omko uriul er a lorrengeles a lmuut el bebil er a omesodel ngii el sensei e ngdirk mla er ngii a rebebil el dirk

uluumededenger er a suobel, e ngungil el lokerang? Ngsebechir el kuk mo oker er a ta er a sensei el kirel a lmuut el bebil er a omesodel sel suobel. E sel sekum a omesodel ngike el ongerung el sensei a di osisiu ngii me a ngike el kot, e a klaumededenger er a rengalek er a skuul a mocha diak. Me ngosisiu, a lsekum ngdiak el ulterekokl a rengum er a tekoi el lulluches a Johannes el kirel a deleuill er a Jesus me Ngike el Chimong el Kedidai el Dios, e ngsebechem el mo omes aike el kuk lulluches a rebibil er a rechad el milluches er a Biblia. El ua tiang, ka molatk aike el lulluches a Matteus. Ngmilluches a tekoi el lullekoi a Jesus el kirel a ulebengelel tia el blekeradel er a beluulechad er a ledu el kmo: “Ngdiak a medengeli sel sils malechub e ngsikang, el ka le anghel ra eanged, ma ka le ngiil Ngalek, ngdi Chedam a medengeli.” (Matteus 24:36) Aika ngmekerang e meketeklii el kmo a Jesus a diak el Ngike el Chimong el Kedidai el Dios?

A Jesus a melekoi el kmo a Chedam a kuk medengei a betok el tekoi er a Ngalek. Engdi a lsekum ngosisiu a chelechad er ngii me a Chimong el Kedidai el Dios, e ngulterekokl el medengei a rokui el tekoi el ble lodengei a Demal. Me a Ngalek me a Demal a diak el di losisiu. Engdi te ngar er ngii a remo melekoi el kmo a ‘Jesus a mle eru teletelel a chelechad er ngii. Ngar er tiang e ngmengencheduch el ua chad.’ Me a omko ngmera el mle uaisei, engdi ngkuk mekerang a chedaol el reng?\*

A lsekum ngosisiu el chelechad ngii me a Dios el Chedam, e ngera me a Jesus a dimlak lolekoi el kirel el kmo ngmedengei aike el tekoi el ble lodengei a Chedam?

Sel omolemolem a omesubem er a Biblia e ke mo medengei a betok el bades el ngar er ngii a tekoi el lolekoi el mo kirel tia el suobel. Aika el bades er a Biblia a mo meketeklii el kmo a Dios a diak el tedei el chad. Ngmo sebechem el mo medengeli a klemerang el kirel a Chedam, me a Ngalek, me a oureor el klisichel a Dios. —Psalm 90:2; Rellir 7:55; Kolose 1:15.

---

\* A Biblia el tekoi er a Belau a ousbech er a tekoi el “Chedaol Reng” el melutk el mo er a chad. A rebetok el chad a dirrek el oumerang el kmo a “reng” a kmung ngerang el melelemolem el ngar er a uriul er a kodall. Engdi a Dios a diak a “reng” er ngii, e sel di mla tekoi er a Hebru el luluusbech er ngii a belkul a kmo “telil” me a lechub e ng “klisiich.” A Dios a ousbech er tia el klisiich el mo oltaut aike el soal. (Momes er a Psalm 104:30; Genesis 1:2, footnote) Tia el “telil” a diak el Dios. Ngbai, oureor el klisichel a Dios el lousbech er ngii el mo oltaut a moktek er ngii.

## Ngkirir a Rekristiano el Ousbech a Kerus er a Omengull er Tir?

---

TE BETOK el miliol el chad a sorir el mengull a kerus. A *The Encyclopædia Britannica* a omekedong a kerus el kmo “ngkot el klou a ultutelel el olengchelel a klechelid er a Rekristiano.” Me nguaisei, engdi ngdi ungil er a Rekristiano a lousbech a kerus er a omengull er tir?

A klou a ultutelel el uchul a kmo a Jesus Kristus a dimlak el mad er a kerus. A tekoi er a Grik el lulleiuid er ngii el mo “kerus” a *stau-ros’* el melekoi el kirel a “dechor el melemalt el kerrekar.” A *The Companion Bible* a kmo: “[A *stau-ros’*] a diak el ta el lolekoi el kirel a teblo el kerrekar el kabutang er a ngii di el teletael . . . Ngdiak a ngii di el tekoi er a Grik el ngar er a [Beches el Testament] el melutk el kirel a teblo el kerrekar.”

Ngar er a bebil er a bades, e a remilluches er a Biblia a uluusbech er a kuk ta er a tekoi el melutk el kirel sel klalo el luluusbech er ngii el lomekoad er a Jesus. Te uluusbech er a tekoi er a Grik el *xy’lon*. (Rellir 5:30; 10:39; 13:29; Galatia 3:13; 1 Petrus 2:24) Tia el tekoi a melutk el kirel a “kerrekar el tang, idungel” me a lechub e ng “kerrekar el skors, chelebed, sums, ututk” me a lechub e ng “dellomel el kerrekar.”

Me a losaod er a uchul me ngkmal di mle beot a teletelel el kerrekar a luluusbech el kirel a okodellir a rechad, e a babier el *Das Kreuz und die Kreuzigung* (A Kerus Me a Omengerus), el lulluches er ngii a Hermann Fulda a kmo: “Ngdimlak a kerrekar er aike el basio el mlenngilt el kirir a rukodall el osongel er a buai. Me te di ulengeltii a teluo el kerrekar er a chelsel a chutem. E a redengerenger el chad, a mle blechoel el luleldars a chimorir el bedul bab me a ocherir me ngmle dmak el rrengodel me a lechub e ngdeleel el mo er sel kerrekar.”

Engdi sel kot el ngarbab el omesaod el lomeketakl er tiang a ngar er a Tekingel a Dios. A apostol el Paulus a kmo: “E a Kristus a mlo delebeakl el kired, me ngngilbetid ra dellebeklel a llach-le ngellechukl el kmo, ‘Tirikel rokui el kltekotel ra kerrekar a medebeakl.’” (Galatia 3:13) Ngar tiang e ngmillekoi a tekoi el ngar er a Duteronomi 21:22, 23 el mle bleketakl el melutk er a teluo el kerrekar, el diak el kerus. Tia el roel a blals el kirel a kodall a rirellii a chad el mo ‘delebeakl’ me ngdiak lemelemalt a lsekum a Rekristiano a omesiich a blirir el lolab a bleob er a Jesus el deleel er a kerrekar.

Ngdiak a olechotel a kmo aike el kot el 300 el rak er a uriul er a kodellel a Jesus e a rechad el melekoi el kmo te Kristiano a uluusbech a kerus er a chesl el omengull er tir. Engdi sera ongeua el dart el rak, e a milengulla a klsuul el chelid el Emperor el Constantine a ulebult el mo chedal a ongdibel er a Rekristiano engdi ngmillemoem el olab a osisechakl el omtok er a Biblia e mlo melisiich er a kerus el mo olengchelir. Me a ngii di el teko el blo loleko a Constantine el melisiich er tiang, me ngii a di mle bleketakl a kerus el dimlak a ngera el chesechesemel el mo er a Jesus Kristus. E le mera er ngii a kerus a mlengai a uchelel er a klsuul el klechelid. A *New Catholic Encyclopedia* a kongei el kmo: "A kerus a debetik er ngii er a omengull er a uchei er a taem er a Rekristiano me a dirrek el siukang er a rechad el dimlak el Kristiano." Ngar er ngii a relmuut el betok el chellimosk er a omesubel a omengull er a rechad el melekoi el kmo a kerus a ulech er a teko er a omengull er a sils me aike el ungil el klebesei el kirel a chelid er a cheroll er a irechar.

Me nngera me tia el olengchelir a rechad er a klsuul el chelid a blo lolisiich er ngii e ousbech er ngii? Me bo el beot er a remengull a klsuul el chelid el mo kongei er a "Klekristiano." Me nguaisei, engdi a blakerreng el mo er a ngii di el olengchelel a klsuul el klechelid a bleketakl el lomtok er a Biblia. (2 Korinth 6:14-18) A Bades a dirrek el lolekebai a ngii di el bedengel a omengull el bleob. (Exodus 20:4, 5; 1 Korinth 10:14) Me nngar er ngii a kmal ungil el uchul me a remera el Kristiano a diak el lousbech a kerus er a chesl el omengull er tir.

## **Chedaol el Blsoil er a Rubak —A Omengetmeklel a Mengebkall er a Dios**

A REKRISTIANO a lulellach er tir el mo meruul er a Omekltkir er a kodelel a Kristus. Tiang a dirrek el okedongall el "blsoil ra Rubak." (1 Korinth 11:20) Ngua ngera



klungel a ultutelel? Ngoingerang e mekerang a longetmocl er ngii?

A Jesus Kristus a milechelii a omengetmeklel tiang er sel ke-sus er a Baskua er a Rechijudea er a rak er a 33. A Baskua a mle chedaol el sils el lulengetmocl er ngii el di mle tang er a ta el rak, er sel 14 el kebesengil a Nisan el buil er a Rechijudea. A losiik er tia el sils el kmo ngoingerang, e a Rechijudea a locha milengiil er sel sils er a chesel a ongedei el buil el blo losisiu a klemengetel a llomes me a klebesei. Sel kot el meues el tab el buil el kmeed er tiaikid el taem, a uchelel a buil er tir er a Ni-san. A Baskua a mlo er ngii er a 14 el klebesei er a uriul, er a uriul er a ngeltel a sils.

A Jesus a mlengedaol er a Baskua ngii me a rechapostol er ngii, e a uriul e ngdilul er a Judas Iskariot me ngmerael, e mlo-chu mechelii a Chedaol el Blsoil er a Rubak. Tia el blsoil a miltechir sel Baskua er a Rechijudea a uchul me ngkirel el ruoll el di tang er a ta el rak.

A Evangkelio er a Matteus a kmo: "A Jesus a ngiluu a blauang, e meltelat e rukemii, e milsterir ar Ubengkel e dmu el kmo, 'Mnguu e mongang; tia bedengek.' E ngiluu a kob, e oldanges e milsterir e dmu el kmo, 'Molim er tial kob, kemiu el rokui; e tia rsechek, el rasech era beches el telbiil, el mo moitel el kirir ar betok el kirel a chitel a klengit.'"—Matteus 26:26-28.

A rebibil a oumerang el kmo a Jesus a milult aike el blauang el mo mera el techel a bedengel me aike el bilong el mo mera el rsechel. Engdi a bedengel a Jesus a dirk mle cherrungel el lu-luusbech er a taem el lorous aike el blauang. A rechapostol er a Jesus te mera el milengang a techel a bedengel e melim a rsechel? Ngdiak, e le leuaisei e te menga er a rechad me tomtok a llechul a Dios. (Genesis 9:3, 4; Levitikus 17:10) A doltirakl er a Lukas 22:20, e a Jesus a kmo: "Tial kob a beches el telbiil el krellii el oeak a rsechek, el mo moitel el kiriu." Sel kob ngmera el mlo "beches el telbiil"? Ngdiak, e le telbiil a kengei el meketmocl er a delongelir a rechad, el diak el tekoi el sebeched el omes er ngii.

Aike el blauang me a bilong a di okesiul a tekoi. Sel blauang a okesiul a cherrungel el bedengel a Kristus. A Jesus a uluusbech

a blauang el mle derengel aike el luluusbech el kirel a blengur er a Baskua, el ngii a lurruul el diak a omkukel me a ongemim er ngii. (Exodus 12:8) A Biblia a blechoel el ousbech a ongemim el omtechei a klengit me a chelebirukel. Me sel blauang a ulemtechei er a cherrungel el bedengel a Jesus el mlo metenget el dimlak a klengit er ngii.—Matteus 16:11, 12; 1 Korinth 5:6, 7; 1 Petrus 2:22; 1 Johanes 2:1, 2.

Sel bekerekard el bilong a omtechei a rsechel a Jesus. A rasech a millisiich er a beches el telbiil. A Jesus a dilu el kmo a rsechel a mloitel el kirel a “chitel a klengit.” Seikid e a rechad a sebechir el mo klikiid er a osengel a Dios e mo soiseb er a chelsel a beches el telbiil el obengkel. (Hebru 9:14; 10:16, 17) Tia el telbiil me a lechub e ngkontrat a rullii el mo sebechir a re 144,000 el blak a rengir el Kristiano el mo er a eanged. Ngar er isei e te mo mesiou el ua king e prist el kirel a klengeltengat el mo er a klechad el rokir.—Genesis 22:18; Jeremia 31:31-33; 1 Petrus 2:9; Chocholt 5:9, 10; 14:1-3.

Te rua techang a sebechir el melim e mengang aika el klekedall er a Chedaol el Blsoil? Ngdi tirke el ngar er a chelsel a beches el telbiil, el oba omelatk el mo er a eanged. A oureor el klisichel a Dios a rulleterir el mo medengei el kmo te mla mengilt el mo bebil er a reking el ngar er a eanged. (Rom 8:16) Te dirrek el mo er a chelsel a telbiil el kirel a Renged el obengkel a Jesus.—Lukas 22:29.

E kuk mekerang tirke el omeltkir a mo kiei el diak a ulebengelel el ngar er a Paradis el chutem? Te olengesenges er a llach el ledillii a Jesus e mo er a Chedaol el Blsoil er a Rubak, e ngdi te di mong el mo omes e olecholt a omengull er tir, e ngdi ngdiak longang me a ka lolim a klekedall er a Chedaol el Blsoil. Ngta er a ta el rak er a uriul er a ngeltel a sils er a Nisan 14, e a Resioning er a Jehovah a mengedaol er a Chedaol el Blsoil el kirel a Rubak. Alta te di tela el telael el meliuekl er a beluulechad a kmo te oba omelatk el mo er a eanged, engdi a omengetmeklel tia el sils a kmal klou a ultutelel el mo er a rokui el Kristiano. Ngsils el rokui el chad a sebechir el mo melebedebek er sel klou el ochotel a bltkil a rengul a Jehovah el Dios me a Jesus Kristus.—Johanes 3:16.

## Ngngar er Ngii a Kmung Ngerang el Tuobed er a Bedenged—E Melemolem el Ngar er a Uriul er a Kodall?

---

TE BETOK a oumerang el kmo ngngar er ngii a kmung ngerang el diak el meues me a diak el mad el ngar er a chelsed. Tomdasu el kmo sel lemad a chad e ngtuobed er a bedengel e melemolem el ngar. Tia el klaumerang a mla oberk, a uchul me te betok a mechas a rengrir el mo medengei el kmo ngkmal diak el losisechakl er a Biblia. Me ngngera ngolisechakl a Biblia el kirel?

### TEKOI EL *NE'PHESH* ME A *PSY-KHE'* EL NGAR ER A BIBLIA

Ke locha dirk melatk el kmo a Biblia a mle kot el meluches el ngar er a omelekoi er a Hebru me a Grik. Me sel loluches el kirel a klengar, e a remilluches er a Biblia a uluusbech er a tekoi er a Hebru el *ne'phesh* me a lechub a tekoi er a Grik el *psy-khe'*. Aika el teblo el tekoi a debetik el kuk betok er a 800 el taem er a chsel a Biblia. Sel morriter a usbechel aika el kot el omelekoi el ngar er a Biblia, e ngmo bleketakl el kmo aika el tekoi a luluusbech el melutk el mo er a (1) rechad, (2) charm, me a lechub (3) a klengar er a chad me a lechub e ngcharm. Ka me bo dorriter a bebil er a bades el lolecholt aika el kldei el kakerous el usbechel aika el tekoi.

**Rechad.** Ngar er a taem er 'a Noah ra irechar, e te di mlosobel ra ralm ar di mle teai [*psy-khe'* el tekoi er a Grik] el mlo ngmasech er ngiil arhe.' (1 Petrus 3:20) Ngar er tiang e ngbleketakl a tekoi er a Grik el *psy-khe'* el melutk er a rechad, el Noah me a bechil me a retedei el ngelekel el sechal, me a rebecherir. Ngar er a Exodus 16:16 e ngmesaod el kirel a ulekrael el mo er a rengalek er a Israel el kirel a omengudel el manna. Ngmildung el mo er tir el kmo: "Ma dertal chad a ngmai a ildisel a ikel lousbech a rokui el chad [*ne'phesh* el tekoi er a Hebru] el ngar a tento er ngii." Me a ildisel a manna el lulengudel a mle ultuil er a ildisir a rechad el mla er a derta el telungalek.



**Charm.** Ngar er a cheldechoduch er a Biblia el kirel a taem el lomeob a Dios, e kede menguiu el kmo: “Ma Dios a dilu el kmo, ‘Le bor ngii er a daob ma ralm a bek el bedengel outeliil el bleob, ma suebek el charm bo lesebek er a melidiul,’ me ng mlo ua isei. Ma Dios a dilu el kmo, ‘Le bor ngii er a chutem a rokui el bedengel a turturk el charm ma rokui el bedengel a meklou ma mekekerel tebelik el charm,’ me ng mlo ua isei.” (Genesis 1:20, 24) Ngar er aika el bades, e a ngikel me a ulekeroul me a tebelik el charm, a rokui el lolutk el kirel a osisiu el tekoi er a Hebru el *ne’phesh*.

**Klengar er a chad.** Sel lebebil e a tekoi er a Hebru el *ne’phesh* me a tekoi er a Grik el *psy·khe’* a melekoi er a klengar er a chad. A Elias a milluluuch el mo er a Jehovah el kmo: “RUBAK el Dios er ngak, moltii a klengar [*ne’phesh* el tekoi er a Hebru] er ngikal ngalek.” (1 King 17:21) Ka dirrek el molatk a tekingel a Jesus el kmo: “Ngak a ungil klekar. A ungil klekar a mengkengkii a klengar [*psy·khe’* el tekoi er a Grik] er ngii el kirel a sib.” (Johanes 10:11) Ngar er aika el bades, e a tekoi er a Hebru el *ne’phesh* me a tekoi er a Grik el *psy·khe’* a bleketakl el melekoi el kirel a klengar er a rechad.

Omesubem er a Tekingel a Dios el lmuut el mo smesei a mo ochotii er kau el kmo ngdiak el sebechem el metik er a ngii di el ker er a chesel a usbechel a tekoi er a Hebru el *ne’phesh* me a tekoi er a Grik el *psy·khe’* el melutk el kirel a kmung ngerang el tuobed er a bedengel a chad er a uriul er a lemad.

### TEKOI EL *RU’ACH* ME A *PNEU’MA* EL NGAR ER A CHESEL A BIBLIA

A tekoi er a Hebru el *ru’ach* me a tekoi er a Grik el *pneu’ma* a blechoel el moiuid el mo “reng” el ngar er a Biblia el tekoi er a Belau. Engdi a Biblia ngolecholt el kmo ngngera mera el belkul aika el tekoi? A Psalm 104:29 a kmo: “[A Jehovah] sel loreked a telil [*ru’ach*] e ng mad, e lmuut el mor a chutem el le mlengai er ngii.” A Jakobus 2:26 a kmo: “Ma chelechad el diak a reng [*pneu’ma*] er ngii a ulekoad.” Ngar er aika el

bades, e a tekoi el *ru'ach* me a *pneu'ma* a dul melutk er a kla-lo el omekngar er a bedengel a chad. A lak tia el klisiich e a bedengel a chad a ulekoad. Me nngngar er a Biblia, e a tekoi el *ru'ach* me a lechub a *pneu'ma* a melemalt a oidel a ledu el kmo ngklisiich me a lechub e ngklisichel a klengar. El ua ti-ang, a Dios er a loleko el kirel a ieleb er a taem er a Noah e ngdilu el kmo: "Ak mo odureklii a eeleb el mor a chutem el mo olekngemed a rokui el outeliil [*ru'ach*]." (Genesis 6:17) Me a *ru'ach* a melutk er a diak el meues el klisichel a klengar el ngar er a rokui el chad me a charm.

A bedenged a ousbech er a klisichel a klengar el ua razio el ousbech a dengki me ngmo oureor. Ka molebedebek er a ra-zio el ousbech a dentsi. Sel mosiseb a dentsi e morolii, e a dengki el ngar er a chelsel aike el dentsi a ua lerellii tia el razio el mo ngar. Engdi a lak a dentsi e ngii el razio a ulekoad. Me a bek el razio me ngdirrek el uaisei el lak a dengki el mo er ngii e ngulekoad. Me ngdi osisiu, a *ru'ach* me a lechub a *pneu'ma*, a sel klisiich el omekngar a bedenged. Me ngua dengki, e a klisichel a klengar a diak lomelechiesiu me a ka lomdasu. E a lak tia el klisiich, e a bedenged a "lmuut el mor a chutem el le mlengai er ngii" el ua loleko a milluches er a Psalm.

A loleko el kirel a kodellel a chad, e a babier er a Olise-chakl 12:7 a kmo: "A bedenged a mo moluut el mor a chebechab er a chutem, ma telil [*ru'ach*] a klengar a lmuut el mor a Dios, el ngikel milskid." Me a klisichel a

klengar, a ltobed er a bedenged, e a bedenged a mad e lmuut el mo er a lemle-ngai er ngii el chebechab. E ngar er a osisiu el blekera-del e a klisichel a klengar er kid a moluut el mo er ngike el lemlengai er ngii el Dios.



(Job 34:14, 15; Psalm 36:9) Tia diak el belkul a kmo a klisichel a klengar er kid a tuobed e merael el mo er a eanged. Ngbai belkul a kmo a ngii di el omeltkel a chad el mlad er a ngar er a medal el klebesei a ultuil er a Jehovah el Dios. E le ngdi oak a klisichel a Dios e a klisichel a klengar er a chad a sebechel el moluut el mo er ngii me ngmuut el me ngar.

Ngkmal mo mechelaod a rengud sel bo dodengei el kmo tiaikid a bo loruul er ngii a Dios el mo er a rokui el olengull el ngar er a “debull.” (Johanes 5:28, 29) Sel taem er a okiis, e a Jehovah a lmuut el mo meob a beches el bedengir a rechad e mo msa klisichel a klengar me ngmo ngar. Ngulterekokl el kmal mo klou el deurreng a mo er ngii er isei el taem!

## Ngngerang a Sheol me a Hades?

---

NGAR er aike el kot el omelekoi el luluusbech er a omelechesel, e a Biblia a uluusbech er a tekoi er a Hebru el *she'ohl'* me a tekoi er a Grik el *hai'des* el kuk betok er a 70 el taem. Aika el teblo el tekoi a dul ngar er ngii a deleuill er ngii me a kodall. A bebil er a oidel a Biblia a oleiuid aika el tekoi el “debull,” “beluu er a ngau,” me a lechub e ng “kliokl.” Engdi, ngngar er a oumesingd el omelekoi e ngdiak a tekoi el kmal osisiu a belkul ngii me aika el tekoi er a Hebru me a Grik. Sei a uchul me a *New World Translation* a di ousbech aika el tekoi el “Sheol” me a “Hades.” Engdi a Chuodel el Testament el tekoi er a Belau a oleiuid er a Sheol el mo “beluu er a kodall” me a lechub e ng “belurir a remla mad.” Engdi aika ngngera mera el belkul? Ka me bo domes a usbechel er a kakerous el bades er a Biblia.

A Olisechakl 9:10 a kmo: “Ng diak le bor ngii a ureor ma uldasu ma lechub e ng klemedengei ma lechub e le llomese-rreng er a beluu er a kodall el kau a mor ngii.” Tiang belkul a kmo a Sheol ngmelekoi el kirel a ulterekokl me a lechub e ngderta el debull el ngar er a olekull el dedilekkelterir a rebe-

tik er a rengud er ngii? Ngdiak. E le Biblia sel lolekoi a derta el debull me a lechub e ngolekkellir a rechad e ngousbech a kuk ngodech el tekoi er a Hebru me a Grik el kirel, el diak lousbech er a *she'ohl'* me a *hai'des*. (Genesis 23:7-9; Matteus 28:1) Ngdirrek el diak lousbech er a tekoi el "Sheol" el kirel a debull el betok el chad a medakl er ngii, el ua aike el olekkellel a ta el telungalek me a lechub e te betok el chad. —Genesis 49:30, 31.

Me a "Sheol" ngmelutk el mo er a ua ngera el basio? A Tekingel a Dios a olecholt el kmo a "Sheol" me a lechub a "Hades," a melutk el mo er a tekoi el kuk klou er a di olekkellir a rebetok el chad. El ua tiang, a Isaia 5:14 a melekoi el kirel a beluu er a kodall el kmo: "Nglai a chesmerel." Me alta belurir a remla mad a mla merekekelterir a rebetok el mla mad, engdi ngdirkak bo el ungilbesul er a rengul a ildisir a rechad el mla soiseb er a chesl. (Osisechakl 30:15, 16) Me ngdiak losisiu ngii me a debull el bo lemedakl er ngii a rulekoad el di klebechel a ildisir a sebechir el mo medakl er ngii, e le "belurir a re mla mad el dirk mengiil er a re mad el chad." (Osisechakl 27:20) A belurir a remla mad a diak el bo el meseked me a diak a telkael er a ildois el mo er ngii. Me tia el Sheol me a lechub e ng Hades, el loleiuid er ngii el "belurir a re mla mad" a diak el ulterekokl el basio el ngar er a kmung ker. Ngbai di tekoi el omtechei er a debellel a klechad el ngar er ngii a ruumesingd el chad el mechiuaiu er a kodall.

A osisecheklel a Biblia el kirel a okisir a rulekoad a ngosukid el Imuut el ngmai a betok el klemedengei el kirel a belkul aika el tekoi el "Sheol" me a "Hades." A Tekingel a Dios a blechoel el mesaod er a Sheol me a Hades el lobengkel a kodall el ngar er ngii a omelatk er a okiis el kirel.\* (Job 14:13; Rellir 2:31; Chocholt 20:13) Ngdirrek el olecholt

---

\* Ngdi tirke el ulekoat el diak el bo el bekiis a losaod er tir el diak el ngar er a "belurir a re mla mad," el ka lengar er a Sheol, me a ka lengar er a Hades, e te bai ngar er a "Gehenna." (Matteus 5:30; 10:28; 23:33) Engdi ngua Sheol me a Hades, a Gehenna a di belkul a tekoi el diak el mera el basio el bo er ngii a rulekoad.

el kmo tirke el ngar er a “belurir a re mla mad,” Sheol me a lechub a Hades, a diak di el tirke el milsiou er a Jehovah e ngdirrek el betok er tir a dimlak losiou er ngii. (Genesis 37:35; Psalm 55:15) Me a Biblia a olisechakl el kmo ngmo er ngii a “chokiis rar melemalt mar diak le melemalt.”—Rellir 24:15.

## **Ngngerang a Sils er a Kerrekeriil?**

NGUA ngerang a osengem el kirel a Sils er a Kerrekeriil? Te betok a omdasu el kmo a rebetok el biliol el chad a mo kaundersta er tir el mo er a medal a kingellel a Dios. Ngar isei e a derta me a derta er tir a mukerrekeriil. A rebebil a mukngeltengat er a deurreng el ngar er a eanged, e a rebebil a mo medebeakl el mo er a diak a ulebengelel el ringel. Engdi, a Biblia a meskid a kuk ngodech el osenged el kirel tia el taem. A Tekingel a Dios a ouchais er kid el kmo tia diak el meringel el taem, e ngbai taem er a omelatk me a smechel a klechad el lmuut el mo er a chelerrungel.

Ngar er a Chocholt 20:11, 12 e kede menguiu er a omesodel a apostol el Johanes el kirel a Sils er a Kerrekeriil el kmo: “Ak dirrek el milsa kloul becheleleul kingall me ngikal dengchokl er ngii; e a chutem ma eanged a chiliis er medal, e mlo diak le betik a le bor ngii. E dirrek el milseterir tirikel mla mad el meklou mar mekekerei el dul dechor er medal a kingall, e ulebkais a betok el babier. Ma lmuut el tara babier me ngulebkais, el ngii a babier ra klengar. Mar mla mad a mlukerrekeriil el oltirakl a ikel llechukl er iaikal babier el kirel chomerellir.” Ngtecha ngika el Chad er a Kerrekeriil el lolekoi er ngii?

A Jehovah el Dios ngii ngike el kot el ngarbab el Chad er a Kerrekeriil el kirir a rechad. Engdi, tia el lureor el loukerrekeriil a bla loterekeklii er a ta er a chad. A doltirakl er a Rellir 17:31 e a apostol el Paulus a kmo: “Ele Dios a mla oterekeklii

a sils el kirel a bo loba llemalt loukerrekeriil er tial belulechad el uleltaut er tial tekoi loeak ngii el le ngileltii.” Ngii el mlengilt el mo Chad er a Kerrekeriil a ngike el mlokiis el Jesus Kristus. (Johanes 5:22) Engdi ngoingerang e a Sils er a Kerrekeriil a omuchel e ua klemengetel a ngerang?

A babier er a Chocholt a olecholt el kmo a Sils er a Kerrekeriil a omuchel er a uriul er a mekemad er a Armageddon, er sel bla el metemall tia el blekeradel er a Satan el ngar tia el beluulechad.\* (Chocholt 16:14, 16; 19:19–20:3) Uriul er a Armageddon e a Satan me a remekngit el anghel er ngii a mo mekelebus er a chysel a diak a btil el deliobech el kirel a ta el telael el rak. Ngar iseikid el taem, e a 144,000 el chad a mo chad er a kerrekeriil el “obengkel a Kristus el mengededer el . . . tal telael rak.” (Chocholt 14:1-3; 20:1-4; Rom 8:17) Me a Sils er a Kerrekeriil a diak el kora tekoi el di mereched el mo merek er a chysel a 24 el sikang. Ngbai ta el telael el rak a klemengetel.

Ngar er a chysel seikid el ta el telael el rak, e a Jesus Kristus a kirel “loukerrekeriil rar dingar mar mla mad.” (2 Timoteus 4:1) ‘Ar dingar’ a melutk el kirel a “kloul seked” el suobel er a Armageddon. (Chocholt 7:9-17) A apostol el Johanes a dirrek el milesterir “tirikel mla mad . . . el dechor er medal a kingall” er a kerrekeriil. Me ngdi ua aike el tilib a Jesus el kmo: “A sikang a mei el bo lorrenge ra ngerel [a Kristus] tirikel rokui el ngara debull, me te tuobed.” (Johanes 5:28, 29; Rellir 24:15) Engdi te mo mukerrekeriil el kirel a ngerang?

A doltirakl er a ues el mlo er a Johanes e ngulebkais a betok el iluil el babier, “mar mla mad a mlukerrekeriil el oltirakl a ikel llechukl er iaikal babier el kirel chomerellir.” Aika el iluil el babier ngmle llechukl er ngii a omerellir a rechad er a uchei er a lemad? Ngdiak, e le kerrekeriil a diak el bo el kirel a tekoi el lurrul a rechad er a uchei er a lemad. Kede mekerang e medengelii tiang? E le Biblia a kmo: “Le

---

\* Kirel a omesodel a Armageddon, e momes er a *Insight on the Scriptures*, Volume 1, er a 594-5 me a 1037-8 el llel, el di tekoi er a Merikel el rirellii a Resioning er a Jehovah.

ngikel mla mad a mla mengubet er a klengit.” (Rom 6:7) Me tirke el mo mekiis a kmal klikiid a babier er tir. Me aike el iluil el babier a locha ngar er ngii er ngii aike el soal a Dios a bo loruul er isei el taem. Me a bo el kiei el mo cherechar, e tirke el silobel er a Armageddon me a remilekiis a dul kirir el mo olengesenges a llechul a Dios, el uldimukl er ngii a ngii di el ngerang el beches el llach el Jehovah a mo olecholt er tir er a chelsel isei el ta el telael el rak. Me seikid e a rechad a mo mukerkeriil el oltirakl aike el tekoi el bo loruul er a *chelsel* a Sils er a Kerrekeriil.

Me a Sils er a Kerrekeriil a mo mesterir a rebetok el biliol el chad a kot el techellir el mo mesuub a soal a Dios e mo oltirakl. Tia belkul a kmo ngmo er ngii a klou el ureor el kirel a osisechakl me a omesuub er isei el taem. E merang, e le ‘a beluulchad ma re chad er ngii a mo medengei el kmo ng ngera llemalt.’ (Isaia 26:9) Engdi, ngdiak el rokui el chad a mo sorir el mo oltirakl a soal a Dios. A Isaia 26:10 a kmo: “Cho bekokuui el mor a re dengerenger, me tir a di diak bo le meduch el meruul a melemalt. Te ngar tial belurir a re melemalt el chad, e dirrek el di cheleuid omerellir. [Te mo diak lesang] a klengarbab er kau.” Tirka el mekngit el chad a mo mokngemed el diak a ulebengelel er a chelsel a Sils er a Kerrekeriil.—Isaia 65:20.

Ngar er a ulebengelel a Sils er a Kerrekeriil, e tirke el silobel a mocha “ngar” el mecherrungel el chad. (Chocholt 20:5) Me a Sils er a Kerrekeriil a taem el bo lemoluut a klechad el mo er a chelerrungel el blekeradel. (1 Korinth 15:24-28) E seikid e ngmochu er ngii sel ulebongel el skeng. A Satan a mo mekedoked er a kelebsengel e mo meruul er a ulebongel el omengeuid er ngii er a rechad. (Chocholt 20:3, 7-10) Tirke el mo otngeklii a mo sebechir el mo oldeu a rengrir er a cherrengelel a otutel a telbiil el ngar er a Biblia el kmo: “A re melemalt a mo ungilbesrir el kiei er a chelsel a beluu e mo oubeluu er ngii el di blechoel.” (Psalm 37:29) Nguaisei, a Sils er a Kerrekeriil a mo uchul a klengeltengat el kirir a rokui el blak a rengrir el chad!

## 1914—A Klou a Ultutelel el Rak er a Ulaoch er a Biblia

---

NGBETOK el rak er a uchei er ngii, e a rengalek er a skuul er a Biblia a uluuchais el kmo ngmo er ngii a ileakl el te-koi el mo duubech er a rak er a 1914. Aika ngmle ngerang e ngera el tekoi a millutk el mo er a 1914 el kmo ngmle klou a ultutelel el rak?

A doltirakl er a Lukas 21:24, e a Jesus a dilu el kmo: “Ma Jerusalem a mo merderd rar Chisentail, el dimerkmo le bo le mecherrungel a taem rar Chisentail.” A Jerusalem a mle mats er a renged er a Judea, el mle delengcheklir a remo mengedereder er a blil a King el David. (Psalm 48: 1, 2) Engdi tirka el king a mle ileakl er a rebek el king er a beluulechad, e le te mle dengchokl er a “kingall er o-merreder el le kildmeklii a RUBAK” me te ulemtechei er a Dios el mengedereder. (1 Kronika 29:23) Me a Jerusalem a ulemtechei er a omengederederel a Jehovah.

Ngmekerang e oingerang e a omengederederel a Dios a “merderd rar Chisentail”? Tiang a dilubech er a rak er a 607 B.C.E. er a Jerusalem er a lemengai er a rechad er a Babilon. Seikid e a “kingall er omerreder el le kildmeklii a RUBAK” a mlo bechachau, me a kleking el oeak a uldidellel a rasech er a David a meldeb. (2 King 25:1-26) Tia el ‘omerderd’ ngdi melelem el diak a ulebengelel? Ngdiak, e le ulochel a Esekiel el kirel ngike el mlo ulebongel el king er a Jerusalem el Sedekia a kmo: “Bedobed a lechetel a bdelum ma krone er kau. . . . el dimerkmo le mei ngikel kirel el oungerachel, e ak mo msang.” (Esekiel 21:26, 27) E “ngikel kirel el oungerachel” er a krone er a David er a omengedereder a Kristus Jesus. (Lukas 1:32, 33) Me a ‘omerderd’ a di mo tmurk er sel bo el King a Jesus.

Oingerang e tia el klou a ultutelel el tekoi a duubech? A Jesus a ulehotii el kmo a Rechisentael a mo mengedereder el kirel a ulterekokl a telkelel el taem. E a tekoi el



Ilechukl er a Daniel er a 4 el Bliongel a ochotii er kid a rolet e kede mo medengei el kmo sel taem ngmo ua klemengetel a ngerang. Ngouchais el kirel a ulaoch el lulemerrous er ngii a King el Nebukadnesar er a Babilon. Ngar er ngii el berrous e ngmilsa kmal klou e metongakl el kerrekar el miltuk. E a mlo medechel el uchul ngii el kerrekar a mirrenged er a deel me a brons me ngdimlak el sebechel el meloseb a tiul. Ngmle kirel el rrengodel el *“euid el rak.”*—Daniel 4:10-16.

A Biblia sel lebebil e ngousbech a kerrekar el omtechei a omerreder. (Esekiel 17:22-24; 31:2-5) Me sel kerrekar el miltuk a ulemtechei er a blekerdelel a omengederederel a Dios, el mlocholt el uleak a reking er a Jerusalem, a bo lemeterob el mengederederer. Engdi sel ues a mileketeklii el kmo a ‘omerderd er a Jerusalem’ a di kirel a tedeb el taem,

### “EUID EL [TAEM]”

2,520 el rak

606 1/4 el rak

October 607 B.C.E. el mo er a  
December 31, 1 B.C.E.

1,913 3/4 el rak

January 1, 1 C.E. el mo er a  
October 1914

607

◀ B.C.E. | C.E. ▶

1914

*“[A] Jerusalem a mo merderd rar Chisentail”*

*“[Ng]mei ngikel kirel el oungerachel”*



el di “euid el rak.” Engdi aikang a mle rak er a otutel a ulaoch. Me ngmle ua klemengetel a ngerang ngii el rak?

A Chocholt 12:6, 14 a meketeklii el kmo a edei me a tedobech el rak er a ulaoch a ua klemengetel a “tal telael ma cherul dart ma chokolem el sils.” Me a leuaisei, e a “euid el rak” a eru el taem el chachisois er tiang, me a lechub e ng 2,520 el sils. Engdi a Rechisenta el dimlak el meterob el ‘merderd’ er a omengederederel a Dios er a 2,520 el sils er a uriul er a lemetemall a Jerusalem. Me ngbleketakl el kmo tia el ulaoch a millutk el kirel a lmuut el mle kemandget el taem er a reksi. E a doltirakl er a Ulecherangel 14:34 me a Esekiel 4:6, el dul melekoi el kirel a “tal sils el kirel a tal rak,” e a klemengetel a “euid el rak” er a otutel a ulaoch a 2,520 el rak.

Aike el 2,520 el rak a ulemuchel er a Ongeteruich el Buil er a rak er a 607 B.C.E., er a taem er a rechad er a Babilon a letemellii a Jerusalem e lenguu a king er a klingenelakel er a David el oridii er a kingall. Ngii el taem a mlo merekui er a Ongeteruich el Buil er a rak er a 1914. Seikid el taem, e a “taem rar Chisentail” a mlo merek e a Jesus a mildalem el mo King er a Dios el ngar er a eanged.\*—Psalm 2:1-6; Daniel 7:13, 14.

Me ngua lulemlaoch a Jesus, sel be lduum el ua King el ngar er a eanged e ngmo er ngii a betok el tekoi el mo duubech er a beluulechad el mo olengchelel, el ua mekemad, bosech, desiu, me a bekoieuiul el rakt. (Matteus 24:3-8; Lukas 21:11) Ngii el tekoi a mesisiich el olechotel a klemerang er tia el kmo sera rak er a 1914 e a Rengedel a Dios a mlo omuchel el mengedereder el ngar er a eanged, me a “ikel uriul sils ra belulechad” a ulemuchel.—2 Timoteus 3:1-5.

---

\* Ngar er a Ongeteruich el Buil er a 607 B.C.E. el mo er a Ongeteruich el Buil er a 1 B.C.E. e ngngar er ngii a 606 el rak. E diak a zero el rak, me ngngar er a Ongeteruich el Buil er a 1 B.C.E. el mo er a Ongeteruich el Buil er a 1914 C.E. e ngngar er ngii a 1,914 el rak. Me a omodekiar a 606 el rak er a 1,914 el rak, e ke nguu a uldekial a 2,520 el rak.

## Ngtecha Mihael el Bderrir a Rechanghel?

---

NGIKE el anghel el okedongall el Mihael a diak el blechoel el losaod el kirel el ngar er a Biblia. Engdi, sel ta el losaod el kirel e ngblechoel el ngar er ngii a tekoï el loruul er ngii. Ngar er a babier er a Daniel, e a Mihael a oldechelakl er a remekngit el anghel, e a babier er a Judas e ngkautok ngii me a Satan, e a lengar er a Chocholt e ngoumekemad er a Diabelong me a remekngit el anghel er ngii. Me a losebechakl er a omengederederel a Jehovah el okeuad er a recherrouel a Dios, e ngika el Mihael a kmal loltaut er a belkul a ngklel el kmo: “Ngtecha ua Dios?” Engdi ngtecha Mihael?

Sel lebebil, e te ngar er ngii a rechad el dodengelterir er a betok el ngklir. El ua tiang, a Jakob a dirrek el ble lodengeliï a ta er a ngklel el Israel, me a apostol el Petrus a dirrek el mle Simon. (Genesis 49:1, 2; Matteus 10:2) Me ngosisiu, a Biblia a ochotii el kmo a Mihael a ta er a ngklel a Jesus Kristus, el luluusbech er ngii er a uchei me a uriul er a klengar er ngii er tia el chutem. Ka me bo domes a bebil er a tekoï el medung er a Bades el ngosukid el mo omdasu el uaisei.

***Bderrir A Rechanghel.*** A Tekingel a Dios a omekedong er a Mihael el “bderrir ar anghel.” (Judas 9) Mutebengii a bades sel du el kmo a ‘bderrir a rechanghel’ el lolecholt el kmo ngika di chimong el anghel el uaisei, me tia el tekoï el “bderrir ar anghel” sel debetik er ngii er a Biblia e ngdi blechoel el di melekoi er a ta el chelechad, el diak a ta el taem el bo lolekoi el kirir a rebetok. Me a lmuut el tang, a Jesus a blechoel el losaod er ngii el ngar er tia el deruchall. Me a losaod el kirel a mlukiis el Rubak er kid el Jesus Kristus, e a 1 Thesalonika 4:16 a kmo: “Le Rubak a ngii a ngara eanged el me metengel loba kedul, ma ngor ra bderrir ar anghel.” Me a ngerel a Jesus a losaod er ngii el kmo ngua ngerel a bderrir a rechanghel. Me tia el bades a olecholt el kmo a Jesus ngii ngike el bderrir a rechanghel el Mihael.

***Mengeteklel a Urrurt.*** A Biblia a kmo: “Mihael mar anghel er ngii a uluumekemad ra dragon . . . mar anghel er ngii.” (Chocholt 12:7) Me seikid, e a Mihael a Mengeteklir a urrurt er a reblak a rengrir el anghel. A babier er a Chocholt a dirrek el

mesaod er a Jesus el ua Mengeteklel a urruert er a resoldau er a reblak a rengrir el anghel. (Chocholt 19:14-16) A apostol el Paulus a ileakl el melekoi el kirel a Rubak el Jesus me a re “ngarngii a klisichir el anghel.” (2 Thesalonika 1:7) Me seikid, e a Biblia a dul melekoi el kirel a Mihael me “ar anghel er ngii” me a Jesus me “ar anghel er ngii.” (Matteus 13:41; 16:27; 24:31; 1 Petrus 3:22) Me a Tekingel a Dios a diak lolekoi el kirel a teblo el urruert er a reblak a rengrir el anghel el ngar er a eanged, el tang a obengkel a Mihael me a tang a obengkel a Jesus, a uchul e kede oumerang el kmo a Mihael a melutk er a Jesus Kristus sel lengar er a deruchellel er a eanged.

## A “Kloul Babilon” a Obeketaki

---

A BABIER er a Chocholt a ngar er ngii a betok el omesodel a tekoi el kired el mo medengei el kmo ngera ngomtechei. El ua tiang, ngmelekoi el kirel a ta el redil el llechukl a ngakl el “Kloul Babilon” er a medal a bdelul. Ngika el redil a lolekoi el kmo ngdengchokl er a bebul a “seked, ma renged.” (Chocholt 17:1, 5, 15) Ngdiak a mera el chad el redil el sebechel el meruul er tiang, a uchul e a Kloul Babilon a ngar er ngii a lomtechei er ngii. Me a leuaisei, e ngika el okesiu el tingaol el dil ngomtechei a ngerang?

Ngar er a Chocholt 17:18, e ngika el osisiu el redil a losaod el kirel el kmo, “ngii a sel kloul mats el mengedereder rar king ra belulechad.” A tekoi el “mats” a olecholt er a uleketmokl el cheldebechel er a rechad. Me tia el “kloul mats” el mengedereder “rar king ra belulechad” a uchul me ngika el redil el ngklel a Kloul Babilon a locha mla er ngii a klou el klisichel el cheldebechel er a beluulechad. Me ngebechel el okedongall el cheldebechel er a beluulechad el rokir. Engdi ngua ngerang el cheldebechel? Ngcheldebechel er a klechelid. Ka mutab a bebil er a tekoi el lolekoi a babier er a Chocholt el sebechel el rullid el mo omdasu er tiang.

A cheldebechel a sebechel el kirel a balatiks, siobai, me a lechub e ngklechelid. E ngike el redil el ngklel a Kloul Babilon a diak el cheldebechel er a balatiks e le Tekingel a Dios a melekoi el kmo

“ar king ra belulechad” me a lechub a chelechad er a balatiks er a beluulechad “a mlora deleboes tir me ngiil redil.” A deleboes el lorruul er ngii a melekoel el kirel a deleuill el bla el rruul el lobengterir a remerreder er tia el beluulechad, misei a uchul me ngokedongall el “tingaol dil.”—Chocholt 17:1, 2; Jakobus 4:4.

A Kloul Babilon a diak el sebechel el cheldebechel er a re “ngara belulechad el mengereker,” el omtechei er a chelechad er a siobai, e le te mo lmangel el meknig it a rengrir sel lemetemall. A reking me a rechad er a siobai a losaad er tir el “dechorecheroi” e omes er a Kloul Babilon. (Chocholt 18:3, 9, 10, 15-17) Sei a uchul me ngoeak a ungil el urebetellel a omesaod sel dolekoel el kmo a Kloul Babilon a diak el cheldellel a balatiks me a ka lesiobai, e ngbai cheldellel a klechelid er a beluulechad el rokir.

A olengchelel a Kloul Babilon el ua klechelid a lmuut el mengal obeketakl el oak a tekoi el kmo ngmengeuid a bek el rengel el oak a ‘choleiuul.’ (Chocholt 18:23) Me seikid el rokui el bedengel a tekoi er a olai a chelsechusem er a tekoi er a klechelid me a remekngit el anghel, e ngdiak el mechas a rengud er a Biblia a lomekedong er a Kloul Babilon el “delengcheklel a meknig it el [anghel].” (Chocholt 18:2; Duteronomi 18:10-12) Tia el cheldebechel a losaad er ngii el kmo ngomtok er a mera el klechelid, e omekcharm er “ar profet mar mechedaol.” (Chocholt 18:24) A Kloul Babilon a mera el imis el ouketui er a mera el klechelid me ngmringel el loldechelakl e omekoad er “ar ucholt ra Jesus.” (Chocholt 17:6) Me ngika el redil el ngklel a Kloul Babilon a bleketakl el omtechei a cheldellel a klsuul el klechelid er a beluulechad el rokir, el uldimukl er ngii a rokui el klechelid el omtok er a Jehovah el Dios.

## **A Jesus Ngmilechell er a Ongeteruich me a Ongeru el Buil?**

---

A BIBLIA a diak el louchais er kid el kmo a Jesus ngmilechell er a oingerang. Engdi ngmeskid a ungil el uchul e ngsebeched el oumerang el kmo a cherellel a dimlak el ngar er a Ongeteruich me a Ongeru el Buil.

Ka molatk er a blekerdelel a eanged er seikid el taem er a rak er a chsel a Bethlehem, el lemlechell er ngii a Jesus. A buil er a Rechi-judea el Chislev (osisiu ngii me a November/December) a kmal mle mekekolt e klou a chull er ngii. E a buil er a uriul er isei a mle Tebeth (December/January). Tiaikid sel buil el kot el mle mekekolt er a chsel a ta el rak, el lebebil e ngmo er ngii a yuki er aike el mekedidai el basio. Ka me domes el kmo ngera ngouchais er kid a Biblia el kirel a blekerdelel a eanged er sel basio.

A Esra, el ta er a milluches er a Biblia a olecholt el kmo a Chislev a mera el buil el ble lodengelii a rechad el kmo ngmle mekekolt e klou a chull er ngii. Uriul er a louchais el kmo a seked a mlo cheldull er a Jerusalem “er a lluich el kebesengil a ongetiu el buil [Chislev]” e ngdilu el kmo, “a re bek el chad el mlar sei a ulemritel . . . el kmal mle klou a chull” a uchul. Me a lolekoï el kirel a blekerdelel a eanged er seikid el taem er a rak, e tirka el mle kldibel el chad a dilu el kmo: ‘Ngkmal klou a chull, me ng diak el sebecham el dechor er tial di chelelluut el ua itiang.’ (Esra 10:9, 13; Jeremia 36:22) Tiaikid a uchul me a reklekar a charm el kiliei er tia el beluu a mle kerekikl me sel lebo el Ongeteruich me a Ongerung el Buil e ngdimlak a delebechel er tir el di bad er rikl sel leklebesei.

*A Jesus er sera lemlechell e a  
reklekar a charm me a delebechel  
er tir a mla er a ked er a klebesei*



Engdi a Biblia a ouchais el kmo a reklear a charm a mla er a ked el olab a delebechel er tir er a klebesei er a taem er a lemechell a Jesus. E a Lukas el ta er a remilluches er a Biblia er seikid el taem, a millekoi el kmo, ng “mlarngii ar mengkar a charm el ngara ked ra klebesei, el mengkar a delebechel el sib” er a bita er a Bethlehem. (Lukas 2:8-12) Mutebengii tia el kmo a reklear a charm a *milengkar* a delebechel el sib, el dimlak el kora di merorael a lemellomes el merekong. Me a delebechel er tir a lullab el ngar er a ked *er a klebesei*. Chouaisei el tekoi ngmle sebechir el meruul er ngii er a Ongeteruich me a Ongerung el Buil el mle blsechel a kelekolt me a chull er a Bethlehem? Ngulterekokl el diak. Me a blekeradel el mla er ngii er a taem er a cherellel a Jesus a meketeklii el kmo ngdimlak el mechell er a Ongeteruich me a Ongerung el Buil.

A Tekingel a Dios a ouchais er kid er a ulterekokl el taem el lemlad er ngii a Jesus, engdi ngmeskid a kekerei el omesodel a kmo ngmlechell er a oingerang. Tiang a mekkeltkid er a tekoi el ledillii a King el Salomon el kmo: “A ungil chisel a chad a kuk ungil er a mekreos el chilt, me sel sils el le mad er ngii a kuk ungil er sel sils el le mlechell er ngii.” (Olisechakl 7:1) Me ngdiak el mechas a rengud a lsekum a Biblia a ouchais er kid a betok el komakai el tekoi el kirel a urerel me a kodellel a Jesus engdi kmal di mekesai el tekoi a lolekoi el kirel a cherellel.

## Ngkired el Mengull a Chedaol el Sils?

A BIBLIA a diak el uchelel aika el betok el ungil el klebesei er a klechelid el longedaol el meliuekl er a betok el beluu er a beluuechad er a chelecha el sils. Me ngngerang a uchelel aika el ungil el klebesei? A lengar er ngii a techellem el mo er a *Library* el mo omes a babier, e ngmera el mo mechas a rengum a tekoi el lolekoi a betok el babier el kirel a omesodel a chedaol el sils el haeri er a beluam. Ka molatk aika el bebil er ngii.

**Easter.** A *The Encyclopædia Britannica* a kmo: “Ngdiak a olecho-tel a omerellel a ungil el klebesei el kirel a Easter el debetik er ngii er a chelsel a Beches el Testament.” Me ngmilekerang e ulemuchel a omerellel? A risel a mla er a klsuul el omengull. Me alta tia el che-

daol el sils a leko ngkirel a okisel a Jesus, engdi a siukang el kirel a omengedolel a diak el kirir a Rekristiano. A *The Catholic Encyclopedia* a kmo: “Ngbetok el kakerous el siukang er a omengull el outkeu er a lletel a *spring* (taem el lora el mo mekeald a beluu me a dello-mel a meloseb) a merrael el mlo telengtengil a omerellel a Easter er a uriul. A ngais a luluusbech el omtechei a obuu el tane me a uchelel a klengar er a *spring*.”

**Ungil el Klebesei er a Beches el Rak.** A kebesengil me a siukang er a omengetmeklel a Beches el Rak a kakerous er a bek el beluu. A *The World Book Encyclopedia* a mesaod er a uchelel tia el ungil el klebesei el kmo: “A merreder er a Rom el Julius Caesar a ulterekeklii a January 1 el mo Beches el Rak er sera rak er a 46 B.C. A rechad er a Rom a uldersii tia el sils el mo er a Janus, el chelid er a siseball, che-simer, me a uchelel a tekoi. Me a kot el buil a mlungakl el loltirakl er a ngklel a Janus, el mle teblo klidm er ngii el tang a omes el bedul uchei me a tang a omes el bedul uriul.” Me a omengedolel a Beches el Rak a mleuuchel er a siukang er a klsuul el chelid er a ire-char.

**Halloween.** A *The Encyclopedia Americana* a kmo: “A telengtengil a siukang er a omengetmeklel a Halloween a sebeched el metik a uchelel er a ungil el klebesei er a Druid [el kleprist er a Celt] er a uchei er a taem er a Klekristiano. A rechad er a Celt a mirruul a ungil el klebesei el kirel a teblo el meklou el chelid, el chelid el sils me a chelid el kirir a rulekoad . . . , el ungil el klebesei el kirel a lurrul er ngii er a November 1, el mle uchelel a Beches el Rak er tir. E tia el ungil el klebesei el kirir a rulekoad a milekekakil el mlodak er a ungil el klebesei el loruul a Rekristiano.”

**Bebil er a Chedaol el Sils.** Ngdiak el sebeched el di ta e smaod a rokui el ungil el klebesei el longedaol a rechad er a beluulechad el rokir. Me nguaisei, engdi aike el chedaol el sils el mengebkall er a rechad me a lechub a cheldebechel er a klechad a diak el ungil er a osengel a Jehovah. (Jeremia 17:5-7; Rellir 10:25, 26) Molemolem el melatk er tia el kmo, a uchelel a ungil el klebesei el longedaol a klechelid a ngar er ngii a lerellii er a kmo ngodeuir a rengul a Dios me a lechub e ngdiak. (Isaia 52:11; Chocholt 18:4) A omellach er a Biblia el ngar er a 16 el Bliongel a mo ngosukau el mo mesa el kmo ngua ngera osengel a Dios el kirel a bo deteloi er a omengetmeklel a chedaol el sils er tia el beluulechad.



Ngsoam a lmuut el omesodel?

Moluches el mo er a Resioning er a Jehovah er a **www.jw.org**.